

東三省古蹟遺蹟  
續編





昭和二年八月五日印刷  
昭和二年八月十日發行



定價現大洋壹圓

奉天隅田町九番地

編纂者 菊池 貞二

奉天隅田町九番地

發行者 宮川 貫作

奉天隅田町九番地

印刷者 石原庄太郎

奉天隅田町九番地

總發行所 盛京時報社

屋

源

同

調

江兆璠題



望古遙集

于省吾題

## 東三省古蹟遺聞續編序

嘗聞遺墟舊壤、博物者動考古之思、斷碣蕪城、方聞者託遐寄之志、在昔淮南侈八埏之談、鄒生逞九州之辯、雖圖度乎荒裔、而身不出乎戶庭、大而無當、亦奚足稱、夫地之云易、代有不同、立土於乙、非無深意、邱陵原濕之間、可徵桑海、開張謙虛之道、欲包須彌、苟非章亥之周遊、空若盧敖之虛說、亦奚益哉、吾國地志之書、代有作者、大抵載方域之廣狹、山川之渟峙、物產之多寡、風俗之純漓、元和郡縣之志、古蹟頗多、太平寰宇之書、



人物評隲、考黃圖於三輔、宮室巍峨、辯九域於元豐、疆  
理浸廣、凡此諸書、膾炙人口、中原風物、取材不難也、  
若夫提封數千里、而文獻無徵、建省數百年、而引典殊  
少、地勢要衝、襟帶諸夏、有志者固當於繩行沙度之餘、  
爲鈎考參稽之舉也、東省民庶豐昌、物華蒨麗、聲名文  
化、日進旡疆、惟古蹟之替堙、殊難覃乎物始、此邦人  
之恥、而志士之責也、秦漢郡縣以來、遼金定鼎而後、龍  
興虎視、代有其人、挹婁肅慎之故墟、渤海大氏之沿革、  
沃阻之國、沙卑之城、定理之州、東寧之衛、殿曰讓國、

并殘塼敗瓦而無存、宮號東丹、慨成敗興亡於何所、令  
威化鶴已千年、遺庄何在、雪僧注水於一孔、圓石猶完、  
管幼安之故里、誰識爲龍、白仲理之仙鄉、終歸於海、尉  
遲洗馬之泉、無復空湧、仁貴搨戟之水、祇有虛名、跋  
扈人稱蓋蘇、白衣登於安市、扶餘赤玉、元菟貂豹、黃  
龍名府、痛飲何時、花露爲台、姻親奚往、尋上京之城、  
入克薩之界、看花樓之故址、梅韓儼然、寧遠伯之聲威、  
成梁焉在、阿濟漢之花池、依稀可辨、費揚古之芍藥、爛  
漫猶存、斯罕之關、何嘗峻險、鴻臚之井、久失清冷、蕭

后梳妝之樓、賀欽釣魚之台、莫不級夷藩拔、旁風上雨、若夫五雲之樓、重明之殿、雲錦之閣、臨漪之亭、皆所謂荒烟蔓草之中、有信史數千萬言者也、長白之峰、天池浩瀚、黑水之部、疆宇縱橫、烏蘇鬱其駭浪、鴨綠弄其晴漪、醫閭北鎮、九阡導帝而何從、千華南峙、百里飛青而不斷、古蹟鬱而未發、搜尋須得其人、筆之於書、皆爲臥遊者也、

盛京時報、以臚言載筆之暇、爲勃窣婆跚之訪、名曰東三省古蹟遺聞、正集旣已殺青、續編又傳副墨、繼式濟龍沙之遊、而軒然有作、學嶺南風

土之記、而織屑靡遺、圖經地志、遺俗流風、一一可考、  
萬萬稱嘉、山川城郭之逶迤、邱陵宮室之遷變、王霸人物  
之興替、衣冠文獻之足徵、陳迹故事、不厭荒唐、小說  
稗官、不妨節取、河朔訪古之記、輝映後先、江城名蹟之  
書、合符同揆、事蹟編類、何必六朝、志乘之基、補於  
三省、夢梁夢華、無此浩博、叢笑叢談、遜茲明備、吾  
知其風行一時、日進無疆也、所望讀是書者、以他山之  
石、爲吾邦之錯、家珍能數、祖典勿忘、研覽靡有所窮、  
低徊莫能自己、方將袖禹貢之圖、授職方之志、恢張光



大、寶愛撫摩、延覽恣其冥搜、濟勝已有其具、  
野、括地成圖、此編正其椎輪大輅也、  
體國經

東北大學教授

陶明濬拜序

## 序言

歷史者已往之陳迹也其所記載無非典章制度及一切事蹟而已曷爲而爲後人所重視以其爲文獻也所以聲名文物之邦國有史縣有志野有乘稽古者一經披覽巨細畢張惟東三省則志乘闕如已往之事跡邈焉而無可考長此以往則歷年愈久跡愈晦而聞愈寡有志之士縱欲爲有條理之編纂苦於茲事體大非數人十數人之心思耳目所能賅况際此人欲橫流之會更無人擔荷仔肩故本社於甲子歲徵集東三省古蹟遺聞併金息侯先生所著之奉天古蹟考彙爲一編以行世嗣

又賡續徵求除沙汰外所得稿件逾於疇昔雖其中不無道聽塗說之弊要足以補前編所未備後之覽者或亦足資依據歟

民國十六年三月三日編者識

## 編輯大意

- 一 本編仍以東三省各道屬縣分爲先後次序凡無記載者縣名從畧
- 一 本編悉如前編不分門類然序次之大要則爲地方沿革古代城郭名勝風景山川橋梁寺廟神佛院宇亭閣塔碑古物器皿名人手蹟墳墓等項其有類於神話者均殿於後
- 一 本編序次雖如上述但有相連屬者間或不按上項次序閱者諒之
- 一 本編所載有爲本報所未會刊錄者或會見本報編輯時認爲無足重輕則廢棄之標題互異事實則一者合併之惠稿諸君務請見諒
- 一 條文中右謂距某縣若干里實則已非某縣所屬或方向誤者錯凡可按地圖考証均加附言
- 一 惠稿人姓名均仍一一揭於條文之上以重言責
- 一 來稿中有屬蒙旗者不能分縣記載故併入附錄



# 目錄

## ●奉天省

### ○瀋陽縣

△奉

天

△瀋

陽

△高麗館遺址

△望

東

京

△營城及大台

△石經幢

△養

馬

圈

△道光駐蹕地

△得勝營

△二

台

子

△九連洞

△古邊

△犀

牛望月

△宮殿羣鴉

△大溝

△鳳

臺

山

△龍虎山一名塔山

△灰山

△御

泥

河

△法輪寺

△向陽金錢寺

△觀

泉

寺

△石佛寺

△興龍寺

第一頁

△龍王廟

△關帝鐵像

△舍利塔

△東嶽廟古碑

△崇壽寺古碑

△長安寺古碑

△寶覺寺古碑

△永安寺古碑

△城隍廟元碑

△三箒碑

△渾河堡德勝橋碑記

△孔廟祭器

△鎮殿侯

△清兵部五楹

△郎太后墓

△安娘娘墓

△索家坟

△范閣老坟

△文中堂坟

△季駙馬坟

△明珠墓

△高總兵墳

△三塊石

△懿路娘娘廟

△李大屯古廟

△猪踪朝陽寺

○鐵嶺縣

第一七頁

△鐵嶺

△心田堡古城

△高麗城

△營盤

△高麗站

△大台石匣

○開原縣

△獸足石  
△龍首山  
△大台山

△拉塔湖  
△香水溝  
△石虎廟

△石佛  
△看花樓  
△康熙樓

△銀岡白塔  
△尖山塔  
△樓子碑

△濟小唐墓  
△李總兵墳

△慶雲城  
△古城子  
△雙城

△威遠堡門  
△開原站  
△黃龍崗

△尙陽堡  
△邊壕  
△官糧窖

△教軍場  
△雙樓台  
△娘娘台

△開原四謬  
△西山石壺  
△飛來仙石

△滴溜石  
△石頭人  
△婆羅洞

△垂珠洞  
△藍旗寨洞  
△礮洞子

△象牙山  
△臥龍潭  
△九龍泉

△甘棠井  
△井中廟  
△銅真武像

△銅城隍像  
△天齊古像  
△銀佛

△唐塔  
△古塔  
△東塔

△石塔  
△龍岡石塔  
△去思碑

△鐵匾  
△銅鐘  
△郝進士墓

△鎖龍碁

○西安縣  
第三四頁

△葉赫東城  
△小城子

○營口縣  
第三五頁

△古台  
△迷鎮山娘娘廟  
△火神廟



△二 笛 碑

○遼 陽 縣

第三七頁

△遼陽縣之沿革

△遼陽北城

△芝蔴城

△大營盤

△點將台

△四方台

△三台子

△連三台

△仙人台

△釣魚台

△首山斗

△高湛屯

△响馬山

△八步緊

△朝陽洞

△振衣岡

△壓疆石

△太極石

△獨鎮翠嶽

△屏藩獨峙

△獅吼鐘聲

△龜石朝日

△八寶琉璃井

△台子溝古井

△雙井

△龍坑

△大寺

△鷄鳴寺

△龍伏嶺古刹

△向陽寺

△永安寺

△慈航寺

△觀音寺

△悟公塔院

△老爺嶺石佛

△遼陽白塔

△勒石紀念

△吳成墓

△清都統墓

△清黃秉忠墓

△石漢墓

△清莊親王墓

△薩哈廉墓

△清刑部尙書墓

△白水灘

○遼中縣

△高麗城

△高麗臺

△高麗城

△高麗臺

○台安縣

△馬占泡

△烽火台

△城子崗

△馬占泡

△烽火台

○蓋平縣

△古辰州

△烏骨城

△古辰州

△烏骨城

△高麗城

△龍潭石城

△藏軍洞

△萬福莊

○海城縣

- △老古峪
- △高麗城古洞
- △破台子
- △和碩館
- △王崇古故里
- △大定石
- △紅旗山
- △塔山
- △饅首山
- △望小山
- △滾馬嶺
- △茂溪
- △盤龍白鶴
- △海眼
- △搬倒井
- △櫃子溝
- △斷魂橋
- △團瓢寺
- △石佛寺
- △墳山寺
- △古塔
- △張家牌坊
- △接引碑
- △懷順王耿仲明墳
- △高麗墳
- △龍灣
- △國神宮
- △西宮娘娘廟

△岳州城

△馬圈城

△鞍山驛城

- |        |      |       |      |         |      |          |      |      |         |        |        |
|--------|------|-------|------|---------|------|----------|------|------|---------|--------|--------|
| △石龍山古城 | △英城子 | △管公屯  | △石房峪 | △廟山台    | △聖水石 | △亂石山之仙人洞 | △蟒洞  | △金塔寺 | △豬龍山老塔寺 | △銅真武像  | △三學寺古碑 |
| △羸城子古城 | △古城崗 | △蓋家屯  | △老牆頭 | △小窪村東古台 | △他山  | △夕陽寺之仙人洞 | △老虎洞 | △駕掌寺 | △銀塔寺    | △他山書院  | △竹葉碑   |
| △山城子   | △騰熬堡 | △大感王寨 | △劉家台 | △臨溟新八景  | △狼洞山 | △玉洞      | △苦井  | △慈化寺 | △茅兒寺    | △鐵塔及石塔 | △尙王神道碑 |

△香雲寺古碑

△徐珍功德碑

△李貞女碑

△牛莊城之鐵牛

△雲版

△墓誌及雲版

△杜姐木主

△虎撞坎

△駕掌寺前石橋

△狐狸台

○錦縣

第八〇頁

△三角城子

△左屯衛(即大凌河甸)

△蚊子關

△滿井子

△搬倒井

△錦縣八景

△觀音洞

△天井清涼

△松山及杏山

△望海山

△小洞寺山

△壓板石山

△二郎洞山

△白狼河(即大凌河)

△凌川

△龍鳳寺

△霧雲山之石塔

△蓋王碑

△湘軍殉難碑

△松化石

△慕容成墓

△尹繼善墓  
△禿老婆店

○新民縣

第九〇頁

△漢南  
△高麗城

△遼濱塔及古城

△佛涅國故城

△小塔子

△營房

△石鼓

△河神廟碑文

△孝子碑

△神榆

○黑山縣

第九五頁

△黑山縣  
△鎮遠堡

△大龍灣

△打虎山

△礮山古井

△無樑殿

△望北樓

△過雲亭

△半截碑

○盤山縣

第九八頁

△盤山

△沙嶺城

△鎮武堡

△盤蛇驛

△滅河

△平陽橋

△得勝碑

○北鎮縣

第九九頁

△北鎮縣沿革

△鍾秀縣故址

△高麗城

△行宮

△望告石

△都察院

△廣寧儒學

△南天門

△醫巫閭山八景

△蓬萊仙境

△大閣

△石棚

△聖水盆

△蝌蚪碑

△東丹王讀書堂

△仙人影

△東丹王道隱谷

△道隱谷及呂祖岩

△玉泉

△萬紫山

△翠雲屏

△窟窿山

△老頭山

△飛瀑岩

△蓮花泡

△龍潭

△葫蘆頭子溝

△體 慧 橋  
△大 佛 寺  
△望 海 寺

△閭山四大古廟  
△青巖寺古佛  
△北鎮廟石額

△觀音堂石額  
△石 像  
△保安寺古碑

△北鎮廟古碑  
△白衣庵蒙文碑  
△東丹王墓碣

△李炳甫德政碑  
△節 孝 坊  
△乾隆題聖水盆詩

△大 石 槽  
△馬 都 督 留 題  
△張驃騎將軍墳

△齊監察御史墳  
△汪 洪 淵 墓  
△李總兵疑塚

○義 縣  
..... 第一一八頁

△義 縣 之 沿 革  
△開 州  
△老 虎 關

△八 塔 子  
△望 海 山  
△大 佛 寺 之 柱

△塔 臺 子  
△聚 星 書 院  
△永 名 樓

△魏忠賢生祠故址  
△王 珣 墓  
△賀 欽 墓



○興城縣

△高麗墳  
△金牛洞

第一二四頁

△興城縣沿革  
△興城

△花爾營

△溫泉  
△文廟

△天寧寺

△湯泉寺  
△圭峯觀

△魁星樓

△鎮國牌坊  
△祖大壽墓

○綏中縣

第一二九頁

△綏中縣城  
△綏中縣城

△前屯衛城

△烏煙城  
△頭台子

△二台子

△老龍頭  
△懸陽洞

△華嚴寺

△碑碣  
△葉家墳

△朱總兵墳

○錦西縣

第一三二頁

△錦 西 △安昌縣與虹螺縣故址 △塔山屯

△網 戶屯 △王子殿 △寺兒堡

△鷹 守堡 △柳條邊 △沙河堡

△塔 山 △虹螺山 △虹螺晚照

△葫 蘆島 △小烏雲山 △女兒河

△馨 水河 △王殿溝 △黑魚溝

△暖 池塘 △井上廟 △攔馬牆

△梳 妝樓 △踏脚石(一名老婆脚石)

○安東縣 第一三九頁

△九 連城 △九連城與三道浪 △沙河子

△虎 耳山 △老台古碑

○興京縣 第一四一頁

△興京縣

△老城

△古城

# ○鳳城縣

第一四二頁

△鳳城縣沿革

△來遠城

△湯伴城

△古婆速城

△古石城

△鎮江城

△山陰古城

△青城子雙城

△高麗城

△高麗城及曬馬靛

△古城及古井

△柵城

△愛哈邊門

△青苔峪堡

△湯站堡

△髮陽堡

△鞭桿溝點將台

△明鏡台

△古小塔子

△定軍山

△月明山

△老蹲臺

△山羊峪

△駱駝嶺

△高麗脚

△石靴

△孤松生風

△巨石出雲

△櫃子山石棋盤

△鳳凰蛋

△古 塔 溝  
△大 湯 溝  
△創 佛 溝

△龍 灣  
△唐 井  
△古 井

△古 石 橋  
△明代建築之寺觀  
△朝 陽 寺

△龍 泉 寺  
△雙塔子雙塔寺  
△斗母宮及大安寺

△鷓鴣窩之唐廟  
△古 石 佛 爺  
△古銅佛及鐵羅漢

△龍鳳寺大鐵像  
△攔 馬 墻  
△元 碑

△明 碑  
△白雲觀古碑  
△紀 念 碑

△小石島怪樹及明碑  
△石 碾 磨  
△唐 石 人

△摩 崖  
△斗 母 宮 摩 崖  
△古刀砲印及元印明磐鼎

△鳳 凰 廳 聯  
△崔致祥墓及古樓址  
△古 烏 馬 山

△古 五 馬 山  
△黑 老 婆 石  
△黑 魚 汀

○寬 甸 縣

△寬 甸 縣 城

△六 甸 城

△蘇 甸 城

△長 甸 城

△永 甸 城

△川 甸 城

△寬 甸 城

△烽 火 台

△狼 烟 台

△六 品 台

△古 樓 子

△玉 石 哨

△小 城 子 山

△缸 山

△登 臺 山

△高 牆 房 身 古 井

△拜 靈 川

△天 洞

△避 流 洞

△砍 川 溝

△寺 院 溝

△二 等 泡

△高 牆 房 身

△碑 碣 子

△王 莽 錢

△盛 甲 金 印

△懷 遠 將 軍 墓 遺 址

△王 將 軍 墳

△武 略 將 軍 墓

○臨江縣

△門 神 石

○輯安縣

第一七二頁

△輯安

△古城

△山城子

△好大王陵

△點將台

△大山堤台

△龍山

△古石馬嶺

△沸流谷

△關馬墻

△飲馬灣

△好大王碑

△丸都勒功碑

△五闕墳

△將軍墳

○長白山縣

第一八一頁

△長白山

△石柱

△仙人橋

○安圖縣

第一八二頁

△安圖

△紅旗河

△老惡河

○淸源縣

第一八三頁

△英額門

○撫順縣……………第一八三頁

△營  
△文惠貝勒墓

○本溪縣……………第一八四頁

△本溪湖  
△烽火台  
△古石洞內之鐵船

△老姥洞

○海龍縣……………第一八六頁

△小城子  
△城子山  
△雙頂山

△茶尖嶺  
△靈神廟  
△古碑

○輝南縣……………第一八八頁

△輝發城  
△點將台

○復縣……………第一八八頁

△復縣沿革  
△駱駝山

○岫巖縣

第一九〇頁

△高麗城 城 子 城 子 城 子 大通門

△龍頭 溝 薛禮脚印石

△東西礮台山 窟 山 貓耳山

△古船塢 望海寺 老古廟

△古石佛 銅佛 大寧學院

△古文昌閣 石 碑 牌坊

△古石獅子 明鐘 明磁碗

△黑魚潭

○莊河縣

第一九六頁

△藏君洞 聖水宮 熱河橋

△鹿島馬方石床 明碑 閣老墳



△清李制台廬墓

○金縣

第一九九頁

△唐王殿及唐王城

△牧城驛

△獅子口

△城山

△假旨山

△海洋島

△姑子洞

△將軍石

△永興寺

△關帝廟

△明金州衛儒學與碑記

△元張百戶墓碑銘

△鐵牛與鐘

○洮南縣

第二一三頁

△洮南

△烏洛侯國

△沙積街

△古城雙塔

○雙山縣

第二一五頁

△雙山縣

△高麗城

△古城

△蒙古舊城  
△五門六眼  
△玉几湖冰山

△七星關寶山  
△聖宗廟  
△戒殺碑

△吡海吐屯

### ○昌圖縣

第二一九頁

△昌圖縣沿革  
△古榆城  
△跑馬城

△四面城  
△小城子  
△大營盤城

△昌圖八景  
△邊牆  
△石廟

△寶塔

### ○康平縣

第二二三頁

△沙陀國  
△高麗古城  
△土城子

△古城  
△小城子  
△闡寶山

△馬鞍山  
△鳳凰坨  
△寶塔寺

△唐 僧 廟 塔 古 塔 包 塔

△觀 塔 神 仙 洞 莫力克石蛤蟆

○開通縣 第二二七頁

△開通縣 俄 樂 廟

○懷德縣 第二二八頁

△懷德公主嶺 寶 泉 石 佛

○洮安縣 第二二九頁

△洮安縣

○法庫縣 第二三〇頁

△小塔子 兀 朮 街 金兀朮飲馬泉

△古井 朝 陽 寺 人 馬 足 痕

●吉林省

○吉林縣

第二三三頁

△吉

林

△白

花

城

△蛤

城

△吉

林

八

景

△臺

子

△八

卦

圖

△小

白

山

△歡

喜

嶺

△天

橋

△杆

旌

石

△轉

盤

石

△歐

孝子

里

○長春縣

第二四一頁

△飲

馬

河

△安

龍

泉

△古

鍋

△二

龍

山

○濛江縣

第二四三頁

△白

龍

潭

○伊通縣

△古

城

△葉

赫

△神

仙

洞

第二四三頁

△石

人

背

△猪

石

印

○農安縣

△龍

灣

城

△羊

藻

城

△龍

灣

西

塔

第二四六頁

○舒蘭縣

△金完顏希尹墓

第二四七頁

○樺甸縣

△高

甸

麗

城

△壽

山

第二四八頁

○扶餘縣

△伯

都

訥

城

△塔

戶

城

△高

甸

麗

古城

第二四九頁

△古

城

△點

將

台

△牛

頭

山

△新城 古廟  
△得勝陀碑  
△得勝陀碑陰之女真文

△珠山

○雙城縣

第一一五五頁

△雙

城

△古

城

△雙城縣之古城

△單

城

△半

拉

城

△運

糧

河

△飲

馬池

△涼

水

泉

○榆

樹

第二五八頁

△牛

頭山

○五

常

第二五八頁

△石

刀

△倒

鱗

魚

○阿

城

第二五九頁

△白

城

△駙

馬

城

○烏珠縣

△岱王隕子之三層洞

△迷魂陣之古壘

第二六〇頁

○延吉縣

△古城

△烟集崗

△龍井村

第二六一頁

△銅佛寺

△馬鞍山石洞

○寧安縣

△寧安

△崆峒石道

△銅柱銘

第二六四頁

△古印

○敦化縣

△敖東城

△唐忽汗河

第二六五頁

○額穆縣

△喇叭喇山

第二六六頁

○汪清縣

△薛仁貴飲水泉

△江畔石

△龍虎石

第二六六頁

○和龍縣

△名坦峴高麗城

△鍾城

△烽火臺

第二六七頁

△將台坪

△汗王山

△汗王山辨

△古

△馬牌

○依蘭縣

△三姓

△鄂多里城

△坐井觀天處

第二七一頁

○密山縣

△古城

△高麗城

△蜂窠山

第二七二頁

△青龍山

△興凱湖

△興凱湖玩石

○綏遠縣

△古鏡及磐石

第二七四頁



# ●黑龍江省

## ○龍江縣

第二七七頁

△黑龍江沿革

△齊齊哈爾

△黑龍江

△兀朮長城

△五里墩

△龍沙西江

△恩公祠

△芍藥廳

△紅豆山房

△古塔

△穆果勇公專祠碑文

△奪將軍碑

△阿爾賽先塋墓道碑

△徐世昌題額

△卜奎火鏈

△塔將軍墓

## ○大賚縣

第二八五頁

△遼泰州故城

△半拉城

△塔呼城

## ○訥河縣

第二八六頁

△訥 謨 爾 河

○拜 泉 縣

△拜 泉

○青 岡 縣

△小 城 子

△石 人

○嫩 江 縣

△嫩 江 縣

△嫩 江

○克 山 縣

△克 山

△石 龍

..... 第二八七頁

..... 第二八七頁

..... 第二八九頁

..... 第二九〇頁

○泰來縣

△泰來縣

△多耐站土城子

△塔子城

第二九一頁

△嫩江蛤蜊城

○肇東縣

△肇東縣

第二九三頁

○景星縣

△景星縣

△濟沁河古洞

第二九三頁

○索倫山縣

△索倫山

△遜河

△温泉

第二九四頁

○布西縣

△金元殘遺之邊堡

第二九五頁

○明水縣

第二九五頁

△明

○呼

蘭

縣 水

第二九六頁

△呼

蘭

△五

國城

△石人城子

△呼

蘭

河

△松

北鎮

△關帝廟

△團山子古井

○綏

化

縣

第二九八頁

△綏

化

△古城及古碾

△四方台

△半

截

塔

△古房身

○海

倫

縣

第三〇〇頁

△海

倫

○巴

彥

縣

第三〇〇頁

△巴

彥

△龍王廟子古城

○慶城縣

△慶

第三〇一頁

○蘭西縣

△蘭

△鏹刀城

△女兒城

第三〇二頁

△郝城子

△後山灣古城

△總領古印

○木蘭縣

△木

第三〇三頁

○龍鎮縣

△龍鎮仙鶴

第三〇四頁

○湯原縣

△鶴

第三〇四頁

○通河縣

第三〇四頁

△通

○通

北

縣

第三〇五頁

△通

○綏

楞

縣

第三〇五頁

△綏

○鐵

驪

縣

第三〇六頁

△鐵

○瓊

瑋

縣

第三〇六頁

△瓊

△普

樂

鎮

△六十四屯

△十里長江

△魁

星

樓

△八角樓

△御賜善將軍祭文

△善

將軍墓

△富將軍墓

△古瓊瑋城

△棲林衙門

△蛤蜊城

○呼瑪縣

第三一二頁

△古

站

○蘿北縣

第三一二頁

△蘿

北

△觀

音

山

○呼倫縣

第三一三頁

△呼

倫

△飲

馬

河

△呼

倫地穴

△練

兵場

△海

公

樓

○臚濱縣

第三一六頁

△臚濱縣城舊址

△臚

濱

石

○室韋縣

第三一七頁

△鐵木哥幹赤斤古城

附錄

第一一頁

△郭爾羅斯沿革  
△成吉思汗站  
△野馬溪峯

△塔虎城  
△興安嶺  
△貝加爾湖

△成吉思汗之陵  
△疊翠巖



# 奉天省

## ▽瀋陽縣

**奉天** 陳沛如云。奉天省爲古青幽二州之地。戰國時爲燕。漢時爲東西遼二郡。至晉爲慕容氏與馮氏所據。後入高麗。唐太宗率兵跨海征伏之。後五代時及宋陷契丹。爲其東南二京地。後爲女真蒙古所佔。明爲遼東都指揮司。清會典圖。稱爲盛京。滿清建業於茲。爲王跡發祥之地。以全國言。實東北之屏蔽也。

**瀋陽** 陳沛如云。瀋陽。原名瀋州。爲遼金時所置。元改瀋陽路。明復改爲瀋陽衛。其後清太祖自遼陽(東京)遷都於此。稱曰盛京。置奉天府尹。定名陪都。清季設爲行省。改奉天府尹爲奉天府知府。同城有承德興仁兩縣。未幾興仁縣廢。僅存承德。民國成立。廢去府制。又因承德與熱河特區縣名相同。遂改承德爲瀋陽。將軍巡按使遼瀋道。皆駐於此。因其地在遼河支流瀋水(俗名渾河)

之陽。故以瀋陽二字名也。

## 高麗館遺址

袁恬云。高麗館遺址。在奉天省城大南門裡。按史崇德元年冬。清太宗親征朝鮮。連戰連捷。翌年正月。朝鮮王遂講和。且出王世子滢及王子鳳林大君溟。麟坪大君潁等三人爲質。於是王世子等隨清軍抵奉。賜邸於大南門裡居焉。滯奉八年。然後始得歸國。現在南滿鐵路公司宿舍地。即其遺址也。

## 望東京

劉遁云。瀋陽撫近門南甕圈外之第二三塚口間。有二尖孔。可向東瞻望。據故老傳說。爲係瀋之古跡。名曰望東京。意在不忘建業之初也。

## 營城及大台

閒樵老人云。瀋陽城東三十里。下伯官屯村南。有舊城基一座。高可丈五。方四五里。有南北二門。相傳爲高麗營城。故城內外田地之名稱。均爲營城某某地。農人耕種城內地畝。每得高麗磚瓦罌器等物。可見其爲高麗營城矣。

城之正西里許。有土台一座。兀立於平地上。高可二丈許。土名大台。以其距營城之遠近揆之。決爲古之烽火台。且與營城相屬。當爲昔年守望之遺跡也。

又此台之東北五里許。上伯官屯村北。西五里許。汪大人屯村西。各有同樣土台一座。更可見古時之五里一墩十里一台無疑矣。

## 石經幢

瘦吟館主云。前編中載東華門之石經幢。均未指出所刻何經。按此物乃唐人作品。所刻爲金剛經全文。繆東麟太史瀋陽百詠中有云。勝數東華八角亭。奇觀十面誑人聽。摩挲細認峻嶒石。上寫金剛一卷經。即此物也。蓋在數十年前。尙能辨認其文字。

## 養馬圈

熊作興云。距瀋陽城西三十里。有一土圍如城。其四轉角有高台。方圓約里許。高丈餘。據鄉老言。係古時高麗之養馬圈。是以上圈之右之村落。名爲馬圈子。鄉老之言。殆不爲無因焉。

## 道光駐蹕地

那玉書云。省垣大北關中學堂胡同。中學校舊址之東院。會建有朱樓一角。

金碧輝煌。係前清道光十九年。帝來奉謁陵。攜某妃駐蹕於此。該樓係某妃家屬接駕所建。余幼時曾見御駕來時。某妃乘黃色緞轎。上扎珠花一朵。若眞者然。今則地雖猶是。樓閣無存。不禁有滄桑之感焉。

## 得勝營

劉德修云。瀋陽縣西四十里。有村曰得勝營。南繞渾河。北枕沙崗。地頗雄勝。據父

老云。唐薛仁貴征高麗。紮營於此。遂成大功。太宗稱其營曰得勝。相傳至今。即以名其村云。

編者按此即前編之得勝營子。但其所傳與張作良姑姑並存之。

## 二台子

李遇春云。瀋北七十里。有邊牆子。村北村南。各有一台。故名二台子。相傳爲周幽王之烽火台。高丈餘。形圓。至今其台猶在焉。

## 九連洞

白蔭樵云。洞在瀋陽縣東南七十里。孟家蛤蟆塘村東山中。因其九洞相連。故名。余少時就學東大堡。聞其異。欲瞻其究竟。乃與同學孟君易君等偕往。至其地。洞口迷漫。僅得其四。然顧名思義。斷不能僅此四洞。惜其餘。無從搜尋。至其洞是否相連。則更不可知焉。

## 古邊

熊作興云。瀋陽縣西界。有古邊一道。高二丈餘。寬約四五丈。綿延數百里。每五里一墩。十里一台。即係烽火台。廿里或卅里即有一古城之遺址。如彰驛站城高花堡城沙嶺堡城皆是焉。相傳此係古時高麗之界邊。雖年代深遠。而遺蹟仍宛然存在也。

## 犀牛望月

堯卿云。瀋陽縣南五十里有山名三塊石。上有古刹。院內三石竝立。色呈深灰。高均二丈餘。狀如倒懸之膽。搖之則動。數百年未嘗傾覆。當中一石。較他石高尺許。上寬丈二三。

下僅五六尺。撼之震動。較其他二石尤甚。最奇者。中含珠狀紅石。恰如初墜之月。而西去二里許一山頂。其聳立形狀類犀。昂首東向。故鄉人稱爲犀牛望月云。

## 宮殿群鴉

李季琳云。清太祖遼陽之難。賴群鴉相救得免。(事見遼陽野老鶴灘一則俗稱烏

鴉救駕烏鴉奉人呼爲老鸛)是滿清得以創業垂統。鴉亦與有力焉。惟其有此殊功。故亦獲食厚報。

憶清季每當二八月吹城時。(吹城者法用大海螺壳一枚于旋紋盡處鑽一孔鼓唇吹之其聲嗚嗚然有如畫角清例于二八月發放旗丁錢糧故使人于八門城樓上吹此聲聞遐邇所以使旗衆知也俗謂之吹城庚子拳亂後此例乃廢)必于盛京宮殿之西偏隙地上撒糧以飼鴉。是時烏鴉羣集。翔者。棲者。啄食者。梳羽者。振翼肅肅。飛鳴啞啞。無慮數千百萬。宮殿之屋頂樓頭。幾爲之滿。或謂管糧有專員。飼糧有定率。食畢。則翩然飛去。至期復來。有清光宣之交。已不如義時之注意。入民國後。益復無人料理。某年江省吳督辦會捐糧散食。今者已矣。宮闕猶是。清社已屋。鴉如有知。能勿興滄桑之感乎。去歲奉直之戰。相持數月。最後奉軍勝直時。羣鴉復集。較昔尤多。識者曰。奉軍告捷矣。已而果然。

## 大溝

白蔭樵云。瀋陽縣東南六十里。有村鎮曰大溝。街市整齊。商賈雲集。其村南有殘碑二。

掃除鮮垢。細辨魚蟲。始悉該村原名綠柳溝。然鮮有知者。至其因何而改名大溝。殊不可攷矣。

## 鳳臺山

淄水漁人云。瀋陽縣東。有村曰大仁境屯者。距城四十五里。村後有山巽然。脈通

長白。南帶瀋水(即渾河)北枕輝峰(見瀋陽縣志)東接金川(撫順河名)西連天柱(即福陵)舊傳此地名鳳臺山。明季遼東之圍場也。清太祖克撫順時。訪知有隱老金伯威者(世龍)居此。徵參戎幕。三召始就。佐贊機要。屢獲勝利。迨兵克瀋陽。定都遼陽。伯威公以疾卒。惜乎附龍未久。致名未彰。諸史冊。彼時太祖。篤念賢勞。遂賜鳳臺山爲葬地。其後裔遂聚族而爲村。墳墓皆葬是處。金氏之裔。居是村者約百餘戶。伯威公者。即前署承德選珊大令之遠祖也。

## 龍虎山一名塔山

楊東門云。塔山在瀋城南。五十里。形勢連綿。東西共五峯。於西

面第一峯有塔。高入雲漢。巍峨可觀。按此塔係唐太宗所勅建。南面山坡如抱。中築安寧寺。寺之東坡中間有觀音閣。閣前有老松一株。粗可盈抱。在寺院中觀之。如在屋頂。院南隅碑下。有石佛一尊。此佛乃數年前。夜間自來者。東面第二峯。上有石棚。兩面石壁。上橫一斜長大石。僅二角橫石壁上。二角空虛。風大時。則隆隆搖動。峯下有石三塊。東西爲座右。中鑿石棋盤。昔時上置

石棋子。惜近年已遺失也。

白隆樵云。瀋陽縣東南四十五里。有山曰龍虎山。俗謂之塔山。因其山巔建有孤塔也。傳言該塔建自唐代。雖經風雨侵蝕。至今巋然獨存。

**灰山** 邱可名云。瀋北五十里之灰山。又名棋盤山。上有平崖一處。中列天然棋盤棋子。橫豎皆可移動。惟不能拾起耳。近被牧童暨子之摧殘。已毀壞不復舊觀矣。

**御泥河** 劉德修云。瀋陽西二十里。有御泥河。父老相傳。謂唐太宗親征高麗。被蓋蘇文。困此河中。危急。乃有薛仁貴救駕。遂改淤泥爲御泥云。

**法輪寺** 李季琳云。法輪寺者。瀋陽四塔之一。位于小北邊門外。距城可六七里。鄰多曠野。廟貌衰頹。亦古刹也。內祀男女佛像二。俗稱天地佛。蓋取天地交泰之義。每年三月某日（似是十八日）爲該寺之香火會。一般善男信女。拈香祈福者。絡繹不絕。尤以婦人求子者居多。相傳凡艱于嗣續者。至寺虔心禮拜。歸必誕子。驗否不可知。不過世俗流傳一種神話而已。

## 向陽金錢寺

陳沛如云。瀋垣天佑門。俗呼小南門。其門外城垣上。而南有石製金錢一

筒。築於牆內。相傳內刻『瀋陽』二字。並藏佛一尊。故稱爲向陽金錢寺。此偶聞諸父老閒談中。未審確否。

### 觀泉寺

那惠忱云。省北八里二台子村。有一關帝廟。額曰觀泉寺。不知建自何時。傳者謂唐室增修。致金遼時。渾河之水。曾由寺前東流。故此寺名爲觀泉寺云。

### 石佛寺

張靖宇云。瀋陽縣城東南二十里許。施家寨村南。有古刹一座。寺內蒼松翠柏。陰可蔽天。殘碑斷碣。橫臥滿地。殿凡四進。因年久失修。類皆坍塌。中殿前有古樹二株。大可合抱。盤桓偃臥。其形如龍。名臥龍松。後殿內有石佛一尊。相傳該寺原係平原曠野。唐初山水爲災。迨及水盡。露此石佛。昂首直立。每值晝夜。則見一片紅光。並聞人聲嘈雜。後村人群往拜禱。頗稱靈驗。因建斯廟。故名石佛寺。

### 興龍寺

瀋陽縣東南三十里許。有村曰娘娘寨。聞清太祖伐明時。皇后曾駐蹕於此。因以爲名焉。村中有廟曰興龍寺。廟宇輝煌。松柏葱鬱。村人避暑。常聚於此。寺之東南有古碑一。高五尺。寬二尺。迭經風雨摧殘。字跡模糊。難以辨識。惟有刀痕一片。厚約三分。面積尺餘。宛然尚在。



據鄉老云。昔年有南人路經於此。識寺內有金馬。遂於夜間乘僧不備。山碑上割之而去。僅遺未成之小馬。有頭無耳。有身無足。碑而拭之。亮如金。擊之石碎而身不損。自日俄之戰。廟被摧毀。已成瓦礫場矣。惟此碑屹然獨立。至今不朽云。

## 龍王廟

劉德修云。龍王廟在潘西六十里潘建台村東。不知建於何年。有匾額。書霖雨蒼生四字。末署尉遲敬德敬書。惜此匾。當日俄戰役。燬於俄兵。現在僅存康熙年。澤沛甘霖一匾。及乾隆時重修之石碑而已。

## 關帝鐵像

劉德修云。潘西四十里之挨金堡。逼近渾河。有古刹。原名迎水寺。不知建始於何代。父老傳說。當清初重修時。河水暴漲。冲刷河岸。現出古佛一尊。高約五尺餘。係關帝鐵像。後面字跡模糊。僅辨明大元二字。遂位於廟中。改爲地藏寺。余於民國八年春。曾題一聯云。寺在昔時名迎水。堡從何處號挨金。意在存古。不計工拙也。

## 舍利塔

袁恬云。瀋陽城西五華里許。有丘陵。東連昭陵。南臨沼澤。稱之曰塔灣山。山上有古塔。高數丈。古色蒼茫。風韻甚佳。確係遼代建築物。其式樣略似遼陽之白塔。考盛京通志。

謂舍利寺一名回龍寺。在城西塔灣。崇德六年勅工部重建。以後隨時修補。寺前有塔。名舍利塔。現在廟宇傾圮。已無足觀。惟古塔屹然聳立而已。該塔在京奉路火車中得望見之。

### 東嶽廟古碑

邱可名云。瀋城撫近門外堂子廟。原爲漢代東嶽廟故址。爲漢武帝所建。碑石猶存。

### 崇壽寺古碑

邱可名云。地載門外。崇壽寺有唐碑一座。係敬德監修二次殘碑。復有明萬歷四十五年重修碑。

### 長安寺古碑

邱可名云。城內鐘樓北。長安寺古碑。係明代所建。有明成化二十三年重修碑。又有清順治二年。乾隆三年。重修碑。

### 寶覺寺古碑

邱可名云。撫近門外寶覺寺。有明萬曆重修碑。並有康熙丙午。乾隆五十七年。重修碑。

### 永安寺古碑

邱可名云。瀋南四十里。奉集堡。有唐時古碑二座。係唐太宗征高麗時。命尉遲恭所建。字尙摩挲可辨。

## 城隍廟元碑

劉通云。瀋陽城隍廟正一道院殿傍有一碑。質黑而堅。文曰瀋陽路城隍碑。字多剝蝕不清。辨其年代。乃元至正年立。查瀋陽之古廟。存者甚多。惟古碑存者極少。其存而未毀者。僅此焉耳。

邱可名云。瀋陽中街路北城隍廟。本元代城隍廟舊址。有元至正十二年碑。及明弘治十年萬曆十四年重修碑。

## 三筭碑

那惠忱云。三筭碑在小東門外三里許。係滿洲聖人儒達海之墓。前清時曾春秋致祭焉。

## 渾河堡德勝橋碑記

東門云。瀋南十里許。有巨流曰渾河。南岸有村曰渾河堡。其命名之義。蓋因地近渾河故也。村北建有三義廟。（即劉備關羽張飛之廟）廟前有碑一座。係清左寶貴所建。碑文如左。

蓋聞夏后憂民。人溺山之已溺。商相輔國。作楫兼以作舟。自來水患之平。未有不賴乎利濟者也。又况潮平兩岸。春來則水徧是桃。浪足三筭。雨過而舟輕於葉。奔流有若江湖。問渡者惟憑鼓楫。

澈底非同溱洧。利涉者胡可牽裳。此所以無人補漏。江心有遲誤之啓師。儘日停橈。渡口雖責成於津吏也。若盛京城南之渾河。誠巨浸也。其源發自長江。其流通乎大海。其勢橫乎東西。其限界乎南北。官吏既絡繹而不絕。士民更往來而無窮。雖河同於海。潮早晚有期。而舟賴於膠。人覆沉其誰恤乎。今春三月。曾溺一船。殞命者不下二三十人。覓屍者何止百數十家。呼號終日。抱恨長天。柁工雖健。此事斷難恃人爲。河伯有靈。頃刻亦莫施神力。風濤作險。波浪爲災。若求屍已得。固可弔河畔之靈。儻覓骨無從。恐枉勞水濱之間。會末等。或觸目情傷。或耳聞心惻。或逆旅待孤舟泛泛。或家鄉隔一水盈盈。欲追蹤於子產。知乘輿未可假人。法遺訓於帝君。必河船方堪濟渡。爰籌千金巨款。造官船六隻。旣便商民。更利兵役。從此松逕夜尋。不至來□□之爭渡。桃源再訪。何至有漁父之迷津。雖西風浪緊。可常保於鷁退之時。即北岸冰消。永無患於雁來之候矣。恭疏短引。謹勒貞珉。庶德澤藉以長存。芳名因之不朽云爾。貫穿黃馬褂記名簡放提督高州鎮總兵官左寶貴監工奉府學優廩生李向瀛撰文藍翎五品銜候補驍騎校富泰敬書清光緒十八年歲次壬辰九月穀旦敬立

## 孔廟祭器

邱可名云。瀋北孔廟內。藏有康熙十五年所製之盥鼓一。儀器庫藏金鐘四。玉

幣八。(壤二)祝一。敵一。琴瑟各四。黻二。翟籥各六十四。干戚各六十四。錫燭台一對。簠簋各一。錫香爐一。鏡一百零二。豆一百二十。麾一。節一。旌一。

### 鎮殿侯

李庶幾云。奉天省城清故宮內崇政殿西。有樓房一所。額標翔鳳閣。中置白熊二具。凜然如生。據紳耆云。二熊係前清初葉守朝門者。因其有功。歿後加以封號曰鎮殿侯。

### 清兵部五榆

邱可名云。瀋陽天佑門內前兵部院內。有古榆五株。玉保曾作五榆歌。其兄鐵保和之。其歌載瀋陽縣志。

### 郎太后墓

那惠忱云。省北毛家屯。有郎太后墓。惜不知其朝代。緣何埋葬於此。

### 安娘娘墓

那惠忱云。省北柳條湖迤東。有古墓一處。向有碑碣之屬。後經風雨摧殘。已無跡可攷。但知其爲安娘娘之墓云。

### 索家坟

那惠忱云。小北門外迤北有索家坟。樹木森森。石碑林立。嗣被風雨侵蝕。半多傾圮。相傳係前清索三之墓。惜清史未刊。文獻無徵。究不知其跡云。

權紫編云。予村北八里有索屯村。距廣寧縣(即今北鎮)四十里。索三。即該屯人也。其屯在清初時

名索府屯。後稱索屯。索位居相國。其妹入宮甚寵。當時朝野皆云要居官。問索三。其權貴可想而知。其村初立集市。商民不往。改立村南趙家屯。即今之京奉路趙家屯站。世人傳說如是。然已無所考察。索族亦無存在者。

### 范閣老坟

那惠忱云。邑北范家坟村東之大道傍。有坟一座。係明朝范閣老景文之墓。

該村即因是得名。

### 文中堂坟

那惠忱云。清文中堂坟。在小東邊門外。松楸屏幢。地勢形勝。其子孫似無復存者。攷文中堂名祥。後謚文忠公。雖無所建白。而清廉兩字。尚不失爲賢宰相焉。

### 李駙馬坟

那惠忱云。大北邊門外。八里許二台子村東。有李駙馬坟。相傳係明朝李國禎之墓。余幼時曾目觀之。見坟大可一頃。松樹蒼蒼。甚爲壯觀。迄今礪斷垣頽。樹伐地闢。無復

當年氣象矣。

### 明珠墓

那惠忱云。省垣北二十五里之朱爾屯。向有土台碑塔坟墓之屬。係清初公爵明珠之墓。現爲村人摧殘殆盡。無復形跡可尋矣。

## 高總兵墳

權旭東云。瀋陽城北六十里之新城堡。古時高麗城也。村之北。城基尚在。名北城崗。斧鐵瓶盜。收暨常有拾之者。堡中某姓園內。有高總兵之墳。總兵何代人。無可考。名字尤不詳。據鄉中耆舊言。大約明末清初。以武功表見於世者也。土居高姓不少。皆充盛京禮部差。未聞以一盂麥飯。奉祀其墓者。殆非其苗裔耶。噫嘻。豐功偉烈。過眼烟雲。身後黃土一坯。又被牛羊踐踏。斜陽宿草。滿目荒涼。臨風憑弔。不禁感慨係之矣。閒嘗爲擬一聯云。大樹威風。想當年飛而食肉。荒邱夜雨。歎此日死僅留皮。

## 三塊石

白蔭樵云。前編趙乃玉君述三塊石山遺迹。有失實處。殆傳言之誤耳。余家距三塊石僅五六里。曾親至其地。故知之稍詳。按該山距遼瀋各六十餘里。但屬瀋界而非遼界。(在瀋陽縣東南)其南北兩山。陡出平地。相距約數十步。中間有崗漫起。望之若馬鞍。地藏寺建其中間。寺院三石聳立。形勢天然。山蓋因此得名。北首之石上築一小塔。中間者。由石縫中生小樹一。南首上大下小。視之岌岌若將傾圮。並有月痕一。虞廷先生所謂紅寶山形如臥牛。前倨後卑。與三塊石山之南之一石相遙對。因該石鑿有月痕。故人稱之爲犀牛望月云云是也。其南山形勢雖峻險。

然登之較易。北山須由山後盤道繞登。始可達嶺。至九缸十八鍋。不在南山在北坡。此寶若出世。須問李大哥云云。乃相傳之諺語。非天然碑文也。相傳北山澗中。生一小李樹。每年僅結一李。熟時即落澗中。爲世人所不見。山中藏有九缸十八鍋之財寶。惟食該樹所生之李者乃得見。此九缸十八鍋之謠所由生也。言難無稽。而鄉老相傳蓋如此。

### 懿路娘娘廟

邱可名云。懿路爲瀋北巨鎮。中有河。界分鐵瀋。街北臨山。山上舊有娘娘廟。中供鐵像。建脩年代不可考。相傳昔年瀋市有車夫某。停車待賃。適有一女郎。美艷都雅。舉止殊流俗。至車前。不詢值。乘之北上。抵懿路。入店稍憩。女即外出。越日未歸。某久待躁甚。急赴街查詢。見人衆喧傳。北山來一鐵佛。及令往視之。果乘車之女郎也。驚疑久之。嗒喪驅車而返。嗣經鎮民集資建寺。命名曰娘娘廟。余前曾載於象爻菴叢話中。民國十二年秋七月遊經於此。徧詢鄉老。所言皆同。故再錄之。

### 李大人屯古廟

吳雲階云。瀋陽縣西南七十里之李大人屯。有古廟一座。據故老相傳。往昔不知何年月日。下大霧三晝夜。村中只聞斧砍聲。不聞人語。至霧散時。見有廟一座。村內多人



往觀。見以普通磚石累成。並無寸木。廟內佛像。火神居正。至今被風雨相侵。半多坍塌。該村父老。不忍荒蕪。乃於民國十三年籌款重修。動工時。由東北牆角上得泥瓦刀一把。重量約可八斤。以此考查。鄉人傳說。或亦非虛也。

## 猪踪朝陽寺

吳雲階云。瀋陽縣東南三十五里。有猪踪朝陽寺一座。寺內有古碑。因被風雨剝蝕。字跡模糊。僅存唐朝建築字樣。正殿懸匾一塊。上述敬德監工事實。殿後有仙人堂。其供棹下有穴。穴口約三尺許。深不見底。相傳昔日有蟒仙度脩於此。殿前有古柏兩株。高可參天。無風時人立其下。其聲嗚嗚。寺門外右邊有大石一塊。上有猪足跡印三個。因此該寺號猪踪朝陽寺焉。據鄉老傳說。前數年間。足跡內有水常存。夏日不乾。冬日不凍。然與否與。非所知也。

## 鐵嶺縣

### 鐵嶺

龍吟館主云。鐵嶺。前編馬元駒君已詳言之。惟尙有一說。謂鐵嶺北門外。距城約三里許之山麓。舊有浮圖一座。爲唐時所建。十里外范河之水通過之。時有童謠曰「塔倒范河陷。鐵嶺

不見而清光緒年間。塔果陷一角。附近居民。恐其言應驗。遂集資修補之。今塔尙在。河仍存。亦古跡遺聞中之一段趣話也。

### 心田堡古城

關振遠云。鐵嶺西北廿里之心田堡。係古城遺址。第不知建自何代。又無碑誌可考。惟城磚長而寬厚。質又堅硬。周圍約三里餘。聞余祖父云。百餘年前。城門及雉堞尙存。惜鄉民不知保護。致將城磚拆毀。今所存者。惟東北城基暨北門。尙依稀可考。餘惟蔓草荒煙間之斷碑而已。城內有古井一眼。光緒年間。居民浚井。會得古錢甚多。惜皆鏽蝕。難辨爲何代物。宣統二年。修理街道。又掘得古銅砲一架。及箭鏃錫壺磁碗等物。且地勢險峻。內環翠山。外繞遼水。東有東營盤。西有西營盤。南有土城子。爲屯兵之所。山巔有烽火台。進戰退守。足資憑藉。爲古所重。殆無疑焉。

### 高麗城

李遇春云。高麗城。在石佛寺之南。相傳爲薛仁貴征東時所修。周圍不過一里餘。城下有護城河。上則城池井然。頗爲齊整。至今滄蒼幾變。而舊址猶存。人皆以高麗城呼之。

### 營盤

傳古蒸云。鐵嶺縣西二十五華里。有村曰營盤。該村傍墩台很多。相傳薛仁貴會練兵

於此。

## 高麗站

馬元駒云。鐵嶺縣城北十二里許之高麗站。爲鐵北門戶。往來要衝。考該村命名之由來。據傳當李唐時。薛仁貴征高麗。高麗兵將。曾駐紮於斯。故名。

## 大台石匣

于履中云。鐵嶺西有達連屯者。其北里許。有大台。崗巒起伏。一望無際。乃高麗之舊城也。南窺瀋陽。北枕遼河。附近有小河繞之。似護城河焉。清季。有傅姓耕於斯。觸硬物。犁具折。掘而視之。乃古磚也。磚爲立方。上有方文。廣丈餘。內似有物。其夜率家人發之。

得石匣一。高二尺。濶三尺。匣黑色。刊蝌蚪文。人莫之識。亦不知何代物。相傳內有金磚三百塊。則未敢必也。惜乎村人不知保存。棄如草芥。即其方磚今亦不可得而尋矣。

## 獸足石

常居安云。獸足石。在鐵嶺城南遼海屯。去村之南有小山。此石在山之凹處。地近泉水。形如釣魚台。寬五尺許。長可七八尺。上有牛馬豬羊等足跡。(故爲命名)據鄉間父老所傳。此石歷年已無從考。但每值夏季午間。即聞錚錚焉之鳴聲。近視之則不復聞。斯亦奇矣。

## 龍首山

孫如中云。山在鐵嶺縣東里許。蜿蜒如龍形。相傳唐時。視此山有王氣。遂建廟

於龍首以鎮之。腰尾則鎮以塔。廟爲三清觀。每值蒲節。香火頗盛。

## 大台山

關振遠云。距心田堡二里餘。有奇峰矗立。高數千仞者。大台山也。因極巔有磚築高二三丈之高台。因以得名。(其磚與心田堡古城磚相仿)其建築年代不可考。相傳爲古之烽火台。今爲牧豎蹂躪。漸見坍塌。登台遠眺。有衆山皆小之慨。山之東麓。爲明濟仙脩真處。其寺宇無存。惟有數丈石基之遺址而已。山背有洞。聞濟仙由此仙去。相傳某年有好事者。曾將獅犬放入洞內。由鐵嶺東龍首山出現。似是荒誕之言。惜年久洞口塵封。徒留痕跡耳。山東坡有石人石馬。不類人工。似係天生。巍然壁峙。高三丈餘。山之陽有寺。爲邑儒士張某所建。後棄俗修真。羽化於此。今主持曹某。曾在寺後鑿一石洞。深十餘丈。前編某君以爲濟仙在此仙去。誤矣。

## 拉塔湖

于履中云。拉塔湖村。在鐵嶺西南七十里。村之四週。有湖環之。其西十餘里。有石佛寺。寺有山。山有塔。塔係唐代物也。每於陰雨之日。則湖中有塔影橫焉。

## 香水溝

于純方云。鐵嶺西南之達連村。在明季爲花半屯。其西三里許。有香水溝。其深莫測。其味異香。因以名焉。相傳明之末葉。有皂衣吏。云自瀋陽來。問香水城。村人莫解。有人

戲云。村西有香水溝。無斯城也。吏諾而去。有好事者尾隨之。見其入水而沒。其後連年水災。村人甚苦之。越三年。有道人至。曰溝有水妖。當除之。否則爲地方害。遂制桃木劍一。弓一。矢三。持劍受村人。而告之曰。余人水與妖戰。雷劍時。請給之。遂挾弓而入。旋見驚濤怒號。濁浪排空。移時有巨手自水中出。大呼劍來。村人誤擲之。俄而溝水赤。道人死矣。村人懼其報復。購石灰二百車。投之入。溝水暴沸。魚蝦殆斃。忽西北有黑雲飛至。大雨傾盆。灰盡擁出。其後無他異。清光緒間。有那國安者。夜經其處。見有席木鐵掀。紛自水出。那某竊其鐵掀。今尙存焉。余童時。冬季聚同學三五輩。至該溝作滑冰戲。突聞其中。有咚咚鼓聲。駭遁。每年夏季。輒見龜鼈羣集。非可以計數也。然亦無敢犯者。民國二年。村人張殿奎之馬。投水自斃。爲鼈所食。亦足奇矣。

## 石虎廟

馬元駒云。鐵嶺縣東關高台廟東。祖越寺山西南坡下。有七聖祠焉。俗曰二虎廟。因該廟前有二石虎故也。據該廟碑誌云。土人於其地中掘出二石虎。遂集資修廟。置二虎於門前云。

## 石佛

李遇春云。石佛寺爲鐵邑之巨鄉。北臨遼河。西臨大山。山中有石佛一尊。其來歷不可考。佛爲青石。據土人相傳。唐時有十佛經過此山。獨此佛墜山谷中。石佛寺因以得名。

## 看花樓

梅劍初云。看花樓故址。在現今鐵嶺東關某商號院內。猶有樓台遺蹟。四壁矗立。尙稱堅好。基石數層。細斲方裁。門上猶存石額。橫尺許。縱可倍。質紫而文黝。非雕非刻。梅幹儼然。亦一奇也。

## 康熙樓

梅劍初云。鐵嶺西南二十里之康熙樓村。相傳清康熙初年。大將軍年羹堯過此。築樓居之。土人卽其時而名之曰康熙樓。樓凡二級。余幼時猶見其遺蹟。土宇已蕩然矣。近因遼水氾濫。已入河中。捕魚者猶時遇其石基焉。

## 銀岡白塔

尹子耕云。鐵嶺縣城。古稱銀岡。其城西北隅圓通寺中。有十三級之白塔一座。係唐初太和二年建立。距今一千餘年。其塔完全無缺。高插雲際。實爲最古之建築物。所以銀岡八景。內有白塔橫雲之句。蓋指此也。其塔之歷史。俱載寺中碑誌。

梅劍初云。鐵嶺白塔。爲銀州八景之一。以其高接雲表。故曰白塔橫雲。塔在治城北部圓通寺內。凡十三級。唐文宗太和二年之建築物。一千一百餘年於茲矣。清光緒間。由塔墮落銅碑一方。長一尺三寸。寬六寸五分。厚二分。現在寺內。其上誌重修塔記。謂明萬曆十九年寧遠伯李成梁夫人宿

氏。往降于香。見此塔不堪。乃率同緣信女。發心修治。增無易腐。並鑄銀佛銅佛銅爐銅碑銅鏡銅鈴等於其上。此塔遂煥然聿新矣。迨及民國三年。爲雷雨震落銅碑銅鈴數個。其上多有刻唐代宮人名諱者。惜爲就近居民拾去。於今不可求矣。夫以有唐古物。幾歷風霜。巍然獨峙。於三十里外猶能見之。豈獨鐵邑之光。亦吾華夏之榮。可與遼陽白塔。並美東陲矣。

## 尖山塔

李遇春云。鐵嶺西南百里之石佛寺。有尖山焉。因此山冠於羣山。故名尖山。山麓有塔。高接雲間。作八面。各有門。門旁有磚刻男女一。各執幡。並刻有烏蟲等類。相傳爲唐時所修。高十丈餘。至今猶在焉。

## 樓子碑

馬元駒云。鐵嶺縣城南。汎河洞之東。昔年曾有古碑一。該碑有甌樓護之。故俗謂之樓子碑。據父老相傳。爲李總兵成梁墓地。其墓因年代深遠。久已湮沒。今則斯碑亦無存矣。

## 濟小唐墓

傅占熬云。鐵嶺縣東二十五華里。有山曰大台山。山景幽雅。其山坡下有濟小唐墓。高約丈許。中嵌明鏡。濟仙遺體。全部可見。顏色宛然如生。余童年時視全部俱存。民二一其首忽塌矣。現已僅存遺體之下部。

### 李總兵墳

孫如中云。鐵嶺城內之鐘鼓樓下。舊爲李總兵墳（朝代未詳）故傍置石羊石馬各一。縣城原在西關。當趾尙可考。嗣移於此。總兵墳適當其中。故鐘鼓樓建於其上。

## ▽開原縣

### 慶雲城

邱可名云。慶雲城。在開原西。遼置縣曰密雲。屬棋州。後改慶雲。金併州人縣屬咸平府。元廢。明於此置站。爲邑西巨鎮。惟城基無存。夷爲田畝矣。

### 古城子

左伯言云。古城子。在開原縣東百里。相傳斯城爲朝鮮古城。今名其村亦曰古城。新城東靠大山。三面臨水。舊時遺址尙在。鄉人有知之者。今則代遠年湮。無可稽考。不過其城之形勢。尙可辨認焉。

### 雙城

丁夢琴云。開邑北雙城子村。有城二座。南北對峙。相距約里許。背山面水。形勢極佳。現馬址已闢農田。陳迹尙有鴻爪可尋。疑是高句麗之城市。土人耕田。時常得盆碗缸罌等物。皆爲高句麗遺物云。



## 威遠堡門

左伯言云。開原東威遠堡門係前清時所築之邊門。在昔設有門兵。以資控衛。又派武章京一員。總理一切事務。今章京衙門尚在。門垣猶存。惟京章及門兵。於民國成立後裁撤。該村乃名爲威遠堡門。

## 開原站

左伯言云。開原站。距開邑十五里。此站係前清驛站。清時郵電未辦時。所有一切公文。咸由驛丁傳遞。每六十里一站。每站必蓄役若干名。清時該村人充斯役者甚夥。至今該村仍名開原站。

## 黃龍崗

左伯言云。崗在開原城北約五六里。東北綿亘二十五里。崗土色黃。儼似黃龍。相傳金兀朮建都於崗之南。宋岳武穆與諸將云。直抵黃龍府。當與諸君痛飲。後人遂附會之。

丁夢琴云。黃龍崗在開原治北五里許。橫枕如龍。形勢險要。爲邑之屏障。入蒙孔道。傳聞岳忠武王拒金兵於此。與部下痛飲黃龍。誓掃胡氛。卒致殊勳未竟。內爲羣小所讒。十二金牌。斷送山河一統。三字冤獄。常使今古同哀。撫今追昔。可勝嘆哉。

## 尙陽堡

張錫侯云。開原東尙陽堡。昔名靖安堡。古之遣戍城也。舊有磚城。週圍三里。

南北二門。明時設衛防守。爲十三城之首。今則城已傾圮。舊址仍存。其堡有古刹。名永安寺。建自明中葉程公波之手。相繼修葺。遺留於今。近年久未修補。漸將零落。經本屯士紳劉文安。募款監修。廟貌一新。數百年之古蹟。至此得未湮沒也。

## 邊壕

吳紹庭云。去開原邑西五十里。有小邊壕老邊壕。南起遼河北沿老邊屯北。迄漢蒙分界之柳條邊止。長約四五十里。予鄉老邊頭即以此名焉。沿小邊壕有土台七八座。距離或三里或五里不等。台基週圍數十丈。高約四五丈。壕西里許。即老邊壕。一壕南北成平行直綫。壕寬均三丈餘。高二丈。惟兩壕現僅餘約二十里左右。餘均踏如平地。成大道矣。北邊雙樓台。即建在此。蓋當時高麗屢敗於唐師。築樓台以憑瞭望。發放狼煙。壕則用以防禦。觀此想見當年戰征之猛烈也。

## 官糧窖

張錫侯云。開原二區境內之官糧窖村。距城可八十五里。村西北有一深坑。週圍約百丈。深五六丈。相傳土人掘地得糧。糧皆朽腐。謂前朝屯兵貯糧之所。故名其堡曰官糧窖。

邱可名君之說。與張錫侯君之說同。故畧。編者附誌。

## 教軍場

史可範云。開原縣城東三里許。有村曰教軍場。地勢平坦。村中住戶尤多。該村

爲開豐往來之孔道。故每當冬令。車馬往來不絕。相傳古時高麗某將軍在此教練士卒。該村之名。由斯而起。

## 雙樓台

丁夢琴云。開邑西五十里有南北土壠一道。上築樓二座。基累紅石。上砌古磚。南北對峙。相距丈許。上有甕圈。下可行人。甕之上有額。題曰宣威。惟建築年月無考。今僅遺故壘一堆耳。

## 娘娘台

邊陲遊人云。開原城西。約卅里許。有娘娘台。因該村出有娘娘。築村西有台。故名。

## 開原四謬

辛夷云。開原縣治內。趙家台與石家台。五里堡與八里橋子。皆兩兩相謬。惜縣志不載。鮮有知之者。蓋五里堡離城實距八里。而八里橋子實距五里。趙家台多石姓。而石家台多趙姓也。該四村之命名。不知緣何如此大謬也。

## 西山石壺

邱可名云。開邑東南西溝山上。有石高丈餘。其狀若壺。望之壺蓋上起。是日必雨。壺嘴則常滴瀝清液焉。

丁夢琴云。開邑東南紫河溝。山巔有巨石一塊。高丈餘。形圓。狀似壺。遠望之。壺蓋隱隱有蒸氣

上升。則是日必雨。壺嘴則常滴清液。飲之極甘。實爲邑中最奇之古蹟也。

### 飛來仙石

丁夢琴云。開邑東南隅三皇廟內。有巨石一塊。色潔白。高五六尺。玲瓏百孔。奇巧天成。文人騷客。翰墨淋漓。名之曰飛來峰。又曰仙石雲屏。

邱可名云。開邑城內東南隅。三皇廟內。有石高丈餘。徑六七尺。石孔玲瓏。名曰飛來峯。

### 滴溜石

丁夢琴云。開屬關門山上有一長石。約數丈。斜傾欲墜。一人搖之則動。百人搖之不動。山下有泉。名滴溜泉。該石亦呼滴溜石。洵奇蹟也。

### 石頭人

邱可名云。石頭人。爲開邑東南村名。村之東山頂上。有石人一。高約四五尺。手足五官畢俱。因以名其村云。

### 婆羅洞

丁夢琴云。開邑東南一面城。山半有島。去地約數十丈。向東有洞如屋。石塌爐竈。舊迹猶存。傳聞有道士曾修真羽化於此。攷縣志載。玉化清虛道人。俗姓黃。河南滑縣人。幼出家於京師白雲觀。好雲遊。清康熙初年。來邑東南一面城山波羅洞。披髮跣足。爐場外。僅一衲。居常爲人療病有奇效。於乾隆十三年某日。土人遙望洞口。火光燭天。衆趨視。道人閉目垂睛。已

糾化矣。遂泥封其洞。並立碣。題曰玉化清虛真人之墓。

邱可名君之說。與上述同。故略。編者附誌。

## 垂珠洞

邱可名云。聞邑南象牙山有洞。極幽深。洞內石樗石子。宛然天成也。

## 藍旗寨洞

左伯言云。藍旗寨在開原縣東南鄉。距邑一百五十里。村東北有大洞一。洞前

有佛殿。欲入洞。必經佛殿。洞分東西二者。中有石座。座有石佛。端坐座中。其西洞因有蛇蝎害人。因被村人以土塞門。不通出入。惟東洞可以自由出入。入之者。雖白晝必手持蠟燭。否則暗黑特甚。不克前進。洞中寬濶。路亦平坦。洞長約半里許。出口處極狹。

## 礦洞子

陳繼賢云。開原縣治東南。柴川撓貝村西南三里許有一山。怪石壁立。令人望之

生畏。石壁之懸崖下有一洞。門高四尺餘。寬倍之。洞內寬約畝許。高五尺有奇。東南隅有一井。其形之大小。與常井同。深則倍之。入其內。雖盛夏亦寒氣逼人。若以石投井中。其聲鏗然。歷久方止。詢諸耆耆。謂係青年醮洞。及詢其開掘於何時。則皆不知。洞中石爲黃色。異常堅硬。村人但皆知其爲醮洞子而已。

## 象牙山

丁夢琴云。開原東南沙河溝之象牙山。形勢崔巍。富鑛質。傳聞山有金馬駒。時常出沒於田禾間。土人百計求之。卒不得。並有謠云。開探象牙山。富貴半拉天。

## 臥龍潭

丁夢琴云。開邑東南尚陽堡村。距治城四十里。山下有潭。峯上有泉。水飛注潭中如瀑布。見底。土人時見水底伏一巨鼉。戲以石投之。則波浪怒翻。有若潮湧。頃刻隱沒。今已不知所終矣。

## 九龍泉

邱可名云。開邑北五里許。龍岡東坡上有猶泉。白石間瀉出。滔滔汨汨。蜿蜒數里。勢若游龍。故土人呼之爲九龍泉。

## 甘棠井

邱可名云。開邑南小孫家台。該處土脈深厚。得水甚艱。清初縣令何奎序出郊勸農。至其地相度地勢。掘地得泉。飲之甚甘。因名其井。以誌賢侯之遺愛焉。

丁夢琴云。開邑小孫家台村。土地膏腴。得水甚艱。清初時。縣令何公諱金序。巡視邊境勤詢民隱。知其地無井。遂相度地勢。掘地得泉。飲之甚甘。因名其井。以誌遺愛云。

## 井中廟

丁夢琴云。開邑東北隅藥王廟堵東樹下。有井一眼。每值天氣清和之日。俯視井

底。宛似有小廟在內。相傳井中有廟。廟中有井即此。

## 銅真武像

張錫侯云。城東北隅上營廟。奉祀銅真武一尊。高丈餘。重六千餘觔。其山來失考。神極靈應。有感斯通。

丁夢琴云。開邑有真武廟神像。爲純銅所鑄。貌極威嚴。背刻明化二十五年鑄。重六千餘斤。

## 銅城隍像

張錫侯云。據傳聞謂往昔秋夜。村老聚談正高興間。忽聞西北草叢中有咳嗽聲。相顧驚疑。覓掘之。乃得一銅城隍像。遂以椅昇而送諸東北舊城隍廟。行至西街路北處。像重不可移。紳商百姓。遂建廟于其處。即今之城隍廟也。

## 天齊古像

張錫侯云。開原東門外。東嶽廟。建自乾隆年間。先有道人。在路傍立棚。常施茶水。以濟行人。於近棚處。種菜。掘地深數尺。視不類土色。訝之。驚傳爲異。觀者如堵。并力掘出。得天齊神石像。建廟自此始。

## 銀佛

張錫侯云。開原城西南隅崇壽禪寺內。舊有銀佛一尊。重約五十餘觔。其山來失考。傳謂銀佛大指。曾被賊竊去。當時佛即顯靈。賊被寺中人拿獲。後於光緒十八年。佛忽不見。人謂

自走。或謂被竊。究以後說爲然。

## 唐塔

趙惇憐云。開原西南隅。有一八角形之古塔。角上置佛像。高可十五丈。詢之土人。僉云建於唐。故稱唐塔。

## 古塔

丁夢琴云。開原城內西南隅。有古塔一座。高二十丈。共十三級。爲邑中最名勝之建築物。考邑志載「金初官徵洪理大師。俗姓王。父長善。母劉氏。夢吞珠生師。性剛激。年十二。超俗果。持戒甚嚴。創建崇壽禪寺經樓佛殿五十餘間。規模宏敞。年六十八歲示滅。金正隆元年二月朔旦。葬於塔中。至今突兀高標。想見師之慧業。塔基年久失修。被風雨剝蝕。已無昔時之華麗云。邱可名云。開原城內西南隅。有塔凡十三級。高二十丈。周圍銅鏡滿布。西面懸銅鼓一。極爲壯麗。據所著之銅版文云。係金正隆元年建築。爲宣徽大師藏骨之所。

張錫侯云。開原縣志云。城西南隅。有石塔寺。唐時所建。原名崇壽禪寺。舊有寶塔。昔在寺中。今在寺外。高二十丈。歷級十三層。東南角。挿寶劍一。頂有鐵葫蘆五。倘或無風自鳴。不過三日。冬則雪。夏則雨。週圍懸寶鏡數百。晝夜放光。清乾隆丁亥年。六月初旬。有大蛇蜿蜒其上。隱見



無常。是年八月朔日。晝間。蛇飲水於清泉。日光如電。口似血盆。有砲手某經過。欲害之。槍火未燃。霹靂頓作。大雨滂沱。蛇乃飛騰雲霄。不復再見。

## 東塔

張錫侯云。開原東二十五里之山嶺。有一塔。根剝落不齊。塔頂只存一角。猶屹然卓立。苦蘚擁護。古氣磅礴。傳謂唐貞觀年徐勣征高麗時所建。嘉慶八年倒。內無別物。遺址尙存。

## 石塔

張錫侯云。石塔在開原南街。高約二丈。圍經五六尺。亭立中衢。成立失考。俗傳地下有海眼。故建塔以鎮之。

## 龍岡石塔

邱可名云。開原北岡之起伏處。有塔子溝。岡嶺左右環抱。小塔居中。四圍桃杏繁殖。春秋佳日。游人甚多。

## 去思碑

丁夢琴云。開原北青陽堡村。有古碑一座。題額云。佟侯去思。明萬歷癸卯季秋九月立。

## 鐵匾

丁夢琴云。開原關帝廟春秋閣。懸有鐵匾一方。額曰萬古不夜。長約二尺。四週鑲鑄戲珠。未悉何時所製。

## 銅鐘

張錫侯云。開原中街樓上所懸之鐘。聲極洪亮。原係崇壽禪寺鐘樓內之銅鐘。乾隆年間。鐘樓下設肆。作小木生理。自朝至日昃。往來行人不絕。嘉慶十八年。七月十八日。微雨初晴。市散人歸。鐘墜有聲。並未傷人。時傳爲有神佑。改懸今處。

## 郝進士墓

左伯言云。清初康熙年間郝璉郝瑛。兄弟皆進士。（已載縣誌）其墓在開原縣東。距城十五里之小台子村西。余幼時至其墓。睹墳之周圍。皆有石欄。前有石門。可通出入。墳內石匣石桌及石豬石羊。陳列有序。今雖零落不完。而遺址尙在。

## 鎖龍樁

丁夢琴云。開原南街糧市胡同南口。某姓牆外。立一石。上有透眼。相傳城外河水。不時氾濫。有蛟龍作祟。淹沒城池。籍小唐川法術制服之。鎖於此。後有好事者掘土甚深。終未窮石之根底。相傳如是。姑妄誌之。

## ▽西安縣

## 葉赫東城

劉耀林云。西安縣城東某隅。有葉赫東城之遺址在焉。其城分內外。外城與

現在之城街市相屬不可考。內城在城外之龍首山上。周二里許。無甚奇跡可尋。僅遺故址及四門。尚可辨認。城西北角有臺。高數丈。傳爲當年城主居處。明史言海西衛扈倫四部。此蓋四部一也。萬歷初。其城主曰楊吉奴者。有少女字於清太祖奴爾哈赤。因其素忠於明。與清生隙。萬歷二十五年間。明清屢次構兵。清太祖乘戰勝之威。乃親統大兵滅葉赫。爾時城主曰金台石。(即清太宗皇太極母舅)不服。憑城固守。戰輒敗。後見外城陷。大勢已去。乃自焚其所有。冀隨城殉。會城破被執。縊殺之。全部降清。子孫世爲顯官不絕。與清相終始矣。

### 小城子

趙冀階云。西安縣城南十五里有土城一座。俗呼爲小城子。四週約里許。聞故老云。係高麗舊城。清末開闢時。農人墾荒於其處。曾鋤出銅印一顆示於文人見篆文。尙能辨識。乃高麗之某將軍印也。又拾得古錢無數。想皆韓民所遺。然昔日城郭。今日成爲阡陌矣。滄海桑田。殊可慨也。

## ▽營口縣

### 古臺

鍾萬有云。營口東四十里。有村名李家屯者。其村西有一台。形方。台基以石爲之。

其表與裏皆以磚砌成。年久頽塌。僅存丈餘。相傳爲周幽王之烽火台焉。

## 迷鎮山娘娘廟

鍾萬有云。營口東行四十里之迷鎮山。山勢巍峨。娘娘廟建於其陽。

工程浩大。華麗異常。斷碑殘碣。層層矗立。惜字跡模糊。闕而不詳。惟廟內上懸一匾。上述尉遲敬德二次監工字樣。此廟創修於唐代。當無疑義。山巔有水池一。周四丈。深不測。隆冬不凍。水質濁。不可飲。余童年時。見池內有一鐵練。引之甚長。不得其緒。今則不知何去矣。

## 冰神廟

劉仙府云。營口縣屬田莊台西南。距街三里許。有冰神廟。即今之靈神廟也。其先

僅有小石廟一座。內無偶像。廟中有頑石一塊。石中生草三株。歷四時而色不變。相傳前清道光年間。當三伏炎暑之際。其廟前周圍約四五尺。上有浮土寸許。下皆堅冰。歷盛暑而其冰堅硬如嚴冬。如是者多年。迨民國八年間。台街有于姓者。綽號酸懶。在該廟午睡。夢有一老人謂之曰。汝當度修。吾保爾壽。汝即傳四方有難者。速來祈禱可也。語畢即去。酸懶醒。逢人徧述此事。適台街張姓婦。患腰疼數載。醫治罔效。求爲治療。酸懶曰汝服藥三日後。腰中必出一蟲。白身黑首。約三寸許。有即將此蟲携來。送至廟中。汝病即愈。三日後果如所言。張姓婦因此而愈。於是遐邇傳聞。

遂集資建一廟。名曰靈神廟。而小石廟至今仍在。

## 二筭碑

劉仙府云。碑在營口縣屬田莊台。距街五里。卽今之藥王廟也。每逢夏歷四月二十八日。香火頗盛。據該處土人云。其地原爲曠野。自前清咸豐年間。一日雷雨交加。無何雨霽雲收。見有二碑豎立於此。其字跡皆模糊難辨。衆咸以爲神。於是遂建廟。曰藥王廟。凡有疾病者。求之無不應。因之戶口移居此處者。日漸增多。遂成村落。因名其村亦曰藥王廟。而二筭碑之名。遂無聞焉。

# ▽遼陽縣

## 遼陽縣之沿革

高恩溥云。自秦在遼河以東設遼東郡。西漢因之設遼陽縣。屬遼陽郡。治。東漢改屬元菟郡。復置襄平縣。晉省元菟入襄平。厥後棄於外徼。夷於高麗。漢晉所置。漸以湮廢。唐征高麗以爲遼州。羣徙爲安東郡護府治遼。以遼東故城爲東京。復設遼陽縣。縣倚東梁河。(即太子河)金因之。元設行省。改稱遼陽路。附倚郭縣以鶴野縣巡警院入焉。有明置都司城。清順

治十年。因明之舊城設遼陽府。轄附郭遼陽縣。十四年移府於盛京為奉天府。遼陽縣仍舊。康熙三年升為州。民國又改稱縣。古今之建設不同。要以地處衝繁。為歷代所極意經營者也。

### 遼陽北城

邱可名云。北城。在遼陽北門外。係明永樂年建築。原為土城。墻垣圯毀。西北隅已入南滿路附屬地。今之縣城。即明南城舊址。清乾隆四十二年重修。

### 芝蔴城

王錫彤云。遼陽縣東廿里石橋子村南。有龍王頂山。山上有古城。俗名芝蔴城。相傳為蓋蘇文所築。週約三畝許。現已傾圮無存矣。

### 大營盤

襄山布衣云。遼陽城西之大營盤。住戶星羅。房屋櫛比。相傳唐太宗征高麗時。大營曾駐紮於此。實為該村命名之由來。

### 點將臺

王錫彤云。遼陽縣東十五里台子溝村之東北隅山麓上。建有石台一座。相傳為唐時之點將台。台高二丈五尺餘。週可六丈許。溯自唐迄今。已歷千餘年。雖經風雨摧蝕。而台依然猶存。堪稱古蹟也。

### 四方臺

襄山布衣云。縣南陶官屯村西。有古台一座。徵諸土人。係唐太宗所建。台之高。

約二丈。寬亦二丈。略成方形。緣唐太宗親征高麗。各軍將官。咸能用命。首則救駕於淤泥河。繼則奪關於三江。越虎城。唐太宗以各將攻關奪塞。大獲全勝。不無功勞。爲獎勵軍心計。特築斯台。用以犒師。休兵三日。雖經歷代風雨之摧殘。尙挺然獨立。當日軍威之莊嚴。可想而知矣。

### 三台子

襄山布衣云。余家於遼陽西南。距縣三十五里之三台子地方。村南里許。有台在焉。台之前。復有二台。週圍約兩丈。高丈許。中實以土。外築以磚。代遠年湮。形將傾頽。惟遺址尙存。至於何時。殊不可攷。

### 連三台

白蔭樵云。遼陽西北六十里。有邨名連三台者。以其村東有三土台相連得名。至於建自何年。不可攷矣。

### 仙人台

襄山布衣云。千山之第一高峯。首推仙人台。距龍泉寺約有三十里許。道路崎嶇。派峯獨立。中架木梯。可登山巔。台之面積。週圍約十步。台之上面有石佛十。依次羅列。據中會寺某僧云。昔時原有仙佛十二位。有云。被人推墜山澗者。有云成仙他遊者。究竟孰說爲是。無從查考。台之下面。鑄有仙人台三大字。

## 釣魚臺

赫柈墅云。遼陽南之釣魚台。建於何代。垂釣何人。不得其詳。惟知俗稱爲渤海遊觀處也。（見壬戌廣益雜誌味諱室隨筆）。

## 首山斗

邱可名云。首山斗。在遼陽首山之巔。爲唐太宗駐蹕時所建之台。其形方。遠望之如覆斗然。因以名之也。

## 高湛屯

高恩溥云。遼陽城南六十里之高湛屯。以產梨著名。所產皆香水梨。前清時作貢品。至該屯之命名。緣明崇禎間。有山東蓬萊縣人高湛者。兄弟三人。以島兵資格。來歸滿清。隸於漢軍廂白旗下。（載於甘泉堡高氏墓碑）。晚年寓於該屯。今遼海大族高氏。皆其後裔也。惟坟墓沒於某姓梨園下。碑碣已無可考矣。

## 响馬山

邱可名云。响馬山。在遼陽南五十里。轉山子村東。是山廣約十里。巉崖削壁。

聳入雲表。有蹊徑可通山巔。策馬繞山背行。約數時許。始至極頂。其上寬廣平坦。面積周約數畝。有傾圮之營壘一。碾磨及棍木插石等。措置其中。據土人云。係唐時蓋蘇文當年防禦唐兵而設。

未識確否。



## 八步緊

塞上散人云。千山玉皇頂之西南。有名八步緊者。爲登一步登天之要徑。該處係天然石徑。就石上鑿成足跡。其跡僅能容足。且祇八孔。一步不容錯踏。經過時須十分警戒。否則卽有墜澗之憂矣。其所以得名者。職是故耳。至於成自何年何人。殊難稽考。

## 朝陽洞

邱可名云。遼陽城東、五十里。有山一座。下有石洞。外有圍牆。正中有木門。山門而進。則行二丈許。始達洞口。洞中方寬數丈。內靠壁有塌二。山石壁鑿戶。儼與居室無異。內有尼僧數人。修行於此。山洞穿出。向西南行百餘步。達山半坡。循階上行。有平台一處。方圓二丈餘。台旁有廟一座。內有尺許之陳搏像。係臥形。上蓋紅繡被。山廟旁繞至廟後。又有石洞一。洞內有石虎二。再向前行五六里。洞漸狹隘。樞僂而入。前有樹橫生。遮於路。由樹上伏身鑽過。再前行數里。有河一道。遙視彼岸。有樹一株。蒼翳蔥蘢。枝葉繁茂。細視之。忽變蛇形。再前行。黑暗如漆。不辨路徑。燃火照路。旋燃旋滅。冷風砭骨。毛髮竦豎。恐懼而返。嗣相戒無敢入者。相傳前洞、係昔時陳搏老祖睡覺處。方醒時。展腰伸拳。後壁觸開。卽今洞之後門也。洞內夏涼冬暖。夏置肉不腐。冬藏花不萎。行人至此。莫不冀覘其異也。

## 振衣岡

赫柵墅云。遼陽千山之一步登天西。一峯矗立。高可齊雲。其絕頂摩崖。刻有「振衣岡」三大字。爲明隆慶間浙人某所題。

## 壓韁石

邱可名云。遼陽東南。倪家台村北。有大石二塊。周圍丈許。上下石各有尖。落於一處。推之能轉。相傳係唐薛禮用此石壓馬韁。遂沿稱曰壓韁石。

## 太極石

鏡瑤云。千山之太極石。在無量觀西嶺山腰處。石徑可丈許。倒鑄太極石三大字。旁面正鑄小字一行云。道光二十四年六月翻身。據道士云。此石六十年一翻身。其字轉正云。

無名氏云。日前鏡瑤君投千山太極石。謂爲六十年一轉。故其字倒置。將來猶能轉正。余童年與鏡瑤同赴千山旅行。余視該石奇異。曾詢諸老僧。據云。該石適居無量觀祖樾寺中間。彼時僧道各不相容。故道人鳩衆擬夜間將該石推下。冀將祖樾寺扎毀。不意甫推一轉。用盡全力。已不能再轉矣。翌日該石字畫倒置。被人發覺。由道人口中傳出。六十年一轉之說。藉以掩人耳目。

## 獨鎮群嶽

赫柵墅云。登千山越祖寺。仰視峭壁崢嶸。特出諸峯。上鑿四字。曰「獨鎮羣嶽」末署明隆慶年字樣。

## 屏藩獨峙

鏡瑤云。遼陽千山龍泉寺西閣前。有山矗立。峭壁天成。形極險峻。頂生斜松一株。峯之東壁。橫鐫屏藩獨峙四大字。下有數字數行云。甲午冬倭寇犯遼。余獨擋雄風。幸賴天子威靈。得保危城。而今江山如故。遊人至此。感慨興焉。未署遼陽太守徐慶璋題。

## 獅吼鐘聲

鏡瑤云。千山風景。以龍泉寺爲最佳。寺內有鐘樓。旁有怪石。狀類獅。俗人敲鐘。聲若獅吼。故名獅吼鐘聲云。

## 龜石朝日

赫柎墅云。千山有巨石。其形類龜。昂首東向。每當旭日初升。相對若揖拜狀。故名。今爲龍泉寺十六景之一。

## 八寶琉璃井

邱可名云。遼陽東五十里。有井一眼。又名柳河湯。井係八角形。旁有廟一座。外周圍牆。人至井上。或咳嗽。或蹠足。井水頓上沸。熱烈蒸騰。昔年井內有鉄鏈一。不知內繫何物。

## 台子溝古井

王錫彤云。遼陽縣東十五里。台子溝村東北隅山麓下。有一古井。相傳爲高麗所鑿。井水清甘。四時長流。南入太子河。惟井中多產黑蝦。俗呼狗蝦。兼有長二寸許者。

並產小白鱗魚。惟不多見。鄉中有罹疹疾者。必持小筐。筐中置碗。碗中置少許飯粒。來取此井之蝦。食之不逾時而疹毒齊發。且無危險之虞。今井中之蝦依然猶昔。

## 雙井

鏡瑤云。千山仙人台下西行十里許。地稍平坦。有雙井焉。二井距離約丈許。相傳昔年如投石於甲井。乙井之水。即波紋蕩漾。投石乙井。甲井亦然。則此二井之水。似係相通。惟甲井之水甜。乙井之水苦。此雙井有苦甜也。今其井水已涸。遺跡尙存。誰苦誰甜。無可考証矣。

## 龍坑

王錫彤云。遼陽縣東二十里。石橋子村南。有龍王頂山。斯山爲太子河北諸山之冠。山上有水坑七十二個。昔時水坑之水。四時不乾。每值天陰。必有龍由坑中絞水上升。相傳爲龍居之所。故鄉人皆呼龍坑。現坑已乾涸多半。年來不再聞有龍絞水之說也。

## 大寺

邱可名云。遼陽南十里許。有古刹一座。咸呼之曰大寺。村即由是得名。攷該寺碑文。爲唐貞觀年間。尉遲敬德重修。相傳先時由魯班建造。究竟確否。無從稽考。觀其工程之大。藝術之巧。想非近代俗工所能脩置。其殿內匾額林立。廟貌巍峨。簷下堵石。歷經數朝。爲簷水滴。穿成深孔。狀甚玲瓏。年湮代遠。山茲可證耳。

## 鷄鳴寺

李春榮云。遼陽東南七十六里某山中間。有一寺曰鷄鳴寺。傳者謂唐王伐高麗。會宿於此山之下。夜間忽聞山上有鷄聲喔喔。因之得名。

## 龍伏嶺古刹

李禹門云。遼陽縣城南二十里之龍伏嶺。其山麓有古刹。佛龕楹比。石碑矗立。碑文敘述。謂係唐代尉遲恭監修。其山脉出自首山。蜿蜒如龍伏狀。故名焉。

## 向陽寺

李禹門云。遼陽城南二十里許有向陽村。去村東二里許。則有向陽寺。基址宏敞。殿宇巍峨。雕梁畫棟。窮極華麗。寺居山陽。脉出首山。左右兩山環抱。門前一水縈迴。因其地向陽。遂以名焉。寺內佛龕楹比。所祀爲釋迦牟尼偶像。及千手千眼諸佛。山門內復有哼哈二將。氣勢森嚴。仰首望之。始見其面。寺中斷碑殘碣。層層矗立。文叙尉遲敬德二次監工。創修確係唐代。當無可疑。惜字跡模糊。闕而不詳。甲辰日俄之役。寺之附近。戰事最烈。未被砲火所毀。亦云幸矣。

## 永安寺

白蔭樵云。遼陽東北六十餘里。有寺曰永安寺。俗謂之喇子寺。廟宇共七十二座。凡世俗所建之廟宇。無不備具。傳聞爲山下三家子村吳姓所建修。建修之年。爲崇德五年。尙有碑文可考。至俗謂喇子寺者。以其廟宇之建修。悉依山勢之高下。故遊覽該寺者。按級而升。自能週

覽無遺。俗謂之老高。(讀上聲)晴日憑眺。可見遼陽白塔。惜庚子日俄之戰。全寺蹂躪。今僅存三四座。幸其最高處一座尙存。可資憑弔耳。

### 慈航寺

邱可名云。遼陽太子河北岸之慈航寺。係清初建。天聰十年征高麗。駐蹕於此。

### 觀音寺

陳祥兆云。觀音寺在遼陽城內土山巔。爲明寧遠伯李成梁金銀庫故址。登之則全

市景物。悉入眼簾。

### 悟公塔院

赫柸墅云。遼陽千山龍泉寺西。双塔凌雲。曰悟公塔院。相傳昔有道人。聚

徒講經於此。今稱龍泉寺。爲十六景之一。

### 老爺嶺石佛

邱可名云。遼陽城南六十里。老爺嶺上之高峯寺內。有石佛一座。高約數

丈。相傳昔年。某甲駕車赴城。歸途中車忽滯住。來一老者。衣貌甚古。幫同推挽。車始移動。老人遂乘車前行。抵嶺下。老人倏然不見。迨至嶺上。見老人在石上端在。趨前視之。乘車之老人。已變爲石形。土人就像建寺。及今猶存在也。

### 遼陽白塔

陳殿武云。塔在遼陽城外西北隅。距城可二百步許。高四十餘丈。直聳雲際。

塔之周圍約百步。以磚砌成。形八楞。頂有銅葫蘆五個。連貫豎立。上段十三層。每層懸鐘八個。下段每面有白佛三尊。故名白塔。相傳昔唐將薛禮征高麗。屢戰屢捷。卒克服之。故建塔以表揚功績。一說謂塔底係海眼。時有孽龍出現。時人恐其作祟。故建塔以鎮之。此二說孰非孰是。不可稽考。然皆余髫齡時聞諸父老者也。

## 勒石紀念

左伯言云。遼陽縣千山有龍泉寺。寺後石壁陡峭處。鐫有『功虧一簣』四字。其旁署名曰依克韋阿。此係甲午之役。依將軍與倭人戰後勒石誌之。

## 吳成墓

陳祥兆云。明遼東指揮使吳成墓。在遼陽南大八戶村。今圯。石人石馬猶存。

按吳成。蒙古人。初名買驢。與父通伯降太祖。更是名。建文初以永平衛百戶降燕。累進都督。愈事。宣宗初封清平伯。後因戰征有功。進侯。卒諡壯勇。與上述遼東指揮使之名義不符。末識一而二歟。編者註。

## 清都統墓

邱可名云。遼陽城北八家子。有清授一等公。都統。太子少保。彭春墓在焉。

## 清黃秉忠墓

邱可名云。遼陽城北小堡地方。有清奉天府尹。世襲都指揮。黃秉忠墓。

### 石漢墓

邱可名云。遼城東三里許。石家坎地方。有清授一等伯。加拖拉哈番石漢墓。

### 清莊親王墓

邱可名云。遼陽城東。京城之東北。積慶山西北角下。有清莊親王。達王

漢巴圖魯。舒爾哈齊墓。是山東角。有清多羅勇壯貝勒。爾清巴圖魯。稱爾哈齊墓。並有清剛毅國公。達爾察墓。

### 薩哈廉墓

邱可名云。遼陽城東太子河南。平頂山下。有清顯親王薩哈廉墓。

### 清刑部尙書墓

邱可名云。遼陽太子河東岸迎水寺村。有清太子太保刑部尙書授他部

勒哈番巴土漢墓。

### 白水灘

襄山布衣云。遼陽城南沙河上游。有巨大之沙灘。據當地鄉老言。清康熙間。關

東著名巨盜。綽號青面虎。勇悍異常。到處擄掠。後經官軍捕獲解京。路過此處。胡匪羣來劫差。

彼時有十一郎者。正在山中打柴。忽聞外邊人喊馬嘶。不知何事。急登山望見前面洩戈逃走之官兵。

被強盜追趕。相距不遠。正在危急之時。十一郎以爲強盜劫差而逃。就算罷了。爲何這樣追趕官兵。

真是可惡。急速廝住救護。雖未能將差犯救回。羣盜被他打散。後來官兵拿十一郎當作青面虎。擒



住解回遼陽城裏去了。到了臨刑之日。青面虎知道十一郎當時本是打柴的好人。爲何替我就刑。無辜被殺。未免太冤。率領其衆前往救護。將十一郎由法場救出。便逃走了。現在劇中演的白水灘。就是此事。此係據土人之傳聞。究竟有無其事。並無史乘可攷。不妨作一段神話觀也。

## ▽遼中縣

### 高麗城

烏宗孟云。竊考關外遼河以東。在唐代前爲高麗國境。至唐太宗時。將韓人驅逐

於鴨江以外。始歸中國版圖。故奉省每多高麗遺蹟。然因年湮代遠。都不可考。遼中與瀋陽交界之區。有村名曰高花堡者。已隸遼中境界。該村迤西不二里。有土城一處。方圓可五里。土牆傾圮。

高猶及丈。余孩童時。嘗過其處。詰諸老人。曰斯處也。傳爲高麗重鎮。原係磚城。設疆吏與中國邊臣互守之所。其後高麗被唐征服。城乃毀。至今村農耕耘其間。每壞犂鋤。嘗得陶器。上鑄韓文。足以証明所傳之非虛。但城屬何名。建於何時。皆不能道其顛末矣。

### 高臺

馬駿名云。遼中地勢平坦。河渠交錯。堰圩頗多。村童見邱垤墳起。輒呼爲邱嶽。距

城四十里。有臺孤立。高可三丈。溯斯臺之建築。年代無可攷。其用途殆同於墩堡。試加臆測。或始於唐。昔封土爲壇。以計里數。五里一臺。十里雙臺。韓愈詩云。堆堆路旁墩。是其証也。然亦難斷言。或謂明清交戰。多在遼西。當時扼河守險。設臺瞭望。此台殆成於彼時。此說較爲近是。今臺土剝蝕。已非昔比。聞土人言。臺內蘊有寶物。發掘者已不少。某姓因獲鏹過多。遽而家稱小康。今其村曰高臺子。蓋即因斯臺得名。

## ▽台安縣

### 城子崗

孟斗寅云。台安縣東二十里有一土埠。俗云城子崗。高可十餘丈。迤邐半里許。

余少時帶同友人遊於崗上。每次必拾得古錢及矢頭或他種罕見之物。頗覺奇異。據鄉老云。昔唐太宗東征。該地爲高麗邊疆。向有城池。高麗王曾詔大將鎮守。經薛仁貴斬將奪關。蕩爲坵墟。故規在土阜累累。遺蹟猶存。至於當時守將爲誰。則不可稽考矣。

### 馬占泡

紀海鵬云。馬占泡。在台安西三十里。原名馬帳房泡。據該處父老云。唐太宗東

征高麗時。曾搭馬帳房駐兵於此。彼時該地無井。僅村北一水泡。人馬飲水。時感不足。是以唐太宗封該水泡。爲千人萬馬喝不乾之馬帳房泡。該泡在村北。每值大旱之年。各處水泡皆涸。獨此泡水深如故云。

## 烽火台

紀海鵬云。台安西邊。小双台子馬占泡一帶之邊道上。每距二三里。輒有一台。聞即古時之烽火台。台基以巨石砌成。周圍約四五丈。高約五丈餘。台下有類似洞門者一。不知當時何用。台身及頂。均川磚。磚之大二倍於近世之磚。遺跡雖尙可考。惜年代久遠。多已坍塌。近惟見台上叢樹多株。磚石錯雜而已。

## ▽蓋平縣

## 古辰州

母心云。蓋平。一稱古辰州。考此名之由來。清初翻蓋福建會館時。於地下掘得石碑。上鑄古辰州三字。旁署尉遲敬德監修。但來歷不可考。故尙有稱之者。聊以作別名耳。

## 烏骨城

張鑣如云。烏骨城。爲隋唐時高麗東地。唐太宗伐高麗。臣下謀取之以迫平壤。

爲長孫無忌所阻。乃移師攻安市。卽今蓋平縣東濱海地方。

### 高麗城

邱司名云。蓋平城北十五里。老青山之絕頂。城址荒涼。內有宮殿遺跡。殿左右飲馬灣。水流不竭。右有犀牛池。冬不凝冰。傳者謂除夕夜闌時。往往於池中得見新月。故曰犀牛

望月云。

### 龍潭石城

孫念祖云。蓋平城南九十里。有帽兒山。高不可極。實一郡之鎮。其山形前俯後仰。若古之冕旒然。故俗人又名老和尚帽子山。人有陟其巔者。皆自背攀蘿而上。每當天氣清朗之日。西望廣寧暨巫閭山。如在其下。其高可知矣。山之下有龍潭三。皆深不可測。乃昔日鑿石爲之。若春碓焉。旁有懸崖數十丈。瀑布貫注其中。清澈見底。時有雲氣覆於其上。故名龍潭。後被沙石將上下二潭填塞。惟中一潭仍舊。水族繁衍。人莫敢有取之者。山之口有南山北山。對峙若門焉。各有巨石。築牆一道。若山海關山上之長城。蜿蜒而上。今日審其牆垣頽倒之勢。當日牆高可三四丈。聞土人云。昔唐太宗征高麗。高麗依山爲塞。故在帽兒山下。鑿龍潭以取飲。築石城以自衛。或可信歟。

## 藏軍洞

東丁云。蓋平東北四十里。葫蘆峪有藏軍洞。傳係薛禮征東時。爲高麗奇兵制勝。嘗藏軍於此。

## 萬福莊

母心云。蓋平東南。距城八十里。有鎮名萬福莊。莊前舊有大水泡。俗稱大門泡。爲蓋平莊河間巨鎮。據父老傳說。昔年鄉人掘地。得一石碑。上鐫萬福莊三字。因以名村。有清中葉。商業繁盛。自南滿鐵路修成。往來莊蓋間。尠有經此地者。

## 老古峪

孫念祖云。熊岳南三十里。有地名曰西北天。蓋是村居於山上。兼以其高。故名。山之西。有石崖若削。中有洞。高可容身。書有漢隸老古峪三字。其旁又有楷書。洞內則風雨不能摧殘。日月不能照臨。故保存至今。查自此而南四十里。自此而東五十里。自此而西十餘里。皆呼爲老古峪。而北至此而止。或亦古人結寨。以此爲界歟。孰意俄人築南滿鐵路。經此山下。將石崖鑿倒。土人有上前阻之者。皆被呵斥。故老古峪三字。竟損滅不復存矣。

## 高麗城古洞

張毓璞云。蓋平東北十五里。大房身屯南山。有一高麗城。城基宛在。城後有古洞。直通紀家屯後山。長約四里許。近已封堵。不克深入。

## 破台子

李纘文云。距青石關二十里。有古台。東西對峙。直線不及三華里。東台圓形。北面僅破一小部分。即其處可繫緣而登。名爲圓台子。西台方形。北部傾圮過半。南面中部亦缺。遠眺則宛如雙指又出。岡背岡北有村。即以斯台之破。遂以命名。據父老傳聞。有清康熙年間。撥民到此。斯台已破。其築也不知始於何代。邈無考稽。其破也亦不知始於何年。迄今又將三百載。仍如故云。

## 和碩館

母心云。和碩館。舊稱曷蘇館。亦作合思罕。合蘇欵。在蓋平縣東南。攷和碩。爲滿語旗之義。曷蘇。爲女真語籬之稱。旗與籬。均即漢語部落之謂也。遼主阿保機。慮女真爲患。

徙其部落之強大者。數千戶居此。使不交通。編入遼籍。即熟女。金改路。明改衛。統治遼東半島。

## 王崇古故里

孫念祖云。熊岳城東五道河村之東。有巨石聳立於其地。高丈五尺許。

大可一抱。上鐫明王崇古故里六字。查王崇古。字學甫。明蒲州人。嘉靖進士。隆慶初。以兵部侍郎總督陝西延寧甘肅軍務。後移督宣天山西軍務。俺答降。加兵部尚書。身歷七鎮。勳著邊陲。卒諡襄毅。未聞其爲熊岳人氏也。或當嘉靖之先。關東大酋。崇古避居山西。隸蒲州籍。顯達後。

念其故居。後過訪焉。故鐫石爲記。亦地以人傳之意歟。不然。吾恐好事者。未必能念及於此也。

## 大定石

孫念祖云。熊岳城裡三官廟門首之左。有特立一赤石焉。高四尺。寬二尺。頂上  
有穹。經人馬衝撞。風雨侵蝕。正面背而文字。皆無一存者。惟左側有大定拾貳年立六字。昭昭可  
考。故人呼爲大定石。考大定。係肅梁宣帝年號。北周靜帝亦稱之。然此時熊岳皆爲化外之地。毫  
無關涉。惟金世宗亦有此年號。則石立於此時無疑。蓋金承遼後。熊岳初名盧州。其地爲金之疆宇  
可知。其石立於金之世宗更可知。然當日立石之用意。則不可得而知焉。

## 紅旗山

王若愚云。蓋平北六十里。有一山曰紅旗山。相傳唐二祖征東之時。被蓋蘇文困  
於此。該山孤立。不與他山連接。類似饅頭。山之東北麓。地勢極底。有泉眼四。荒草叢生。泥濘  
無比。二祖所乘之馬。曾被陷於此。故爲所困。薛禮救駕。即此地。緣據所聞記之。

## 塔山

邱可名云。蓋平縣東五里。山勢平坦。唐時建有鐵塔一座。及前清道光年間。復行改  
築。至光緒朝。其塔自遷。不知去向。經人改築爲石。今仍其名。改築鐵塔云。

## 饅首山

任有伊云。蓋平城南饅首山。在熊耳山之北。熊岳以此得名。距治城五十里。孤

立地上。形若饅首。故名。東南兩面若削。人皆從西北攀石磴而上。計其石磴。共計三百六十。如周天之數。皆若礪焉。蓋不知幾千年矣。

## 望小山

邱可名云。蓋平縣南五十里。孤峰矗峙。高插雲霄。巔具塔形。狀若人立。即俗所謂望小山也。相傳昔年某士子赴山東考試。航海遇險。拯救不及。堂上老母。以其子逾期未歸。懸想綦切。逐日登山。引領南望。馴至血淚焦枯。徹夜達旦。飲食俱廢。里人見其連日遙望。不進飲食。咸哀之。及趨山巔視之。目雖凝注。而氣已無矣。嗣經近村集資建塔。永垂紀念云。

## 滾馬嶺

李洸久云。蓋邑城東三十里許。滾馬嶺位於東。牽馬嶺在村之西。該嶺西坡平坦。東則巉巖怪石如削壁焉。下有蹊徑。旁多棗刺而無鈎。惟距徑較遠之棗刺仍多鈎。相傳唐太宗征高麗。牽馬行此。棗刺鈎住龍袍。太宗怒。曰何物刺鈎。牽扯朕衣。嗣後無須長鈎。故至今嶺路之棗刺無鈎。因其嶺不便行馬。故名滾馬嶺。嶺東之村。乃名牽馬嶺也。

## 茂溪

任右伊云。熊岳城南四十里。有桃家屯位於熊耳山之西陲。山下有泉。曰茂溪。廣三尺。深一尺。四時不涸。西北入於浮渡河。(復縣與蓋平分界之河)溪之兩岸。每至三冬。堅冰尺餘。



相傳漢時公孫度自立爲遼東侯。嘗越海南征。經過此地。適值天旱。飲馬無水。至此喜曰。其流雖小。其水不竭。有馬五千餘匹飲於此。後遂謂爲茂溪云。

## 盤龍白鶴

匡汝非云。蓋邑東南三十里。有山廻繞峭峙曰盤龍。山中有寺曰青雲。俗傳山產白鶴茶。昔有雲遊道士。來山覓探。臨行。在青雲寺內。烹試該茶。瀲浮作白鶴狀。道士去後。再尋之。無能識此茶樹者。

## 海眼

李纘文云。蓋平伴仙山東南五六里。有山如踞獅。峯巔石崖壁立。崖根石平如砥。上有海眼一。圓似盂口。直徑七八寸。水深不知底。據土人傳言。每當海水潮汐。斯眼小如之。未嘗或爽。而無知樵牧。常投以石。致日久壅塞。遂失其常態云。

## 搬倒井

東丁云。蓋平東北二十里。張家牌坊後。有一水泉。曰搬倒井。俗傳唐王征東。飲馬於此。井口狹小。無法汲引。遂將井搬倒飲之。至今古井猶在。泉流澄清。且冬夏不涸。亦異事也。

## 櫃子溝

母心云。櫃子溝村名也。亦作貴子溝。桂子溝。蓋省筆或轉音耳。村在蓋平東南九十里。畢利河（碧流河）南岸赤山下。環村皆山。如櫃子形。故名。溝內有高麗古城。及古墳。惜

年久頽廢。不可稽考。村之北溝。崔家屯。左列赤峯。前臨碧水。層巒聳翠。古木陰翳。大有世外桃源之概。清德宗時。邑名士。王公旭樓設教於此。曾以昔人『山迴水曲疑無路。柳暗花明又一村。』之句。移贈之。可見斯村之足傳焉。

### 斷魂橋

王大魯云。蓋平南門外有石橋。直通護城河。相傳清同治年間。王公出守是邦。因南門外護城河。瀦水頻溢爲患。乃鳩工溝通之。並建石橋。處決囚犯。經過此橋。故名斷魂橋。橋之兩旁。植楊柳數株。每值春夏之交。綠蔭如蓋。後因水患。無一存者。

### 團瓢寺

李洸久云。蓋平城東三十五里。和美村南之團瓢寺。不知建於何年。考其碑誌。有唐尉遲敬德監工重修字樣。該寺正殿五楹。供地藏王等像。前爲二殿三楹。供塹皂等神。前東西廊各五楹。爲十殿閣羅。每殿下列油鍋刀山磨鋸等刑。鬼貌兇獍。望之凜然。兩廊中即團瓢。爲八角形。構作之精。莫與比倫。

### 石佛寺

母心云。石佛寺在蓋平東南萬福莊東北十六里。爲有清乾隆年所建。道光年補葺之。殿上石佛。據住持云。係於地中掘得。爲古代物。遂就地立廟。廟中碑碣林立。係誌廟之顛末。

余幼時讀書於此。其文惜已不復記憶。

## 墳山寺

東丁云。墳山寺。在蓋平南四十里。相傳唐以前。即有是廟。後據高山。前臨綠水。右望渤海。左有溫泉。因寺在山之陽。突出如墳。故名。

## 古塔

邱可名云。蓋平縣東北峪塔溝。有唐塔一。週五丈餘。高約三丈六尺。八面塑有八仙。塔上椽木。盡係南檀。現已凋毀矣。

## 張家牌坊

東丁云。張家牌坊村。係唐將張士貴征高麗時。建牌坊以勸功。故名。但牌坊今已無存矣。

## 接引碑

邱可名云。蓋平城南二十里之塔子溝。有石碑建於前明。字蹟斑斕。帝號無稽。碑上鐫載倭人入寇。居民得接引道人保護。乃感恩勿忘之意耳。

## 懷順王耿仲明墳

李洸久云。蓋平東六十里天寶村。有清懷順王耿仲明之墓在焉。該墓地內數十塚。首葬者該王之曾祖父。次爲該王之墓。均有碑碣。並有御賜碑文。

## 高麗墳

高迺文云。蓋平城南五里。有村曰鳳鳴。村前里許。有墳地約數畝。其中荒塚相

接。草木叢生。因無墳主故。已爲近村貧乏者之義地。據鄉老傳云。此乃高麗之古墳也。所異者。墳前有門一。爲卅形。梁柱皆以石爲之。高寬均丈許。年湮代遠。傾斜已將及地。余幼時常與小朋友。跨坐梁上。足幾抵地。其傾斜已如此。清末之際。竟漸漸自起。現已屹然直立。斯奇亦矣。村人多呼此爲石盤路。余不知其命名之意也。

### 龍灣

高廼文云。蓋平東南十里許。有土山。蜿蜒數里。崗巒起伏。形似龍身。山盡處有巨崖。凹凸伸縮。狀若龍首。沙河經其下。曲而西流。登對面塔山遙望之。此處似遊龍入水。龍灣之名所山來也。相傳前清某年。北京遣善風鑑者。尋遼東山水。有王氣者破之。得此謂係龍脈所鍾。遂督工鑿其崖。廟建於其上。至今該廟猶存。

### 國神宮

姜一字云。國神宮。在蓋平縣西之西河口。相距十八里。殿宇荒蕪。形狀甚古。前面爲鳳凰山。右臨渤海灣。究係何神。并何代建築。因無碑碣。渺不可考。惟門之上方。書有國神宮三字。每於陰曆正月十八日。設祭演戲。斯口必有神附人身。裸體露足。坐刀轎（係用若干刀做成一轎。神坐刀上。扛抬游行）打針毬（以針做成毬形向自力擊）跑火（係燃燒大木種炭神赤

足在火中往來行走。壓花。』花即正月十五所放之花炮燃放時神裸體壓其上。而神身毫不受傷。又有千斤燭一對。高三丈餘。上有對聯。寫的是『唐代探花文射當年牛斗地。』『清朝故曲恩賜今日鳳凰山。』此聯乃該神附身時說出。今照書寫。故一般善男信女。每屆斯日。皆送彩燭。上書此聯。以表誠意。此事似覺離奇。但神於斯日必降。迄今盛會不衰。故特表出。以供鬼神學家之攷証。

## 西宮娘娘廟

母心云。廟在蓋平東南畢列河右岸山嶺叢蓋間。河左卅里。偏嶺南。有廟名東宮。故此以西宮別之。

攷此廟。不知建自何時。說者謂當日有遠來處女三人。路遇鹽車。乞以代步。御者。初以載重馬疲爲辭。繼因三女固請。許之。既升車。反覺駕輕就熟。馬不停蹄。輪轉如飛。瞬息間。行經山下。三女則止車欲去。一聲道謝。回首已杳如黃鶴。御者疑訝久之。車之滯行也如故。

三女下車後。爭先入山。似亟欲達其目的地者。長女在後。次女居前。而幼女飄忽不見。蓋已捷足先登矣。幼女抵廟。(即廟址之所在)遂居正位。次女追及。便坐左旁。長女以後至之故。竟列於末席。山下土著聞之。以爲神女降臨。爰於該處鳩工庀材。大興土木。經營塑像。不日落成。於是廟

貌巍峨。香火鼎盛。名之曰西宮娘娘廟。

廟位於山之陽坡中坳。座北向南。後有古洞。前多碑碣。四周則羣峰羅列。古木參天。每逢浴佛日。演劇酬神。紅男綠女。禮佛拈香。扶老携幼。累千成萬。遠近村屯。結隊賽會。(俗稱秧歌會)齊集廟前。蜂擁蟻聚。所可惜者。末位娘娘。側其身而燧其額。一般士女。瞻仰佛光。莫不喁喁私語曰。因爭座位。而盛怒至今猶未息也。

廟初成時。扮會人衆。均係因病而許者。許則病癒。否則病革。即降香男女。赴會之日。苟以山路崎嶇。砂石塞途。稍存戒心。一往返間。雖鐵鞋。不難踏破。若一瓣心香。奉佛惟謹。虔誠隨喜。不計其他。即斂屣。不至決踵。佛之靈應。概可想見。迄今婦孺。類能道之。廟之突兀。有目共賞。神之有無。豈敢附會。然事雖渺渺。而言者鑿鑿。故錄之。聊當一篇神話耳。

## ▽海城縣

### 岳州城

鍾萬有云。海城南六十里。有村名岳州城者。爲海蓋營往來之孔道。周約五里許。

有南北二門。昔有城垣。年湮代遠。牆已傾圮。邊基猶存。城內北隅。有古井二。分列東西。水質東鹹而西甜。深約丈。雖經萬人飲用不涸。城東高麗墳甚夥。鄉人不時掘得古錢古瓶等物。據父老云。是城確係遼時獨木關故址。改名岳州城。殊不可考。

## 馬圈城

章子生云。海城西五十餘里。遼河左岸。有馬圈城焉。寬長約十數丈。相傳唐王東征時。曾渡河於該處附近。後建城以供養馬者。故名。

鍾萬有云。海城縣南七十里之官馬山。山陽有土園。方圓約四畝許。俗呼養馬圈。相傳唐太宗征東時代。遼將某率師駐守於茲。特建斯圈養馬。今則圈已傾圮。僅留遺跡矣。

編者按章鍾兩君所云大旨相同而方位不同徵諸地圖則兩無所得未識二而一歟。

## 鞍山驛城

韓克明云。海城北六十里之鞍山。明洪武十二年置驛。萬曆六年建城。周圍一里二百零四步。今廢。而城基猶存。(見縣誌)。

鍾萬有云。鞍山之麓。有古城在焉。周里許。有東西二門。聞故老云。清初有農人。曾掘得古碑一。字迹依稀可辨。鐫有洪武十二年置驛。萬曆六年建城字樣。近則一片荒涼。城垣俱圮。僅遺殘磚斷

瓦而已。

## 石龍山古城

鍾萬有云。海城西南六十里。有石龍山。其山麓有城。周圍約四里。因年久失修。頽塌不堪。僅遺濬基可攷。據聞唐太宗征東時。高麗某王。駐兵於此。亦古之城垣也。

## 羸城子古城

鍾萬有云。海城東南十五里。羸城子山。有古城在焉。周圍三里許。城基遺址。尚可辨認。現被附近住戶。開墾成田。每當耕種時。恒拾得古錢古碗等物。相傳此城。爲

高麗建築。曾遣將駐兵於此。

## 山城子

韓克明云。海城東南四十五里之羊角峪村。四面環山。形勢險要。村後東北山。

俗呼北山城子。高數十丈。險峻異常。登臨不易。有冒險而上者。見有古城基。並掘得殘缺弓劍等軍器。相傳係高麗舊城。意者當高麗之據是山也。必以爲天險足恃。要隘難攻。然今則殘磚瓦礫。蔓草叢生。見者徒事憑弔而已。

## 英城子

韓克明云。城北英城子村山上有古城。爲高麗大將屯兵之所。相傳昔年樵夫牧豎。

嘗聞山上有歌吹聲。英城歌舞。爲臨溟舊八景之一。



## 古城崗

張芷湘云。距老牆頭三里。有古城崗。係唐時高麗城郭遺跡。高二丈餘。週里許。今已坍塌。城跡莫辨。但見碎磚瓦礫。複雜其上。據古人傳言。高麗時。爲極盛之城市也。

## 騰鰲堡

楊世昌云。海城縣正北五十五里。有村曰騰鰲堡。遼海二縣。于此分界。村之心有一水泡。周圍百丈餘。泡雖不大。水雖不深。而永無乾涸。相傳是村之名。昔曰胡貴屯。嗣于某年月日。天降大霧。有鰲自泡中藉霧騰空而去。因此改名騰鰲堡。事雖近乎荒唐。而鄉老言之鑿鑿。且以改名之事稽之。諒亦不爲無因焉。惜當時無人記其實耳。

## 管公屯

高恩溥云。管公屯在海城西北六十里之新台子。已載前編。不佞居該屯。傳聞自較詳切。故贅述如下。管公屯遺址。距新台子街市約三里許。有相通之大道曰樓台路。據鄉老云。明季猶有樓之遺基。故有樓台之名。考該路直達之處曰馬路崗。在古城崗東南不過數武。有崗一道。即管寧樓之遺址也。雖無碑碣可考。而秦磚漢瓦。時得之於耕犁之下。余前歲重陽登該崗。拾得古瓦一片。平面似硯。敲之鏗然。確係舊式樓閣所需之物。尤有憑弔詩詞二首。作於何時。作者何人。皆非所悉。但吾鄉稍識之無者類能誦之。一併附錄於下。

管公屯在管公無。楊柳溪邊訪舊廬。(吾村昔名楊柳河)惟有芳名流不盡。神龍隱現却模糊。

滾滾長沙萬里流。管公舊跡渺難求。只因未捨遺金去。惹得披沙揀不休。

## 蓋家屯

李海民云。海城西二十里。蓋家屯。屬於四區轄界。村內住戶二百餘家。相傳爲

高麗大將蓋蘇文生長之地。村東尙有土圍故址。周圍里許。誠古之屯兵場所。遺跡猶在。至今村童牧豎。時常挖出大孔銅錢。惟被土剝蝕。字跡難辨。一說以五區耿庄子爲蓋蘇屯。二說孰是。殊難斷定。

## 大感王寨

李海民云。海城西南三十五里。有大感王寨村在焉。該村住戶繁盛。西通營

口。南接蓋平。北至牛庄。東去奉岫。洵四通八達之要路也。當南滿鐵路未成之際。吉江兩省暨東邊各縣赴營。此爲必經之所。相傳唐太宗東征時代。是村有高麗某王。率師據寨。防禦於茲。亦古之戰場也。

## 石房峪

李崇實云。石房峪村。在海城南五六十里。該村命名之由來。因村南數百步之嶺

上有石房焉。房之西南北三面。豎立三巨石以爲壁。上覆一石。如屋頂焉。下亦鋪一巨石。房寬長約七八尺。西南有一小洞。深不可測。據鄉老云。在昔洞中有一鐵鍊。引之甚長。不得其緒。今則不

如何去矣。其南壁有四大字。曰亘古一人。字跡清楚。字大約二寸。此房類似天然。絕非人工製造。故其堅固異常。迄無傾圮之虞。

## 老牆頭

張芷湘云。海城西北六十里之老牆頭村。相傳爲明時防水所築之堤。經年水浸。僅遺土崗。狀似牆頭。故村名老牆頭焉。其地逼近遼河。上通遼陽。下達營口。帆船往來。絡繹不絕。登高眺望。大有雲天海外之景也。

## 劉家臺

李春榮云。海城東北四十五里。有一台名曰劉家台。台高約三丈許。頂平坦。方約二丈餘。台西南隅。因年久傾頽。據土人云。此台乃前代之點將台也。

## 廟山臺

李海民云。海城西南廟山台村村東。有古台一座。相傳爲烽火台。係周代建築物。磚形奇巨。爲近代所無。台之基址。每面寬二丈餘。高四丈餘。建於山巔。十里外視之。高入雲表。蔚然可觀。相傳有蟒仙蟠踞其中。故土人視爲仙境。台之前。舊有蘭若。香火頗盛。相傳此刹甚古。斷碑殘碣。字跡可考。係有明萬歷年重修。

## 小窪村東古臺

李位三云。海城西九十里。小窪村東有一古臺。高約丈許。周圍百步。

據父老言。或云高麗之故城。或曰前朝之廢廟。惟年湮代遠。莫名真相。然斯臺也。左環遼水。右映巫山。地雖窪下。形勢崢嶸。余先人于清初由關內移來。遂築室於其旁。安塋於其右。迄今三百年。臺仍如故。且臺生古木六株。遠瞻如蓋。近觀似筆。此殆天然奇勢。自有神靈默護歟。姑誌之以期勝跡不湮云。

## 臨溟新八景

韓錫侯云。考縣志八景之說。相傳已久。今時移境遷。多不相符。近人

搜尋勝蹟。綜覈名實。另擬新八景。(一)城中山色。城中厝石山。孤峰獨聳。文昌閣在其巔。孔廟居其左。公園關於右。亭臺花木。嵐靄氤氳。出城過楊柳河南岸。回望城中。直一幅仙山樓閣圖也。

(二)林內鐘聲。城東南繡嶺山中有古刹。曰茅兒寺。林泉擅勝。風景清幽。寺外複岫重巒。蒼松翠靄。遙望之不見闌若。但聞叢林內時出鐘聲。震蕩空際。(三)風亭待月。城內厝石山西南。峭壁陡絕。上建一亭。名曰歌風。當夕陽西下時。游人多集於此。待東山月上。相與吹簫唱和爲樂。繁華市井中。得此清雅地。良不易也。(四)石塔停雲。城東南十餘里有青龍山。爲近邑諸山之冠。巔頂有石。類塔形。時見雲霧繚繞其上。(五)奎樓晚眺。城東南隅有奎星樓。高踞城頭。地勢爽塏。登其

上。則東南山水。一覽無餘。傍晚之際。見蒼巖翠靄。映帶霞光。城郭樓臺。夕照如畫。無限好景。俱在此中。(六)峭壁欄河。城東南十里之欄河山。峯不甚高。勢極峭拔。適當楊柳河上游要衝。屹然獨立。不啻中流砥柱。山南怪石嵯峨。疎松蔚秀。天造奇峯。與附近諸山。迥乎不同。誠縣境東南一保障也。(七)蓮溪畫舫。城外東南隅荷花池北。女閭在焉。每當蓮花盛開。游人如織。好事者特造小舟。供衆游玩。紅蓮香裡。畫舫游行。倚酒聽歌。恍如秦淮河畔。(八)湯谷溫泉。城東北四十里湯崗子有溫泉。其熱如沸。可以療疾。從前僅茅舍數椽。引流爲池。供人沐浴而已。自歸日人經營後。園亭花木。點綴極佳。有對翠閣清林館玉泉館龍泉別墅諸名勝。中外人士。多往遊觀。夏日則爲避暑地方。此外復有李鵬翼君以浪淘沙按景填詞以描寫之。均載入邑乘。茲因限於篇幅。不克備載。

## 聖水石

韓克明云。海城東南羊角峪村東山。俗名羊角峪山。山頂有白色巨石一塊。年代極古。上有馬蹄窩。窩內水常滿。炎夏不乾。隆冬不凍。村人之患眼疾者。輒取水以浴之。頓覺清爽。故名聖水石。

# 他山

李崇實云。他山。一名厝石。位於海城縣城內東南隅。巍然特出。蔚然深秀。聖廟居其左。教育所居其陽。而教育會保安寺皆在焉。又有中路高等學校。爲契霞元君廟故址。昔時金碧樓台。猶有存者。其右則爲今之公園。怪石嵯峨。林壑幽美。入門。有矮屋五楹。爲藏花室。塔前異草奇花。紛繁雜列。每當天氣清朗。遊人咸集。東上有二斜徑。廻曲如羊腸。陟其半。有亭曰思錯。取他山之石。可以攻錯義也。亭中對聯頗多。其尤者曰。（劫後圖書惺衆眼。歲寒松柏見天心。）爲清時省視學蕭鴻鈞所題。循徑而上。過雁齒橋。達峯之巔。文昌閣聳然高起。俯視山川城郭。歷歷如畫。閣外有清光緒年間。邑宰管鳳蘇題聯云。（先天下憂。後天下樂。山不在高。水不在深。）閣前巨石。錯落天然。而綠樹層陰。高可入雲。履蹬至西南隅。地平如砥。中建紙爐。高數丈。如塔然。稍西北。則有歌風亭也。名人題聯甚夥。不克備載。又有雲梯臺。俯瞰市廛。櫛比鱗次。亭之東。有小潭。積水不涸。相傳昔年有龍潛其下。雖風雨晦明。水中常見月影。故曰龍潭印月。迤北道旁。有明諸王生之召墓誌銘。又有金天命癸亥年雲版。皆係篆字。尙可考察。園之北。則爲保安寺。係數百年古刹。有明萬歷年碑石。高可丈餘。今雖改設學校。碑迹猶存。洵海邑之大觀也。

## 狼洞山

劉奇峯云。海城九區李氏房身村後。有狼洞山焉。山之陽。有石洞深數丈。俯首可入。洞口則峭石壁立。勢甚凶惡。幾不敢仰視。其上鑄有四字。模糊難辨。只可相出光武二字。洞之東側石壁。鑿有民裝婦人像。手携煙袋。清楚可鑿。村人相呼爲李小脚也。謂其曾埋白鏹於此山。故村中諺語云。九缸十八鍋。不在前坡在後坡云云。

## 亂石山之仙人洞

韓克明云。海城縣城南二十里商易台村後有山。山中多怪石。奇形詭狀。錯落天然。俗呼亂石山。山腰峭壁陡絕。其中有洞。上覆石蓋。爲一極大石室。雖類人工。亦半屬天然。內有石炕。寬約數丈。可容二三十人。並有石鍋石烟窗石棋盤各一。誠多年古物也。相傳唐時有道人。修真於此。羽化成仙。故名仙人洞。至今香火未絕。每至端午。村中老幼。備供焚香。絡繹於途。更因洞口朝陽。石炕曝熱。村人皆伏於其上。烙腹少時。謂如此則終年不患腹痛。余家居鄧家台時。距該村僅五里許。幼時曾親往驗之。

## 夕陽寺之仙人洞

赤壁客人云。海城縣東北約六十里處有山曰夕陽寺。山峯巒聳立。高插雲際。峯之東北面有洞。俗呼爲仙人洞。洞口大與門等。口之上方及兩旁。有聯額勒于石上。

因年代深遠。被風雨侵蝕。字跡模糊莫能辨。何人所留。莫之能知也。相傳此洞可通廣寧（即今之北鎮縣）山。清光緒間。有好事者邀三四人持燭入探之。未見其出。因而人以爲戒。無復敢入。余幼時曾邀同學數人遊是山。欲究其竟。遂燃燭數支。提燈籠而入。自覺冷風颼颼。寒氣襲骨。約至十餘丈處。有石墻一道。高與人等。橫截面前。如再前行。非踰牆不能進。由牆竄窺之。深淺莫能測。投以石。亦不聞聲。此時風沙撲面。目不能張。因恐踰牆而不能復返。遂相率退出。

## 玉洞

姜一字云。玉洞。在海城縣南一百里。洞在山半。去地約數十丈。形頗似屋。石塌石竈。宛然天成。觀其樸陋剝剝之狀。非近代之建築物可知。向裡探視。黑暗如漆。冷氣襲人。因洞口石上。刻有玉洞二字。故名。

## 蟒洞

韓克明云。城東六十里。蟒洞峪村之龍頭山。山背有古洞三。相傳古有神蟒居此。故名。

## 老虎洞

韓克明云。城東三十里。尖山懷山。山腰有天然石洞一。內可容數十人。相傳古有神虎居此。故名老虎洞。

## 苦井

劉仙舟云。海城東北五十餘里之白石寨村北。有山曰蔭家湖溝山。怪石聳立。三五高



峯。時有雲霧繚繞。樹木青茂。山景幽雅。足爲吾人閑暇遊覽之所。其半山有一苦井。諸父老相傳。昔時有白豬一頭。被鎖於井中。現今還露鐵鏈於外。且傳聞龍常治水於其中。故各村遇有苦旱。求雨者必趨其處。頗有靈應云。

## 金塔寺

王文通云。金塔寺在海城東南。析木城之北山麓。塔以黃磚築成。高二丈餘。凡七級。分八面。相傳爲唐人所築。究其用意。不知如何。而其命名則由於色素也。

## 駕掌寺

梅林野鶴云。海城西九十里有駕掌寺者。東界遼河。南臨巨壑。舉目汪洋。儼同澤國。惟北連東台村。地勢隆起。而寺即建於其巔。據鄉老傳言。昔唐太宗東征高麗。渡海遇風。賴神靈默佑。得慶生還。及行經是地。見波濤洶湧。因憶海中之險。遂建茲寺。以答神庥。迄今千數百年來。雖規模宏敞。遺跡猶存。然代遠失修。牆垣頽圯。碑碣殘敗。已莫可指數矣。歲癸亥。今鎮威上將軍張。暨前吉督鮑。各出巨資重修。不二月而大功告成。或亦藉以存古跡也。

## 慈化寺

鮑日暄云。海城北三十里甘泉堡村。有古廟曰慈化寺。余童時見爲三層殿。院內有石碑數座。均爲唐時所置。歷經風雨剝蝕。字跡模糊不清。山門外有巨碑。字跡尙能明辨。上鐫

大唐尉遲敬德監工二次云云。相傳爲唐太宗征高麗時所建。據鄉老言。昔時廟貌宏壯。僧人數百。廟產豐富。其後僧人因事被控。廟產悉爲官府沒收。以致廟宇頽塌。住持無人。後經村會改建爲一層殿。大減昔日盛況。致數千年之遺跡。幾乎湮沒無存矣。

### 豬龍山老塔寺

李海民云。海城縣屬耀州北里許。崗巒伏起。望之蔚然而深秀者。豬

龍山也。山巔有蘭若。名老塔寺。斷碑殘碣。字跡模糊。惟細辨之。尙有大金某年字樣。其他則風磨雨洗。不能辨認。然廟貌巍峨。數十間之古刹猶存。繪棟彫梁藻梲之遺痕尙在。牆外石塔聳立。乘南滿車過大石橋驛。得望見其遺跡。與迷鎮山海雲寺相對峙。查該山之陽。村名太公堡道土屯。兩屯多李氏族。詢之野老。謂此寺乃明季某年所建。爲李氏家廟。然乎否乎。尙待考古者之鑒別耳。

### 銀塔寺

鍾萬有云。銀塔寺。在海邑東南六十里。殿宇巍峨。華麗異常。寺中碑碣甚夥。

但字跡模糊。細辨之尙有大明嘉靖某年字樣。其他因風雨剝蝕。不能辨認矣。

### 茅兒寺

韓克明云。寺在海城東十一里大新屯村之東南山。以其蔚然深秀。故名繡嶺。出

村循山麓。入幽谷。沿途多野花芳草。山半有泉湧出。泉水作吐納狀。故名銜泉。至今繡嶺銜泉。

爲邑中八景之一。旁有小亭。顏曰洩玉。趙庶南題聯其上。聯云「泉聲到耳鳴環珮。」山色迎眸展畫屏。」再進則景益幽。藪若參差。松陰匝地。遊人到此。脫盡俗塵。寺西南隅。有客堂三楹。曰消夏軒。規模宏敞。四望無阻。尙子元頤聯云「獨立感蒼茫。北臨河水。西望魚山。煙雨晴嵐。遙指綠楊城郭隱。」良辰來宴集。坐列羣賢。遊從二客。風流儒雅。時聞別墅管絃多。」隔澗有亭曰多羅。登其上。心曠神怡。塵襟頓滌。宋搢青題聯云「佳日值春秋。對水郭烟村。四望平鋪圖畫好。」羣賢聚觴咏。喜河聲山色。一齊飛送酒樽來。」迤北即禪院。院門有聯云「一徑松聲。敲棋客至。」四圍山色。拄杖僧歸。」出門東折。徑愈狹。歷佛殿至娘娘宮。見金碧樓台。與幽靜林泉相掩映。遊人如在畫國中焉。迤南山半有亭曰延爽。地勢較高。張朗階題聯云「佳氣鬱東南。山不必深。林不必密。」游人恣來往。休者於樹。歌者於途。」觀諸聯語。可想見其景物矣。按該寺創始於前清初年。僅茅屋三楹。至乾隆間改建佛殿。增修娘娘宮。民國十二年。又建馮玉延爽二亭。天鍾靈秀。復加人工點綴。此寺此山。遂占邑中名勝也。否則繡嶺寒泉。任其荒涼寂寞。不將勝景化雲烟。梵宇叢茂草乎。

## 銅真武像

鍾萬有云。海城縣屬。岳州村北隅里許。豬龍山之老塔寺。內有真武像一尊。

純以銅爲之。重約五千斤。背刻萬曆三年鑄。

## 他山書院

韓克明云。院在城內厝石山之陽。咸豐七年。知縣張鼎鏞所建。月試生童兩

次。拔尤給獎。文風丕振。其後叠經變亂。學宮冷落。及賀小泉來宰是邑。募資重修。並設考棚。

延主講。定課程。赴考者動輒數百人。文風士習。甲於兩遼。清末變法。改爲學校。該址即今中路

高小學生宿舍也。

## 鐵塔及石塔

韓克明云。海城縣東南四十里。析木城村之西北。有古塔一座。俗呼鐵

塔。相傳唐時所築。計七級。高約五六丈。再城南二十里青龍山之巔。有石塔一座。一說爲開土墓。

(按塔爲佛藏舍利之所與僧墳不過大小之別耳)與金塔銀塔。共爲海邑之四大塔。

## 三學寺古碑

鍾萬有云。城內西南隅之三學寺。中多碑碣。雖經風雨相蝕。尙有唐明

兩代之古碑。其字跡依稀可辨。相傳係唐將尉遲恭監修。今寺改建學校。唐碑毀。而明碑猶存。

韓克明云。海城西南隅之三學寺。係千年古刹。爲唐將尉遲恭監修。內有唐明兩代碑記。今寺已改

爲中學校。唐碑已毀。明碑尙存焉。

## 竹葉碑

韓克明云。海城南。距城五十里。虎莊屯廟前有碑。石文橫斜。狀如竹葉。故人皆稱爲竹葉碑。相傳係村人鑿井得此石。於康熙二年製碑。余幼時赴戚家。路經該屯。曾親見之。

鍾萬有云。去海城南五十里。處莊屯村中有佛寺一。年代極古。門前石碑聳立。其石紋橫斜。如竹葉形。故名竹葉碑。相傳村人鑿井得此石。清康熙二年。始製成碑。

## 尙王神道碑

鍾萬有云。距海邑南十里。鍾家台村北。及城東二十里。東靈村東。俱有石碑聳立。二碑係清初平南敬親王『尙可喜』之神道碑云。

## 香雲寺古碑

鍾萬有云。海城南廟溝村之雲寺。內有明萬歷十年建修碑。復有清道光三年重修碑。

## 徐珍功德碑

韓克明云。海城城東二十五里。嶺夾空子。有遼陽吉洞峪徐珍功德碑。庚子拳匪之亂。盜賊蜂起。珍倡辦團練。保衛地方。本境東南各鄉。皆受其福。鄉民感戴。爲立此碑。

## 李貞女碑

韓克明云。海城西四十里牛莊箭亭子旁。有貞女碑一座。考其事蹟。大有記述之價值。貞女係邑人李建魁之女。幼字牛莊趙德海。年十七未嫁。夫卒時女在姨母家。晨起。忽

自覺悲痛。淚潛潛下。莫解何故。急歸家。始知婿於是時病歿。遂更素服。請往守義。父母以其年稚。恐貽後悔。不之許。謀之婿家。翁亦以其年少。不宜輕出此言。堅拒之。女無奈。茹素以明志。終至絕粒瀕死。父母見其志不可移。漫應之。又爲之兩次論婚。悉以死爭。後乞翁來勸。翁聆女言。悽然動。始知女志堅如鐵石。三週後。備彩輿迎歸。先謁夫墓。觀者咸被感泣。是時黑雲陡起。風雷交作。大雨滂沱。獨墓地無雨。人皆嗟異。歸趙八載。婦道無虧。卒時態度安閒。鄰人聞音樂聲。鏗鏘空際。移時始杳。嗣經紳商各界請旌表建牌坊。時清光緒初年也。

## 牛莊城之鐵牛

韓克明云。牛莊在海城西四十里。亦係高麗遺址。唐太宗征服後。與沙卑城(即海城)同時建築。在東南城基內。置一鐵牛。相傳謂爲尉遲敬德所置。以鎮城者。牛莊之名。或即由此。並用鐵鍊鎖之。外視不得見。惟露鐵練約尺許於牆外。以手曳之出。長已數丈。仍覺未盡。然撒手時。即自墜如原狀。經明清兩次修建。均保持未動。今則城牆已圯。衰土殘磚。覆沒其上。遺跡已無可攷矣。

## 雲版

韓克明云。城內公園。(即厝石山)有鐵雲版一個。爲修公園時所掘得者。上鐫有「大金

天命癸亥年鑄牛莊城」十一字。誠古物也。

鍾萬有云。厝石山公園。有雲版一塊。上鑄大金癸亥年牛莊城」十字。據聞。斯物。前爲牛莊縣佐所有。嗣將縣佐裁撤。移置於此。前者。韓克明君謂修公園時掘得殆屬錯誤。

## 墓誌及雲版

高恩溥云。海城公園梯雲台下東北。有一小潭。石橋通焉。橋之西口。南有古石一方。徑二尺許。字跡不清。但可識之爲明諸生王之召墓誌銘。北有大金天命癸亥年製之雲版一方。俱用木製龕框以承之。三百年前之古物。足爲我縣公園生色矣。

## 杜姐木主

韓克明云。海城節孝祠內有一木主。上書烈女杜姐之位。年代事跡。已無可攷。相傳該祠木主甚多。後經日俄兵燹。其他均被毀壞。惟杜姐神牌。巍然獨存。亦異事也。豈其貞操義節。有爲他人所不可及歟。誌之以免湮沒。

## 虎撞坟

韓克明云。海城縣西南五十里之虎莊屯。相傳係虎撞墳之訛。因昔年曾來猛虎二隻。一母一子。頗爲人害。後被村人將母虎刺死而埋之。時值子虎他去。幸脫險。子虎返。見母墳。哀鳴三日。撞死墳前。誠虎之孝者也。

## 駕掌寺前石橋

李位三云。海城境西駕掌寺前之石橋。據父老傳言。此地素無橋樑。行人苦之。有清初年。一夕天大雷電以風。翌晨視之。則見有石橋一座。建于道周。由是往來行人。無不稱便。其果大士之迷津普渡歟。抑居民之誠念所感歟。要足以作一段神話觀也。

## 狐狸臺

梅林野鶴云。海城縣西九十里五鄉界內。有大狐狸台。因村東有土崗。高數丈。故名曰台。是台之上。草木叢生。旁無居民。每逢春夏之交。萬紫千紅。爭鬪芳菲。予先人因墾荒至此。築舍於台右。自是始有人矣。嘗聞鄉老傳言。當日余村爲藩營交通要道。曾有脚車於衣間至者。見有大店遂宿於此。其應酬及供給食品。均甚週至。遂擬返時還留斯店而已。及返適晝。徧找是店。毫無踪跡。徒遺野草高台。心竊異之。迨至期年。復至此宿。次早登程。僞以鞭置壁上。黎明返取。仍無是店。覓鞭在樹上得之。當疑爲狐。故呼是台爲狐狸台。相傳至今。並云予先人至此時。與狐尙通往來。後以人烟漸密。遂不之見。事雖無稽。亦可作神話觀也。



錦

縣

## 三角城子

謝星垣云。錦縣大凌河東岸。有村名三角城子。此城三角形。門在東面。盛



京通誌載之。惟此城俱以沙土築成。至今土人挖土於城根。俱見黑沙。讀晉史晉帝奕五年春正月。慕容令日秦奔燕。燕人以令叛而復還。疑爲反間。徙之沙城。注云。沙城在龍城東北。按龍城即今之朝陽縣三座塔也。此三塔即北燕所築。以地勢考之。三塔去東北三百餘里。惟三角城子是用沙築。餘無有沙以築城者。姑誌之以俟博雅君子之攷證。

## 左屯衛即大凌河甸

尹子耕云。錦縣城東四十里。大凌河甸村。即前明之左屯衛城。爲關東三衛之一。現在後街居民。有城裏某家之稱。北首田地。有城後某地之稱。東北西三面城基。今猶存在。村北真武臺。即昔時之北門也。

長青子云。大凌河甸。爲錦縣東四十餘里之重鎮。東臨大凌河。東南臨枯凌河。南面山邱。如屏藩然。清建左屯衛。置千戶。歸錦州直轄。明末祖大壽曾降清於此鎮。其胞弟祖大弼。以忠孝節義力斥其非。大壽心始悔。爲收撫錦州計。遁歸錦州重與清抗。其弟大弼。與清惡戰數次。卒因衆寡不敵。城破身死。前清末年。有人在附近山下。掘出盛甲一具。及朽腐之刀箭甚夥。盛甲大常人一倍。不知何代物。掘出後原存紫荊山某寺內。至今則不知歸何處矣。其他明清遺跡。猶爲不鮮。惜予未

能一一述也。

## 蚊子關

長青子云。錦縣東南八十里許。有古村名蚊子關者。以夏秋多蚊得名。地臨渤海灣。爲海寇出沒之處。明清皆設戍防盜。今雖無高峻城垣。然舊時城跡。依稀尙在。如烽火臺。鼓樓臺。殘碑敗碣等。皆明以前之故物。想昔時必爲海防要塞。今則已成爲荒墟矣。

## 滿井子

閻向山云。錦縣東石屯衛南十餘里許。有滿井子在焉。據鄉老云。昔唐王征高麗。曾駐軍於此。見其傍有枯井。其他並無可飲之水。當時人馬饑渴已極。王嘆曰。莫非天使我絕於此耶。是夜暗祝於井傍曰。若枯井生泉。我當兩進。不然。即班師返國。次日視之。果然湧出甘泉。人馬得以痛飲。遂征服高麗而返。今井內之水常滿。汲之不盡。故曰滿井子。其傍有村。遂以滿井名焉。

## 搬倒井

閻向山云。搬倒井之名。不僅一處。而錦縣東石山站西距街六里。有古井一眼。係以石壘成。其井口與底斜向。西南歪倒。水勢向外湧流不竭。嚴冬亦不結凍。其水味甘。往來行人。多爭飲之。據村老云。昔時唐王駕遊於此。御馬行至井傍。馬渴極。以頭觸入井口。仍不得飲。

蓋水距井口較遠。乃作咆哮狀。帝四顧無提水器。距村落又遠。帝遂以手搬着井口。極力一搬。井果倒斜。井水立即外溢。馬乃得飲。今猶湧流不息云。

## 錦縣八景

高冠市云。(一)紫荆朝旭。紫荆山在城東十八里。高三里許。山巔平坦。周圍十餘里。尊巖高大。爲錦之主山。形如九字。每晨日出山左。即成旭字。(二)虹螺晚照。虹螺山在城西六十五里。形勢高聳。每值夕陽西墜。將山影返照於小凌河內。(三)凌河煙雨。小凌河在西門外舊街西頭。每日清晨。煙霧迷漫。恍如煙雨氤氳。(四)錦水迴紋。凌河又名錦川。此河從西北繞城西而南。復折而北。經城之東。又轉南流。故曰錦水迴紋。(五)寶塔昏鴉。塔在城內北巷。大廣濟寺前。高二百五十尺。每屆日暮歸鴉千百成群。周匝回翔。棲息其上。(六)湯水冬魚。湯河在城西三十里。源出膠築山。南流十餘里。會入女兒河。雖冬季氣候嚴寒。尙有未結冰處。猶見魚躍于淵。(七)石堂松雪。觀音洞在城北十八里。即普陀寺之主山。懸巖下垂。層樓高聳。天朗氣清時。憑欄遠眺。可望渤海。洞前古松數株。冬雪覆之。青白如繒。八、筆架插海。大筆架山在城西南六十五里。峙海中。狀如筆架。潮退見天橋。濶八丈。長四里。小筆架山。在城西六十五里。亦峙海中。狀如

筆架。四面皆水。自海濱登山。有沙崗如橋。寬三丈。長一里有奇。潮漲淹沒。潮退出現。故名天橋。附近有村。名天橋廠。

## 觀音洞

趙國澄云。錦縣北十八里。有觀音山洞。山之中央。建有觀音寺。寺之北面。一峯聳起。上有二洞。位列東西。二洞之間。建有觀音閣。閣前植松樹極多。風景頗佳。名曰石棚松雪。爲錦縣八景之一。寺左有泉。名曰龍湫。水質澄淨。清冽可飲。由山麓至寺之道路。川白石鋪成。道中有小亭一座。爲遊人登山時休息之所。內多名人佳句。惜不加保護。盡被塗抹矣。

## 天井清涼

謝是垣云。十三山之最高峯。其峯頂有井曰天羅井。非水冬夏不涸。井上有石砌。鐫詩一首。係明萬曆六年所刻。詩云。天生聖水石爲泉。一飲清涼思爽然。卻愈征夫消渴甚。誰能汲取到山邊。石砌上有桃樹數百株。紫丁香白丁香數株。春日開花。灼灼奪目。遊者甚衆。

## 松山及杏山

王步瀛云。松山在錦縣城南十八里。杏山在城西南卅里。明末清兵攻錦州。曾屯重兵於此。明總兵洪承疇、洪承德等。率師十三萬來援。戰於松山。敗走杏山而降。是役爲明清興亡之一大關鍵。故清高宗詩云。承德承疇皆背主。山松山杏盡連營。又云。借問王師何所恃。天

時地利與人利。紀實也。松山之北。有真武廟一座。高可四丈。係清築點將臺。今改建。

## 望海山

孫繩武云。在錦縣東南十五里。上有朝陽寺。今只存一碑。因山高可望渤海。故名。

## 小洞寺山

孫繩武云。在錦縣北二十里。山光盪翠。樹影連雲。山下有寺。砌石爲磴。

拾級而上。路盡處有二巨石相拱立。石高數丈。上合下離。中通處爲天然一門。舍此無歧徑。入門數十步。即至洞。洞東西有二。洞內有石佛。依石修葺爲佛殿。西洞甚小。深濶只丈許。中設短榻。僅容一人。清同治間。有高道士志蒙鍊修。羽化於此。

## 壓板石山

張靖宇云。錦州西北卅里許。有壓板石山者。遙望岡巒起伏。蜿蜒無際。中

有石峯三。插入雲霄。其形如柱。山半有向南古刹一座。門牆皆石成。名壓板寺。寺前而山。山有石徑達巔。巔平坦可坐。登其上。俯視平原。村樹廬舍歷歷在目。寺西即石柱。南北列立。南者較次低。中之北者最高。約可數十丈。仰視柱頂。廟小如豆。柱後曲徑盈尺。人跡罕到。相傳唐時寺僧某。夜聞人定。聞柱頂人喊馬嘶。斧鋸齊鳴。翠晨雲霧彌漫。莫辨柱在。比及霧散。柱頂有廟在焉。是夜即夢神人告以階升術。故是廟朝夕焚香。惟僧可上下。其後年餘。不見何往。人均謂其飛昇云。

## 二郎洞山

趙國澄云。二郎洞山。去錦縣北廿里。洞在山之巔。其中頗寬廣。洞中巖石。俯仰天然。略施人工。築樓四層。下層供大小佛像。其上層則爲玉皇大帝像。再上層則供二郎像。山之得名。即本於此。由此達頂上一層。須經一小山洞。洞在像之右方。鑿石爲階。洞口甚狹。行至中央。必須轉身始克上升。其上所供之神像。爲觀音大士。合手瞑目。一塵不染。登臨其上。錦城如環。凌水若帶。南見渤海揚波。西見筆峯高峙。東見紫荆積翠。足使人發出世之想。又洞之東北巖石下有泉。四時不涸。但水質渾濁。不及觀音洞之醴湫泉水。可供飲料也。

## 白狼河即大凌河

邱可名云。白狼河。即今之大凌河。源出熱河塔溝縣。南凌源縣西南之尾蘇圖山。(亦曰布祜圖山)。東流經朝陽。入奉天、義縣。折而南流。經錦縣東大凌河。注於遼東灣。

長青子云。錦縣東四十里之凌河。古稱白狼河。蒙人號爲傲木倫。源出熱河凌源境內之老龍山口。東北流經朝陽縣。水勢浩蕩。穿城而過。東南至九官台門附近。會合阜新北察拉泊之水脈。再東南至義州。(即古宜州地)爲天然護城河。復流入錦縣界。南折至大凌河甸。經枯凌河於東南。大凌河

甸。爲明清時之重鎮。由斯鎮東行。經右屯衛南。寬澗數里。右屯衛傳言明時馬芳被困地也。再東折而南。經老龍廟萬金灘。由遼東灣入於渤海。長凡五百餘里。經二省四縣。實遼西之巨川也。

馬玉言云。大凌河。源出內蒙古四陵公附近之老龍口。東南流二百二十里。由九官台門。流入義境。東行經縣治城北。泛濫無常。城西北隅。沖沒大半。繞城東流。由出頭山子南折。經平房峪。新庄子。方正堡。至錦縣之螞蟻屯入海。前清道咸年間。距縣城可二三里許。厥後每逢淫雨。水即暴漲。沿岸居民。每逢水漲之時。引領西望。見有無數大鼃。聳立上流。霎時水如山立。少頃。水洶湧而東下。兩岸田產。多被沖刷。人民視鼃爲神物。因而建立廟堂。歲時致祭。俗稱鼃神廟。迄今南北沖沒十餘里。而鼃神廟猶存。迷信者流。視同黃河之金龍四大王也。

## 凌川

趙國澄云。錦縣西關之小凌河。源出熱河。至本縣爲護城河。當明末祖大壽防禦滿清。固守錦州。藉此河之力甚多。河之左岸。有關帝廟河水至廟附近。多起迴紋。名曰錦水迴紋。亦爲錦縣佳景之一。

## 龍鳳寺

閻向山云。距錦邑東六十里石山站轄界。有山曰龍鳳山。山之陽有古寺。因年久

失修。垣牆坍塌。惟神堂並未損壞。神像仍然如故。正殿係瀾鈞釋迦牟尼。偏殿則關帝武穆。餘像糊糝難辨。寺北數武。有山峯聳立。上有石梁之古塔一座。遙望甚高。近視之則二丈餘。塔南面有石門一。內有石佛一尊。已難辨認。塔南又有古碑一座。字跡因年久受風雨摧殘。均已模糊。可辨者僅下款燕丹公主重修字樣云。

### 霧雲山之石塔

謝星垣云。大凌河東之霧雲山隆福寺嶺上。有石塔一座。高兩丈餘。

該塔以石砌成。千餘年不搖落。亦無灰痕。旁有石碑一。其文已漫漶不可考。但見有大遼諸王公主告成。拜墓等字。吾想此塔必係遼所砌。惟盛京通志及錦縣地誌皆不載。故特表而出之。

### 蓋王碑

尙賢云。錦縣城北十六里。有蓋王碑在焉。一倒一豎。風雨摧殘。詢諸鄉耆。謂

蓋蘇文與唐王戰役時所立。字跡漫漶。其意遂不得悉。故該鄉命名蓋王碑。聚民百餘戶。舖面五六家。儼若小鎮焉。

### 湘軍殉難碑

袁恬云。京奉路高橋站迤南十餘華里。地臨渤海。俗稱西海口。舊隸錦縣

天橋巡檢管轄。爲古來錦州與芝罘間貿易之海港。現在蒙古方面所產出之甘草。多聚集於此。余往



年因事赴該地。滯留兩三日。一日乘閒散步海濱。偶見臨海有一京觀。(大塚)中有碑。題名忠骨碑。讀之知爲殉難軍人之塚。當時謄寫碑文保存之。今已杳不可得。猶憶碑誌概要。謂光緒甲午之役。奉諭往援遼東之湖南軍。經海路向營口方面運往。在西海口衝鋒。一夜爲颶風所襲。乘船覆沒。搭乘之湖南軍四百五十人。盡殉渤海死焉。因之集收殉難將士之遺骸。築墳立碑。以慰幽靈云云。

## 松化石

謝星垣云。錦縣東六十里石山站街南之老龍頭山。產松化石。其石之平面作松樹形。土人用以砌牆。頗覺美觀。

## 慕容成墓

趙國澄云。錦縣南三道壕村。前有一古墓。土人呼之爲高麗墳。隆然高起。大逾尋常。民國元年夏。大雨滂沱。墓頂塌陷。現一深穴。好奇者入內探視。內有石階。拾級而下。中甚寬曠。四週燃明燈十餘盞。川石甃盛油。僅餘少半。中間陳一巨棺。長約丈餘。尙未腐朽。棺前置青石墓碑一座。上書燕大將軍慕容成之墓。餘無他物。後因觀者日衆。有司恐生事端。遂遣人將穴填塞。考史錦縣晉時原屬燕地。但記載中並無慕容成其人。豈史之闕文乎。抑別有說歟。

## 尹繼善墓

孫繩武云。尹繼善。諡文端。錦縣人。墓在縣城東北二十里。其碑文曰。皇

清誥授光祿大夫太子太保文華殿大學士兼吏部尚書加贈太保諡文端尹繼善之墓。墓前有乾隆三十六年御製碑文勒石。

## 秃老婆店

趙博武云。秃老婆店。在錦城東六十里。現爲巨村。余幼時曾讀書於此。聞父老談及該村命名之義。頗堪發噱。據云是處原係荒甸。草長沒膝。但爲京奉大道。來往頻繁。有李姓母子者。其母時年約七十。鬢髮脫落。赤然光頭。子亦三十歲上下。別無事業。同母在此築草舍三間。作棧店營生。停宿往來商旅。其稱安適。至清乾隆帝。駕臨陪都時。途經是店。正值午刻。停輦備餐。帝令侍臣覓菜蔬。藉領鄉間風味。回奏老嫗不種菜蔬。無所供獻。帝怒。立召嫗至。問以何不種植。嫗對曰。各地有主。不租不課。何敢自耘。帝聞嫗言。詞甚誠樸。遷怒爲喜。賜嫗子乘馬。限於二時內。任馬之馳。按所經過。均賜與焉。復親書秃老婆店四字匾額一方。令懸戶外。該村名由是而始。近今李氏已絕宗祧。惟其地界土壕。尙存在耳。

## ▽新民縣

### 潢南

邱可名云。新民縣。別稱潢南。未知何據。按遼史地理志。有木葉山。在永州潢水土

河合流處。明一統志。木葉山。在廣寧中屯衛東三十里。明志所言。當在錦州。方輿紀要。廣寧衛東三十里有木葉山。綜上諸說。尙以遼史爲近也。

據遼史。當在喀爾喀河南。按內蒙昭烏達盟八部。有喀爾喀。左翼一旗。在喜峯口東北八百四十里。其地約在赤峯北境。則潢河土河合流之處。當在熱河赤峯北境。開魯之南。遼置永州。爲發祥地也。土河卽老哈河。亦曰老河。源出直隸平泉縣南永安山。東北流經大寧故城。北流入赤峯縣。納英金河伯爾克河。北入潢河。

潢河。乃遼水西源也。卽西遼河。又謂西喇木倫河。出內蒙古克什克騰旗西境。東流經直隸赤峯縣境。納哈喇木倫河。及老哈河。又東南經綏東縣。入奉天洮南縣南界。至遼源北與東遼河。合入遼河。爰菴按潢南。殆指潢河迤南之謂。若然。則潢河之南。又非新民一縣。何以他縣不以斯名之。尙希明達者有以詳釋之也。

## 高麗城

解文芳云。由新民北行十五里。有高台山。山之起伏凡四。中而北者曰鍋底山。(山上有鍋底形之坑故名)鍋底山之東。有高麗城在焉。聞昔爲韓人駐兵之所。自李唐興韓人東徙。

此城遂日臻圯毀。今則碎瓦頽垣。僅影約可辨耳。

## 遼濱塔及古城

譚偉臣云。新民東北五十里。有遼濱塔村。位於遼河右岸。東西南三面環水。北倚小山。中有土築古城。週圍約三四里。城址宛然。最高處尙有土牆二丈餘。惟烟火五六百家。均繞城而居。因之有前屯東台塔西城後之稱。城內無一居戶。詢之村人。僉云當年曾有建屋於城內者。夜間聞種種響動。不得安枕。由是無敢住者。城外西北隅有古塔。高約二十丈。周可數十抱。上塑佛像八尊。今僅存其七。相傳某年夜間。自走一尊。語雖不經。然亦傳之久矣。現塔根已圯毀。頗有傾倒之虞。但已歷多年。無所改觀。至該塔及城。究係何朝代建築。無可考徵。惟據鄉老云。塔爲唐時所修。余嘗考地理。新民縣東五六十里處遼河附近。有遼時遼州城遺址。殆即遼濱塔之古城也。

## 拂涅國故城

劉子厚云。距新民縣北五十里。有古城一座。居民數百戶。繞城而居。即所謂遼濱塔村是也。相傳是城爲拂涅國故城。城係以土建築。高約丈許。有南北二門。前臨古剎。旁依浮屠。形勢巍峨。誠壯觀也。剎中碑碣三五。字跡模糊。隱約尙可明辨。其一載有我遼濱塔處。

古封拂涅國。唐置遼濱縣。其制雖廢。遺跡猶存。迄今巨水縈流崇城。似蓮峯拔地。諸山環拱寶塔。如文筆挿天。傳聞各省。實屬名區等語。則是城之風景。益可概見。迄至今日。知者寥寥。故特表而出之。用誌古蹟於不忘云爾。

編者按此即劉子厚所謂遼濱塔古城也。

## 小塔子

譚偉忱云。新民東北七十里。有村曰小塔子。村東有山。山上有小塔。因以名村焉。此塔用石砌成。高約二三丈。但未悉建自何年。相傳昔時有蒙古人。以鐵鍊繫塔頂。復用牛數十拉之。僅將塔頂拉斜。終未曳倒。迨光緒季年。忽一夜。村人見山上燈火輝煌。聞人聲喧嘩。天曉視塔已倒。塔石羅列於山之上下。而塔已杳然矣。

## 營房

邱可名云。新民縣西。四十五里。有營房村。西隣鐵路。北倚土崗。似建築之堤壘。以禦此村者。北復有小河一道。環繞村崗。天然防衛。形勢極佳。相傳係唐時所建之堡壘。以屯兵者。故後人以營房名之也。

## 石鼓

邢紹銘云。距新民縣北十五里高台子山西面之山腰石壁間。有石平置。方可盈尺。下

與石壁稜角相連。成蒼黑色。擊之砰然若鼓。名曰石鼓。成於天然。

## 河神廟碑文

高柱石云。巨流河古蹟。前編已備述之矣。惟於清高宗所題河神廟碑詞。

獨缺而不載。余觀其中言遼河之沿革。頗有關於志乘。茲特錄之。或亦考古家所樂聞也。

志稱今遼河。乃古之句驪。巨柳及巨流。訛傳日以滋。合流東入海。其源頗可稽。夏霖或泛漲。

傍侵多淖泥。崇德闢坦途。王政不謀齊。百年無敢廢。修江遵前規。戊戌此經渡。命建河神詞。

及今棟宇煥。瓣香落成之。惟希明佑昭。兩京連亨遠。

噫。封禪紀續。期傳無窮。萋草荒烟。誰爲守護。岫嶼一碑。風雨消磨乎蝌蚪。歧陽石鼓。塵沙剝蝕夫蛟蠹。况此區區。再過數百年後。尙復得辨識哉。撫星宿而遺義娥。又烏乎可。

里任賢云。去巨流河城東北二里許。有山隆起。俗名北山。上有蘭若。已頽塌不堪。無足觀覽。惟右石碑一座。係清高宗撰書。字跡端好。未遭剝蝕瞻仰之下。足見一代英主。好大喜誇之雄心。亦考古者所不可忽也。

## 孝子碑

邱可名云。新民縣西街泡子沿旁。有清季建立之孝子碑一座。按孝子姓信。以賣

卜爲生。術之奇驗。不讓尹平。堂上僅有繼母。每日所得卦資。儘贖其母。極盡孝道。母性悍妬。世無其儔。雖事盡其禮。恒哭笑皆非。稍有不怡。鞭扑立至。孝子輒以膝代足。猶難獲其忻容。每日出肆。按時而歸。未常爽分刻。歸即以資市肉麵。親爲執炊。己則啗糠粃。甘之如飴。一日母臥病。醫藥無少效。孝子惶慮萬狀。憂煎欲死。而母病日沉重。羣醫束手。孝子悲痛之餘。夜間焚香潛請神佑。損己算而益母壽。一面將臂肉割下。煎以餉母。翌日病若失。母知之。流涕頓悔。待如己出。時值會子固知新民縣事。悉其事。奏聞於上。奉旨建碑。邑人傳爲美談也。

### 神榆

李芳彬云。距新民縣北二十里許高台子北山之旁。有一數百年之榆樹。高約二丈有奇。迄未枯萎。相傳該樹之影。照至村中某家。某家由是致富。雖相隔百里。尙能遙見之。故鄉間稱其謂神榆也。

## ▽黑山縣

### 黑山縣

汾陽後裔云。黑山縣原屬廣寧縣轄境。舊名小河山。上帝廟院西南隅石柱上鐫有

小河山三字可考。後改稱小黑山。在鐵路未交通以前。爲京奉間往來之大道。商旅出於斯途者極多。清光緒三十年。始設縣治。初名鎮安。民二袁總統當國時。因鎮安與陝西縣名重複。乃改爲黑山縣。鎮遠堡 尹子耕云。前明鎮遠堡城。即今之黑山縣也。天主堂火神廟後身略東。城基宛在。

城基略南。有古井一眼。井水混綠。無人汲取。其東北高阜之上帝廟。有石碑一座。該地之歷史備焉。

## 大龍灣

蓮西云。去新立屯東北五里許。有土嶺一。自西徂東。蜿蜒三里有奇。凸凹起伏。

儼如龍形。嶺盡處。土崗歧出。恍如龍首。沙河經其下。登柳邊南望。有游龍戲海之勢。故名其地曰大龍灣。

## 打虎山

尹子耕云。黑山縣東南十五里。有土山名打虎山。現爲京奉路之一小車站。其山

之得名。相傳自前明末葉。李成梁鎮守遼東。駐節廣寧。嘗率衆遊獵。至此山擊得一虎。土人遂稱之打虎山。迄今三四百年。名稱仍舊。

## 礮山古井

蓮西云。去黑山縣北五十華里。有礮子山村。爲村西有山高聳。亂石嵯峨。

故名。山之極峯。有古井一。方四丈有奇。鑿於何年。無可稽考。遊人每以石投之。約半句鐘許。



始聞水聲鏗然。其井之深可知矣。後村人恐牧豎不慎。有墜井之虞。故用方石掩蓋云。

## 無樑殿

齊繼先云。無樑殿。爲黑山縣東北隅一小集鎮。清乾隆五十二年建築關帝廟。內有一佛殿。並無大樑。係懸空架起。如扞門形。遂將該地名之曰無樑殿。

## 望北樓

尹子耕云。黑山縣西北十二里有小村。曰望北樓。村後山頂。舊有樓址遺迹。四角礎石。與殘磚斷瓦。歷歷存在。並有不完全之石匾一塊。上鐫望北樓三字篆文。雖經風雨侵蝕。尙可辨識。其村命名。蓋由於此。而其樓之建築。始於何代。與望北二字之義何所指。惜無可考。

## 過雲亭

蓮西云。距黑山縣北三十里。有一芳山。(俗名荒山子)山之西北。有一高峯。峯上平坦。約方十丈有餘。據父老云。昔蓋蘇文曾建亭於此。爲亭極高。可以過雲。故名。迄今年湮代遠。風剝雨蝕。棟梁磚瓦。傾圮無遺。僅四柱之跡。宛然尙在。

## 半截碑

蓮西云。半截碑在黑山縣城北上帝廟院內西隅之仙人堂前。此碑沉埋土壤。不知若干歲月。後修仙人堂。經工人於地內剜出。時人不忍湮沒。故重以石座樹之。碑背刻有碑文。奈年湮代遠。半爲風雨剝蝕。不能辨識。惟起首(此半截碑也)句。尙真切可識。姑誌之以備稽古家之

考證耳。

▽盤山縣

盤山

張鏡如云。盤山縣。木名四正。古有田盤先生居此。因名盤山。亦名東五台。高一千二百餘丈。周百餘里。分上盤中盤下盤。清聖祖高宗屢幸於此。建行宮曰靜寄山莊。

沙嶺城

邱可名云。盤山正東六十里。明建沙嶺城。城周二里。清兵屯沙嶺。揚言兵已薄城。王化貞遂棄廣寧。即此地也。

鎮武堡

尹子耕云。盤山縣東北有巨鎮曰高平。即前明之鎮武堡。其西街路北普庵寺內。尙有碑記可考。

邱可名云。盤山縣北五十里。周一百八十二步。明鎮武堡址。熊延弼命劉渠守鎮武。即此地。

盤蛇驛

邱可名云。盤山縣西北七十五里。有圯城一處。周二百六十步。明季清初爲驛。後廢。

## 減河

自蔭樵云。盤山縣原名雙台子。南臨渤海。北近閭山。地勢平坦。有減水河直貫縣城。故該縣街分河南河北。至其所以名爲減河者。初以渤海氾濫爲患。因開鑿此河。以減其水勢。但開自何年。不可考矣。

## 平陽橋

邱可名云。盤山縣屬平安橋處。係明熊廷弼命劉渠會師擊清兵。清兵勝。追渠至平陽橋。渠死之。

## 得勝碑

邱可名云。盤山縣東北五十二里。有碑一座。相傳清初敗祖大壽于此。遂建碑。今碑頽圮。字亦摩挲不辨矣。

## ▽北鎮縣

### 北鎮縣沿革

六山館主云。北鎮在唐堯時屬冀州地。虞舜時屬幽州地。夏商復屬冀州。周又爲幽州。秦爲遼西郡。歸遼東統轄。兩漢三國時爲無慮縣。晉爲望平縣。屬元菟郡。六朝元魏太武帝時廢望平。改入廣都縣。隋屬高麗境。唐初平高麗。置無慮守尉都護府。設守捉城。後入渤海

海國。爲顯德府。五代南北宋時。屬遼顯州奉先軍。爲奉陵縣。旋改爲閩州。及金置廣寧府。領廣寧。望平。閩陽。鍾秀。四縣。屬北京路。元置廣寧府路。先後廢鍾秀望平。廣置閩陽縣。明初爲廣寧衛。繼又改爲廣寧中左右三衛。俱屬遼東都指揮使司。大清康熙三年。設廣寧府。領廣寧縣。四年裁府。留廣寧縣。民國洪憲時。因廣寧與廣東省廣寧縣重名。乃改爲北鎮縣。其所以改爲北鎮者。蓋以西有豎巫閭。爲隋開皇十四年所封之北鎮名山也。

### 鍾秀縣故址

六山館主云。北鎮城西。北鎮廟香亭前。相傳係金元時鍾秀縣故址。但早已夷爲隴畝。城基無存。民國成立後。其地已爲建陸軍營矣。

### 高麗城

六山館主云。北鎮縣城南二十里。有村名壯鎮堡。其四圍有廢城遺跡。城垣雖頽圯殆盡。城基古甃猶有存者。南北兩面門洞依稀尙可考。據鄉老傳說。爲隋唐時高句驪之城郭。相沿爲高麗城云。

### 行宮

六山館主云。出北鎮西郭不五里。有行宮。爲前清皇帝躬祀北鎮時駐蹕之所。畫棟雕梁。倍極精美。光緒末年。余曾至院中遊觀。記有舍碧齋仰止堂等匾額。東北角猶有小山。據盛京

通志載山旁鑄有呂祖像。名曰呂公岩。俗則因其頂畫有石棋枰。皆稱之爲棋盤山。自民國成立。翠華不來。聞已改爲陸軍司令部矣。

## 望告石

郭輯珊云。北鎮縣城東中安堡小學院中。有紅色石一塊。名曰望告石。體積之大。兩人可舁之行。當前清時代。常由京特派二品以上大員致祭。臨祭之前一日。高搭彩棚。置石於中央。用淨水滌之。拭去泥沙。祭時具太牢禮。色尙黑。廣寧縣知縣及城守尉均陪祭。盛服齊明。向石展拜。爲國家大典。據鄉村中相傳。謂有名王格者。與清太祖爲小友。自明李總兵營脫逃時。曾登此石上馬。現在石上之凹處。即當年所踏之足跡。有清祭之。是數典不忘之意也。詢諸耆宿。始知當日大祭。有人親見不止一次。聽所讀祭文。則爲祭遼太祖。蓋遼太祖墓在木葉山中。已無華表可考。不詳何處。乃假設此一片石。作遼太祖陵寢所在地。望空而告。故名望告石。要之兩說皆非也。書曰望告於山川。即此意耳。

## 都察院

六山館主云。北鎮城內有名察院衙衛者。相傳爲明時廣寧衛都察院故址。然今皆建爲民宅。已無遺跡可尋矣。

## 廣寧儒學

郭輯珊云。北鎮縣立第二小學校。爲廣寧儒學舊址。校長室即昔日之明倫堂。係清道光十三年。經訓導綱興重修。匾額今尚在。旁有大興吳裕仁題聯。聯云。帝德覃敷。芹藻香分新壁水。興功廣被。魯鄒風到古鑿岡。

## 南天門

邢紹銘云。北鎮縣西北十五里。崗巒重疊。高峯挿天。有兩大石壁夾立。只可通人於其間。形勢險極。壁側刻『北鎮名山』四字。此舊謂南天門也。

## 鑿巫閭山八景

王俊才云。鑿巫閭山。在北鎮四十餘里。其中奇蹟有八。記錄於下。

大石砌 砌在閣(觀音閣)下里許。係巉巖懸石。斜覆天成。廣五丈餘。內塑羅漢像。(十八羅漢)昔人遊此者。臨景吟咏。題諸石壁。其詩云。遙空一帶鎖奇峯。幽谷超然喜肇封。十二州山星拱北。四千年事水流東。洞深瀑灑三冬雨。松老龍吟萬竅風。上有天章常跪讀。鸞笙鳳管嘆時雍。(刻在石壁傳爲韓人所書。)

聖水盆 係泉水。由砌頂(大石砌)流下。狀如瀑布。旁有乾隆御書石額。曰聖水盆。(今此額移至北鎮廟院內)下有詩云。乖崖迸水落紛紛。冬不凝冰事亦奇。應爲仙家修養法。將臨玉女洗頭時。

蝌蚪碑 在大石礮下山徑之旁。雙碑對峙。高可仞餘。寬厚相等。成立方形。至建於何時。無從稽考。以蝌蚪文測之。尙係太古之物。

曠觀亭 在大石礮東。昔時有亭翼然。憑闌遙矚。北鎮諸邑。羅列目前。惜乎頽而不修。今僅存四柱之眼而已。

桃花洞 又名小桃園。洞口桃松雜植。每當初春三月。碧桃乍放。嫩綠松針。饒有畫圖情景。

仙人影 在怪石巉巖間。於辰時望之。有人影出現。

道隱谷 在大閣西環山中。中有石洞。幽深叵測。相傳昔有道士。隱居洞中。每日晨夕。木魚聲達於谷外。故名道隱谷。

雲巢松 係蒼然虬龍。高可數丈。又名萬年松。

## 蓬萊仙境

郭輯珊云。北鎮縣城西大閣後峭壁上。有摩崖。大書「蓬萊仙境」四字。未紀

年月。亦未署姓氏。字體爲行草。澆潤可愛。相傳係呂祖亂筆。因名此處爲呂公巖。與道隱谷。桃花洞。仙人影。雲巢松。蝌蚪碑。曠觀亭。聖水盆。同爲醫巫闞山八景。登其岩上。東望則烟火萬

家。北鎮縣城也。南望則雲烟蒼茫。極目無際。西北望則羣峯高聳。怪石峻嶒。幽閱遼復。不可具狀。佇聽山鳥亂鳴。真非復塵世矣。

## 大閣

郭漢輝云。北鎮縣西十里許之大閣。鑿巫閭山中勝處也。左近有道隱谷。呂公岩。曠觀亭。雲巢松。蝌蚪碑。桃花洞。聖水盆。諸古跡。清高宗宣宗前後曾來巡幸。並有題詩。詩皆刻於石砌下峭壁上。茲錄於後。

奧宇坤維鎮。神堂碣石開。陞從參漢廻。案衍向陽恢。舜典升柴載。山經括地咳。曾從望昔度。可又負今廻。禪祀帛籙薦。威儀聊尹陪。達誠仙闕退。問景玉鞭催。暮入栗梨墅。延緣峒嵒堆。圃場崇有積。雞犬靜無猜。頻見耕荒穉。疇能保一坏。日高方覺暖。風細不生埃。盤古深成阻。牛山久已咳。寺額僧避去。屋寂鳥飛來。遂造崎嶇遍。從看草木纒。地靈自呵護。天意本栽培。寫露豁宮霍。漪澌落漩洞。柳書人作字。松抱石爲胎。初狹塵凡限。中宏造化胚。便因窮窈窕。旋命喊輿檣。話曲遼嶺逕。蒙茸藉嫩苔。懸崖飛瀑水。切顯發瑤臺。尙有芝英碣。寧妨薦福雷。武陵雖假藉。洞口試徘徊。作記徵彭澤。成詩憶楚材。寧知進士第。轉繇岳陽杯。肥豚幽棲處。翹思猶往才。雲巢真



可號。龍種是誰栽。最後中峯轟。居然一笠巖。海天惟浩蕩。心日與兼該。始遇欣佳矣。曠觀誠壯哉。安期如却掃。意不在蓬萊。乾隆甲戌杪秋東巡迴蹕躬祀北鎮因遊暨巫閭山遍歷諸勝得五言三十韻御筆。

雲烟幻化分崖岫。高秋攬轡足河秀。錯落珠璣峭壁間。一洗塵心冷然漱。空空色色大光明。妙法由來隨緣構。我來瞻理何所祈。敬祝慈闈無疆壽。更願民和歲屢豐。瓣香展敬菩提佑。高峯下礪總依然。獨愴心中不同舊。道光己丑季秋御筆。

## 石棚

邢紹銘云。北鎮暨巫閭山。其山脉綿亘數百里。其間古蹟。不可勝紀。距北鎮縣城北十二里。山勢突兀。徑曲路狹。山腰有石棚一處。棚高三丈。廣十餘丈。濶四丈。棚之成。非出人力。乃爲天然之一大石窟。其形如棚。故曰石棚。棚之上有石鐘乳下垂。中有南大士及十八羅漢之像。右旁壁中有石穴二。人可出入。內深黑不知其底。擲石子於其中。則砰然回響。蓋其內有水也。左旁石壁有古名士題詞。上刻『天然幽谷』及『四大成和』諸句。石穴之前有『古洞天』古匾。窟之中。俱無所有。

## 聖水盆

邢紹銘云。石棚之南不百武。山谷環抱。其大石台上。原有石盆一座。如五斗斛。爲聖水盆。蓋水入盆中。永無消長。山水石隙中下流。綿綿無間。入石盆而止。終年流無間斷。故名其盆曰聖水盆。蓋盆之成。成於天然。或謂宋時外寇金太祖阿古打破遼主時。得乾顯露川壕五州後。得奇石置之。說殊荒誕。五州皆屬今北鎮地。今則其盆已失矣。

## 蝌蚪碑

郭漢堦云。蝌蚪碑在北鎮縣城西大閣上。碑文爲蝌蚪字。係神禹時所建立。四千年前古物也。鑿巫闔山中之勝蹟。以此碑爲最古。惜山僧不知保存。今已沒於斷崖幽隧中矣。

## 東丹王讀書堂

六山館主云。北鎮闔山中之曠觀亭。即遼東丹王讀書堂舊址。清乾隆帝兩次詠曠觀亭詩云。山堂此口已爲亭。眼底平陵碧海濤。應是遼王貯書處。至今秀色著眸青。又云。會聞萬卷貯山亭。欲勝劉家陋室銘。榑桷縹緗消已盡。惟餘名共碧峯青。

## 仙人影

六山館主云。北鎮大閣西北。有一奇峯。類古裝美婦人首。鬢髮嫺雅。南向凝眸。惟清晨自曠觀亭觀之。形像宛似。愈觀愈真。俗皆以仙人影稱之。爲鑿巫闔山中八景之一。

## 東丹王道隱谷

六山館主云。北鎮闔山中之道隱谷。說者皆謂昔有道人隱于是。故名。

禹按石渠寶笈繪有東丹王逐鹿圖。王漁洋集有題東丹王射鹿圖詩。清高宗詠道隱谷。詩一則曰。谷名道隱非充隱。泌水洋洋樂足飢。游藝不能無後議。圖成逐鹿又何爲。再則曰。聞道深山足隱淪。與居木石桂松隣。誰知潛志樂飢者。原是前身逐鹿人。可見道隱谷。即遼東丹王學道隱居之谷也。

## 道隱谷及呂祖岩

赫穆墅云。道隱谷。因昔有賢者栖隱故名。呂祖岩。傳者謂呂純陽駐鶴之所。此二者均在今之北鎮西鑿巫闔山中。

## 玉泉

郭輯珊云。玉泉在北鎮縣城西鑿巫闔山中。玉泉寺即以此得名。泉在巖石畔。彷彿若一泓池水。西而靠山。東北南三面繞以石闌。中有鯉魚。以餅屑投之。則羣出爭食。小者二三寸。

大者尺許。食盡即攸然而潛伏。迤北峭壁上。鑿有關壯繆公像。勒馬提刀。回頭注視。人皆稱之爲老爺勒馬望玉泉。旁有斷碑。字皆漫漶。摩挲辭篆而細認之。似爲萬歷年所建。

## 萬紫山

六山館主云。萬紫山在北鎮縣城內西北隅。一名萬翠山。亦曰萬字山。山頂昔有崇泉。係明時遼王府舊址。前有東庫西庫。疑即當年王府之儲藏所。清初崇尚佛教。就故宮改建梵宮。於是山上修祖師廟。娘娘廟。崇泉寺。山下修築藥王廟。保安寺。白衣庵云。

## 翠雲屏

郭駢珊云。按盛京通志載廣寧(即北鎮)縣北鎮廟西有翠雲屏。一石方廣丈餘。下有竇。南北相通。明巡撫張學顏。題補天石三字於其上。故清高宗詠詩云。廟西峙立翠雲屏。凝盼誰能擬色形。一石丈餘太方廣。補天兩字出何經。今皆稱翠雲屏爲窟窿山。抑何失實之甚也。

## 窟窿山

郭漢揮云。窟窿山在北鎮縣城西五里許之北鎮廟院中。高僅一二丈。下有窟窿。故名。俗傳一經窟窿中偏僂而過。可終身不患腰痛。事涉神怪。殆不可信。惟山之南面有石極平。

上鐫古松一株。旁有詩並序。序曰。甲戌東巡。親祀北鎮。禮成。周覽廟中。有古松已柘其半。杈枒如鐵石。東幹鬱然蒼翠。奇致天矯。因坐其下。寫爲是圖。並題一律。九月二十四日御筆。詩曰。鎮朝門西似蓋松。半在枯幹半龍葱。凝神如見抱朴子。圖貌懸非陳所翁。立下忽疑晴與晦。眼前可悟色兮空。何當六月其根坐。讀疏乞聽謾謾風。蓋清高宗所題石也。民元以前。每年中元日。任人攀登攬勝。今因北鎮廟附近爲陸軍駐防地。廟中藏有軍用品。窟窿山下。遂不許遊人往觀矣。

## 老頭山

六山館主云。自北鎮縣西南吐雲寺。西望醫巫闾山。有一奇峯聳立。類廟中所塑之呂祖神像。斜倚而臥。頭戴綸巾。身穿道袍。束帶。左足稍屈。右手曲肱而支頤。醉眼欲睜。五

緙長髯飄於胸下。形神酷似。愈望愈真。俗皆以老頭山稱之。當春夏秋三季。一有雲煙繚繞于呂祖頭上。是日必雨。故偶遇旱年。附近田父盼老頭山戴帽。甚於望雲霓也。

## 飛瀑岩

六山館主云。飛瀑岩在北鎮縣西大閣上。怪石陡立。形勢天成。幽谷嵒巒。迴絕塵世。夏日桃花洞之水。自岩上下流。作滴瀝聲。頗有飛泉瀑布之觀。昔日聖水盆。即在此岩下承水。惜今亡矣。西首有古洞一。其深莫測。俗皆以仙洞稱之。洞口有七十老翁杜恩波所題長聯。懸於兩旁。詞極警切。可發人深省。聯云。閭山聖水古今流。看大難將臨。大災將起。爾官紳堅忍回頭。藉岩前聖水。洗洗私心。登登道岸。感應有冥機。我仙家救些苦難。瑞靄祥雲南北繞。仰天理勿虧。天良勿昧。願諸君爭強愛國。托洞裏祥雲。生生民智。阜阜民財。刻薄無久享。汝黨會積點陰功。

## 蓮花泡

六山館主云。北鎮縣西郭門外。有蓮花泡。水深二三尺。四時不乾。夏日水草怒生。並無蓮花。隔城垣與城內萬紫山。相距不過百步。父老但云。泡中昔有蓮花。亦不詳得名之所由來。愚按盛京通志載萬紫山係明遼王府舊址。明史載英宗時簡王植之。長子肯綮封遼王。正統四年

有罪廢爲庶人。其弟貴煖繼爲遼王。及穆宗隆慶二年。傳至遼王憲燾。淫虐無度。被巡按御史邵光劾廢。國除。而北鎮城則爲崇禎四年遼東巡撫邱禾嘉始築。經清乾隆年又重修者。可見當遼王時。萬紫山與蓮花泡之間。尙無城垣。萬紫山旣在遼王府中。考其形勢。爲花園。則此山麓之蓮花泡。必爲遼王花園中之蓮花池。殆無疑義。不然。一泓池水。何能和沿以蓮花泡稱耶。

## 龍潭

六山館主云。龍潭在北鎮縣西南鑿巫閭山中。係一圓潭。周約數丈。水深三尺許。色微綠。四時不涸。故尊稱之曰龍潭。龍潭宮卽以此得名。相傳明末有達官携瀛眷避難於此。使女誤在潭中澣衣。潭水立乾。嗣經龍潭宮道人川淨水將潭洗刷。隔宿水乃如初。及清乾隆時亢旱。各處禱雨無靈。盛京將軍飭有司取潭中水。建醮而雩。不三日甘霖立沛。因此將軍專摺入奏。奉旨發帑銀。乃重修北鎮廟。以謝鑿巫閭之神。事雖渺茫。鄉老至今爭傳不置。潭北有光緒初年。知廣寧縣事談廣慶題「右龍則靈」四大字。鑿於斷崖旁。可見龍潭亦鑿巫閭山中之勝蹟也。

## 葫蘆頭子溝

六山館主云。北鎮閭山大朝陽南。有名葫蘆子溝者。以溝形類葫蘆得名。中頗幽敞。猶有荒墳。觀其遺蹟。昔年似有隱君子寓此。但詢諸耆老。亦皆不知其人爲誰。聞明末

大儒。鑿問先生賀欽。曾居是山。歿後葬于光明谷。今則雲深嶺峻。已無光明谷之名。或此處即是歟。然而文獻無徵。不敢妄斷。溝口東面懸崖旁。鐫四大字。書法極嚴冷。文曰磨石映水。

## 體慧橋

郭賡珊云。北鎮縣城大南關有石橋一座。名曰體慧橋。考橋命名之緣起。蓋以清光緒戊申年夏。一雨七日。大水爲災。將該處舊有挹爽橋沖毀。水退。大街之上。南北隔絕。往來不通。紳商正擬重修。因籌無的款。尙在集議中。適有闔山接待寺住持體慧者。心存利濟。慨發慈悲。庀石鳩工。獨力修築。於己酉春三月興工。迄秋橋成。經營五閱月。所費不貲。歲事後。知廣寧縣事熊公(希存)嘉其行誼。詳其事于大府。奉上諭以該住持之法名名橋。以誌不忘。故名體慧橋云。

## 大佛寺

六山館主云。北鎮城內之大佛寺。山門外古碑對立。字蹟皆無。建自何時。已不可考。然據故老傳說。院裡斷碑中。曾有明總兵李成梁立等字。並云正殿佛座下。猶有地洞。北通崇興寺。昔年兩寺往來。常由地中行。自有僧人一去不返後。乃相戒不敢入。始將洞口泥封。查崇興寺前有双塔。盛京通志載係唐朝所建。則此大佛寺。簷瓦飛鴛。坍塌已不堪言狀。始修之年。縱不自唐。要亦必在明無疑也。

## 望海寺

郭戲珊云。北鎮縣西暨巫闔山絕頂。有古刹曰望海寺。俗傳遼太子在此出家。茲考寺之由來。係遼皇王托雲。(即東丹王)愛此山景。並晴日登峯。可望渤海。爰在此築室三楹。額曰望海。貯書萬卷。歌嘯其中。及卒。即葬於此。後人就其書室。踵事增華。建爲梵刹。沿川其書室之舊名。遂稱爲望海寺也。

## 闔山四大古廟

六山館主云。北鎮縣屬暨巫闔山中。有著名之古廟四。在南曰大蘆花。(海雲觀)在北曰老爺嶺。(聖清宮)中間東坡曰靈山。(接待寺)西坡曰千家寨。(元通觀)佛殿輝煌。橫亘山半。各有僧道若干衆。廟產頗多。老爺嶺爲清初大俠王梁出家之所。大蘆花爲梁弟王棟出家之所。靈山係崩山老祖成佛處。俗皆謂老祖後來轉生清順治帝。千家寨則在明末有千家來此避難。皆獲安全。故有斯名。至今山腰遺有春米廢碓。足爲昔有人家之證。余未曾至各廟游觀。據父老傳聞如是。姑妄述之而已。

## 青巖寺古佛

郭漢輝云。北鎮縣城西南五十里。暨巫闔山中。有名青岩寺者。多年之古刹也。上院正殿老母佛像。係鑿石爲之。頭向右傾。相傳當大殿落成之日。羣工人見石佛入殿。



及門不能進。正躊躇設法時。工人中有戲之者曰。老佛若一歪脖則可入。言已。見佛像之頸即歪。羣工人從容昇入。置諸佛座上。祇驚老母顯聖。皆肅然起敬而出。忘請老母正脖。因此遂成歪脖老母。故至今尙歪。二月十九日香火會。士女隨喜者極多。咸以爲奇異。寺爲何年所建。有無碑碣可考。余因未曾至寺中游謁。不得而知。然父老爭傳此爲實事。言之鑿鑿。並云寺後數十丈高之峭壁上。尙有斧一把。衝於石縫中。亦不知該斧何以至人所不能到之處。此實古蹟中之一段神話也。

### 北鎮廟石額

邱可名云。北鎮廟門壁上有明嚴嵩書額一。

### 觀音堂石額

邱可名云。北鎮城東街觀音廟內。有石額一。爲唐廚遲敬德所書。

### 石像

邱可名云。北鎮西間山青巖寺大殿內。有觀音石像一尊。高七尺餘。額部稍偏。爲明朝所建。

### 保安寺古碑

邱可名云。北鎮城西北隅保安寺內。有碑一座。所刻年月。均被風雨剝蝕。

細察之。有遼東諸城字樣。故知爲遼時所建也。

### 北鎮廟古碑

郭蕤珊云。北鎮縣城西之北鎮廟。未詳修自何年。金碧輝映。極其壯麗。

正殿神像。有謂爲堯之子丹朱。亦有謂係鑿巫閭山之神祇。顧名思義。兩說以後者爲近是。院中有青綠色石碑一。聳立于西墻下。與他碑迥乎不同。碑高僅五尺餘。中央有直徑四寸許之圓孔。經風雨摧殘。已與沒字碑無異。人多以穿心碑呼之。不知爲何代之古物。或云是大唐武則天時所立。亦無從證實。

## 白衣庵蒙文碑

郭漢墀云。北鎮縣城內西北隅萬紫山下。有東庫西庫。二庫僅隔一牆。相傳爲遼金遺蹟。當日爲武庫。抑爲金庫。已不可考。西庫今名保安寺。東庫今名白衣庵。皆爲出家人離塵絕俗之所。但白衣菴之禪堂左側有地洞。其深莫測。數十年前有僧人法名淨洗者。素稱膽大。曾秉燭作地中游。因懼燭盡。旋出。據云似向西北方去。空無所覩。自該僧圓寂後。始將地洞之門。用巨石封閉。去洞門東北不百步。正對白衣菩薩。殿後有蒙古文字碑。臥于深土中。惜無通蒙文者。見之亦不知碑上均係何詞。要之此碑爲元代古物。殆無疑義。

## 東丹王墓碣

郭漢墀云。北鎮縣西二道溝南。有望海寺琉璃寺。鑿巫閭山絕頂處也。兩寺之間。山勢稍平。荒草亂石中。有斷碣已仆於地。上鐫大遼東丹王耶律貝之墓字樣。摩挲可辨。

名宿劉東閣會親見之。民國初年。碣尚存在。今則有無不得而知。

## 李炳甫德政碑

郭戡珊云。北鎮縣南門外有德政碑一座。聳立道旁。經其下者。皆呼之爲李令碑。蓋因碑爲李大令炳甫所建者也。考李令。諱景祥。字書雲。別號炳甫。浙江寧波府鄞縣人。清光緒乙未進士。丁酉署理廣寧縣知事。壬寅以勞卒於任。在官五年。所行德政。不勝枚舉。中經庚子之亂。主持外交。鋤暴安良。尤爲有膽有識。古稱循吏。李大令當之實無愧色。歿後邑人不忍沒其政績。爰勒此碑。川垂不朽。

## 節孝坊

六山館主云。北鎮縣治中安堡村西。有清光緒初旌表馮姓節婦。奉旨建立之節孝牌坊一座。聳立道旁。額曰彤管揚芬。當中聯云。奉堂前二老晨昏。孝心差慰亡夫志。教膝下三男成立。苦節羣誇慈母賢。兩旁聯云。節可勵冰霜。幾等共姜守義。孝原超巾幗。宛同陳氏養姑。背而兩旁聯云。懿訓寓深心。慈母無殊嚴父。褒榮出盛典。節婦不減忠臣。當中聯云。廿九齡矢志靡他。截髮守貞完節義。三十載操心獨苦。斷機課學著賢勞。據耆老相傳。此聯語係錦州名士苑午樓先生所撰書。

### 乾隆題聖水盆詩

郭漢墀云。北鎮縣城西。北鎮廟西院胡仙堂裏。有長方石一塊。彷彿如碑形。斜臥于東墻下。石上橫鐫聖水盆三個大字。下題七言絕句詩一首。詩曰。垂崖迸水落絳絲。冬不凝冰事匪奇。應爲仙家修養法。將臨玉女洗頭時。末署乾隆御筆。詩詞雋逸。筆走龍蛇。因石藏于屋中。未經風雨剝蝕。今尙嶄新云。

### 大石槽

六山館主云。北鎮縣公署西墻外。有極大石槽一面。清時凡訴訟者。皆登之以喊冤。據故老閒談。謂縣公署係明李成梁總兵府故址。當年總兵有駿馬二。號大青二青。曾繫此槽上餵養。或云總兵府在北關帝廟。此處係廣寧衛巡撫衙門。石槽爲巡撫馬號之遺物。兩說不知孰是。今則石槽之北半。因不易遷移之故。已砌于民宅墻中。該街因之即名爲大石槽衙。

### 馬都督留題

郭戡珊云。北鎮縣西大閣上。小閣西門外。北面數丈高之峭壁上。有磨崖大書「壁立萬仞」四字。旁刻嘉靖秋。末署右都督馬永書。經風雨剝蝕。字蹟雖尙可辨認。亦間有殘缺。蓋自留題以迄於今。已歷有年所矣。

### 張驃騎將軍墳

六山館主云。北鎮縣城北二十里。有明驃騎將軍張鳳儀墳。墓碣上鐫

奉祀元孫朝珍朝璣。字蹟尙可識。據皇朝經世文編載張朝珍字玉笏。康熙四年爲安徽巡撫。會上詳定刑律疏。旋遷湖廣巡撫兵部尙書。張朝璣字溫如。官至福建總督。封一等男爵。

郭戩珊云。北鎮縣治分稅關北。有張家墳。墳上有明驃騎將軍張鳳儀神道碑一。係康熙十九年三月立。都察院左都御史吳正治撰文。又墓碣三。一鐫皇清誥封光祿大夫太子少保尙書史都御史張九思之墓。一鐫皇清誥封光祿大夫太子少保兵部尙書兼都察院史副都御史張應種之墓。其他鐫明指揮同知張應明之墓等字樣。奉祀者均爲朝珍朝璣。

## 齊監察御史墳

六山館主云。夫北鎮城南約八里許。有明四川道監察御史齊宗道暨其夫人秋氏之墓。神道碑。係嘉靖二十四年七月立。碑文首句爲奉天承運皇帝勅曰。字蹟尙清楚可辨。石人。石羊。石豬。石獅各二。亦皆兩兩對立。惟松楸荒落。祭掃似已無人矣。

## 汪洪淵墓

六山館主云。北鎮縣東北十八里。有汪家墳村。以村旁有汪道台墳得名。相傳汪道台諱洪淵。世居山岩口。前清嘉道間。由知府署理河南道。以積勞卒於任。當年靈柩還鄉時。跋涉極艱。僱槨夫多名。途中費許多周折。始抵家山。故鄉村中至今尙傳有欲抬槨。上岩口。一抬

半月。還供煙吸之童謠也。

### 李總兵疑塚

六山館主云。出北鎮縣北門外約十里許。有四石人。兩兩相對。高可丈餘。傾斜欲倒。鄉老皆謂其地係李成梁疑塚。相傳成梁以衰老之年。膺總兵重任。因輕開邊釁。深恐歿後獲罪。當病革時。囑家人備櫬五。秘密含斂。發引日。五門皆出喪車。成墳五座。以故李總兵之骸骨。似在北鎮城邊。究不知葬於何所。或又謂真靈並未出城。實埋於總兵府中。即今之老爺廟後之土阜是。亦無從證明。事隔多年。其他四處疑塚。早皆夷爲隴畝。遺蹟毫無。惟此城北者尙依稀可考也。



義

縣

### 義縣之沿革

馬玉言云。唐虞時代。分冀州東北爲幽州。舊錦州府地爲其所統。故義州屬焉。夏商時代。復爲冀州所屬。周初爲朝鮮地。後屬燕。秦爲遼西郡。漢置累縣。後爲州城。其東南爲無慮望平二縣。晉省無慮縣。元魏太武帝時省望平。入廣都縣。隋屬高麗。唐平高麗。在其

地置平岡守尉都護府。設守扼城。入渤海國爲顯德府地。趙宋時。地屬遼。置宜州崇義軍。領弘政開義二縣。又置成州。領同昌一縣。共屬中京。遼季韓慶民任宜州節度使時。金闡母拔槎柅山。下宜州後。廢成州。改宜州爲義州。始修土城。領弘政開義同昌三縣。此義州之名所由來也。元滅金。以義州大寧路。而耶律楚材耶律辨材王珣諸人。輩出於此。明洪武時何浩。囚金之土城而重修之。永樂宣德年間。楚勇登輒。乃廢州置衛。與廣寧衛並屬遼東指揮使司。崇禎四年。遼東巡撫邱禾嘉築廣寧義州二城。於七月興工。年餘而成。滿清崇德五年三月間。派鄭親王濟爾哈朗貝勒多鐸率兵修義州城。駐劄屯田。順治初年。以此地界內附之察哈爾王。爲公主湯沐邑。康熙十六年王叛。護衛辛珠。赴京告變。派兵討平之。以辛珠有功。授爲城守尉。辛珠創修尉署。(俗稱西衛門在今東街路北)又設巡檢署(俗稱東衛門即今之縣公署)屬廣寧縣。雍正二年。改屬錦州府。移府通判治之。十年設管邊同知。十二年升爲義州。仍屬錦府。乾隆四十三年。浙江徐之寬知義州。奉敕修城。五年工竣。咸豐十年。賊人王達劉珠犯城。(適值臘月會令當商將月利由三分減爲二分。嗣後每逢臘月贖當。當商皆以二分收利。除此仍收三分。故諺云。王達留下二分利。民國初年仍行之。余多年未

歸。不知今仍舊否。足見當日之賊。勝於制民之官也。曾用石礮。以補城之缺口。同光年間。時有流寇。散匪潰兵。擾亂義境。鄉間多被其害。而市民尙得少安。悉恃城爲護符。故邊地之城池。猶有利於人民也。民國初年。袁政府時代。又改州爲縣。此義縣沿革之大略也。

## 開州

張乃復云。義縣南四十里。有村名開州者。爲遼之故址。昔有城垣。年久頽塌。遺址猶存。城南有水池。週百餘步。水深莫測。隆冬不凍。相傳爲海眼。鄉人不時掘得古錢古鏹等物。

均是高麗遺物。始知確係當年高麗一巨城。是村居民。仍以四圍城內外稱焉。

## 老虎關

孫繩武云。老虎關。在義縣南。建設年代及古名稱。皆無可考。今廢址猶存。

## 八塔子

任朝發云。義縣南三十里許。有山陡起。蜿蜒如龍。相傳唐時有堪輿家觀其山勢。知爲龍脈。特修八塔以鎮之。塔建於山之首。每塔相距七八丈。均是巨石堆成。高丈餘。雖有碑碣。字跡不辨。故近人稱爲天然物也。

## 望海山

任朝發云。義縣南四十五里。有山聳立。登其巔。回首下視。徑曲如羊腸。人豈而馬寸。山巔平坦。極目四顧。南望黃海渤海。浪疊如山。汽船穿越。如在目前。望海之名。緣山



於此。致東望闕山。西瞻錦朝路。北顧開州。尤其餘焉。

## 大佛寺之柱

那惠忱云。義縣大佛寺正殿東首之柱。相傳建此寺時。此處曾有參天大樹一株。經匠人將枝葉稍爲戕伐。即川以爲柱。余於民國十二年。曾遊於此。見此柱之底。似有樹根。亦異事也。

又該寺居中之大佛。大指及食指間。無論人之肥瘠。能容一人出入。謂係佛法無邊云。

## 塔臺子

趙連第云。義縣城內西南隅。有古塔一座。高可五六丈。相傳爲唐代所建。至今數百年。仍巍然矗立。

## 聚星書院

馬玉言云。義州城內。東南隅。舊爲儒學聖廟文昌宮地。聖廟今仍其舊。惟儒學文昌宮則非昔比。文昌殿後。儒學署南。有上房三間。左右廂房六間。即聚星書院舊址。致聚星書院。創於清光緒初年。非講學之地。乃課士之所。其制月試兩次。以初二十六爲期。生童均得與試。生即俗稱秀才。童即文章。考生者有超特壹等之分。考童者有上中次取之別。名列超特上中者。分等給獎。名曰膏伙。故寒素士子。藉此上進者。頗不乏人。蓋義界邊鄙。文學不甚發達。自

有聚星書院。文風丕振。人才輩出。提倡者爲知州白福培。其欲皆由地方紳富捐助。作爲基金。存於商號生息。以其年利作獎金。在昔亦稱鉅款。今按之不過萬圓耳。其有益於學風如此之鉅。清光緒末年。廢科舉興學堂。聚星書院。遂改爲兩等小學之講堂。今之縣立小學校。其極東之課室。前卽文昌殿。彼卽聚星書院也。欲聞其詳。請閱聚星書院實錄。

(附記聚星書院實錄詳記書院始末但藏於舊紳董之手不肯傳佈)。

## 永名樓

趙連第云。距義縣東北七十里。有永名樓。相傳該樓爲古代某名宦夏日納涼之所。樓上有石匾一。上鐫「永名樓」三字。今該樓僅餘四壁。已作村人之秫稽棚矣。

## 魏忠賢生祠故址

趙連第云。義縣城內。有魏家衞衞者。相傳宋宦官魏忠賢曾造生祠於此。今其故址尙存。而祠內之房屋。早已坍塌無餘矣。

## 王珣墓

馬玉言云。義縣南區。距城三十六里。村名中李恒溝。附近有王珣墓。考王珣。元人。少遊淩水。(大淩河)曾得寶刀。鋒利異常。後仕元。任武職。以寶刀禦敵。每戰輒勝。說者以爲神物。卒因戰功卓著。封鎮國上將軍都指揮使。爲元名將之一。迄今荒塚猶存。殘碑尙在。不識

寶刀猶留人間否耶。

## 賀欽墓

馬玉言云。義縣東區。距城六十里。有村名雲盤嶺。數家烟火。四面雲山。有古賢之遺蹟。即有明賀欽之墓也。按明紀。賀親。字克恭。定海人。以進士授戶科給事中。遷參議。好學。手不釋卷。明賀公似非義州人也。豈原籍定海。而後服官東省。致仕未歸。卒於義州。而擇葬於雲盤嶺乎。據鄉先生言。大凌河北岸有四方台。四方台之南。清初猶有賀公釣魚台。即賀欽當日遊釣之所也。後因河水北侵。台即淹沒。兩相考証。台雖沒而墓猶存。賀欽殆隱於義州者也。

## 高麗墳

趙連第云。距義縣東北八十里。有高麗墳二。前曾被該地農人王某挖掘。入內探視。據王某云。墳內有石室二。皆以方磚鋪地。儼然神仙洞府。最可奇者。內有柏木槽一。槽內滿盛似水非水之液體。不知究係何物。此外並有古銅供器及石碑等物甚多。考之墳內碑文所載。乃係高麗某將軍之墓。吁。似此古墓。不能保存。豈不大可惜乎。

## 金牛洞

張乃復云。義縣南四十五里大凌河西岸。有洞曰金牛。相傳昔有黃牛。晝出夜伏。土人見之。初爲農家牛。牧於山坡。久之。詢諸附近。均無此牛。始相聚尾追。牛遂遁入洞中。洞

口有方石如桌。上有蹄痕。深約寸餘。至今猶存。因以金牛洞名之。洞之深淺莫測。無人敢入。惟大凌河水。時有暴漲。沿岸居民。深懼水患。而金牛洞附近諸村落未受其害。咸謂金牛有以默佑也。

## ▽興城縣

### 興城縣沿革

王崑翹云。考今興城縣。爲唐禹貢冀州地。虞幽州地。商孤竹國地。周屬

燕國。秦屬遼西郡。漢海陽縣地。或云徒河縣地。晉慕容廆置集寧縣。唐柳城縣地。改瑞州。遼濕州平海軍海陽縣地。屬來州。金海陽海濱二縣地。屬瑞州。元瑞州地。屬大寧路。明初本廣寧前屯中屯二衛地。永樂初。大寧淪沒。而虹螺山始入外境。于是利州之墟。荆條之陽。戎馬馳驅。歲相抄掠。總兵巫凱都御史包懷德上狀。乃割二州之地。于曹莊湯河之北。建衛治。賜名寧遠。統中左右二千戶所。城爲宣德三年所建。門四。東曰春和。南曰廷輝。西曰永寧。北曰威遠。清初改衛爲州。因名寧遠州。清末改州爲縣。因改名興城縣。並考命名興城之由。其詳亦可得而說。志載寧遠州南有興城廢縣。遼聖宗置嚴州保肅軍治興城縣。屬錦州。金皇統三年州廢。以縣屬興中府。全遼志

興城縣。在寧遠城南四十里海中覺華島。或云在今州南十五里桃花島上。故址猶存。是今興城之名。當淵源於興城廢縣之名。且今興城之城。乃明清寧遠衛之城。而非興城廢縣之城。縣名雖屬相襲。城址絕非相沿者也。究古者毋眩焉。

## 興城

張鏡如云。興城古名柳城。又名寧遠衛城。週圍凡八里。清初某年增修。其附近處有土城一。牆基傾圮。半皆闕爲良田。據耆老云。明袁崇煥建以防敵者。彼時清太宗以十三萬勁卒攻之。不克而還。

## 花爾營

寇鴻鈞云。興城西北七十里。有巨村名花爾營。相傳爲唐季高麗花爾將軍之營壘。前時築有土城。現在村前尙有牆址丈餘。及城門石基之遺蹟焉。

## 溫泉

張鏡如云。興城縣東二里許之溫泉。水湧如沸。善治疾病。夏秋之交。前往沐浴者絡繹不絕。相傳清乾隆帝東巡至此。是時寧遠州知州強上林奏請上至溫泉沐浴。帝從之。因和珅與之有隙。誣其有謀害意。上怒。立貶之。據父老所述如此。遂書其概略焉。

## 文廟

長青子云。興城南文街廟。係明宣德三年寧遠總兵巫凱奏請。蒙旨允建。略具雛形。

景泰四年修葺之。康熙二十二年。府尹高爾位捐俸重修。較前可觀（以上見盛京通誌）至道光二十八年。知事強上林大加擴充。於是宮崇聖大成殿。泮水橋。櫺星門。東西廊廡。左右庭庫。戟門神路照壁圍垣。及以名宦祠。鄉賢祠。禮門義路無不備。廟之周共一百八十餘丈。前後三層大院。當時極稱輝煌。惟後無人修理。至十二年經前直隸省長王孝伯。捐資修葺。十三年大功告成。費用不數下萬。皆出王氏一人之私囊。計正殿二偏殿四。庭庫二。即碑碣門路橋牆鐘祠亦皆煥然一新矣。

## 天寧寺

邱可名云。興城縣城內北街之天寧寺。創自漢代。相傳先有廟。後有城。年月不可考。山門前有鐵柏旗杆一對。高四丈餘。已逾千年。豎立不朽。現歸僧人智善私有矣。

## 湯泉寺

賈宗誼云。寺在興城東南四里。寺後有湯池一。周圍砌以石。水從地中湧出。如湯沸然。能療人疾病。東牆外有隕星石。相傳墜自天。清沈釋堂先生題詩云。首山南麓有湯泉。煖

霧騰空亂曉煙。野寺荒原題句少。一泓靈液自涓涓。

## 圭峰觀

寇鴻鈞云。圭峯親在興城西海蓮花島上。島四面環水。面積狹小。約十五方里。荆棘縱橫。海鷗群集。相傳清初吳三桂之幕府某。耻降異族。遷居於此。托跡黃冠。建觀島上。闢

地耕田。不與世通。僅收生徒。傳其衣鉢。現在島內土地。均招佃耕種。因土質肥沃。收穫甚豐。增築房舍。租與漁人。所有房地各租。均爲觀內香火之用。春夏之間。耕者耕。漁者漁。大有世外桃源之概。

## 魁星樓

富璫善云。考興城於明代爲寧遠衛。宣德三年時。守臣巫凱。始建斯城。城高三丈。周八里。爲門四。其東南隅有魁星樓。係強上林宰斯邑所建。登其上層。東瞻三首。羣山參差。南望渤海。巨波滉漾。先時是樓已頽敗。近爲王孝伯出資重修。煥然一新。垂斯樓於不朽焉。

## 鎮國牌坊

長青子云。興城縣南街崇然矗立者。鎮國牌坊也。分南北兩座。相距約十餘丈。北座石紅色。高五丈有奇。闊三丈餘。計三層四柱。柱每面闊一尺五寸。第二層北面刊『元勳初錫』四字。南面刊『登壇駿烈』四字。第三層兩面之字相同。爲其四世官爵名。文爲橫行。每行之爵位相同。共四行。詞爲『誥贈榮祿大夫接剿總兵官左軍都督府左都督祖鎮祖仁祖承教祖大壽』。二中柱鐫聯兩副。北面爲『松檟如新。慶善培于四世。』。琳瑯有赫。賁永譽于千秋。』。南面爲『桓赴興教歌國倚干城之重。』。絲綸錫朝隴口隆銘鼎之褒。』。南座色灰白。高闊於北座同。惟層較高。柱較矮於

北座耳。第一層南面有『忠貞胆智』四字。第二層兩面各刻『四世元戎少傅』六大字。第三層兩面同刻其世爵。暨行。每行四字。詞爲『誥贈曾祖榮祿大夫提督遼東左都督少傅祖鎮』。『誥贈祖父榮祿大夫提督遼東左都督少傅祖仁』。『誥贈父榮祿大夫提督遼東左都督少傅原任遼陽協守副總兵左軍都督僉事祖承訓』。『欽差經理遼東掛征遼前鋒將軍印總兵官左軍都督府左都督少傅祖大壽』。旁層模糊。有祖大成祖大弼字樣。頂尖築一石塔。屹立其巔。兩牌坊之上頂。每面皆有豎匾。中刊『玉音』二字。坊上刻有年月日。惜不能得其真切矣。坊下之靠柱獅。尤爲偉大。至若盤龍人物。均極精巧。今人之行其下者。無不驚昔之巨工也。

王步瀛云。興城城內南街。有石牌坊兩座。南北對峙。橫貫街中。俗稱頭道牌坊。以石爲之。高可三丈。其上刻有盤龍。其下各有石獅一對。梁柱皆絕大無倫。工程浩大。雕刻極精。非晚近所能工作。迄今三百餘年。毫未損壞。可想見古人之建築矣。故老相傳。此牌坊係明朝爲祖大壽所建。崇禎時。祖氏兄弟。總兵關外。鎮守寧遠。(今改興城)功勳卓著。特建此坊。並刻有御製對聯以褒崇之。

## 祖大壽墓

孔質騏云。明將祖大壽。輔袁崇煥。鎮守寧遠衛。(清易寧遠州現改興城縣)饒勇



善戰。爲國捐軀。英豪駿烈。於今稱之。歿時葬於本縣城西之佟家屯北。距城三里許。歷今數百年。松柏蒼鬱。蔓草叢生。其墓地勢平坦。東北而與長流河相毘連。某夏。山水暴發。河流氾溢。佟家屯村。附近之廬墓禾稼鐵道。冲毀殆盡。人畜之與河伯爲伍者。尤難指計。而水道竟繞行祖墓。毫末波及。相傳因葬祖時。曾受皇封。故有冲了佟家屯。冲不了祖家坟之語。又謂墓有寶珠。故能避水。語雖無稽。理有可信云。

## ▽綏中縣

### 綏中

王嵩翹云。綏中縣城。明中後所故城也。宣德三年。置前屯衛中後千戶所於此。城周二里有奇。門四。東曰潤和。南曰歌薰。西曰說澤。北曰寧瀾。今存東西南三門。當北門處爲上帝廟。城南門常陽懸木匾。顏曰關外第一縣。清光緒三十年設。翹客綏中時。曾登臨其上。全城景物。俱呈眼底。想立匾之初。必取與天下第一關相映成趣之意也。

### 綏中縣城

邱可名云。查綏中城古名紗帽城。僅有東西南三門。不記何時建築。由前清

乾隆四十七年重修。至四十九年工竣。改爲中後所。至光緒二十八年設治。改爲綏中縣。東臨六股河五里許。正當官道之衝。

### 前屯衛城

邱可名云。綏中西五十里。係出關之孔道。前明曰瑞州。至前清改爲前屯衛城。今僅存北面土壕。城裡財神廟內有碑碣一甬。鐫有瑞州二字。尙模糊可考。

### 烏煙城

陳海林云。綏中縣城西三十五里許。有烏烟城一座。城凡兩層。內爲磚築。外爲土壘。週圍約二里許。據鄉老云。係秦代所築。用以抵匈奴。就近有火烟墩數座。烏烟城爲墩台之首云。

### 頭台子

邱可名云。綏中縣西三里。有台一座。高三丈四尺。週十五丈餘。上有石匾一塊。鐫有寶山台三字。係前明崇禎癸丑年所建也。

### 二台子

邱可名云。綏中西十里台。高三丈餘。週圍十五丈。相傳係前明時代冀州總兵戚繼光監修。

### 老龍頭

潘雅俠云。綏中縣東南。距城三里許。有故墟在焉。周圍約十餘丈。以磚灰砌成。

相傳爲吳三桂疑墓。今故址雖可辨認。而知之者已甚少。土人名其地爲老龍頭。想因地脈故歟。

## 懸陽洞

周如海云。綏中縣城西三十里許之三道川關村。村西有懸陽洞。洞門懸於山空。

太陽東昇。光先照耀。洞下有石房一座。出自天成。非人工所鑿。刻有多數道人守望。其洞形上圓下方。內塑佛像多尊。洞中另有一小洞。內有石鑼石鼓。因洞深黑。不敢冒險探視。後洞門有藥王神像。像前有天井地井。天井之水。直流地井。井傍蒼松二株。昔有人鋸之。汁如血。一般迷信者謂爲神樹。不敢動搖也。

## 華巖寺

邱可名云。綏中前屯衛城內之華巖寺。係前明隆慶年建築。可稱古寺。其餘衛城內雖多有古寺。無蹟可考。

## 碑碣

邱可名云。綏中縣西二十里沙河屯官道北。有古碑碣一。橫鐫「來賓縣裡映」五字。下有東至海顯界。南至海二十四里。西至州百三十里。北至阜俗縣黃縣塞所。俗傳係宋代縣城之地也。

## 葉家墳

邱可名云。綏中西三十里。葉家墳官道北之墳。立碑二甬。一鐫嘉靖丁未。明備禦葉廷璽。一正德六年。明鎮國將軍葉廣。其餘則模糊難辨也。

## 朱總兵墳

邱可名云。綏中西百里。荆條河屯。有前明墳墓一座。係明守遼東都督挂五將軍印朱梅之墓。碑碣鐫有明崇禎十三年派員致祭字樣。

## ▽ 錦西縣

### 錦西

孫繩武云。錦西原名江家屯。於前清光緒三十二年七月。設撫民通判。是年九月改爲錦西廳。民國成立。遂改爲錦西縣。

### 安昌縣與虹螺縣故址

孫繩武云。安昌縣。在錦西縣北十里許。基東有一塔。塔下有金大定間碑。至今尚在。繩武今夏旋里省親。曾詣其下。見斷碣殘碑。字跡模糊。不可辨認。碑座最屬。亦被人斲斷矣。

虹螺縣。在錦西縣東北五十里。屬三區界。考遼金元三史。無此二縣名。惟唐書平高麗。置百縣。或係其遺址。今書南昌峴虹螺峴。

### 塔山屯

孟憲政云。塔山屯。距錦西五十餘里。原屬錦州府。清季錦西廳改爲錦西縣。因

籌款不足。故割歸錦西。據村老云。是屯係高麗古城。屯旁西邊有磚塔。南面渤海。北負白太山。西據瓦寺山。故俗呼塔山屯。今屯邊尙有殘餘塊磚可尋。

## 網戶屯

王步瀛云。網戶屯在縣東六十里許。北及東距女兒河均五里許。清錦州副都統。置網戶於此。專打女兒河鯽魚。用作貢品。故名。

## 王子殿

王步瀛云。王子殿在小虹螺山東南角。有石台一座。若殿庭然。據稱金時某王子率兵駐此。故名。

## 寺兒堡

王步瀛云。寺兒堡在縣南四十里許。爲縣境八鎮之一。據稱唐時爲高麗重鎮。屯兵於此。現在城基猶可考。

## 鷹守堡

王步瀛云。鷹守堡今訛稱鷹守堡。在網戶屯東半里許。清初爲八旗打鷹場所。置有官守。用作貢品。故名。

## 柳條邊

王步瀛云。柳條邊在縣北爲奉熱天然之界限。士人因之有邊內邊外之稱。爲中國北部之古蹟。在關內爲長城。在關外爲柳條邊。昔人所謂限內外而防患者也。有山海關起。東北經

新台門（興城屬）入縣北境。再由縣北境松嶺門經清河門（義縣屬）法庫門（法庫）伊通門（吉林伊通）蜿蜒如帶。止於吉林舒蘭縣屬之松花江。柳條云者。在昔於邊牆上皆插柳條俾日久成林。川資屏障故也。其牆以土爲之。高可四尺。清時於新台門松嶺門等處。均設防禦。專司其事。始尙認真辦理。嗣因日久弊生。相率敷衍。有柳條邊之名而無其實。當光緒中年。盛京將軍派員驗邊。各該防禦均臨時僱人。以長不及五尺之柳木細棍。插入邊牆。以爲搪塞之計。事竣。皆賣民間燒火。余兒時猶及見之。今則滿清云亡。此制已廢。牆雖傾圮。邊基仍在。亦歷史家考古之一助也。

## 沙河堡

王步瀛云。沙河堡在縣城南三十五里許。故老相傳。高麗遼金均爲屯兵之所。村南關帝廟牆上。尙有石刻沙河堡三字。村北有台。高可二丈。據稱係點將台。今改作真武廟矣。

## 塔山

王嵩翹云。錦西縣塔山。明寧遠衛中左千戶所故地。舊有城。今毀。遺迹不存。惟所存古蹟尙多。臚列如下。（一）南門額石。爲巨石一方。顏曰海寧門。據云即故城之南門。明天啟年間建。石今在村東小廟附近。（二）西門額石。顏曰安平門。據云即故城之西門。明崇禎年間建。石今作關帝廟階石。已折成兩段。（三）義倉額石。明崇禎年間遺物。現存村西小廟附近。（四）三官廟

碑。偃伏關帝廟內。村人每烹茶於其上。今夏拂塵視之。文首行云。重修三官廟碑記。末行云。萬曆三十年歲在乙巳數字。誠古物也。惜碑文班剝。不可全識矣。(五)靈覺寺碑。村北有靈覺寺。通志作菱角寺。實誤。原寺頽毀。祇餘豐碑。考其文。知清初有杜姓者建靈覺寺。康熙三年立此碑。(六)關帝廟鐘。明崇禎六年造。重可數百斤。發聲頗宏壯。據云鐘舊在靈覺寺。後移置於此。(七)鑼鼓達天。村西有嶙峋青石。起伏地表。石上白畫呈篆文日字形者三處。咸若天然生成。舊傳石入夜發聲。作鑼鼓響。惜今已闕然無聞。舊說不得證實矣。

## 虹螺山

王步瀛云。在錦西縣東八里許。高五千英尺。有大小虹螺山之別。俗稱大虹螺不大。小虹螺不小。山脈自西而東。蜿蜒百餘里。從各方觀之。均成形。土人因有八面威風之稱。就奉天言。以余所見。雖不及醫巫閭山及千山之高大秀麗。然亦相去不遠。山中寺廟林立。風景絕佳。以小寺插溝龍泉寺望海寺(因登寺可望南海故名)朝陽宮等爲最古。小寺插溝等。均邑紳王國鎮出資倡建。產業亦衆。有水晶石及各礦。因地處邊徼。交通不便。騷人墨客。足跡罕至。故不著名。故老相傳。山爲高麗及遼金時代之要塞。有高麗城烽火台可資印證。大虹螺山北之安昌縣。小虹螺山

北之虹螺縣(爲縣境八鎮之一)均爲遼金時重鎮。土人每於地中得有古印。此外古蹟頗多。惜代遠年湮。頗難詳考焉。

## 虹螺晚照

王步瀛云。小虹螺山在大虹螺山之東。與錦縣接壤。每當夏季雨後。夕陽西下時。山影射入小凌河內。景色頗佳。名曰虹螺晚照。爲錦縣八景之一。

## 葫蘆島

王步瀛云。葫蘆島在縣南八十里許。據聞燕太子避秦。唐太宗征高麗。均至此。島長十餘里。南臨海。狀若葫蘆。故名。與興城屬之覺華島。距離三十里許。海水環繞。爲不凍港。港口絕佳。清季曾闢商埠。今擬作軍港。即著名之連山灣也。

## 小烏雲山

王步瀛云。小烏雲山在寺兒堡西南二里許。遠望山峯。高插入雲。至上則極平。坦。寬長約六七丈。據稱唐時爲高麗某王避暑之處。山西南角有古井一眼。深可四五丈。迄今千年。並未傾圮。可想見古人之建築矣。井之北有菜園。方圓二丈許。高麗韭菜。春季仍生。山東北角有高麗房數間。雖年久坍塌其牆基猶存。房後有天然立石一塊。上有石碑一座。係唐時戰勝高麗之紀念碑。故老相傳。碑載大唐某年某月。始尙認識。嗣因風雨摧殘。字蹟遂糊糝難辨。現被牧童樵子



推倒。碑已破碎矣。山腰有石棚一座。寬長可七八丈。高可二丈。東北有小廟。代遠年湮。倒塌不堪。棚後有高圍坎。方圓可十餘丈。在昔每逢大雨。山洪暴發。往往冲出石棺及古錢銅鍋等物。友人婁鳳山爲寺兒堡人。兒時嘗遊此。舉以告余。故誌之。

## 女兒河

王步瀛云。女兒河在縣北一里許。源出熱河凌源縣五頂山。東流山興城屬之新台門入縣界。再由縣北境折而東南流入海。以產穿時鯽魚著名。穿時云者。即魚之兩眼相通之謂。積時爲貢品。味極鮮美。鄉人王廣聚。言河源有小泉十數。遠望若列星。東流二里許至某處。河忽縮小入地不見。再由某處流出。始汪洋浩蕩。入縣境。遂成巨川。談者道其地甚詳。惜忘之矣。

## 響水河

劉鵬嶽云。去錦西縣東二十里。有村曰響水河。因村西有一小河。河內多巨石。每逢河水漲發。水激石。聲甚響。故名。據父老言。清初虹螺山西岔溝崩裂。洪水橫流。冲出巨石。隨水入河。及水落。巨石停留河內。至今夏季。山洪暴發。水聲激石。震人耳鼓。雖在平時。其流亦淙淙也。

## 王殿溝

劉鵬嶽云。去錦西東二十里之虹螺山。其山陰有溝曰王殿溝。相傳爲高句麗曾修

王殿於此。故名。現在尚有舊日殿址。地極宏闊。在下望之。頗似石砌戲台。其上坎井甚多。常發見極長大之骸骨。數年前山下牧童。曾在石隙中掘得古鍋一口。下蓋銅錢甚夥。多爲崇寧重寶等字樣。究係何代之幣。予不得知。現予家向有此錢多枚。係當時向牧童乞得者。

### 黑魚溝

王步瀛云。黑魚溝在縣西南三十里許。故老相傳。爲新民水患者。柳河。在河作祟者黑魚。該魚即由此溝遷出。清同光時。鐵路未通。縣境大車。往來吉林運貨。每過柳河。輿夫必拈香跪求佑護。余兒時常聞此語。

### 暖池塘

孫繩武云。暖池塘在錦西縣北三十里。爲縣屬之一鎮。街南有小河一道。其水清潔游魚可數。源出該鎮西八里西邊屯水泡。隆冬不冰。清晨視之。熱氣蒸騰。俗名暖池。該鎮遂得名於此。

### 井上廟

孫繩武云。錦西縣街舊縣署前。有古廟一座。座下係一井。童時經過其處。恒以小石戲投其中。砰然作聲。據鄉耆云。廟建井上之故。係因常有溺鬼出現。故建廟以鎮之。

### 攔馬牆

王步瀛云。攔馬牆在王子殿西。方圓可二十餘丈。爲王子養馬之所。其牆基猶可考。

## 梳妝樓

王步瀛云。梳妝樓在小虹螺山頂。狀若平台。高可三丈。有石級可登。據稱爲遼時某王后（或云蕭太后）避暑之所。嘗梳洗於此。故名。

## 踏脚石

（一名老婆脚石）劉鵬嶽云。踏脚石在虹螺山陰之牆縫（溝名）間。形略方。面積約四丈餘。上有極大民粧婦人足兩個。據聞係霹靂小便時所留之之痕跡。復有尿坑甚大。溺餘滴灑之跡。亦宛然尚在。尤可異者。其尿流之白鹼一片。雖風雨剝蝕。歷久不變。遠在里許。即可望見。究係何人遺跡。鄉村父老。傳說不一。有謂古有仙女名虹螺者。曾降於此。遺跡殆其所留。荒謬之談。殊難憑信。但其痕跡。絕非人工所造也。

# ▽安東縣

## 九連城

赫明林云。安東縣東卅里。有九連城在焉。城建於唐代。背山臨水。依帽山之支脉。俯瞰鴨綠江之下流。建築屏列。連環九城。故該地因以名焉。城爲古代國防重鎮。亦江防之要隘。前清初年高麗入貢。是地猶爲必經之路。光緒初年。開闢安東。因將中心移於沙河鎮。（即安東埠

也）該城因而失修倒坍。短垣數尺。尙復遺留。至今過其地。不免使人具今昔之憾焉。

盧致吾云。安東縣北二十五里。有古城一。（建築年代未詳）名曰九連城。相傳原有九城相連。或謂城之九而環拱。二說孰是。迄今皆無可考。城後山上有崇碑二。乃日俄戰後。建以誌戰蹟者。城墻無磚石。盡以沙和黏土所築。因年代湮遠。多半傾圮。所餘者高僅五六尺之遺址耳。

編者按九連城在安東縣東北境盧君云縣北疑誤。

## 九連城與三道浪

崔鳳五云。九連城與三道浪。爲安東沿江（鴨綠江）上下重要之區。

三道浪爲安東出入汽船之門戶。地在縣西。三十餘里。爲一山脈。自北向南。蜿蜒至江沿。突然而止。勢如削壁。形如龍頭。土人云。昔有風鑑稱龍飲江水。必有他異。遂於龍頭起廟。以鎮壓之。即今日山頭之關帝廟也。

九連城。在縣東二十五里。爲金舊城。蓋安東一帶。金屬海蘭路。（舊作合懶路或曷懶路）史載金韓魯。於海蘭甸築九城。與高句麗對峙。以爲戰守之地。甲午之役。日敗清軍於九連城即此。

## 沙河子

赫柈墅云。安東。舊稱沙河子。以其北有沙河之故。其地唐置安東都護府。清設

縣。鴨綠江繞其前。元寶山在其後。安奉鐵路貫於中。水陸交通。爲奉省各大商埠之一。

## 虎耳山

李廣堯云。去安東縣東北三十里。有虎耳山形勢突兀。與朝鮮之舊義州遙遙相對。

左扼鴨江。右控九連。爲東省咽喉。中外要衝。川武必爭之區也。中東一役。宋宮保敗績於此。日俄開釁哥薩克由茲北竄。今凡中外人士。經斯憑弔。莫不咨嗟感歎云。

編者考奉天全省輿圖作虎兒山。

## 老台古碑

寧金鏞云。距安東縣二十里。緩河尖村東偏。有小山崛起。高三丈許。頂極平坦。而積約十數方丈。土人呼爲老台。己丑夏季。村民建廟於其巔。掘出斷碑一。僅存大明萬曆四字。餘者不可辨認。所紀何事。無可攷矣。

## 興京縣

### 興京縣

陳沛如云。昔清太祖自赫圖阿喇。在縣南蘇克素護河喜哈河之間。清肇基居此。歷三傳而至太祖。始遷興京。遷都於此。稱曰興京。原設直隸廳。清末改府。民國又改爲縣。屬奉天

省東邊道。城西十里許有興京舊城。清時有副都統駐在。城內舊有宮室。今已頽廢。然尙有遺跡可攷也。

## 老城

李芷馨云。興京西卅里有老城。爲清之發祥地。築土爲城。周圍約四里餘。有東西南北四門。城外古榆參天。一望卽知爲數百年物。城內居戶零落。非復清時盛況。一望故宮瓦礫。徒增禾黍之感耳。

## 古盛

李芷馨云。興京縣西三十里老城之皇寺內。有鐵盛一。式如帽。緯約三尺。重約四十觔。相傳係清初武人所用之物。憶余遊皇寺時。曾同友人陳王二君。合力擎起。冠於友人趙君頭上。盛左右及趙君之兩肩。陳君戲放其一邊。而趙君之右臂已負痛不堪矣。於此一盛。可想見古人身體之魁偉也。

## ▽鳳城縣

## 鳳城縣沿革

李北辰云。鳳城在奉省之東偏。曠山荒野。阡陌鮮通。當清初時。隸岷僅

數百人。(見順治四年張尙賢陳奉天邊地情形疏)迨康熙後。始遷滿蒙漢兵民。闢田野。修城隍。以是四民漸興。泊光緒初年。始設廳。治轄州縣。後安奉鐵路築成。陸路交通。央費五方。至民國。改廳爲縣。以安奉路之便利。四民麇集。外僑紛至。今昔情形。是以大異。攷鳳城沿革。當唐虞之世。禹治水成功。定九州貢賦。屬青州域。(按古時青州之域極廣)兼今奉天遼河以東之地。至後漢青州刺史始專限臨淄也。)

虞舜分十二州。以青州之地極大。因分東北遼東等處爲營州。皆置牧縣。(鄭玄云舜以青州。越海分置營州。遼東之地安東府宜禹貢青州之域也)。

夏合十二州爲九州。復屬於青。而仍堯之舊制。

商分十二州屬於營。葳貊據之。仍舜之制(按今鳳城及朝鮮之江原道皆當時葳貊地也)。

周併營州。與幽州合一。是爲箕子封屬國。葳貊屬焉。

戰國秦伐燕。燕王喜走保遼東。

秦滅燕。造蒙恬築長城。擊走東夷。置遼東西二郡。屬遼東焉。

漢初仍秦置。爲燕王盧綰封地。後綰亡。入匈奴。爲衛滿所略。至其孫有渠武帝。遣將討滅之。置樂浪玄菟真番臨屯四郡。仍屬玄菟。

三國初。公孫度據遼東。自號平州牧。縣境屬之。度傳至孫淵。魏司馬討平之。合爲幽州復屬。

晉分幽州置平州。(按今奉天朝鮮之地。俱在其內)。而縣境屬之。及東晉爲慕容廆所據。傳至孫德稱帝。二世而亡。

宋齊梁陳。不在封域。俱無制置。

北魏置營州。領遼東。而縣境遠在南部。實爲高麗奚部所侵。

北齊時爲高麗地。北周仍爲高麗地。

隋屬高麗慶州地。

唐總章初平高立。置安東都護府。後渤海大氏據之。爲東京龍原府地。亦曰柵城府。領慶鹽穆賀四州。仍屬慶州地。

五代後唐仍屬渤海東京。同光二年。遣王子入貢。天成三年。降契丹地。入於遼。



宋不在封域。是無制置。

遼初隸東平郡。(按太祖神冊四年得渤海遼陽故城完葺之置東平郡)開州鎮國軍天顯三年。改隸南京。(襲大氏五京之制升東平爲南京)開泰三年。置開封府遼軍。尋改開遼縣屬東京道(按太祖十二年改南京爲東京)

金屬東京路。(即遼之東京金仍稱其名)遼府石城縣。

元至元六年。置東京總管府。(即今之東京)二十五年改遼陽路屬焉。

明洪武四年。置定遼都衛。八年改爲遼東都指揮使司。治定遼中衛。(即元之遼陽路)而縣境屬焉。

(按明史定遼中衛注言東有鳳凰城。在鳳凰山東南。成化十七年築云云。又按顧祖禹讀史方輿紀要。

司東南三百五十里。其相近有鳳凰山。山上有壘石古城。可屯兵十萬衆。唐太宗征高麗。駐蹕於此。

明成化十七年。以朝鮮使臣還國。道經山下。爲賊徒所掠。奏乞於舊路南。新開一路。可便往還。

於是撫臣王宗彝奏諫鳳凰山前後實爲出沒之要途。距途東三百餘里。其間土地廣漠。舊無烽墩。請自山之東北至驪陽間。築墩台廿二座。距山之西北一十五里。舊有故城址。於此有一堡。名鳳凰城。

距城西北六十里。曰斜列站。宜立一堡。曰鎮寧堡。距城西北六十里曰新遠堡。於堡南增築一堡。曰寧夷堡。各置軍馬。爲鳳凰城聲援。則自遼陽直抵鮮朝烽堠聯絡。旣拒行旅竊掠。亦便朝鮮使臣往來。朝議改鎮夷堡爲鎮東。寧夷堡爲鎮東夷。除悉從之云云。與明史相合。惟明史言城在鳳凰山東南卽誤。清天聰八年。設兵駐通遼堡。崇德三年。移置於此。康熙二十六年山京撥滿蒙漢兵實遼。設鳳凰城。光緒元年。改爲鳳凰直隸撫民府。卽鳳凰廳焉。

民國初。沿清制。二年遂改廳爲鳳凰縣。三年因與湖南鳳凰縣同名。奉令改稱鳳城縣。

## 來遠城

赫柸墅云。來遠城。位於鳳城東南。爲隋唐屯兵之所。

## 湯伴城

赫柸墅云。湯伴城。實古城也。在今鳳城東六十有五里。但其建設年代。已失考矣。

## 古婆速城

赫柸墅云。鳳城東北百餘里。有古婆速城遺址存焉。據鄉老云。婆速城。卽

博索府。

## 古石城

赫柸墅云。鳳城鳳凰山中。有古石城。一名開州城。實高麗故城。唐貞觀二十一

年。遣牛進達等自萊州渡海擊高麗。曾拔去其石城。

## 鎮江城

李北辰云。鳳城東八十里。明天啟元年。毛文龍襲安奠入鎮江城。即此城。今被水淹沒。僅餘北門。(今名土城子)

## 山陰古城

林大樹云。城在鳳凰山內。週圍二十餘里。東西門各一。東門通高麗邊門。西門達鳳凰城十里許。城據天然之險。若令少數兵固守。萬將莫敵。古時爭戰。莫不據城禦敵。唐王征東時。此城不免血戰。門裡路西。石上鐫共和再造四字。民國五年朱蓮溪所紀。路東有石。可容數人。坐下鐫憇石二字。大如斗。歟沒入泥中未詳。

## 青城子双城

赫田林云。古青城子。位於鳳城縣西北青城子村。距城一百二十里。東界大嶺。西連雙頂溝。南瞻青涼山。北枕萬兩河。萬山環抱中。有大小古城二。大城建於平原。小城建於西山之巔。兩城相距五里。勢成犄角。據鄉老言。此兩城悉爲高句麗所建。惜年遠失修。頽圯不堪。僅存城基丈餘。清駐總兵於此。南門舊址尚在。城中居民。常於耕種時得古銅器。悉爲高麗之物。南門外尚有古石一方。蓋係門額。石刻青城子三字。實爲該村命名之所由來。

## 高麗城

王益亭云。鳳城西南五十里有老平頂者。上有高麗古城一座。城基巋然。惟代遠

年湮。不能悉其何時建築也。

## 高麗城及曬馬鞮

赫柵墅云。鳳城鳳凰山東麓。亂石縱橫。堆積道周。數里不絕。

非高麗城故址乎。復前行。岩石嵯峨。其稍平者。上具蹄痕。傳者謂唐薛仁貴當日曬馬鞮處。其蹄痕爲馬所踐也。

## 古城及古井

赫柵墅云。鳳城山城子山間。與大堡後田中。皆有古城基。又吉星園子上。

亦有古土城基三週。且有古井三眼。均不悉爲何代遺址。

## 柵城

李北辰云。柵城即柳條邊。周千九百餘里。共十七邊門。在本縣境內。僅三百餘里。

亦稱老邊牆。有門二。曰鳳邊門。曰驪陽門。今二門俱廢。鳳邊門爲安奉鐵路驛站。相傳唐貞觀時。

高麗大將莫支離蓋蘇文等爲區分疆域所築。起自邑南窟窿山。北行至鳳邊門（高麗門）折而西行。

過開原至山關。今柵已化爲邱墟。尙有土壘可尋。

## 愛哈邊門

赫柵墅云。鳳城北百二十華里。有愛哈（清語愛哈琉璃也）邊門在焉。亦稱驪

河邊門。

## 青苔峪堡

赫柵墅云。青城子。即有明青苔峪堡。在今鳳城西北百三十里。其東十里。猶有城基宛在。相傳數年前。鄉人曾於城中掘得殘碑。第有萬曆年號尙可辨云。

## 湯站堡

赫柵墅云。湯站堡。置於明。在今鳳城西南七十里。蝸蝓溝境內。

## 爨陽堡

赫柵墅云。鳳城東北。百五十華里。有古城曰爨陽城。爲明清互市之區。但明日爨陽堡。清曰爨陽城也。

## 鞭桿溝點將台

赫明林云。鳳城縣西百二十里之鞭桿溝。有點將台在焉。台築磊子溝萬山中第一山嶺。高二丈。週築石牆。就山之形勢爲之。方可數丈。相傳唐太宗征高麗。駐兵於此。砍山中之木。製馬鞭萬餘桿。故該村命名爲鞭桿溝。

## 明鏡台

赫柵墅云。鳳城南范家山。有巨石一塊。常明將亡時。常發奇光。至夜益明。百里可見。故一般航海家。重之。視如今之島嶼燈塔然。及清帝繼位。光忽不見。然仍少名。今視其石質。與常石等耳。

## 古小塔子

赫柵墅云。鳳城西南三十五華里之山嶺。有方形塔一。合磚石砌成。每面寬

僅五尺。以其體微。故曰小塔子。夫是塔。建於何代。詢之父老。無有知者。視其首層已殺。餘基不滿六尺。草木茂密。荒蕪不堪。固知其去今已甚遠矣。

### 定軍山

李北辰云。鳳城北五里有定軍山。俗名發家嶺。古名發箭嶺。唐征高麗。薛仁貴會駐兵於此。

### 月明山

赫明林云。鳳城縣西百二十里之鞭杆溝村。有明月山。山週里許。河臨其下。每於河中望月。遊人登河邊之高石。望水中之明月。青山綠柳。映水如畫。最奇者。一人立觀。水中常現三人之影。相傳山中有黃仙現形。伴遊人觀月。故一人三影。迄今月明山老靈仙之盛名及奇驗。遠近馳名。是以該山命名爲月明山。

### 老蹲臺

王益亭云。老蹲臺山。在鳳西一百二十里之黃花甸西首。山蹲踞如人形。山頂有老松一株。松下有石棋盤一具。棋子數枝。字皆模糊不可辨。惟二馬字稍清。相傳昔爲神仙對奕處。

### 山羊峪

李北辰云。鳳城北八十五里。多大山峻嶺。怪石起伏。可謂金城矣。明嘉靖二十五年。置鴉鶴關。今名山羊峪。

## 駱駝嶺

赫柵墅云。駱駝嶺。在鳳城南百三十里。特產白石。石質堅。爲碑最佳。

## 高麗脚

王益亭云。鳳南邊門二里許。有古城一座。相傳爲唐時蓋蘇文盤據之地。城東西北三面。皆高山環繞。惟正南僅有一口。廣五丈餘。砌以巨石。形勢險固。後爲薛仁貴所破。遂棄城而逃。城中有突起一小峯。怪石參差。峯頂有一石臺。上有人脚及牛蹄印各一。土人傳爲高麗所存之遺蹟。因謂之爲高麗脚云。

## 石靴

邱可名云。鳳城盤龍山南面。有石靴一雙。狀如朝天。

## 孤松生風

林大樹云。松生山陰石間。每當天氣炎熱時。樹下必有風。游者多往納涼。石壁題有詩句云。世路險如此。崎嶇不易行。孤松盤地起。亂石倚天生。杯酒重陽日。烽烟兩國兵。我來臨絕巘。海宇盼澄清。光緒甲辰。錢塘張錫燮。

## 巨石出雲

林大樹云。鳳凰山內靈官廟側。險石矗立。高出天空。與雲爲伍。石鐫『直上青雲』四字。大清光緒八年。歲次壬午。孟夏上浣。山陰屠立咸書。

## 櫃子山石棋盤

赫柵墅云。鳳城南百三十里。櫃子山嶺。有石棋盤一具。石棋子數十

枚。詢之父老。謂係古高麗遺物也。

## 鳳凰蛋

王元昉云。鳳城縣之鳳凰山。山上有石。其形橢圓。宛如巨卵。即俗所謂鳳凰蛋是也。推之動搖。取之不下。旁一巨石。上有箭孔。相似爲唐薛仁貴所射。

## 古塔溝

赫柅墅云。鳳城南境。有四層古浮圖。創修年月失考。上干雲霄。旁靠深谷。故其地今以塔溝名之。

## 大湯溝

赫明林云。大湯溝位於鳳城西北百二十里。帽盔山在其左。關門山在其右。青涼山位於前。青城子在其後。廣潤百里。誠本縣名勝險要之區。相傳唐代時。經高麗闢爲市場。故南山之峯。有古城遺址。今人呼爲高麗城子。短垣斷磚。歷歷可考。由此益信古爲市場之不謬也。溝之中部。北山之陽。有溫泉。此爲大湯溝命名之所由來。

## 創佛溝

林大樹云。清初有張嫗。素持齋。一夕夢金甲人與語曰。吾埋沒此處有年矣。請假我一椽。當爲汝福。醒以語人。好事者如其處掘之。得大小銅佛像二十四尊。餘皆鐵石質。並得碑一。文已模糊。僅識明萬曆四年。乃建安峯寺。名其處爲創佛溝。今廟中銅佛。僅餘一尊。鐵石者尙



存。疑皆明代遺像。

## 龍灣

林大樹云。鳳北五十里有水灣。長百餘步。寬三丈許。水深莫測。西首山石高立。有窟半出水面。咸謂此係龍居之所。故有龍灣之名。每遇亢旱。禱雨輒應。夏日初晴。羣魚游躍。巨鯨伸頸。波紋翻動。人坐東岸竊觀。禁聲屏息。以爲神游也。

## 唐井

赫柸墅云。鳳城東南。百有餘里。浪頭嘴子山頂。有古井一眼。俯視暗黑。不知其深幾百尺也。據鄉耆云。鑿始於唐。故曰唐井。且其畔有鐵索一條。一端伸入井底。有好事者。力曳上端。重逾巨鼎。方數丈。已喉燥唇焦。口鼻生煙。喘汗交作。憊甚少息。鐵索即自行下墮。其奇也如斯。

## 古井

邱可名云。鳳城背陰寺廟有古井一眼。天明水清。天陰水暗。

## 古石橋

赫柸墅云。古石橋。在鳳城二區鞞轡領迤東。已斷爲數段。鄉人排列河中。以利渡者。今地因之而名。

## 明代建築之寺觀

赫柸墅云。鳳城全境。觀寺廟閣。建於有明者夥矣。而其尤著者。

如邑西闢枝溝。泉眼觀與泉峯觀。(嘉靖五年同建) 大侍溝青華觀。(萬曆三年建) 蠅蛄溝。寶峯觀(萬曆二十年建) 鷄冠山。善佛寺。(弘治九年建) 丁字峪。安峯寺。(萬曆四年建) 剎溝。蛟龍寺。(今改保安寺萬曆四十年建) 背陰寺。朝陽寺。(萬曆年間建) 邑內。上帝廟。(弘治十三年建) 邑南。三義廟。(前明建) 他若鳳凰山。觀音閣。(萬曆十八年重修) 韻態河。雙山島。兩寺院。(萬曆四十四年同建) 有一非建自有明者耶。此其略考也。

## 朝陽寺

邱可名云。鳳城鳳凰山之朝陽寺。建於明萬曆間。寺址方圓四十二丈。門前石階四重。寺旁立碑。係萬曆廿年豐原第先生秉官修隱時修建。

林大樹云。朝陽寺在鳳凰山裡。相傳爲高麗城東廟宇。唐太宗征高麗時。燬於兵燹。其地並無當年遺蹟。惟朝陽寺碑云。唐時古刹僧奏請重修。此寺原址宏濶。縱橫數百步。今傾頽荒穢。其鐘架鼎座碾磨等尙在。井一眼。已淤。石廟一所。額曰清虛宮。未詳建於何年。

赫柎墅云。朝陽寺。未悉何代所建。但據傳聞謂唐軍征東時所焚。其故址在今鳳城鳳凰山中。

## 龍泉寺

赫柎墅云。鳳城西。六十餘華里沙里寨。龍泉寺內。有古碑一座。文字模糊。雖

其左上有大元二字。然非審視不辨。據鄉老云。此寺至萬歷二十一年。已重修五次矣。

## 双塔子双塔寺

赫墅柵云。鳳城南雙山子嶺。嘉靖十三年各建一塔。故土人遂以雙塔子呼之。今西塔已傾。塔之後。有寺院。曰雙塔寺。正殿三椽。東西廡各三楹。初建歲月失考。現尙有萬曆十八年。四十三年。兩次重修碑記存焉。

## 斗母宮及大安寺

赫墅柵云。鳳城鳳凰山中。斗母宮。與其左大安寺。(又名大寧寺。今改紫陽觀)同建於明代者也。

## 鵝鵝窩之唐廟

赫墅柵云。鵝鵝窩村。在鳳城南百一十里。因昔年多鵝鵝來巢故名。該村北有古剎。曰聖水宮。老碑傾斜。其面背皆斑剝脫落。文字難辨。故其建築於何代。不可知也。但據鄉老傳云。其工興於李唐之中葉。故亦曰唐廟。

## 古石佛爺

赫文博云。鳳城西第八區石佛爺村。距城一百四十里。清初崇德間。村民在河中掘得石佛一尊。高八尺。而現金色。耳目完全。村民昇之東山之陽。建廟祀之。由是金苗暢旺。村人益神之。迄今香火不絕。該村因之得名。

## 古銅佛及鐵羅漢

赫柸墅云。鳳城頭台子。朝陽觀。建自乾隆四十三年至四十六年。鄉民掘地。得銅佛三尊。鐵羅漢二尊。形貌古峭。決不類近代所製者。查此觀近來兩廊傾頽。而正殿尙可支持。內僅存一鐵羅漢。其餘一鐵羅漢。及三銅佛。不知何去矣。

## 龍鳳寺大鐵像

赫柸墅云。鳳城南大街中心。龍鳳寺。建於明。中日之役。毀於兵燹。相傳當寺木建時。有挖獲者。負七尺鐵像。自遼外來。至此小息。不得復動。遂募資建寺。及落成呼之爲龍鳳寺云。

## 攔馬牆

赫文博云。攔馬牆子。位於鳳城縣西一百里之青涼山村。東枕帽蓋山。西界青涼山。南靠大王廟山。北倚大崗。萬山環抱。峭壁轟聳。中間陡現平原一區。方圓四十里。古牆由西南山麓起點。橫貫東北河邊爲終點。望之如長城。但年遠代遙。頽圯不堪。僅餘牆基。一二丈不等。但悉用石築。並無磚瓦。據鄉人云。唐帥敬德征東時。在此休兵息馬。因恐軍馬逃逸。故在山口築此橫牆以擋馬。名爲攔馬牆云。

## 元碑

赫柸墅云。鳳城鳳凰山之深壑陡澗中。有元碑聳立。雖其面厚蒙蒼苔。審視之。尙有

大元等字樣可辨。

## 明碑

赫柎墅云。鳳城縣屬西南境。二道洋河左岸。有古碑一筭。蔓生苔蘚。字跡模糊難辨。然確知其爲明代所遺。

## 白雲觀古碑

赫明林云。距鳳城縣西百里青涼山村。有白雲觀在焉。觀位於青涼山之南巔。山高萬丈。峭壁千仞。而於亂石峻嶒中。陡現平原。週可百餘丈。白雲觀即建於此。觀前有碑一座。因年代遙遠。字跡湮沒。僅有大明天啓九年重建數字。尙約略可辨。則此廟之建自明代以前可知也。山之北峯下有石洞一。上鑄大字三個。文曰羅汗洞。旁書貞觀年鑄。洞有矮碑一座。殘缺不堪。僅存敬德二字可認。相傳白雲觀始於唐太宗征東所建。洞係某道士苦修之所。迨唐王在此山休兵。見道士詫爲異人。故題其洞額曰羅汗洞。並命敬德在南巔鳩工建廟。因山高齊雲。故命名爲白雲觀焉。

## 紀念碑

邱可名云。鳳凰三官廟有紀念碑一座。係明萬歷十五年參將陳加寵建。其斗女宮內。有明萬歷二十五年。定道指揮崔應魁建之紀念碑。

## 小石島怪樹及明碑

赫柎墅云。鳳城南百八十里。有小石島。孤立黃海中。石壁嶙峋。蒼松蒼鬱。清靜絕倫。塵飛不到。登其巔。南望張鹿二島。西視大孤山。北觀北井子。東有邱陵環繞。形勢天然。景色壯快。能使遊者。心神泰然。飄乎欲仙。以故每屆赤帝肆威。士女目之如桃源。絡繹而爭至也。由是島東麓盤徑下。有怪樹一章。生長遲極。數十年來。圍僅盈握。高僅三丈許。皮紋深裂如櫛栝。質輕軟若樺。所怪者其葉今年爲梨。明年爲栗。三歲如槐。逐年改易。未嘗同也。今枯已二載。當其生日。雖居近累世。航海半生者。皆不識其爲何樹。故竟無確名。惟土人賜以怪樹之號焉。其上則寺院林立。碑碣塞道。其一半陷泥土中。上有明萬曆三字。尙稱完璧。餘不可辨認矣。

## 石碾磨

邱可名云。鳳城鳳凰山朝陽寺內。有唐時石碾磨各一。寺內並有古井一眼。深十餘丈。現歸畢信清保管。

## 唐石人

赫柎墅云。鳳城龍台河陽大佛寺。有八尺石人一。冠盔衣甲。手荷長槍。作武裝。純石爲之。孤立殿庭中。詢之僧人。謂係晚唐故物。惜無碑碣資稽考也。

## 摩崖

林大樹云。鳳凰山陰城門外。去仙人橋里許。泉聲汨汨。石壁前撐。題有俯視清流四字。極合情景。下列民國五年六月東邊鎮守使馬韻潭摩崖。

## 斗母宮摩崖

林大樹云。鳳城邑南斗母宮。後有石壁。鑄出類拔萃四字。雖久經風雨剝蝕。然筆畫古樸。頗有可觀。下列陳濟清書。惟年月日模糊不辨。聞陳列職軍門。曾於同治九年。剿匪到鳳。留題於此。其石後十六字云。劃開天險。盤亘金甌。峯巒高聳。京垓春秋。此係民國五年康德峻所銘。

## 古刀砲印及元印明礮鼎

赫耨墅云。鳳城任某。昔年於石頭城下。掘得古刀一把。重十八斤。因鏽蝕無用。已售於鋼鐵公司矣。又邑東胡氏家。藏有古砲。生鐵鑄成。重三十斤。爲當日犁得於田中者。又有去邑東草河而浴者。曾得古銅印。印爲沙水磨滌。金光眩目。重九兩。其文曰。別部司馬。字體近隸書。又某氏於鳳凰山麓田中。犁得銅印。重一斤三兩。其文曰。萬戶之印。字篆書。(按元置諸路萬戶府爲管軍官又有海道運糧萬戶府掌每歲海道運糧事故此印爲元代物無疑現藏鳳邊門康某家)又邑內山東街。關帝廟中。有一生鐵礮。上鑄天啓元年。五月十六日九字。並人

名甚夥。(按關帝廟建於有清康熙間。鑿爲明物。非修廟後所得歟)更有銅鼎。重五十四斤。三足。於雙環下。鑄大明宣德四字。款在腹上。口下文曰。康熙甲寅。欽命特授奉天府尹。廖文山敬獻。鳳凰城東門外。關聖帝君寶鼎。朝鮮國。朴格造。三十五字也。(按鼎爲明器。廖府尹有事朝鮮。其大臣李某所贈來時。曾寓鳳城關帝廟。酬神奉獻。故復造字留名。及甲午之亂。鼎失去。明年張今坡先生自藩購得之。仍寄還廟中。但頂蓋已無矣)

編者按林大樹君所述與赫君同不齊

## 鳳凰廳聯

赫作民云。鳳城縣。因城南有鳳凰山而名。毋庸贅述。惟本縣古稱龍原。初

隸屬於岫巖州。迨同治間設鳳凰廳。同年並設東邊兵備道城守尉等官署。由是東邊開放。南關安埠。東設寬桓各縣。因而本邑漸見興隆。歷任同知。最清廉者首推樊公公佩。公爲科甲出身。清廉自持。在大堂上自題一聯云。所判案非皆允也。貪一毫枉法。唯恐子孫有報。不愛錢。敢曰廉乎。存半點徇私念。定知鬼神難欺。讀其詞。足見其人之耿介矣。

## 崔致祥墓及古樓址

赫柎雲云。鳳城縣南。沙金廠。有崔致祥墓在焉。墓前有豐



碑聳立。上刻明故進士崔致祥之墓九字。墓之側有古樓址一座。週二丈餘。高丈許。純以石砌成。一故其地又有樓房溝之稱。

## 古烏馬山

赫柎墅云。烏馬山。在鳳城南。依藍蘇境內。傳者謂當二百年前。人烟稀少時。有一烏色神馬。時常出現。嗣後居人漸稠密。馬亦不知何去。但烏馬山之名遂大著。

## 古五馬山

赫柎墅云。鳳城南。黃海濱有山。東西魚背而列者五。當百八十年前。尙在水中。每巔各有神馬一匹。其後人烟稠密。不知徙於何方。以故今人稱爲五馬山焉。

編者考地圖並無烏馬山五馬山之名不知圖中之疏漏與抑後人始名之也

## 黑老婆石

林大樹云。鳳城縣屬鬩陽城南荒地。有奇石一塊。頂平。有天然坐痕手跡。游人多往觀。相傳爲昔年晨間。有一極黑之老婦。身依石上。手置坐傍。作憩息狀。見者擬協同往視。轉眼無踪。該石痕印。疑係黑老婆所留。石即因此得名。

## 黑魚汀

林大樹云。鳳城東北之佟家村。依山帶水。別有奇景。村南爲鬩河流域。山陰水停。深若無底。內有黑魚。名曰黑魚汀。秋初斜陽半墜。清風徐動。碧波折紋中。有圓光滉漾。如

月印潭。俄而千百齊出。小若羣星。聞方人言。謂照魚望斗。登山觀之。猶有海市蜃樓。且謂黑魚已成神。京市古玩。會託帶書云云。要之漁人均不敢犯。尤奇者。南山彬水。見有參苗。入山遍覓不得。中外人士。多往避暑也。

## ▽寬甸縣

### 寬甸縣城

趙君堯云。寬甸於清光緒二年設治。其縣城爲明萬歷三十六年所築。南門曰

安阜門。東西門名。今無可考。牆高三丈有奇。其基與表。皆以石爲之。上部與裏爲磚砌者。磚長大而厚。性堅如石。周圍八里。北無門。街市之北。有過街樓。磚砌懸門。東西行人出其下。城北牆基雖立。未及落成。明社已屋。考之明史。總兵劉綎駐守此城(寬奠)以拒清。爲明代鉅鎮可知也。城外南去半里。有點將台。爲明將之閱兵場。歲久傾頽。遺址尙存。北二里許。有明季王將軍墳。余爲小學生時會經過其間。碑文年事等。已不復記憶。北五里有高山。名娘娘頂子。(今改名崢嶸山)廟宇清潔。爲道家之誦經地。西二里黃椅山。山色黃。形如椅。故名。昔士人宋志清題廟壁詩曰。

安阜門修自大明。而今依舊作寬城。三韓畫界江相隔。六甸重山路不平。點將石荒風幾度。過街樓冷月三更。娘娘頂子仙竇地。夜半鐘聲分外清。

## 六甸

趙君堯云。六甸者。蘇甸長甸永甸坦甸寬甸赫甸是也。蘇甸無城。其餘均有城。惟縣城較諸城高大宏壯耳。每甸相距各二十五里。連之成弧形。爲明邊疆駐兵要塞。

## 蘇甸

高心德云。蘇甸村。爲寬甸縣六甸之一。山勢起伏。居民零落。原有古城。今已頽圮。每行其地。榛莽荒穢。瓦礫滿目。令人頓生滄桑之感。北有墩台。高聳入雲。攀登其上。則鳳山在望。鴨水興懷。旁有大石二。並皆圓滑可愛。

## 長甸城

李煥烈云。長甸城。爲明時所築。縱橫各一里。四面環山。今已雉堞墜廢。其前怪石如豬。清泉潺潺。繞城南流。距城西百餘武。有點將台。相傳昔時點將所。高二丈餘。寬畝許。蹊徑甚微。頗陡絕。登時須留意。否則必躓。

## 永甸城

李煥渤云。距寬甸縣治五十里。有永甸城。爲明朝所築。雖雉堞圮毀。而屢經墳修。至今仍巍然可觀。城西數百步。有奇峯。作圓錐形。蓋狼煙臺也。高聳天際。雲霧出沒於其間。

峯巒起伏於其下。草木蒼叢。又多怪石。突怒偃蹇。負土而出。有若牛馬熊羆之狀者。不可勝計。枕山麓一寺。爲清代所建。曰三聖觀。老松隱蔽。三門嵯峨。簷牙歷歷。頗壯觀瞻。

### 坦甸城

李國香云。寬甸內坦甸。距邑廿五里。爲通安之衝。城扼於右。峻山屏於左。城之西北隅。有石碑。蓋與茲城同時所建。迄今閱數百年。仍超然屹立。未改舊觀。而城郭圯毀。業莽荒穢矣。

### 寬甸城

徐成九云。寬甸石城。建自萬曆三十六年。周八里。西北兩隅。雉堞已毀。內有土城舊址。年代莫稽。維新後。就土城東南隅闢公園。建亭於其上。以供士夫學子之遊覽憩息焉。

### 烽火台

寧金鏞云。寬甸南百里東洋河口西偏。有烽火台一。以土石壘成。高丈餘。周圍數十尺。相傳爲明萬曆時所築。

### 狼煙台

胡鳳枝云。去寬甸城東北隅數里。有一小丘。其峯爲圓錐形。不甚高聳。相傳爲狼煙臺。今已廢頽。其旁有積磚數堆。頗碩大。亦古物也。

### 六品台

李庚堯云。武略將軍故之西南五里許。有六品台在焉。廣六七方丈。高可四尺。

以巨石壘成。其用途無可考徵。想爲明代兵家所築。

## 古樓子

李庚堯云。寬甸所屬之古樓子。位於村之中央。形方。占面積約廿五方丈。周圍短牆。皆甃石砌成。高六尺許。其中隆然如邱。高丈餘。登其巔。全村皆收入眼底。故以之名村。建自何代。無從稽考。

趙君堯云。距寬甸縣治城百四十里之古樓子（今作村名）在大蒲石河右岸西南高崗上。四隅砌有石。高五尺許。中央如山。高約二丈。合觀似固字形。計佔地十畝。並無樓之遺址。余村度之。此殆古昔所造之營壘。或砲台也。今其上草木叢生。類天然之土山。（據鄉老云於光緒年間該處左近。農夫耕地。得古箭頭十數枚。）何代建築。無從稽考。徒存遺蹟而已。

## 玉石哨

李庚堯云。玉石哨。去朝鮮之薛禮廟東北六十華里。居鴨綠江中心。屬寬甸縣南區太平灣之下游。右距古樓子村數里許。此哨因有蒼色大石如玉。故名。天旱與秋深水落時。乘舟得見。石頂方可二丈。夏季水漲則沒。該處水流湍急。不宜停泊。爲舟子注意之地。每值大旱。若朝夕聞此哨有響聲。不出三日必雨。屢驗不爽。其聲如松濤然。數里左右。皆可聞之。

## 小城子山

劉貴一云。寬甸縣東北百四十里。有山曰小城。頂成方形。上有高麗古城。

牆已頽廢。基尚可辨。清光緒間建有蘭若。後有石牆。高約三丈。堅固異常。傳者爲高麗牢獄焉。

## 缸山

趙元善云。寬甸城南百廿里。砬子溝村。山峯羅列。極高處可三百餘丈。頂有大石三。

形似缸覆。因以得名。山半有平原數十方丈。今已闢成良田。其中遺存古廟基一所。並有殘碑斷碣。字蹟尙能辨認。係明代崇禎年遺蹟。前清光緒元年。開墾邊土。經鄉民掘出銅佛九尊。高皆盈尺。衆以古佛出現。不宜暴露。遂修寺院。招住持道人誦經頂禮。至今香火不絕。

## 登臺山

劉貴一云。寬甸蒲石河村東。久財溝教會學校後。有登臺山焉。四圍山勢環抱。

怪石嵯峨。形勢險峻。周十餘里。高五千五百餘尺。鴨綠江環繞其下。臺上平坦。巨石縱橫羅列。

若坑若桌若屏若石柱等類。似曾琢磨。實白天然。點將台居其中。相傳朝鮮王點將於此。故又名點將臺。

## 高牆房身古井

李庚堯云。寬甸南古樓子村。高牆房身東南隅數十武。有明代古井一。

深可兩丈。清光緒三年。村戶高某。命長工緝入淘之。及底立斃。救出後半晌始蘇。以故中止。乃

因需水不便。翌年仍命長工淘之。無恙。而非底有巨石一。平滑如兒。以足踏之。震震作響。竭力掀起。突出臭氣。觸之噴嚏。下有二鍋相覆。內置紅綠瓷壘十餘個。狹口大腹。各封泥蓋。取出時。羅列地上。光潤可愛。主役盡喜。以爲係明代古物。其中必有黃白藏焉。及啟視之。則青烟縷縷。直冲雲漢。瓷壘頃刻皆頽。主役驚顧。不知所以。今鄉老談及。猶稱其奇云。

## 拜靈川

邱可名云。寬甸縣西百里。俗呼柏林川。乃前明參將劉挺戰死處。昔時人民曾往拜祭。因名爲拜靈川。

## 天洞

劉雲章云。距寬甸北牛毛場五里許。有山曰飛雲。幽奇險峭。殊形詭狀。上有古廟。前有二碑。字跡模糊不可辨。院中幽邃。牆垣坍塌。佛像皆黯淡無光。據山僧云。此廟數百年於茲矣。其言雖無足徵。要亦不遠。廟左里許。有仙人洞。矗立數仞。若斧削然。洞內可容數十人。洞上鑄天洞二字。別無古蹟。惟洞中有木牌土像等。相傳清初有僧潛修於此。

## 避流洞

姚鳳儂云。距寬甸西十里許。渡蒲河。有慶峰山在焉。陟山腰。怪石如林。中有石洞。其上有石匾。因風霜剝蝕。字跡殘缺。不可辨認。余甚惜之。詢諸野老。知爲避流洞。口狹

小。可容一人。初入昏黑如夜。咫尺不辨物。燃燭四顧。中頗宏邃。可容數百人。穹上而虛下。玲瓏嵌挂。險怪百出。中有方平大石數十。羅列不紛。此蓋避兵者。陳列而食之桌也。

## 砍川溝

邱可名云。砍川溝。在寬甸東七十五里。爲往來要道。商民建有德政碑兩甬。一爲徐公慶璋。字豫齋。浙江山陰人。一然榮公禧。字筱峯。滿洲旗籍。碑立溝側。高五尺。周三尺。厚八寸。二公會宰斯邑。誌不忘也。

## 寺院溝

寧金鑪云。寬甸城南百里。東洋河村西北之寺院溝。有明代廟宇一座。今已頽廢。銅像無存。斷碣殘碑。字雜辨認。所可誌者。朝夕間溝中結有雲霧。不出三日。必有雨水。每遇天旱。臨近各村。咸往祝禱焉。

## 二等泡

安文波云。寬甸東百里許。有鴨江。爲中日國界。兩岸皆山。或聯若螻蟻。或列若峰岫。殊形詭狀者。實大且多。山巔有圓池。方數畝。深不可測。池沿有鐵樁。高五尺許。粗可拱把。有鐵鏈長不知幾百尺。一端繫於鐵樁彼端沒入池內。相傳此鏈鎖一龍。池名二等泡。距吾宅幾十里。余暇口曾遊於此。目所親覩者。



## 高牆房身

趙君堯云。古樓子村大蒲石河東岸。其北五里許有高牆房身溝。因其中有高牆房身。故名。房身後依山麓。居高臨下。前砌入石牆。高二丈餘。昔爲明懷遠將軍程公府第。(按墓碑推求可以知之)今爲李君鴻遠住宅。

## 碑碣子

劉貴一云。寬甸縣南百二十里。有地名碑碣子。其地殘碑斷碣。數見不鮮。惟多偃仆土內。字跡模糊。莫可辨認。殆皆古時所建者。歲遠年湮。爲風雨所蝕。遂漫漶若是。就中以廟溝之碑爲最高大。屹然竒立。石質堅韌。未署明武德將軍朱□□敬撰。

## 王莽錢

趙君堯云。寬甸兩區。大蒲石河東岸之西山谷中。民國十二年盛夏。陰雨旬日。迨晴有黃姓牧童放牛於該谷。平坂爲牛踏陷數尺。發現缺邊之粗質陶器。牧童見之。不識何物。歸以告父。經其父挖出綠色刀錢六十餘斤。錢形厚薄不同。薄而完全者(每把重一兩)多。折損者少數。後均售於(每斤六角)鄰近于家藥舖。將其碎者作藥材。(銅綠)整者轉售於(每枚五角)安東古董肆。(肆再零賣每枚索價一元)今存者。(余家有數枚爲于君所贈)已無幾矣。至何時埋斯錢於地下。無從稽考。惟尙未被土蝕盡。其銅質(將銹磨去色如赤金)良足貴焉。

## 盛甲金印

李庚堯云。六品台左近有小山一。峭石矗立。形勢起伏。如雞冠狀。民國十二年。村戶黃姓牧童。由葭隙中拾得盛甲及金印一方。盛甲之重。爲今人所不勝。鏽腐侵蝕。不甚堅固。金印則光耀奪目。毫無鏽痕。面積約四方寸。重二斤餘。均係篆文。殊難辨識。嗣經該村小學教員將金印騙去。盛甲已爲村民毀壞。如是古物。爲嶼近所僅見。不加保護。一併失去惜哉。

## 懷遠將軍墓遺址

趙君堯云。高麗房身北里許之山麓。遺有古墓一處。(何時遷移近無知者)據鄉耆云。原有石碑一座。上刻「皇明懷遠將軍程松之墓」數字。碑於光緒某年失去。(爲夏季山水暴漲時沖失。或淤於土內未詳)旁有石碣。爲「后土之福」迄今猶存。

## 王將軍墳

趙榕生云。寬甸城北里許。有將軍墳。老樹十餘章。鴉巢三五。荒塚三丘。塚前各樹墓碑一。高約四尺。正中鐫明故將軍諱王國之墓。萬曆八年立。左鐫明故副將軍諱承祖之墓。萬曆十年立。承字殘缺。幾不可識。右墓之碑已仆。名爵不得悉。該縣原爲明季防清寨卡。烽火台堡壘。猶有存者。

寧金鏞云。去寬甸城北里許。有明代將軍王國之墓在焉。民國十三年春。縣令汪公鳳池。作文祭之。

胡鳳揚云。寬甸城後二里。崢嶸山之陽。有王將軍墓。墓前置石碑。字跡模糊。有香爐蠟臺等物。左側有十面石。一面臨地。可見九面。高二尺。此九面惟上面無字。餘皆有字。字爲大將軍有八面威風。廣袤二畝。柞槐相間。草木雜生。蓋距今數百載矣。

## 武略將軍墓

李慶堯云。去寬甸城南三十里。牛皮岡村西北偏。有明代將軍塚。方圓約五丈。頽圯不堪。前有石碑一。高八尺許。係萬曆卅五年立。鐫有「皇明武略將軍王成祖之墓」十一字。雖經風雨剝蝕。猶歷歷可辨。傍有石碑一。鐫皇天后土四字。數年前。被村戶朱某。將碑之上。破擊碎。其婦即晚無疾而死。人言謂其毀碑致禍。由是村民咸有戒心。故迄今墓碑猶得保存也。

## ▽ 臨江縣

### 門神石

趙鏡湖云。臨江縣清和村外有二奇石。遙遙相對。其形狀皆如獅。石上各有山花野草。石下各有清溪深潭。至於其位置之距離與形態。均相酷似。惟石色一黑一白。故土人稱此石爲門神石云。

## ▽輯安縣

### 輯安

邱可名云。輯安縣。爲古高麗建都地。考東國通鑑曰。漢永光五年。壬午。高句麗始祖高朱蒙立。元帝世也。北史高句麗傳。漢武帝元封四年。滅朝鮮。置玄菟郡。以高句麗爲縣以屬之。漢昭賜衣朝服。鼓吹常從。玄菟受之。據此則高句麗之立。非元帝世也明矣。

### 古城

邱可名云。輯安爲高句麗建都地。其石城已圯。周圍五里。東西兩面共四門。日人橫井忠直。集有會餘錄。云即古之令安城。未詳何據。

### 山城子

邱可名云。距輯安城北十里之山上。隨山砌石。有城址形。南一門。俗呼山城子。按母丘儉登丸都山屠其所都。當是此城。

### 好大王陵

忠鶴泊云。好大王陵。在輯安縣西二三十里。地係平原。形勢頗佳。前方較低。中有土邱極大。隆隆如小山。詢之土人。僉謂遠年陵寢。予於初設縣治時。權篆斯縣。曾瀏覽好大王碑。並得好大王陵磚石一塊。其質細膩堅硬。彈之有聲。滴水不滲。較漢瓦尤上。以之作硯。

發墨甚述。其一側而鑄有願大王陵安如山固如岳。十字。一側面俱斜形。

邱可名云。輯安城東崗地方現屬蘊和保六牌。有人在墓旁掘得古碑一。長一尺。寬五分。厚八分許。其八分之側面有字。文云。願大王陵安如山。固如岳。

### 點將台

邱可名云。輯安山城內。有土台高丈餘。俗呼點將台。

### 大水堤台

邱可名云。大水堤台。在輯安城東一百四十里之江邊。烏道中有礮頭數處。

突出阻隔。緣石而過。手攀足登。危險異常。蜀道之難。不是過也。

### 龍山

邱可名云。東國通鑑曰。高句麗王朱蒙薨。太子類利立。葬始祖於龍山。號東明聖王。

按山在今輯安城東八里許。明一統志。謂在復州穆東十里有明山。高句麗王之子曰東明。葬其上。疑即此山。而一統志誤在復州。

### 古石馬嶺

邱可名云。石馬嶺在輯安城西一百五十里。相傳古有石馬一匹。後不知其所終。

### 沸流谷

邱可名云。沸流谷在輯安城北二十里小青溝裏。有水如沸。古碑有云。於沸流城

西山上建都焉。蓋即此谷。

## 關馬墻

邱可名云。輯安城西北百五十里。有石墻兩行。中隔里許。俗謂慕容柁伐高句麗。遣長史王寓等勸衆五萬。從北直而進。或即此歟。

## 飲馬灣

邱可名云。輯安山城子。內有飲馬灣。廣可兩丈。水深五六尺。

## 好大王碑文

邱可名云。惟昔始祖鄒牟王之創基也。出自北夫餘。天帝之子。母河伯女。剖卵降出生子。有聖□□□□□命駕巡車南下路山夫餘奄利大水。王臨津言曰。我是皇天之子。母河伯女郎。鄒牟王。爲我連葭浮龜。應辟即爲連葭浮。然後造渡。於沸流谷忽本西城山上。而建都焉。永樂世位。因遣黃龍來下迎王。王於忽本東岡。黃龍負昇天。顧命世子儒留王。以道與治。大朱留王紹承基業。傳至十七世孫國岡上廣開土境平安好太王。二九登祚。號爲永樂太王。恩澤□□皇天。威武柳被四海。掃除□□。庶寧其業。國富民殷。五穀豐熟。昊天不弔。卅有九。宴駕棄國。以甲寅年九月廿九日乙酉。遷就山陵。於是立碑銘記勳績。以永後世焉。其詞曰。永樂五年。歲在乙未。王以碑麗不息□□又躬率往討叵富山負山至鹽水上。破其丘部落六七百里。當牛馬羣羊。不可稱數。於是旋駕。因過婆平道東來□□力城北豐五備狝。遊觀土境。田獵而還。百殘新羅。舊是

屬民。由來朝貢。而倭以辛卯年來渡海。破百殘。□□新羅以爲臣民。以六年丙申。王躬率水軍。討科殘國。軍□□首攻取壹八城。曰模盧城。若模盧城。幹弓利□□城。閣彌城。牟盧城。彌沙城。□舍葛城。阿且城。古利城。□利城。□彌城。奧利城。勾牟城。古模碑羅城。頁□□□□城。分而能羅□塲城。□□城。□□城。豆奴城。沸□□利城。彌鄒城。也利城。大山韓城。掃加城。敦拔□□城。□婁寶城。散□城。□婁城。細城。牟婁城。弓婁城。蘇□城。燕婁城。弓支利城。巖門至城。□□□。□□□□□城。就鄒城。□拔城。古牟婁城。閏奴城。貫奴城。穰城。□□□□羅城。仇天城□□□。進至其國城。賊不服氣。敢出百戰。王威赫怒。渡阿利水。遣刺迫城。橫□□□□便國城。百殘王困逼。獻男女生白一千人。細布千匝。歸王。自誓從今以後。永爲奴客。太王恩赦□迷之銜錄其後順之誠。於是□五十八城。村七百。將殘王弟并大臣十人。旋師還都。八年戊戌。教遣偏師觀帛慎土谷。因使抄得莫新羅城加太羅谷男女三百餘人。自此以來。朝貢論事。九年己亥。百殘違誓。與倭和通。王巡下平穰。而新羅遣使白王云。倭人滿其國境。潰破城池。以奴客爲民。歸王請命。太王恩後稱其忠□。遣使還告以□訴。十年庚子。教遣步騎五萬。往救新羅。從

男居城至新羅城。倭滿其中。官兵方至。倭賊退□□□□□□□□□□來背息。追至任那加羅從拔城。城即歸服。安羅人戍兵拔新羅城。是城倭滿倭潰城□□□□□□□□□□□□□□□□九盡臣有□安羅人戍兵滿。下缺三十九字) 辭(下缺十三字) 潰。□□□□安羅人戍兵。昔新羅安錦。未有身來朝貢。□□□□□□□□開土境好太王(缺十四字) 朝供。十四年甲辰。而倭不軌。侵入帶方界。□□□□□石城□連船(缺九字) 平穰□□□□□□□□相遇。王愼嬰截盡。倭寇潰敗。斬殺無數。十七年丁未。教遣步騎五萬。(缺九字) 城□□合戰。斬殺蕩盡。所獲鎧鉀一萬餘領。軍資器械。不可稱數。還破沙溝城婁城還(缺十字) 城。廿年庚戌。東天餘。舊是鄒牟王屬民。中叛不貢。王躬率往討。軍到餘城而餘城。國駢(缺六字) 那□□王恩普處。於是旋還。又其慕化隨官來者。味仇婁鴨盧。卑斯麻鴨盧。□立婁鴨盧。肅斯舍(缺六字) 盧凡所攻破城六十四。村一千四百。守墓人烟戶。賣勾余民。國烟二。看烟三。東海賈。國烟三。看烟五。敦城□四家。盡爲看烟。毛城一家爲看烟。碑利城。二家爲國烟。平穰城民。國烟一。看烟十。昔連二家爲。看烟。住婁人。國烟一。看烟卅三。契谷。二家爲看烟。勃城。二家爲看烟。安失連。廿二家爲看烟。改谷。三家爲看烟。新城。三家爲看烟。南蘇城一家



國烟。新來韓穢。沙水城。國烟一。看烟一。牟婁城二家爲看烟。豆比鴨岑韓。五家爲看烟。勾牟客頭。二家爲看烟。永底韓。一家爲看烟。舍葛城韓穢。國烟三。看烟廿一。古家龜羅城。一家爲看烟。只古城。國烟一。看烟三。客賢韓一家爲看烟。阿且城。雜珍城。合十家爲看烟。巴奴城韓。九家爲看烟。各模盧城。四家爲看烟。若模盧城。二家爲看烟。牟水城。三家爲看烟。幹弓利城。國烟二。看烟三。彌舊城國烟七。看烟□。(缺八字)三家爲看烟。豆奴城。國烟一。看烟二。奧利城。國烟二。看烟八。須鄒城。國烟二。看烟五。百殘南居韓。國烟一。看烟五。大山韓城。六家爲看烟。農賣城。國烟一。看烟一。閨奴城。國烟二。都煙廿二。古牟婁城。國烟二。看烟八。瑯城。國烟一。看烟八。味城六家爲看烟。就咨城。五家爲看烟。積城。廿四家爲看烟。散那城。一家爲國烟。那且城。一家爲看烟。勾牟城。一家爲看烟。於利城。八家爲看烟。比利城。三家爲看烟。細城。三家爲看烟。國岡上廣開土境好太王存時教言。卍王先王。卍教取遠近舊民。守墓洒掃。五慮舊民。轉當羸劣。若吾萬年之後。安守墓者。但取吾躬率所略來韓穢。令備洒掃。言教如此。是以如教令。取韓穢二百廿家。慮其不如法。則後取舊民一百十家。合新舊。守墓差。國烟卅看烟三

百。都合三百卅家。自上祖先王以來。墓上不安石碑。致使守墓人烟戶差錯。惟國岡上廣開土境好太王。盡爲祖先王。墓上立碑銘。其烟戶不令差錯。又制。守墓人。自今以後。不得更相轉賣。雖有富足之者。亦不得擅買。其有違令。賣者刑之。買人制令守墓云。

### 丸都勒功碑

不文節譯小川運平原著云。數年前輯安縣知事吳公。開鑿道路。掘得丸都勒功之殘碑一塊。筆勢勁健古峭。經吳公拓之。其字爲

正始三年高勾驪

督七牙門討勾驪五

復遺寇六年五月旋

討寇將軍魏烏丸單于

威寇將軍都亭侯

行禮將軍領

將軍

凡四十六字。誠一碑得之珍本也。按該碑爲千數百年前之故物。又爲滿洲最古之碑文。於考古學上及骨董文學上之價值。自不待言。其於滿洲歷史史證之研究。不更有至大之獲得乎。

考滿洲本土。向無史書。博探漢民族。朝鮮。日本。蒙古。俄國。各種書籍。更証以滿洲現存之史証。始能舉滿洲史之大義。其困難可謂至矣。

他如書錄未載之地史料研究。自以碑文爲確實有力之証人。滿洲史証中見於書錄之外者。數亦甚鮮。列舉之。僅有羈隴江口永寧寺記之碑。又石碑嶺金代婁寶之碑。及得勝陀金碑洞溝永樂大王碑。並旅順黃金山下之唐碑。暨奉天東華門之石面唐代經幢而已。雖然。其珍貴仍無逾於丸都碑之斷片也。此碑之發現。在離輯安縣城西北八十華里之板石嶺。該嶺高可一百六十里。該處似即高勾驪之丸都城。吳縣長想像此石係高麗人所破壞云云。吳公想像之確否。是一疑問。惟吾人就碑之文字意義解釋之。其必爲魏之母丘險征伐丸都。之勒功碑無疑。查丸都係高勾驪國王。自三國時迄晉建都之名城。與洞溝國內城相距甚近。國內城。亦高麗之古都也。此二城悉爲中國攻陷。史有明載。現國內之碑在洞溝。俗呼永樂大王碑。廣閑上王之碑也。因有此碑。國內城之位置。在地理上乃明顯。今

又有丸都之殘碑出現。丸都城之位置。亦確定矣。豈非滿洲史研究上之一大便利乎。至於碑文之建設。兩者不同。丸都碑建自漢人。年代較古。文字與文章。完全爲漢魏風韻。反之國內城之碑。其形狀大于丸都碑百倍。文字亦大。文字與文章均古澁難解。終不足與丸都斷碑媲美。但於考古學及歷史學上之價值則一也。謹記其概略。以公於世之考古家及歷史家。

邱可名云。輯安設治於前清光緒三十年。是時設治員爲吳君清華。到任伊始。即感交通梗阻。乃闢同和嶺。板石嶺。西岔。高六百餘丈。北近通化。西入省城。乃得斷碑。共四十八字。其文爲「正始三年高句驪督士□門討句驪五」復遺寇六年五月□□「討寇將軍魏爲丸單□□」威寇將軍都亭侯「行稗將軍領「稗將軍」計七行。

魏正始三年。母丘儉討高句麗。懸車束馬。卒屠其城。蓋因險阻故也。今得斷碑四十八字可印證矣。「吳君自跋」按魏正始高王位宮寇遼西。安平幽州刺史母丘儉。將萬人。出玄菟討之。大戰於沸流谷。位宮敗走。儉追至頽峴。懸車束馬。登丸都山。戾其所都。通典曰。新羅國。魏時新盧國。其先本辰韓。辰韓始有六國。稍分爲十二。新羅其一也。魏將母丘儉。討高句麗破之。高王奔沃沮。繼歸

故國。留者遂爲新羅焉。

宋書諸夷傳曰。嘉平五年。幽州刺史母丘儉。將萬人。出玄菟。討高句麗。位宮將步騎二萬人逆之。大戰於沸流。按沸流水。在城北二十里。小青溝。中流有石。高丈餘。水來直下。激水如沸。故以此名之也。爰菴按此碑。乃首端毀下之一斷。文係橫行。長短不一。詳加考證。殆係魏碑無疑。

### 五闕墳

邱可名云。輯安城東八里。北山之麓。土塚環立。有五塚高似丘。陵上有穴。好事者以繩縋探之。有石灰隔壁數曲。上畫人物。餘無他異。

### 將軍墳

邱可名云。將軍墳。在輯安城東五里。全川大石砌成。共計三層。每層磨光石條兩塊。最上一層。四面石條。均有柱眼。其下敗瓦堆積。舊有一門。方廣兩丈。高約一丈餘。中鋪兩石床。匡已鑿壞。旁有隙處。投以小石。久之始隱隱作响。俗呼將軍墳。亦不知將軍爲何人。蓋已不可考矣。

## ▽長白縣

### 長白山

東邊野人云。長白山爲清朝發祥之地。又爲鴨綠圖們松花三江之源。山嶺高峻。

森林叢密。嚴冬積雪。四時不化。望之色白。故曰長白。

## 石柱

赫楞墅云。長白山東。與朝鮮接壤處。在前清康熙朝。將軍傅察穆克登。會監樹「華夏金湯固山河帶礪長」十字大石柱。以分國界。迄今絲毫無恙。

## 仙人橋

東邊野人云。仙人橋。在長白山東北五十里。橋橫三尺。非木非石。土人云。百餘年來。曾未聞修造此橋。而堅固異常。令人不解。故呼爲仙人橋。

# ▽安圖縣

## 安圖

東邊野人云。安圖地處奉省邊境。與朝鮮僅隔一圖們江。當設治之初。所以名安圖者。蓋存有保安圖們江之意。俾免外人之侵入也。

## 紅旗河

東邊野人云。紅旗河。在安圖縣東北。一名紅溪河。源出黑山嶺。與荒溝成交尾形。兩岸森林豐富。東南入圖們江。相傳宋岳飛曾北征至此。

## 老惡河

喻景泗云。兩江口下。百里之遙。沿松花江。懸崖峭壁。聳立兩岸。高數十丈。

水流至此。由上而下。恍如瀑布。湍急聲大。可聞數里。天塹形勢。令人駭視。石刻古字。模糊莫辨。聞諸鄉老云。放木簾者。經過此處。必須殺豬。投之江中。焚香放炮。上供叩拜。方免阽危。若不如是。不能過此。謂河中有蛟龍潛藏。惡河之名。由是來焉。

## ▽清源縣

**英額門** 孫伯瀛云。柳條邊迤邐東省各縣。其門不一。惟清源縣東之英額門。獨有老邊門之稱。門係人工製成。洞之寬廣。駕乎省垣甕圈之上。扼清開海往來孔道。邊裡邊外。即由此判。今難頽圮。遺蹟猶存也。

## ▽撫順縣

**營盤** 徐魁多云。撫順縣東六十里。渾河北岸。有村曰營盤。其村南爲渾河。北負平山。西峙峻嶺。高可三四里。峭壁崇崖。仰望駭然。與河南之薩爾濟山相對。據父老言。當明之季世。明

遣遼東經略楊鎬助葉赫攻清太祖。四路進兵。在此地駐紮大營。故名營盤。觀其形勢。清兵駐河南。明兵據河北。至今過斯地者。猶令人想見當年天然一戰場也。

### 文惠貝勅墓

孫蔭喬云。貝子墳溝。在撫順東七十里高麗營子村之西。爲清初文惠貝勅之墓。前有石碑三。均滿文。今已殘毀。不可辨認。

## ▽本溪縣

### 本溪湖

鏡瑤云。本溪縣城。四面環山。山多巖石。盡屬不毛。縣城西北山麓下。有石洞。洞口上刻本溪湖三大字。久經風雨侵蝕。湖字已模糊不清。洞底有水。深不可測。由山隙下流。涓涓不絕。經本溪縣街流入太子河。此殆本溪湖之名所由來也。

### 烽火臺

趙春生云。本溪縣南千金溝口山城子。有臺曰烽火臺。高約二丈。其底邊寬約一丈。長約一丈五尺餘。純以條石砌成。極其堅固。惟建自何代。無從考查。然由其用途觀之。大抵周朝之建築物也。周時各諸侯如有軍事行動。即在臺上生煙。使彼方知之。或禦防。或救援。今則視



之雖爲陳跡。而在科學不發達時代。尙依之爲利器云。

## 古石洞內之鐵船

翟鑄山云。本溪縣東二十里許之臥龍村。村東娘娘廟附近。有大山高聳。旁有古石洞。高與寬。均可四丈。經年洞水長流。聞諸父老云。咸豐年間。天亢旱。該村人禱雨。集農夫數十人。持燈燭乾糧。於黎明時進洞。洞內形勢。險惡可怖。行約日終。見有石炕一。石佛五。再進則碧八一潭。橫阻於前。內浮鐵船三隻。以鐵練繫於岸之鐵樁上。長約四丈。寬三尺許。其潭水不知幾何深。人不敢渡。始返。及出洞。已翌日日出時矣。近有好事者曾入洞探奇。中途水太深。不能前進。故不得再到鐵船處也。余距村僅五里。於今春四月十八日赴該村廟會。曾親詢胡姓老父。年七旬餘。據云。伊幼時祈雨。曾隨衆進洞。洞內事實均確定云。

## 姥姥洞

趙春生云。本溪縣第一區東南隅。山嶺綿亘。約數十里。最著者曰姥姥嶺。其麓有洞曰姥姥洞。中有神像一座即姥姥像焉。該像塑自何代不可考。雖有殘碑斷碣。因被風雨侵蝕。字跡模糊。不易辨識。相傳唐將薛仁貴東征高句麗。曾至其地。夜夢姥姥。授以天書三卷等語。事雖渺茫無稽。而土人猶盛傳其事。

▽海龍縣

小城子

周得飽云。朝陽鎮東三里許。有村曰小城子。城長約三里許。有四門。民國元年時。尚有存立者。近則墻垣頽塌無存。然塼基尙隆然可考。據老人云。此城係高句麗所築。惟修於何年何人。殊難考証矣。

城子山

高漢傑云。海龍縣西百二十里山城鎮之西北四里許。有城子山。因該山西南坡有古城基在焉。故名。現在城內已盡闢爲良田。耕耘時恒得古錢箭頭等物。惟此城建自何年。已難稽考。登山遠眺。則橫河出其後。柳河繞其前。方山聳峙於左。長嶺盤繞於右。固一望而知其爲形勝區焉。

雙頂山

高漢傑云。海龍縣東南廿里有山曰雙頂山。因雙峯對峙故名。據縣志云。清光緒丙午（二十二年）正月初二日。晨現山市。二峯各現一城。南城樓堞宛然。北城無樓堞。居民多有見之者。

## 茶尖嶺

周得飽云。去朝陽鎮東北六十里。有山曰茶尖嶺。其南麓勢甚平坦。有石房一間。房內牀棹器具。悉以石爲之。余客春赴磬石。經過此地。詰諸老人。謂此房乃高句麗遺物。昔清時乾隆帝曾射獵於此。以斯房爲休息之所。故山之得名爲茶尖嶺者。即由此也。

## 靈神廟

無識子云。海龍縣城內。有東西二靈神廟。位東西隅者。爲東靈神廟。位西北隅者。爲西靈神廟。西廟後靠城。有洞。口大如缸。住持者言。山此洞可達東廟。前清光緒廿六年。巨匪忠義軍。圍攻斯城。匪衆兵寡。城將陷。黃昏時。匪見城上有身著黃馬褂。頭戴官帽者。督兵禦敵。燈明如晝。砲聲隆隆。愈攻而城上之兵愈增。匪怯而退。斯時鎮守總管爲依公立峯。感胡仙靈佑。建廟以酌神庥。相沿至今。香煙不斷。

## 古碑

無識子云。前清設海龍廳。後添東平（即東豐）西安西豐柳河四縣。陞爲府治。民國成立。復改爲縣。城週四里。門四。余童年時據鄉老傳聞。建城之時。由戶口撥夫建築。修東南隅城基。掘得古碑一座。字跡模糊。無從考識。民國三年。余就學是邑。遍覓是碑。卒不可得。或係九龍口之碑歟。未敢確定。誌之有待於考古者。

## ▽輝南縣

### 輝發城

邱可名云。輝南縣北三十里之輝發河南岸。有明季輝發城舊址。按輝發城。考海國志係明季扈倫部。即輝發國故址也。今城基已圯。闢成田疇矣。

### 點將台

邱可名云。輝南縣北卅五里。團林子地方。有台高十餘丈。面積平坦。前清乾隆十九年八月丙寅日。高宗純皇帝東巡。曾駐蹕於此。

## ▽復縣

### 復縣沿革

遼東野人云。復縣位於奉天省之南端。南界金州。北鄰蓋平。東接莊河。西臨渤海。境內東山西海。形勢險要。實爲奉省南部之門戶。原設州。民國成立。始改爲縣。周秦時代爲朝鮮地。漢武帝時屬元菟郡。魏屬平州。(公孫度佔遼東時自稱平州牧後合爲幽州)晉隋之時。屬高句驪。遼初爲遼民縣。興宗時。置復州懷德軍。(名始此)治永寧。德勝縣。屬東京道。金爲復

州懷德軍。領永康化城二縣。明昌四年。降軍爲刺史。大定七年。改名永康。元屬蓋州。後隸遼陽路。明洪武十年。設復州衛（通志作九年）十五年。修築舊城。立門三。東曰明通。南曰迎恩。北曰鎮海。屬遼東都司。（按東三省鹽法志曰復州衛。本復州。明洪武五年六月。置於舊復州城。十四年九月置衛。及廿八年四月。州乃廢。西濱渤海。南有長生島。『現名長興島』又南有沙河。麻河。西入海。東有得利廢城。爲元季土人所築。洪武四年二月。設遼東衛於此。尋徙。南有樂古關。西有鹽場。北有鐵場。距都司二百四十里。清初裁衛。改屬蓋平縣。雍正五年。改設復州通判。管金復二州之境。隸奉天府。本邑治城。於明洪武修築。永樂四年。保定侯都指揮蔡珍。奉命來邑包砌。（見城內真武廟碑記。記稱復州古爲臨襄郡。原係土城。蔡來易以石。）清康熙時屢修。（見一統志）乾隆四十五年。邑侯陳銓。改建甌城。（陳以詩記其事。一說原本土城。陳州牧改修始廢。）繼此修補者。則有同治年。知復州事之趙守璧。光緒十七年州牧朱錦標。卅年知州曹祖培。（均見修城碑記）民國鼎革後。改州爲縣。縣仍州署。十三年。本縣知事陳公文斗。及商會又會重修。今以交通不便。歷任知事。均陳請省憲。擬移縣治於瓦房店。（瓦房店距縣六十里。位其東。係南滿鐵路之大車站。居全縣

中央。現任陳文斗邑宰。仍申前請。已蒙省署照准。(現已於瓦建新署)。業經移治。千百年後。則復縣城。又不知何若矣。

### 駱駝山

邱可名云。復縣駱駝山。有古井一。上有鐵索。伸入井內。究不知內繫何物。

## △ 岫 岩 縣

### 高麗城

赫柵墅云。岫巖西南藍旗堡之西。有高麗城一座。形長方。每面各闢一門。周圍數里。純以石爲之。今已坍塌。惟存幾堆石礫。叢雜於草間耳。

### 高麗土城子

赫柵墅云。岫岩南百三十里。土城子村。因昔時有高麗土城。故名。

### 大通門

赫柵墅云。大通門。在岫巖東街北首。牆高數丈。中央洞廠。俗呼北大通門者是也。視其雉堞圯毀。藁葬荒穢。非建於數百年前。曷克臻此。惜岫巖無縣誌。每使古事古物。無從

考證耳。

### 龍頭

王益亭云。關門山位鳳岫二邑之間。在岫者曰河南。在鳳者曰河北。蓋二邑以哨子河

分界也。河北有山。蜿蜒自東北來。兀然立峭子河畔者。龍頭也。山巔二巨石矗立。高三丈餘。如龍首之雙角焉。相傳唐太宗征高麗時。唐兵與番兵夾河而陣。太宗會親登是山觀戰。故土人呼爲龍頭云。

### 教場溝

姜一字云。教場溝。在岫巖西南六十里。位於龍潭山前。十里之遙。四面皆山。一內中寬曠。週圍數十里。相傳高麗大將蓋蘇文。立大營於龍潭山。在此教練士卒。故名。

### 薛禮脚印石

赫柎墅云。岫岩南百三十里。三道林子村。北山頂。一石仰臥。面極廣平。印有長尺餘。寬五寸之大足跡一隻。傳者謂薛禮東征時。曾踏此石小息。故今人以薛禮脚印石稱之。

### 東西礮台山

赫柎墅云。岫岩東南八里。兩山東西對峙。相距約四里。其峯各有石砲台一座。台均係韓人所建。以禦唐軍者。其方向爲東西。故曰東西砲台山。今則故址無存。惟有兩堆

亂石耳。

### 窟窿山

王益亭云。窟窿山有二。一在鳳南海岸。一在岫邑東北一百餘里之峭子河旁。在鳳境者已誌之矣。岫邑窟窿山上有三孔。作倒三角形。在下者大可容二三人出入。上者平列。匍匐亦可

容人。山下近岸處。有小孔如卵。每雷雨。則有鱗陸續出。土人往捕之者。恒盈筐而歸焉。

## 貓耳山

姜一字云。貓耳山。在岫岩縣西七十里。爲岫岩蓋平兩縣之天然界。聳然直立。

清秀宜人。山之峯。如貓之耳。故名。相傳唐太宗東征時。傍此山立寨。夜襲高麗大將蓋蘇文之大本營。因不諳地理迷途。幸賴貓耳山高大。遙望之乃得歸。太宗贊曰。貓耳貓耳。功績甚偉。苟無貓耳。朕不得歸。於是貓耳山之名益彰。太宗恥夜襲無功。遂大破蓋蘇文於龍潭山。(距貓耳山二十里見古蹟遺聞前篇。)迄今寨址累累。遺蹟猶存。

## 古船塢

赫柅墅云。岫巖東南。二道洋河上游。當五百六十年前。水勢浩瀚。帆檣雲集。

故有船塢之稱。今則細流如綫。兩岸多淺草平沙。不過一小水隈而已。烏摩。滄海桑田之變遷。何其速也。

## 望海寺

赫柅墅云。岫巖東南。百二十里。有古寺建於山坳中。曰望海寺。該寺初建之年

無可考。或云始於唐。然碑碣泯滅。誰敢取信。而其重修。實在萬曆三十九年。老碑殘缺。蒼苔怒生。故其文無有能辨之者。再修於道光十七年六月二十四日。其碑文如左。



奉天省岫巖城東南麓望海寺。實古刹也。創建之始。邈莫能稽。重修之年。肇自萬曆。知其由來者久矣。原夫此地。山勢稍平。水光若接。憑欄閒眺。吞遠山。挹江瀨。雲濤之狀。在乎襟袖。誠東陲之勝地也哉。第年深日久。風雨漂搖。棟榱折崩。無以肅觀瞻。奚以震聲靈。况近洋河之濱。舟車商賈往來者。俱注目焉。使坐視其傾圮。不事夫修葺。恐削美弗彰。而後盛莫作矣。山左登郡榮邑庠生孫銘沐手拜題。

以創建之始至知其由來者久矣。五句考之。或云始於唐。庶乎近焉。

## 老古廟

赫柎墅云。老古廟。在岫巖南松樹秧萬山中。殿庭寂靜。環堵蕭然。且失其建設之歲月。故一般人士均呼之爲老古廟。

## 古石佛

赫柎墅云。岫巖城南老爺廟。有石佛數尊。爲重修殿宇時。得於土壤中者。刻工粗拙。精彩毫無。不過略具形骸而已。以此考之。其非近代物。尙何疑哉。

## 古銅佛

赫柎墅云。岫岩南。紅旗溝。烟酒戒制會。供有古銅佛一尊。高盈尺。坐姿。全軀凹凸如被土浸狀。衣紋幾不可辨。蓋歷年久遠矣。

西坡按。此佛爲本縣曹某。於有清時在南省得之。供奉家中。后贈之於該會云。

## 大甯學院

赫柵墅云。岫岩南關。孔廟西院。有瓦房三椽。門首爲方磚砌成。磚面鑿有『大甯學院』四大字。及清德宗。舉行新政。罷科舉。是院改立學堂。今更爲縣立初級中學教室矣。所惜者碑碣湮滅。無從考其建築之年代也。

## 古文昌閣

赫柵墅云。岫岩東街南首。有磚台直起。高可三丈許。中闢懸門。門陽額鑿文昌閣三字。陰則鑿觀音閣二字。雖一門題異。但邑人均稱爲文昌閣。未有稱爲觀音閣者。台之上。右閣三楹。乃昔奉觀音與文昌之所也。近日偶像全無。惟殘閣尙高聳耳。而台之東南隅。多年傾頽。以此考之。斯閣非建於近代也明矣。

## 石碑

邱可名云。岫岩城北百里東。羊哈拉峪溝裡。有碑三筵。字跡模糊。略識有明萬曆字樣。

## 古牌坊

赫柵墅云。古牌坊。在岫岩南西坡村。其建設年代不可考。今惟有八塊巨石。突兀

地上而已。

## 古石獅子

赫柵墅云。去薛灣脚印石東數十武。有大石獅一對。張牙舞爪。鑿巖作奮鬪

狀。獐惡可怖。而兩者腰際均各有如綫裂紋。深入數分。亦有斑剝脫落處。以此思之。其爲古物。可恍然矣。

## 明鐘

赫柸墅云。岫岩南西坡村。小南溝口。有九聖祠一座。祠前有古榆一株。上懸大鐘。用報弦望。迨民國紀元前二年。四月二十日。陰霧四布。暴風卒至。傾屋拔樹。鐘亦齧粉。現有鐘柄。尙存墅家。昨濬拭之。於近柄處。現有大明二字。而明字復缺其下半。雖然。終不失爲古器也。

## 明磁碗

赫柸墅云。岫岩東南百二十里。密溝堡住戶赫氏。於光緒三十二年春。墾山荒。得一磁碗。前繪渭水垂釣圖。後書萬曆戊戌暮夏偶題八字。但未署姓氏。墅於二年前。曾見是器。

## 黑魚潭

赫柸墅云。黑魚潭。在响哨南。距岫岩縣治百里。西傍大山。深不可測。內多黑魚。故名。當六十年前。有范姓樵夫。采薪山間。忽聞歌聲。悠揚盈耳。憑絕壁東望。第見巨浪滾滾起丈許。少頂。浪息。平靜如鏡。現一桌。繼出兩叟。昭穆列坐。老態龍鍾。衣冠皆古。談笑自如。昭者。一聲高呼。童子抱琴來。接奏之。引商刻羽。疾徐抗墜。并稱善焉。繼相高歌。歌畢。童子復捧酒肴出。穆坐者。連進數觥。醅酏大醉。徐起。昭者力扶。蹣跚水上。速也如風。觀者奇甚。大

噉。三人聞之立人水。大浪復作。全潭盡赤。觀者懼退。據先覺傳云。兩叟及童子。乃黑魚所幻也。凡眼一覩。破其靈機。汚其仙術。不克復行其道。怒各自殺。水之赤。職是故也。語雖荒誕。而潭之名實以此。今之土人。只知呼其名。多不知其故事。緣據所聞以誌之。

## ▽莊河縣

### 藏君洞

姜一字云。藏君洞。俗呼仙人洞。在莊河縣北七十里。余於民二遊其地。山峯矗立。優秀無比。有小華山之稱。入其中。如入仙境。洞在山腰。洞口高寬約有十數丈。有四大金剛偶像。立洞內兩側。初入洞。異常昏黑。咫尺不辨。行數百步。漸入明途。(洞有天窗故明)洞口上方石上。刻有斗大藏君洞。三字。洞內建有樓閣二層。殿宇巍峨。佛像森嚴。殿前有古碑二。因年代久遠。字跡模糊。然一係漢立。一係明立。尚可辨認。殿後黑暗如漆。深不見底。有一道人名紅真。虔修於此。終日團坐。不飲不食。不言不動。童顏鶴髮。飄飄有神仙之概。因此土人又呼作「仙人洞」究竟紅真道人。由何年何日來此。無人知者。相傳有此廟宇。即有此道人。余遊其地時。紅

真道人。預先備辦茶果。余至。出以享余。余訝其先知。道人笑曰。事有定數。子何疑焉。貧道早知吾子今日辱臨。日後宜以武功顯。但不可多殺。今日之遇。乃宿緣也。貧道當日亦是富貴中人。因感世亂。隱匿斯洞。洞廟乃貧道督工監修。唐將薛仁貴東征時。曾避禍于此。今子又來遊。洞廟生輝矣。據道人之言。証之古碑。則洞廟之年代遠矣。余回憶遊此洞。僅十五齡之書生。且世代業儒。不作崇武之想。孰知少長。目擊時艱。投筆從戎。迄今廿七歲矣。作糾糾武夫。紅真道人之言驗矣。余思其山奇。其洞奇。其道人尤奇。不飲不食。數千百年。其殆仙歟。山洞古蹟甚多。如石虎井。團坐石。仙攀葛。望海樓等。惜余不文。不能詳誌耳。

## 聖水宮

赫桐墅云。聖水宮。在莊河縣東。大孤山之陽。懸崖數丈。涓滴涔涔。出於石隙。自高而下。無時或已。甃池以儲之。雖萬人飲不竭。且其水冬不結冰。至夏益涼。以其奇。故名爲聖也。

## 熱河橋

劉豁然云。莊河縣西北十五里。有一河。河西有山。名關家山。山東有橋。即熱河橋。此橋建自何時。已無可考。現破壞已久。無人修理。橋西有古碑一。碑上刻有文字。尙彷彿

可辨。其文云。九缸十八鍋。不在山前山後坡。修上這座橋。剩也剩不多。

## 鹿島馬方石床

赫明林云。鹿島位於莊河縣大孤山之南海中。島週四十里。中有平原。居民數百戶。悉以漁爲業。相傳明代總兵馬方開府於此。據島民言。馬方坐鎮此地。驍勇善戰。島中製石床。每遇春夏之際。風清日暖之會。與妻妾携手登床。夜御九妻。至今石床猶在焉。

## 明碑

赫明墅云。莊河縣屬南鹿島上。有碑一筭。文字模糊。僅餘馬芳兩字尙可識。柳浦少年按。馬芳本明季人。原駐守鳳城南雙山子。後移至鹿島。故此碑爲明碑。毫無疑義。

## 閣老墳

邱錫三云。莊河縣東十三里老金山南麓。有古墳一處。俗曰閣老墳。縱橫都是九墳。總爲八十一墳。距離遠近。絲毫不差。又皆砌以塊石。他無可考。祇石碑數起。埋沒土中。僅大上露明故二字。姓氏未詳。據牧童云。見牛馬踏陷處。內係磚砌空洞。似非埋葬枯骨之所。且有山內拾出古銅錢者。

## 清李制台廬墓

赫明林云。莊河縣東七十里石咀子村。有銅鏤李公秉恒之廬墓在焉。公於前清光緒中葉。歷任山東巡撫。古北口提督。洊任總督北洋大臣等要職。庚子拳匪之役。公爲

最信教匪。仇視外僑之一人。迨聯軍入京。公奉旨督師近畿。師潰。戰歿於通州。查李公生前。宦遊廿載。歷官三省。政聲昭著。歿後毫無積蓄。公起家田間。在石咀子北里許。有草廬六楹。矮牆不及三尺。迨位極人臣。禮傾中外。家中未築一室。其宅右有公之祖墳。仍如常人。並無修飾。據村人言。石咀子云者。係一土阜。其龍脈南由海中起。蜿蜒起伏。至李公廬前。陡然跌落。現一石頭。故名石咀子。最奇者。當公盛時。土龍來脈。係由海水中某島而來。每於落潮時。海水發現橫浪。直與土甬銜接。比李公敗後。水中橫線。不可復睹矣。至銅錘李。係公之綽號。蓋公善武術。其拳如銅錘。因而得名云。

## ▽金

## 縣

### 唐王殿及唐王城

古南蘇云。唐王殿。在金縣城東赫山左側。距城僅十餘里。唐王

城在城西南城山上。距城八十里。兩處古蹟。傳者皆謂唐太宗伐高麗時所建。而兩處又皆有飲馬池。點將台之遺址。惟城山上羣石排立。或謂即當時之雉堞。實則自唐迄今。已逾千年。既無邑乘可憑。

復無稗官野史之記載。可供參考。僅就士人流傳。沿訛尤多。考舊唐書太宗本紀。貞觀十八年十一月庚子。命太子詹事英國公李世勣。爲遼東道行軍總管。出柳河。禮部尚書江夏郡王道宗副之。刑部尚書鄖國公張亮。爲平壤道行軍總管。以舟師出萊州。左領軍常何。瀘州都督左難當副之。發天下甲士十萬。並趨平壤。以伐高麗。十九年春二月庚戌。上親統六軍。發洛陽。又紀三月壬辰。上發定州。四月癸卯。誓師於幽州城南。癸亥。李世勣攻蓋平城。拔之。五月丁丑。車駕渡遼。甲申。上親率鐵騎。與李世勣會圍遼東城。拔之。六月丙辰。師至安市城。高麗兵十五萬來援。李世勣率兵奮擊。上自高峯引軍臨之。高麗大潰。殺獲不可勝紀。因名所幸山爲駐蹕山。刻石紀功焉。秋七月。李世勣進軍攻安市城。至九月不尅。乃班師。據此。則太宗渡遼伐高麗。車駕並未至蓋平以南。即高麗本傳。亦只謂李世勣攻白崖城。帝臨其西北。按白崖。即今之岫巖城。在蓋平之東。則在南蘇所謂唐王殿與城者。或係舟師由海登岸。偶駐兵其上。人以其爲唐師也。故所至必稱唐王焉。世俗不加詳考。以爲太宗伐高麗。無處不有其車轍馬跡。其亦不思甚矣。

## 牧城驛

劉監圃云。金州西南旅順之東北有鞍子山。山傍有古城。名曰牧城驛相傳爲高麗



城。蓋係唐初高麗人所築也。城之周圍。不過四里。今則半多頽塌。附近有土邱甚多。每掘之。其內如室。人可入。尙有七缶石罐石馬等物。土人取而賣之。則得值甚重。且皆爭購之若寶。余于庚申秋。曾在日本帝室博物館內。見有古器數宗。其上皆標識爲該處所發現也。

## 獅子口

姜一字云。獅子口即今之旅順口。距金州一百里。爲遼東第一重門戶。第一個要塞。亦可謂渤海灣之咽喉。爲兵家必爭之地。故唐太宗東征時。由此登岸。然後長驅直入。臣服高麗。假使當年高麗以重兵扼守。太宗雖英勇。恐難登岸。奏功有如此之易也。故日俄爭戰時。竭盡全力。爭奪其地。可見其地。關係戰爭之勝負最大。爲古今軍事必爭之要隘也。嗣日人在山「白玉山」巔。建築紀念碑。以誌軍功。並有一古井。名曰金井。上覆石板。有粗大鐵鎖練。下沉井底。鑄有十個字云。若要金井開。必得原人來。據土人傳說。係鎖一蛟龍者。

## 城山

劉監圃云。旅順北二十里許有城山。山上有古城。相傳唐王征高麗時。曾駐蹕於此。故築是城。

## 假旨山

古南蘇云。山在金縣西南海雙島之東。山勢平行。無峯巒特起之觀。山上有古蘭

若。數百年前之建築物也。詢諸父老。山胡爲以假旨名。咸云不知。惟相傳明季袁崇煥殺毛文龍於雙島。即在此山。語雖無稽。然考之明季某稗史所紀。謂袁崇煥抵雙島。誘毛文龍至一山。山上有廟。袁招文龍至廟中。而不令一卒入。袁即於廟之後院。假稱有旨。遂殺文龍焉。其所紀之山。與此山似隱隱相符。且山距雙島。不逾十數里。尤足證明之。更考明季袁崇煥本傳。亦謂崇煥以閱兵爲名。泛海抵雙島。文龍來會。崇煥相與宴飲。每至夜分。不覺也。嗣又云。以六月五日。邀文龍觀將士射。先設韓山上。令參將謝尙政。伏甲韓外。文龍至。其步卒不得入。崇煥曰。予詰朝行。公當海外重寄。受予一拜。交拜畢。登山問從官姓名。多毛姓。崇煥笑曰。爾等積勞海外。月米止一斛。言之痛心。亦受予一拜。崇煥因詰文龍違令數事。文龍抗辨。崇煥命縛之。數其有十二斬罪。乃頓首請旨。取尙方劍。斬之帳前。乃出諭其將士曰。誅止文龍。餘無罪。當時文龍麾下。健校悍卒數萬。憚崇煥威。無一敢動者。觀此雖與稗史所記稍殊。然謂斬文龍於山上。則同也。且明季迄今。不過二百餘年。袁崇煥殺毛文龍。本爲擅殺。假旨之說。當時必已喧傳衆口。故遂名其山爲假旨山。惜海隅僻陋。無人搜訪古蹟。著之史乘。迄於今日。又訛爲夾矣。故欲於荒烟蔓草中。考究

此山之命名。不綦離乎。爰約略記之。

## 海洋島

徐成安云。海洋島。在金州東海中。一派青山。陡起海面。逶迤環抱。作圓曲圈形。當中海水一灣。深碧無波。西北有口。巨艦可通。此亦天造地設之一良港也。甲午之役。我海軍艦隊丁汝昌所部。嘗伏於此。其後俄租旅大。欲增其式廓。以作海軍前哨根據地。測量規畫。動工未久。而日俄之戰又起。今日人設有捕鯨會社在焉。此島之有人烟。固不知自何時始。然在昔地理不講。交通未便。國家政令所弗至。征斂所不及。此中居民。男耕女織。生活簡單。桑麻鷄犬。優游自得。所謂世外桃源。殆不過此。至前清咸同間。某勢豪作亂。避罪逃此。官兵乘船追緝。未獲。自是上憲始知有此島云。

## 姑子洞

劉監圃云。旅順東數里。有姑子洞。洞在山腹。可容數十人。就岩石鑿成佛像以供奉之。大小不一。每佛前則有石桌一。大可方尺。時下尙在。其外有茅屋數椽。道士居焉。惟創自何代。則無可稽矣。

## 將軍石

劉監圃云。將軍石。又名上馬石。在金縣營城子村西。相傳爲薛仁貴征高麗時。

一日曾在此處上馬。故名之也。

## 永興寺

劉監圃云。旅順北數十里。有古刹曰永興寺。寺院甚大。爲金州城西第一廟宇。

有如來大殿。彌勒殿。觀音閣。關帝廟。天后宮等。院內松柏蒼蒼。古碑甚多。考其碑誌。係唐時尉遲敬德飭工建築。當初均係銅像。後因屢遭兵燹。以致不完。今則全易泥塑矣。

## 關帝廟

金萬選云。金縣地處渤海北岸。爲奉省渤海門戶。昔唐太宗征高麗時。浮海而來。

於此登陸。大戰獅子口。(即今旅順口)黑風關(即南關嶺)各要隘。至今遺跡不可勝述。惜余幼年離鄉。古跡鮮聞。憶幼時曾聞老者言。先有老爺廟。(即關帝廟)後有金州城。金州古名寧海。老爺廟位於城之中心地。關帝像乃係銅鑄。於城未立時。由海潮滾來。潮退村人近前視之。知爲關帝像。

衆議抬像進村修廟。以保民福。向像祝畢。以八人抬之。至村邊井口前。抬夫口渴置像飲水。飲畢再抬。雖百人亦不能動。(其像身高八尺多。勝濶三尺餘。其重量可知矣)於是人咸謂神靈顯聖。隨地而安。即時募款修廟。神坐井沿。工竣後。夜夢神示曰。吾借此一箭之地。可保黎民幸福。但夜間不許打五更。倘不遵吾言。爾等咸葬魚腹矣。慎之戒之。其後修城立縣。名曰寧海。(至今西城門石刻字跡

尙可辨認）某朝有宰斯邑者。不信不打五更之戒。迫更夫打五更。天尙未明。潮水大漲。沒城僅離三版。黎民百姓。病苦嚎啕。宰無奈。焚香祝禱。將寧海縣之區投於海水中。水乃退。民乃安。至今仍舊不打五更。事雖迷信。但鄉人士咸奉之惟謹云。

## 明金州衛儒學與碑記

長風節譯岩間德也原著云。金州城內東南隅文廟。爲明

金州衛儒學舊址。其建設年代。據明一統志載稱建自英宗正統元年。遼東志則稱創於太祖洪武十七年。其間相差五十二年。何說爲是。遼難斷定。惟查洪武年間。各地方盛興學校。洪武二年。詔全國各州府縣興學。遼東各衛儒學（即衛學）亦興於此。洪武八年。成立海州（今海城）衛學。十六年。建蓋州（今蓋平）衛學。十四年（明史稱十七年或指校舍竣工之日而言乎）設都司（今遼陽）儒學。十八年設復州衛學。廿五年設三萬（今開原）衛學。遼東各衛學。旣於斯時先後設置。斯則遼東志稱金州衛學。創至洪武十七年。當屬事實。萬歷三十六年金州海防王邦才撰文勒石之金州衛廟學碑記。有『金州東海陬窮微其孔廟儒學建自國初迄於今二百年』一語。其『國初』云者。必指洪武時代而言。又自該歲廂算至洪武十七年。正二百廿三年。則二百年云者。亦殊近理。且遼東志載有『洪武十七年

建設於金州城西南隅之前衛學。至止統二年。經指揮左讓遷移城東南隅之語。則一統志所載。必以正統元年之遷移計畫。而記爲建設無疑也。金州衛學之創立。如在洪武十七年。距今已五百三十六年矣。中國古制。興學必先釋奠先聖。明朝國初祀典。已有先師廟祀典之規定。則衛學建置之時。必以同建文廟。不難臆測。厥後盛衰靡常。其衛學與文廟。却每終數十年重修一次。迄於明末。就中自萬歷三十三年七月。迄翌年三月之工程。載在王邦才之金州衛建修廟學碑記。並南京吏部尙書趙煥之遼東金州先師廟碑記。其前者多述肇工之次第。後者則將遼東當時之形勢。並日本文祿之役。暨元末明初至永樂間倭寇之累仗。所受損害狀況。悉含於碑文。則其在遼東史上之價值可知焉。該碑全文。學界知者甚鮮。茲錄於下。

遼東金州先師廟碑

我國家敦上儒術。建學立廟。諸凡典制。所爲崇重先師者。視往朝獨備。薄海內外。遍置預宮。蓋譬宗立。四遠咸取則焉。遼東之金州。有學舊矣。歲久告圯。赤白錯渝。亟闋闐闐之不飾。而羣萃都肆之所。幾化蒿萊也。興起人文之謂何。余門人盧氏王汝川。以濟南郡相防海於遼。金州實其轄口。

慨然奏記當塗。咄嗟報允。凡經三時而爵鳩其工。以訖聞。堂奧飭矣。呆窟挾振新矣。孚釐藻井煌煌矣。旅樹幅如矣。桂椽翼如矣。而後金州歸然。稱有尼父之宮。凡筵媵爵庭。且萬焉。尼父南向當坐。配祀秩然。博士弟子。肄習□達。獲以處所。則汝用之。能急當務也。惟是遼陽爲京師左輔。女直毛憐。距其東北。朶顏福餘。距其西北。蓋控弦鳴鏑地。漢季公孫氏。有衆一旅。能株守疆圉。管幼安至棄中原往依之。□代驅逐南北。遂藉爲□□。不費一矢。向其樊。夫非強國歟。而今之遼河何多故也。倭奴犯與國。糜

國家錢穀數百萬。碧蹄雲黯。鴨綠波腥。僅僅束甲鳴劍去。而高句麗之元氣已羸耗不能支。此震於鄰也。大將軍建旌旄出塞。鼓聲不起。全軍覆沒。屋瓦皆振。洶洶累卵危矣。此震於躬也。蠅營之使。吮血吸髓。狼域橫馳。人獲鼯鼠。青海長山之利。童木竭川。而不能供。剝於膚矣。夫彈丸之地。一震於鄰。再震於躬。至於剝膚。而重陰積晦之爲。可悠然念焉。然而商不易途。市不易肆。介冑之士。荷戈之夫。甘爲魚肉。仙々焉而不敢越厥志。固主上之威靈赫矣。實吾尼父道光。二曜用以維之之效也。金州於遼陽最重。豈以控弦鳴鏑之地。獨重兵哉。古者春夏學干戈。秋冬學羽籥。

胥□□序。良非無以。夫金州尙干戈。而羽箭亦曷可舍旃。若汝用者。眞能急當務者也。于時當塗督撫。則川吾趙公。直指則□漢康公。念野肅公。兵使則雲□張公。錦溪楊公。皆主其議。而捐俸樂成者。法得書記已。而系之辭。辭曰。洙泗興業。虞周無前。雷雨徒盈。寧坤清乾。遼海之區。矢盡虺橫。仁義在國。如綫不傾。金起於鎔。水實因水。血氣可通。靡不風起。堂煌俎豆。□況□□。象效殫明。菁莪化行。厥目所王。厥心所之。觀感奮發。郊遂不移。譬射有鵠。如戰示旌。懷仁景集。抱智騰生。膠棧列采頹水生文。勒名貞石。永範□□。賜同進士出身資政大夫南京吏部尙書前刑部尙書吏部左侍郎都察院左僉都御史東萊趙煥撰。

萬曆三十五年歲次丁未仲夏月吉且立

## 元張百戶墓碑銘

岩間德也云。出金州城北門。渡小石橋。東北行。約百步許。有

天齊廟。不知何時所建。內有古碑。爲明正德二年立。以此推之。則此寺常創立於四百年以前。沿寺之西廡北壁。有小菜圃。地不足半畝。菜圃與西廡北壁間。有古碑橫臥於地。僅露背而底部一角。餘則悉埋地中。人亦未嘗發掘。詢之寺僧。亦不知爲何碑。余於數年前。曾在此寺西里許之永慶寺



境內。掘得唐代梵文古陋羅尼經幢。且此地明代古碑之存於今者不少。遂以爲此碑或亦經相當年代之一古碑也。惟爲冗務所纏。迄未得發掘之機會。本年五月二十一日。偶得少閒。遂發掘之。始知其爲元張百戶之墓碑也。張百戶。於日本弘安四年。從元軍往侵日本。此碑舊在雙山屯。後世子孫。移居金州附近。遂携此碑以俱來。其後。或因子孫斷絕。不克祭祀。竟棄碑於草野間。亦未可知。有心人恐其堙滅。因而寄託此寺。寺僧不知保護。亦棄置之。詢之寺僧。亦不知何時移來。該寺不但無意保存。且願人之携去也。余遂爲之移於金州東南文廟內。今仍在文廟保存。

儒丐按此碑高四尺一寸三分。寬一尺八寸五分。厚六寸三分。無碑頭龜趺。惟碑之頭部中央。有凸起之部分。大約係碑蓋接筭處也。本年五月。經日本人岩間德也君發見之。夫金石文字。頗足以補史傳之不足。欲研究歷史者。以金石爲必要資料。故近來治斯學者。不獨中國人士。而東西洋學者。尤注意搜羅。岩間君對於此碑及張百戶之考証。旁徵博引。細大靡遺。其全文載於九月號之「滿蒙」雜誌。茲不能爲之全譯。碑文。亦由岩間君譯成和文。本擬轉譯。恐有錯誤。現已請於岩間君。將原碑文見惠。照錄於左。

皇元故敦武校尉管軍上百戶張君墓碑銘

東路蒙古侍衛親軍都指揮使司□□張克敬撰

東武司史王繼先書丹 芝陽石匠□頭吳安道鑄刊

張君諱成。蘄州人氏。元十二年內附。十六年

詔精銳軍士。起赴京師。充當侍衛。君應

詔選時。年已壯仕矣。勤而有勇。蘄州路新附軍總管司。檄君權充百戶。五月蘄州路□討□□。復檄

君□侍衛軍百戶。統軍八十六名。暨妻孥至京師侍宿衛。十八年。樞密院檄君仍管新附軍百戶。率所

統塔千戶岳公琇往征倭。四月。□合浦登海州。以六月六日至倭之志賀島。夜將半。賊兵□□來襲。

君與所部據艦戰至曉。賊舟廼退。八日賊遵陸復來。君率纏弓弩先登岸迎敵。奪占其□要。賊弗能

前。日晡。賊軍復集。又返退之。明日倭大會兵來戰。君統所部。入陣奮戰。賊不能支。殺傷過衆。

賊敗去。

行中書賜賞有差。賜君幣帛。二軍還至一岐島。六月晦。七月二日。賊兵兩至。皆戰敗之。獲器仗

無算。二十七日移軍至打可島。賊舟復集。君整艦與所部。日以繼夜。鏖戰至明。賊舟始退。八月朔。海風作。船壞。軍還至京。二十一年。君承命乾山伐木。運至京師。以爲修第之備。廿二年十二月。

勅授君敦武校尉。管軍上百戶。詔賜白金五十兩。鈔二千五百緡。幣帛二。命統所部軍携妻孥輕重。隨千戶岳公。隸宣慰使都元帥阿八亦往水達達地西屯田鎮守。明年三月。至黑龍江之東北極邊而屯營焉。廿三年五月。諸王乃顏叛。從千戶岳公領軍。屬以南。且戰且行。七月二日。至古州。敵障其前。不能進。譏夜攻敵營。失其路。黎明迎敵力戰。敵敗之。如是遇敵相戰。踰四月。至高麗雙城。十月回至遼陽。又起鎮咸平府。廿五年。樞密院檄仍侍宿衛。廿六年。隸右翼屯田萬戶府。廿六年調楊村桃御河。五月。隸臨清運糧萬戶府。三十年。

詔領所統軍。併爲金復州新附軍。萬戶府屯田鎮守海隘。七月至金州。君分屯於城之東北雙山沙河之西。遂爲恒業而居焉。

三十一年四月六日卒。年六十有九。嗚呼。

皇元興盛。武勇之士。盡力效忠於時也。君由徵應

詔。選充侍衛。征日本。戍極邊。二十餘年。水陸奮戰。何營百十餘陣。爵

授百夫長而世襲焉。非君之忠於爲

國。曷至於此哉。君之妻王氏。一子。貴未襲而先卒。君之孫二人。尙幼。次賽效又卒。幾乎廢矣。

大德二年。長重孫襲祖職。

勅授進義校尉。陞敦武。加忠翊。返贈其考曰忠顯校尉。管軍百戶。

母黃氏。妻劉氏。封恭人。繼妻王氏。男三人。長保保室劉氏。次衆家室湯氏。三拗驢室姚氏。孫

狗兒黑厮歪頭八速開住寨家奴。

女四人。以至正八年三月朔日。遷柩葬於沙河東而塋焉。銘曰。

皇祚隆興 是生孔武 君奮戰威 從征□□ 二十餘年 忠勤不吐 有子先終 幾乎廢功 孫其承

之 襲爵無窮。刻銘樹石 算永國同 時至正八年戊子三月朔日忠翊校尉管軍上百戶張重孫等立石

石頑按上百戶張君墓碑銘。本年六月間曾見之於某報專載。與岩間君碑考所載之原文。間有一二

字之不同。註錄如下。以便考古者之訂証也。起赴京師之起作趨。□合浦登海州之□作至。賊舟迺退之退作返。又返退之作又返敗之。携妻孥輕重作携妻孥輜重。阿八亦作阿八赤。二十年調楊村桃御河作廿七年調楊村桃御河。餘均同。

## 鐵牛與鐘

金萬選云。金縣西門外玉皇廟前。有鐵牛一隻。埋於地內。首足皆不見。惟牛背露於地上。背上有字一行。因年久字跡模糊。年代已不可考。余幼時。曾聞父老言。昔者海潮上湧。關帝像與鐵牛及玉皇廟之鐘。皆由海水滾來。清光緒十三年有劉盛休者。係劉銘傳爵帥之侄。率銘字軍馬步砲十三營駐防金州柳樹屯等處。修築城壕。時該兵勇欲將鐵牛掘出。費盡半日工夫。掘至二尺深。天晚工散。比及第二日視之。仍如原理之深。可謂奇矣。後被該管長官申斥。不敢再挖。日清戰爭之年。夏秋間天色忽變昏黃。每至夜半。嘗聞怪叫之聲。人咸云其聲似牛。必主荒亂。後果如其言。

## △ 洮南縣

### 洮南

徐喜文云。洮南昔爲蒙地。名沙鷄毛頭。清時設府。民國成立以後。始改爲縣。因城

北有洮兒河。故命名洮南。

富瑄善云。洮南未開時。土名沙鷄毛頭。考其地。昔屬蒙古。蒙語沙鷄毛頭者。即鵠窠之義。蓋彼時不過一村落耳。

張篔如云。洮南縣。土名雙流鎮。本內蒙古科爾沁右翼前旗札薩克多羅札薩克圖郡王之地。爲洮爾河貴勒河合流之點。茲今洮昂鐵路工成。商賈麇集。市井繁盛。大有一日千里之勢。迤北過突泉。聞有殘石刻漢隸大將軍字樣。意必衛青出塞。偏師所及。勒石紀功者。姑誌之以備博古家之參考焉。

## 烏洛侯國

邱可名云。魏之烏洛侯國。唐時爲烏羅渾國。地居北海。其土下濕。多霧氣而寒。其國北有完水。東北流合於難水。又西北有于己尼水。即古之北海。按清曹廷傑爲烏洛侯。即今之俄屬尼布楚。考辭源謂魏書舊唐書所載核之。其國當在今之奉天洮南地方。按洮南南一百四十里之郭爾羅斯旗界。平地數十畝。去土一尺。下有鹹鹽。人民爭往取之。與海鹽無少異。人咸稱之謂北海鹽。可證昔之北海。即在是地。

## 沙積街

吳紹庭云。洮南縣大小北門裡土城內有古榆樹一株。今枝幹已枯。圍以土墻。據

蒙古人云。係屬神樹。已百餘年矣。俗稱沙積街毛頭。沙積街即喜鵲。毛頭即樹也。蒙古土人。以喜鵲在該樹修壘。地遂以此名焉。光緒廿八年放荒時。改稱双流鎮。以鎮基位於洮交兩河之陽故也。旋設洮南府治。即今洮南縣。特誌之以備考證云。

## 古城雙塔

徐喜文云。距洮南城北廿里。四家村。有古城一。內存雙塔。塔如亭形。大者可二丈。次者僅丈許。塔之中間。有倒栽楊柳一株。其枝下垂。詢諸守塔者云。唐時蓋蘇文之妹。爲兄復仇。屯兵於此。並云城內之瓦礫堆。乃其梳粧台焉。村人在城內掘溝。常得古錢古物。故謂塔及城。皆唐之遺物也。

## ▽ 雙山縣

## 雙山縣

劉豁然云。雙山縣。舊名板打窩堡。據父老云。該地原爲蒙古村落。所建房屋。不用磚坯。均以木板爲牆。故以板打窩堡名焉。宣統三年。設立雙山縣。迄今仍多稱板打窩堡者。或云有蒙人名班達者。曾在此地設立窩堡。故名班達窩堡。二說未悉孰是。姑並誌之。以待識者之

較証。

## 高麗城

劉谿然云。高麗城。在雙山東南七里許。又名老城。周圍約三里。隆然突起。高丈餘。破磚碎瓦。雜然滿地。城基遺趾。猶可辨認。現被附近居民。開墾成田。每當春耕時。恆得銅鍋銅鏡及磁碗瓦缸等古器。相傳此城。係高麗所築。故迄今仍呼該地曰高麗城。

## 古城

王惠周云。雙山縣。東南廿華里。有古城一。周圍約五里許。現已頽塌不堪。惟塼基尙存。寬有丈餘。邇來被附近住戶開墾成田。每值春耕時。恆拾得古錢古杯盃甲片等物。相傳高麗某王。藏兵所築。

## 蒙古舊城

王惠周云。雙山北有重德屯者。其南里許。崗巒伏起。一望無際。乃蒙古舊城也。但年遠代遙。頽圯不堪。僅餘城基。尙可辨認。余友董宛祥幼時即住于此。故知此地軼事甚詳。每于暇時談及之。某歲春。其兄耕于斯。拾得鐵匣一。高一尺。長六尺。上刊蒙王自佩等字。餘均模糊不清。開之。內有七星寶劍一。劍身一面有龍泉劍三字。一面有龍一條。惜乎劍匣其家人不知保存。棄如草芥。惟其劍現在余友手。前帶之來街。特招余視之。果如其所言。聞相傳金兀朮伐宋



時。駐兵于此。

## 五門六眼

王濮陽云。雙山縣城。有門五。當築城之初。並未留出水洞。故每遇霖雨。城中輒受水潦之患。無何而城牆自裂一洞。水得出。民乃安。是以有五門六眼之稱。

## 玉几湖冰山

王濮陽云。雙山縣城北十里許。有玉几湖焉。湖在積善村後。能容雙山全縣境之雨水。相傳湖內有怪獸。每當夕陽西下時。輒聞如牛之吼聲。及至天氣寒冷。湖水冰凍。

初亦無甚異。未幾。冰裂小湧。說者謂係怪獸之噴吐。水上湧。復結爲冰。狀如山嶺。晶融皎潔。白日照耀。霞光萬道。高可十五丈。邇來春溶化。湖面依然無所變動。故時人爲雙山八景之一。

## 七星鬧寶山

王惠周云。去雙山縣城西五里。有嶺隆隆起者。七星鬧寶山也。高僅五十餘丈。橫亘數百步。遠視之如虎踞。近觀之似龍盤焉。山巔有峯七。排山如北斗形。(近又多稱爲七星山)相傳清光緒廿八九年。土人常見金馬金雞出沒其間。故命名曰七星鬧寶山。但近年來。山形依舊寶物已不復現矣。

## 聖宗廟

劉谿然云。雙山東北廿五里。有村曰邊家營子。村後有一土崗。崗東有聖宗廟。

據父老云。前五十年。此崗東西兩端。年年增長。後有堪輿家某。言此崗東端長入泡中（崗東二里許有一大水泡）此地當出一王者。嗣爲蒙王聞知。特令該村在崗東端建一聖宗廟以鎮壓之。建廟後此崗果不長矣。今該廟多年失修。坍塌無餘。惟磚瓦狼籍。遺址猶存。

## 戒殺碑

王漢陽云。雙山縣北關路東土地祠左有戒殺碑在焉。文曰。祈禳不宜殺生。世人有疾。殺生祀神以祈福佑。不思己之祀神。欲免死而求生也。殺他命而延我命。逆天悖理莫甚於此矣。夫正直者爲神。神其有私乎。命不可延而殺業具在。種種淫祀。亦復類是。此舉世習行而不覺其非。若業殺生。神理所殛。我勸世人。若無生計。寧丐食耳。造殺生命。不如忍飢而死也。吁可不戒哉。其碑背抹塗不清。不能盡錄。

## 吠海吐屯

王惠周云。雙山縣城南十里有吠海吐屯焉。土岡環抱。沙漠無垠。村前有古廟。據土人云。清道光年間。村中時有神豬出沒。住戶方姓。築院墻得一石曰。置于門前。作神豬食槽。嗣于光緒十年。方姓少婦。持鎌刈桑。適值神豬在伊門前。少婦奔逐之。至岡坡。以鎌刀擊之。中尾。遂砍落尾尖數寸。倏變爲金。少婦方欲拾歸。忽而黑風驟起。神豬大吼。聲聞數里。事

爲蒙王達爾罕所知。遣員查察。查畢爲其築廟。遂以吠海吐名村。（因蒙人呼豬曰吠海）至今廟宇巍然。遺跡仍存。爲父老所津津樂道云。

## ▽昌圖縣

### 昌圖縣沿革

史可範云。縣治疆域之沿革。唐虞夏商以前無論矣。自周秦以訖前明。

迭有變更。其間部落不一。或爲扶餘。或屬鮮卑。或隸靺鞨。或入契丹。史策所載。代遠年湮。經界源流。莫可辨識。至前清則爲科爾沁部。故以其游牧之區。爲湯沐之地。亦分茅胙土意也。攷內蒙古分盟者六。而哲木里爲六盟之一。科爾沁三旗。又爲哲木里四部之一。從前府治。皆屬博多勒噶台親王旗地。所屬各州縣。則多達爾罕王旗賓圖王旗地。嘉慶初年。招民開墾。漢族漸繁。於是添設民官以治之。初設理事通判一員。巡檢一員。尋改撫民同知。皆在古榆城內。即今縣治是也。光緒三年。始升爲府。所屬領州一。曰遼源。即今遼源縣。縣三。曰奉化。即今梨樹縣。曰康平。即今康平縣。曰懷德。（即今懷德縣）其牧佐各官。亦先後並設。然地面遼闊。村屯稀少。民皆蒙玉租

戶。由王旗設局徵租。無丁賦正供。官斯土者。催科雖免。撫字則勞。蓋與內地府治異矣。民國成立。改府爲縣。與從前所屬各州縣同隸洮昌道屬云。

### 古榆城

史可範云。城方形周約一里。即前明遼海衛故址。城垣有榆樹數株。命名蓋由於此。昔年掘地得石。刻有遼海衛三字。徑尺大。旁刻永樂七年。指揮陶煜立石。今城垣傾圮無存。

而城關尚在。考其磚石。長大而厚。雖歷年風雨侵蝕。而堅強如故。城關上書古榆城三字。字跡雖模糊。尙可辨認。即今之昌圖縣城也。

### 跑馬城

史可範云。昌圖西南十里。有荒城遺址。周圍二里有奇。相傳古時高麗在此賽馬。故名跑馬城。

### 四面城

史可範云。距昌圖北四十里。有城曰四面城。週約十里。分四門。城內有石龜。昂首土中。城垣雜圮。遺址尙歷歷可數。聞諸鄉老。此城爲高麗所築。至今城內時時掘出古錢等物。遊此地者。不勝弔古之感焉。

### 小城子

史可範云。距昌圖東南廿五里許。有村曰小城子。地勢較平。其城垣已頽圮無存。

惟有民戶四五十家。自成村落。該城建於何代。則無從考查矣。

## 大營盤城

史可範云。昌圖縣城南十六里。南滿鐵路馬仲河驛南。有荒城遺址。周約三里許。牆高丈餘。形爲四方。惟年久頽圯。城之內外。已墜爲農田。然殘磚破瓦及土垣遺跡。尙可辨認。春夏之際。農夫恒耕出古錢等物。城垣之上。有古廟一座。亦因年久失修。坍塌不堪。相傳古時高麗在此屯兵。該村之命名。不問可知矣。

## 昌圖八景

王舜卿云。昌圖舊八景。今姑縷陳於左。(一)王寺歸鴉。縣城南郊之文昌廟。俗稱喇嘛廟。前清忠親王少年時。曾讀書於此。因以得名。寺之前後。樹目葱鬱。每當夕陽西下。爭巢烏鳥。逐隊飛來。擇枝而棲。知其所止。(二)南橋烟雨。縣城正南有大橋。橋南有碑亭。草木清蔚。每於陰雨迷離之際。烟繞林樹。形勢蜿蜒。(三)榆嶺鶯聲。距縣城東南十里之新立屯有山焉。山上多榆。因名榆嶺。每值春色融和。草木青茵。鶯簧迭奏。榆錢振蕩。堪携斗酒雙柑。共聽黃鸝。(四)金山晴雪。金山距縣城十五里。山高廟古。每於雪止日出。光明一片。因以得名。(五)關山落雁。城南馬仲河有山焉。兩峯環抱如門形。南三里許有邊關。故名。其山曰關山。山下爲平地。每屆春

秋。雁集於此。亦天然一幅平沙落雁圖也。(六)青雲石佛。縣城北之八面城。有青雲寺焉。殿宇巍峨。林禾蔚美。中有石佛一座。不知出於何代。惟風霜剝蝕。古色斑斕。想歷已數百年矣。(七)三井蟹樓。三眼井距城五十里。每當日出之前。雲氣上升。幻出空中樓台殿閣。亦變幻之奇觀也。(八)通江晚渡。通江口在縣西南。距城七十五里。爲縣境之通津。每當日暮。往來行旅。爭上渡船。蕩漾中流。夕陽明滅。真一幅煙波畫稿也。

### 邊墻

史可範云。昌圖縣北十里。長山堡村北五里一墩。形跡宛然。東起吉林。西入柳條邊。長百里。高二十丈餘。如土邱。

### 石廟

史可範云。石廟。在昌圖縣西四十里。石雖剝蝕。上有大韓二字。餘不可辨。土人均呼爲韓神廟云。

### 寶塔

史可範云。昌圖北七十五里。有村曰小塔子。該地有寶寺。高約數十級。中級具十八面。刻羅漢。相傳建自唐朝。旁有舊碑。字跡不可辨認。屹立遼水之濱。當清時。府治與康平縣分界之處。相傳爲古遼濱塔。

## ▽康平縣

### 沙陀國

傳占熬云。康平縣西北五十華里。有土壕一道。即沙陀國之境界也。相傳後晉石敬瑭。駐兵於此。以防高麗。

### 高句麗古城

傳占熬云。康平縣正北九十五華里。有村曰城五家子。該村有古城。相傳唐征高麗。某將軍駐兵於此。該城面積週圍五里半許。現僅存城址而已。

### 土城子

姜希農云。康平西二十里。有土城在焉。週圍五里許。城基尙可辨認。近經人民開闢成村。相傳此城係金兀朮所築。曾駐兵於此。

### 古城

郝淑洪云。距康平縣五十五里小塔子村東。有一古城。內外三層。週圍四里。頽塌不堪。審其形。則有四門。南門外有一點將台。高一丈。西門外有一寶塔。高十一丈。共十八層。東門外則遼水環繞。城內殘磚敗瓦。縱橫山積。今已闢爲田地。土人耕種。嘗得古錢古甕銅鏡等物。其爲何代之建築物。則已無可稽考。惟是村古刹內僧人。由城門下掘得古磚。上有字數行。俱已模糊。

不真。稍能辨者。僅真觀二字。則此城殆係唐時所建。

## 小城子

彬憲章云。康平縣北四十五里。有村曰小城子。因該村之東頭有一古城。週圍四里許。四門相對。據傳聞此城係高麗建築。彼時有高麗鎮邊使駐守。今城雖坍塌。牆基尙可辨。城內早耕田。昔年有耕此者。得一方石。形似碑。上有字跡。隱隱可辨者。則爲「書有…益…金飲…鎮守…」之數字。因埋沒年久。被土侵蝕。難以認識完全。斯石現仍在北門外。

傳占熬云。康平縣正北五十華里。小城子村有古城。周圍約五里半許。現已僅存邊基。寬可五丈餘。相傳係唐太宗征東時。高麗某王。駐兵於此。

## 鬧寶山

津門少年云。康平縣正南三里許。有山曰鬧寶山。山景幽雅。山中有石坎十三個。相傳係十三太保李存孝之墓。每年春秋兩季。蒙民前來祭祀。

## 馬鞍山

傳占熬云。康平縣。西南一百廿華里。有山高約六十丈。山形如馬鞍式。名曰馬鞍山。石散上有石碗一個。內盛石骰子三枚。手抓到碗口。回則出點。欲將骰子拿出碗則不能。

鄉農云。每逢陰天雨後。有金馬到該山。見者以爲與常馬無異。



## 鳳凰坨

傳占鰲云。康平縣東北二十華里。有村曰鳳凰坨。因該村形若鳳凰故名。然據農人相傳。唐太宗征高麗時。有鳳北往。止於新村。薛仁貴以箭射之。展翅飛去。斯爲村名之由來。二說不知孰是。

## 寶塔寺

彬憲章云。康平縣東四十里。有寶塔寺。其正殿塑有娘娘像。院內之塔。相傳係唐王征服高麗時。建此塔以留紀念。但年久失修。瓦片已多下墜矣。

## 唐僧廟

傳占鰲云。康平縣西北四十華里有村。村傍有廟曰唐僧廟。分前後殿。廟貌巍巍。前殿門畫有唐僧金身像。高約數丈。蒙民崇信者。或跪膝而坐。或閉目影身而立。該廟有番僧五百餘人。廟產亦頗豐富。

## 古塔

傳占鰲云。康平縣東南五十華里。有村曰小塔子。村傍有古塔在焉。高約三丈六尺。根寬丈餘。相傳唐太宗征高麗時。駐兵於此。後命尉遲敬德監修此塔。形如亭式。嵯峨雄壯。迄今數百年。並未頽塌。惟塔頂稍歪耳。

## 包塔

郝淑湛云。康平縣東南五十五里。小塔子村東之古刹院內。有一塔。高十三丈。共十

八層。中節週圍皆羅漢像。旁有碑碣。已斷爲三。置諸地。視之爲清咸豐八年。昌圖祥知府。見此塔中節殘壞。令村人集資。已亦捨金數十兩。興工補修。名曰包塔。今已磚瓦零落矣。

### 觀塔

郝淑湛云。康平縣東南四十里。郝家屯村南有一觀塔。據聞當清初時。太宗之女固倫興平永雍公主。由此經過。停戀少憩。見此地山清水秀。有明時所建古刹。公主乃捨香資。並由燕京請銅佛數十尊。青陂弘陽明醫眞人所著之經卷數堂。後有住持王道士守緒者。修煉十餘載。於雍正二年羽化。身坐如健。面目如生。死之日。本村人見道士乘黑驢而行。問之何往。答曰吾赴鷲嶺。及歸。至廟視之。則道士與其驢已死三日矣。村人以其已成証果。乃集資建此觀塔。將道士坐尸盛於內。觀高三丈餘。立於山巔。共七層上有匾額。字跡已模糊不眞。稍能辯識者。爲雍正二年八月建修。中有萬壽塔三大字。尙極清楚焉。

### 神仙洞

李佩恩云。康平西一百廿華里有一山。山之西坡有一洞。即神仙洞也。洞凡七門。頭門寬高各丈餘。內甚寬濶。在石台上。供有佛像二尊。居近土人。每因病前往求藥。服之果效。二門圓形。直徑約四尺許。內有如巨牛之一石。一人推之則搖。二人撼之稍動。三人擁之。則絲毫

不動矣。以舌舐之。亦能去病。其餘五門。次第減小。然人均可屈身而入。惟內極黑暗。入時必須持燈。及至七門極端處。僅有一如升口大之洞。伸手其中。涼風透骨。聞父老云。某年有人試該洞之深淺。以小犬投入洞中。後由大壘墮界。某河內浮出。此洞通地河。所聞如斯。合併誌之。

## 莫力克石蛤蟆

傳占熬云。康平縣西北四十華里。莫力克(蒙古古名即蛤蟆)村傍有山。

曰闢寶山。形如饅首。當中有石坎。據鄉老云。係李存孝之墓。每年春秋。蒙古某王。攜帶供品。前來祭祀。該山坡下。有石版。長約丈餘。寬約六尺半。該石版上有石蛤蟆。大如臥牛。每逢盛夏夜間。輒害禾稼。農人某碎其腹。棄在村西河中。現猶存石首。時常作祟。某君建祠供石首。每月朔望焚香云。

## ▽開通縣

### 開通縣

吳紹庭云。開通縣。又名七井子。據扎旗蒙人云。該地原有蒙人村落。因其向來生活習慣。蓄牛馬羊羣甚夥。孳生口繁。需水益多。遂鑿井七眼。故以七井子名焉。光緒廿八年設

立開通縣。迄今仍多稱七井子者。

## 俄樂廟

邱可名云。開通縣西十五里。相傳音爲平沙。纒起高崗。蒙人乃建俄樂廟於崗上。

未詳年代。考俄樂二字。係蒙人謂崗之美稱。崗後原有水泡一處。方圓數十丈。周圍十餘里。泡內有泉眼。冬夏不涸。常有水雁飲食於此。廟院內供有金佛一座。高一丈七尺。廟之極上層。供有多數佛像。壁間畫有美女及牛。足下皆有雲。未知何意。每年四月十五日。香火甚盛。各地蒙人。咸來拜佛。現已年久失修。漸次頹圯。蓋因蒙人口少。無人主持故也。

## ▽懷德縣

### 懷德公主嶺

齊翼昇云。前編昌法懷雙四縣。均載有公主嶺。編者因無從辨証。故分縣

誌之。查昌法懷雙。均與蒙界毘連。各蒙王之女。均稱公主。四縣俱載。宜也。按懷德房蔭棠係如中二君所述。詳細不謬。深恐閱者致疑。用以証明。查懷德公主嶺。確係城南八十里。該嶺蒙人稱爲格格靈。(因公主小字格格)今人呼爲公主嶺。嶺左右九峯環繞。中嶺聳。靈居中嶺前。嶺四十里許

黑山咀子有駙馬墳。俗稱達子墳。經累年風雨剝蝕。仍不頽朽。其奇者。坐公主墳前瞻望。駙馬墳若在目前。旋返視公主墳亦然。據鄉老遺傳。昔有相士某。謂此嶺係九鳳朝陽。左右階級。爲之朝拜。爲懷境地勢之冠。將來嶺前下有千人萬馬之現象。後經俄人建築鐵路。由長春至嶺前。爲之三站。站名稱爲公主嶺。今果應相士之言矣。

## 甕泉

劉式南云。懷德西四十里之甕泉。吳君駿適早已陳之。而其南二十里尙有一甕泉。此泉之面積。較大一倍。其中水已涸。每歲所生蘆葦。高可及丈。春秋兩季。人民多擊雁於斯。其景較先述之甕泉。雖相去霄壤。而爲甕泉區別計。不可不記也。

## 石佛

吳駿適云。石佛。爲懷德縣西北之巨村。距城三十里。村旁有河。前清某年。雨連綿。河水暴漲。迨水平退。河中現石佛一尊。村人以敬禮迎之。置土阜上。以楮醴祭之。旋修廟供奉之。村中患病者。禱之即愈。故至今香火勿替。該村之名自此始。

# 洮安縣

## 洮安縣

吳紹庭云。洮安縣。原名白城子。因該地舊有城基。其城墻均以白土塼之。故蒙

古人名之曰白城子。自設縣治迄今。漢蒙人民。仍多沿稱白城子。惟在無垠之蒙荒段內。代遠年湮。殊乏考証。據聞係唐時朝鮮人所建。按其情勢。想非虛語。

## ▽法庫縣

### 小塔子

傳古鰲云。法庫縣有村曰小塔子。因該村之傍有古塔。爲磚石砌成。高約丈許。其寬僅六尺。體甚微。聞諸農人云。昔唐太宗征東時。建修斯塔。現已頽塌矣。

### 兀朮街

張巨豐云。兀朮街。在法庫縣東二十五里。距街西半里許。有大隈子山。其山上。有古時營壘遺址。大隈子山之南有小隈子山。其山東曰大歲子。大歲子與小隈子之間。有白條石。高可五尺。周六尺。似係古時營壘之藉以防守者。相傳爲金兀朮占山爲王。即在是處。故曰兀朮街。其村南曰鎖龍溝。想係宋徽宗被囚之處。村北五里爲調兵山。殆係兀朮調兵聚會之處。惟無信史可徵。終不免疑似耳。

### 金兀朮飲馬泉

傳古鰲云。法庫縣東北五里許。有村源曰山仙村。該村後有山。高數

十丈。山之平坦處。有古時戰壕遺跡。山下有古井。深丈餘。據老人云。係金兀朮在該山屯兵時。用以飲馬。其奇者。人呼兀朮。非水則苦。呼皇帝非則水甜。民國以來。該井忽然涸矣。

## 古井

傳占鰲云。法庫縣東二十里。有山在兀朮街後。草木叢雜。高約數十丈。山下有古井。春秋水漲。流出井外。相傳係金兀朮駐兵於此。用該水飲馬。迄今數百年不涸。

## 朝陽寺

傳占鰲云。法庫縣北門外有山。高約數百丈餘。山頂有廟。名曰朝陽寺。前後三大殿。匾額很多。寺址方圓約二百丈。該寺係明末時同老汗王手創。清朝之尙某。棄官回籍時所建修也。

## 人馬足痕

邢紹銘云。法庫縣西南五十里許永德堡村東。有饅首山。其山腰有巨石。長約數丈。上有馬蹄印四隻。均雙立。前二隻印深三寸。後二隻模糊難辨。有人足靴印一。深四寸。長一尺四寸餘。若踏泥式。傳者爲金兀朮當寇宋時。騎馬登臨南望之遺跡。





# 吉林省

## ▽吉林縣

### 吉林

高恩溥云。吉林即遼黃龍府（農安）之寧江州也。金屬上京路。明爲葉赫烏拉部地。土名船廠。清雍正間置永吉州。乾隆間廢。光緒間置府。民國改縣。北六十里松花江右岸之打牲烏拉城。即寧江州故址。明烏拉國都城也。

陳沛如云。吉林省。爲古肅慎國地。按肅慎。在唐虞時爲息慎。至周曰肅慎。兩漢時屬挹婁。南北朝屬勿吉。隋唐時屬靺鞨。後歸渤海。屬遼女貞。元爲開元路之北境。明設都司。（官名掌一省之軍政）領衛一百八十四。所二十。清初視爲邊防之地。置吉林將軍及寧古塔瑯春。三姓。阿勒楚喀。伯都訥。五副都統。至光緒末。始仿行省設治。民國因之。即今吉林省治也。

劉卓清云。吉林一名鷄林。又名船廠。詢之父老。謂舊將軍衙門前陰溝內。有鐵船一隻。爲鎮吉之

寶。叩其究竟。則亦無人見過。實則因黑龍江初設將軍於卜奎。當時本省土地未闢。糧秣借助於吉林。歷年由松花江順流至今扶餘縣界。入嫩江以達卜奎。因而就吉造船。並設駐吉水師旗營。置總管等官。專供運輸。嗣後本省設治。運輸雖停。而旗營循例排船如故。光緒中葉。猶有百餘艘停置西關外江岸。人皆呼之謂船營。船廠之稱。乃船營之代名也。船營西南隅有空地一段。圍以矮垣。禁人入內。違者罪之。詢之守者。因高宗東巡時。曾排龍鳳式御舟二隻。並修行宮於城內。以備駐蹕。高宗至奉而返。吉林行宮。特旨賜將軍爲府第。大堂後正殿五楹。仍供萬歲牌位。朔望大典。將軍率僚屬。行禮於此。以當朝覲。而停船之處。二百年來。船雖無存。地仍圈禁。入民國始闢人民宅院云。

## 白花城

赫柈墅云。容秋赴吉林。車至九站。友人謂余曰。此地有白花城。爲金兀朮妹白花公主所建。助乃兄以拒宋軍者。當其牽勁旅南下。暗鳴則山岳崩頽。叱咤則風雲變色。雖金城湯池。過則成墟。兩河寸土。不爲宋有。牛耳東北。固一時之雄也。旋大敗岳飛於朱仙鎮。身斃敵手。英風安在。城亦隨廢。昔城內有公主祠。畫棟雕梁。殿庭宏壯。今則殘垣斷宇。一片荒涼。將與城

借歸於無物也。

## 蛤城

王元昉云。清時吉林所產之珍珠。名曰東珠。歲爲例貢。烏拉街之協領衙門。專司其事。產珠處多在山河以內。大鱉子水極深處有蛤蚌城。排於水底。按九宮八卦。大蛤居中。小者列外。採蛤者獲得大蛤。則小蛤伏不敢動。有清已亡。而蛤城如故。雖非古蹟。亦一奇事也。

## 吉林八景

太瘦生云(一)白山鹿圍 吉林省西南數里許。巍然而轟。蔚然而深秀者。小長白山也。其山脈由老長白而來。蜿蜒起伏。至此而止。山之巔有前清愍王殿五楹。須由山下盤道而上。殿式古緻。內有愍王軌轡一双。索羅棍一根藏焉。傳係清朝未定鼎前。在長白山挖參時所用。殿前中空。用木板接鋪數丈。如履平地。下以木柱爲之。週圍飾以欄杆。清代吉林將軍四季致祭。如古之柴望焉。山之左麓有鹿圍在焉。以豎木圈之。面積十畝許。從前蓄鹿百數十隻。現因各大吏不斷送京。祇有三十餘隻。經旂蒙科派員飼養。月供豆草。夏間遊人甚多。薄暮而返。爲吉林名勝。所以白山鹿圍。爲吉林八景一之也。

(二)松江漁舟 吉林省城。南臨松花江。北靠玄元嶺。東接龍潭山。西至歡喜嶺。松花江由南而來。

轉而之東。順流而下。乾隆下關東。會臨此城。笑謂琵琶城王八灣銅幫鐵底松花江是也。江水甘美。冬令尤佳。夏間輪船由哈爾濱經過餘扶縣。再經張家灣（有江橋）至吉林省城。往返不絕。帆船運輸。以糧石佔多數。至各種木料燒柴。均由南山與順流而下。絡繹不絕。長春火車所運木料板片。取之不盡。松江之特產。甲於他省。惟漁舟取魚。則有異焉。如秋季風清浪靜時。於晚間一人駕小舟。駛至江心。燭之以火。（即以松木之帶油性者燃之）再用木棒敲之。舟槓如擊析。然其聲緊急。魚自躍入舟中。往往取魚時聲音聒耳。達諸數里之外。此松江漁舟。爲吉林八景之一也。

（三）龍潭印月 龍潭山在吉林省城之東約十五里許。渡松花江不數武而至山根焉。望之極高。樹木叢雜。怪石危巖。觸目皆是。由北而盤道而上。能容車馬。約行六七里許。見有木質牌坊一座。左面即龍潭在焉。面積十餘畝。周圍古樹林立。水面浮萍。以石投之。許久始竟。其潭之深也不可以尺計。潭邊有古樹一。形勢參天。與羣樹不同。土人云昔年曾有鎖鍊一條。繫諸樹根。好事者盡力拉練。無窮無盡。數人拉之亦然。拉到極點。則水翻浪湧。風至雲生。其人則頭暈目眩。四肢無力。加之畏感而必鬆手。練則徐徐而返。傳謂鎖一遭貶之龍。近年練忽不見。而大樹依然。惟松江漲水。

而潭水亦隨之而漲。江水乾旱。則潭水不與之俱乾。亦一奇也。俗云潭通江心。或有之乎。但風約半池萍之時。月照潭心。明珠一顆。眞令人玩賞不置。由龍潭而上里許。有關帝廟娘娘廟。更衣廳。廟懸乾隆御筆福佑大東匾額。前清時代。將軍春秋致祭。乘輿而往。衣冠整飭。率僚屬至潭前而拜。其拜前青萍必結。拜時青萍必開。又有神樹一顆。將軍祭時。亦一同拜之。至宣統末年。神樹無故自焚。現今祇有樹根存焉。予于前數年曾遊此。故拉雜記之。此龍潭印月爲吉林八景之一也。

(四)猴石凌雲 吉林省北。順江而下約十數里。有猴石在焉。東臨大江。而向正南轟然而獨立者石也。高十數丈。如猴獨蹲其上。遠近視之。五官百骸皆肖。陰天則雲霧往來其間。視之模糊。故有凌雲之稱。石之南二里許。有榮侯墳。而猴石葬焉。即前清烏拉世襲侯關某是也。聞其後裔。仍住北京。所以烏拉街本族甚多。僉稱爲侯爺關也。此猴石凌雲。爲吉林八景之一也。

(五)團山雙峙 吉林城之東西兩方。各有團山突起。形圓而聳。樹木蒼翠。謂之東團山子西團山子。至東團山在松花江東岸。上有土圍形。俗稱高麗城。唐時有兵駐守於此。至今代遠年湮。舊址猶存。山下臨江有板石數塊。往往天氣清明。鰲乃出石上曬腹。或曬蓋。舟船行經其旁。鰲則一折而入江。

欲獲不得。至西圍山則樹林密密。頗鍾秀氣。偏右有慶舉人墳塋葬焉。山下民戶櫛比。儼然一巨村耳。此圍山双峙。亦吉林八景之一也。

(六)八卦孤懸 吉林城北玄天嶺嶺上東玄帝觀旂杆。飾以黑色。與他廟不同。殆取西方壬癸水之意。嶺之中間。修有八卦圖。俗云避火圖。以磚爲之。山嵌坎中滿式。以白石砌成。取水尅火之義。緣吉林火警不時。諺云火燒船廠是也。但不知何年所修。山之下端。名爲九龍口。近年作爲行刑場者在此。山上迤東。修有避暑亭。夏間遊人多集於茲。此爲吉林八景之一也。

(七)德碑夕照 吉林城北玄天嶺爲通衢大路。路西豎有德將軍德政碑一筭。碑亭以磚飾之。註有德莊毅公姪留奉知縣何忠聲建修字樣。其碑文有同治四年奉旨德英著署吉林將軍欽此。緣是時馬賊蠶起。有匪首馬傻子徐占一滾地雷王五姜老道等。由朝陽竄來。聚集羽黨數萬。將吉林所屬之阿什河寧古塔伯都訥伊通州等處均行佔據。焚殺淫掠。無所不爲。該將軍身先士卒。力籌戰守。曾徵服赴省北烏拉街偵探。一夜間往返一百四十里。可謂神捷矣。嗣在烏拉北双陽一戰而匪敗北。傳有城裏關帝廟顯聖。人高馬大。是夜燈火不絕。並有主持焚香。視關帝像兩目齊開。赤兔馬渾身是汗。又兼捉

來匪黨。亦供稱如前。又有一奇談云。姜老道被獲時。供稱占奇門星課卦。現黑虎星攔路。勸馬優子勿侵入吉林附近。今果應驗。乃知將軍前身乃黑虎星也。此碑係戰後公民建築。所叙戰功。不外乎是。該將軍清廉無比。至今耆老稱道不衰。人皆呼爲德清天。每至斜陽返照。碑碣光芒奪目。令人不解其意。又兼樹枝搖曳石上。玲瓏可愛。此德碑夕照。爲吉林八景之一也。

(八)藥寺晚鐘。吉林西北附郭有北山焉。距城里許。山勢嵯峨。老樹參天。迤西山根。有甘泉一涓涓始流。甘冽異常。每至陰雨連綿。江水渾濁。講衛生者皆取水於此。售酒對漿。非此水不可。冬令亦不凍。山巔廟宇最多。惟藥王廟最著名。每年四月廿八日。廟會最盛。因農商各戶。放工三日。故遊人如鯽。趕會者如林立於其間。鐘樓懸一古鐘極大。晚間一擊。聲達數里。不同凡響。又有遠照亭更衣廳八角亭蜂密塔。花園茶社。應有盡有。夏間踏青者。大有流連忘返之勢。此藥寺晚鐘。爲吉林八景之一也。

## 臺子

解躍塵云。吉林省城北。有名臺子者。自頭二台起。順次以至十數爲止。每十餘里。或六七里不等。設土臺一座。高兩三丈。周圍七八十步。或有樹。或童禿。其形不一。惟其傍必依森

林。草木暢茂。烏雀競喧。景緻幽雅。怡人心目。登而上之。由此臺以至彼臺。瞭然在望。毫無障礙。每屆蒲節或重九。鄉間士女。咸以此爲登臨之所。此臺建自何時。惜無記載。莫可考究。但據耆老所言。殆古之烽火臺耳。

## 八卦圖

劉卓清云。吉林縣北極門外有山曰玄天嶺。上有磚牆一堵。式如照壁。中以條石砌成坎卦形。俗呼爲八卦圖。詢之父老。謂吉林地形屬火。坎爲水。用以制火也。

## 小白山

劉卓清云。吉林縣治西南八九里許。松花江西岸。有小白山。逼近林江。孤峯獨峙。山雖不大而樹木菁蔥。山半有殿三楹。內供長白山神碑位。下有鹿圈。置兵守之。歷年秋季。由吉林將軍親往致祭。蓋清制有祭長白山之例。因路遠難往。藉以代之也。

## 歡喜嶺

史可範云。吉林省城西十里。有山曰歡喜嶺。山勢平坦。上有石碑牌坊數座。惟歷經年久。風雨剝蝕。字跡模糊。殊難辨識。余於數年前在吉時。公餘之暇。曾往遊歷。詢諸老人。謂前清時乾隆帝東巡。至此東望。吉林省城。歷歷在目。心中歡喜。乃爲之大笑曰。琵琶城。王八灣等語。此該山命名之所由來也。



## 天橋

全壽山云。吉林縣東南隅。距城約五十餘里。奢林村東南兩峯間。有石橋。名曰天橋。長丈餘。高百數尺。爲天然佳境。非人工所能爲也。

## 杆旌石

邢紹銘云。吉林南山東首。有石方二尺。中有圓孔。拳可出入。深尺許。傳者爲女軍練兵於此。用以樹旌旗者。故謂杆旌石。

## 轉盤石

全壽山云。吉林縣九區距城約六十里之唐家崴子江西岸。其山巔有轉盤石。寬三尺。厚數寸。因其形如磨盤。故名。該石一人推之。旋轉不已。多人推之。則不稍動。傳者謂不知已歷幾千秋矣。

## 歐孝子里

李崇實云。吉林城東有歐孝子里。在昔有監生歐某者其家有狐患。善治者燻死數狐。老狐益憤怒。作祟尤甚。喪十餘人。且聲言將殺歐某之母。歐某割股以進。忽聞狐曰。割股孝親。天增其母壽十年矣。遂去而之他。不復爲患。後十年其母果壽終。因以名里。

## 長春縣

## 飲馬河

全壽山云。飲馬河屬於長春德惠二縣。沿吉長路下九台飲馬河兩站之間。源出又

陽縣屬邑牟泊子。至扶餘縣順流而入江。長約三百餘里。寬四丈有奇。每屆夏。魚船帆檣。游泳往來。洵足觀也。據聞清乾隆帝曾飲馬於此。故名。

## 安龍泉

何世賢云。長春縣東三十里板帳店屯西。有一泉。周圍八丈許。泉水澄清。冷氣森然。雖投以草楮。着水必沉。大雨泉水不溢。亢旱不減。相傳明永樂帝征漠北。爲敵軍引誘至此。荒郊漫野。杳無人煙。人馬皆困乏。無處覓水。軍心將變。帝乃拜禱皇天。地忽湧泉。人馬得水。歡聲振野。乃命名曰安龍泉。

## 古鍋

何世賢云。長春縣東六十里。廣寧窩堡屯南嶺。某年春季。農人耕地。忽聞地中有金鼓聲。村人訝異。掘視之。深五尺許。得一大鍋。周圍三丈許。深可六尺。撞之聲錚錚然。鍋中藏匣一。匣中有印一顆。鑄以古篆文。字跡莫辨。鍋上鑄至化十年製。考諸史乘。至化係朝鮮某王之國號。約八百年以前之古物。村中人以得印爲不祥。棄之河。而鍋則尙在。

## 二龍山

何世賢云。長春縣東五十里許。有山名二龍山。山高五丈許。山傍有二穴。穴口方尺餘。中有二蛇。長短大小無定形。每當晚涼時。化作一男一女。頭梳雙髻。來往遊行。山麓人

時見之。因謂此山爲二龍山。

## ▽濛江縣

### 白龍潭

權旭東云。吉林稱龍潭者三十六。散於各縣。水旱祈禱著靈跡。守土官春秋致祭。

例也。祭之日。必呈異相。故點蒿跪拜。罔敢不虔。予僅經歷十餘處。惟山濛江赴交河。中踰廟嶺。爲奉吉分界地。嶺高數十丈。萬樹參天。遮蔽雲日。嶺頂有闕廟。茆舍數椽。住持則道而農者三四人。南越小崗巒。有水一泓。四山環抱。面積方二里有奇。浮萍蓋滿。大如錢。雖大風亦不揚波。名白龍潭。較他處龍潭尤靈應。祭時萍必開。或方或圓。形不一。且有滿潭萍開。作一十字形時。開時水深碧。清澈底。人不敢熟視。視則心惕然悸。祝廟談話時。似亦毛骨悚然。民國改元後祀典廢。土人尤靈之。每值霽雨祈晴。必肅肅環潭跪拜。

## ▽伊通縣

### 古城

徐紹周云。伊通縣西百七十里。地名葉赫站。即明時之葉赫部落。爲滿清所滅者。吉

林志載之甚詳。清初置驛站。該處有古城二。一居山腰。一居平地。年久垣頽。而四週土稜。高猶丈餘。山葉赫東北行。如赫爾蘇大孤山東尖山子前城子等處。各有古城一座。再東北入雙陽縣界之成合店姚家城子地方。亦各有古城遺跡。接連二百六十餘里。有八古城遺跡在焉。城均在高崗處建築。皆四方形。垣雖頽塌無餘。而城門城基。歷歷可考。近城皆有村落。人煙稠密。惟城內無一人家。相傳前有建屋居住者。恒多鬼怪肆擾。致人夜不安睡云。

## 葉赫

楊乃綈云。去伊通西南一百八十里。有葉赫站。爲奉吉往來之孔道。東西二城。雖無雉堞可尋。然土勢隆起。詢諸父老。曰此古葉赫國也。明稱海西衛。清太祖滅之。置建州衛。努爾哈赤督之。當時掘地得一石碑。上書「滅建州者葉赫」六字。命斷之。謀滅其跡。詎二百六十年後。慈禧皇太后（葉赫氏）垂簾聽政。失天下於婦人之手。此殆數歟。

編者考建州係唐渤海國所置。在今吉林省治之地。元代謂之建州城。明成祖置衛於此。以其地之酋長爲指揮等官。是爲建州衛。（楊說爲清置殆誤）其民戶皆女真。分據吉林附近及穆稜河流域。歲一朝貢。成祖增置建州左衛。以猛哥帖木兒爲之長。即清肇祖也。明宣宗時。建州衛遷其部落於奉天

之桓仁及興京。時猛哥帖木兒爲野人所殺。其部亦移興京。英宗乃復折其左衛增置右衛。是爲建州三衛。則建州又屬於奉之桓仁興京一帶矣。

## 神仙洞

李篤忱云。伊通縣西北半拉山門。右山曰神樹山。山之陽有洞三。俗呼神仙洞。清咸豐年間。有某道士者。携食物。備臘燭。冒險深入。數日方出。語人云。洞中寬闊異常。黑暗如夜。陰風凜凜。寒氣逼人。行數里許。見石人石馬石棹石椅各一。復行里許。見一小洞。中停人尸一。面貌似生。衣服尙新。因食物臘燭將竭。始尋舊路而出。集徒設教。乃在其傍復鑿洞一。設置頗備。惟洞之極端。築室一。門戶常閉。一日道士外出。囑其徒慎勿入該室。旣行。復返囑之。如是數次。始行。其徒疑焉。乃竊入該室觀之。見缸三。內置紙人紙馬各若干具。人持紙刀乘紙馬上。搖搖似動。該徒大駭。以沸水冲之。盡毀其物。嗣以師返必怒責之。乃趨縣報吏。縣吏以其左道惑衆。擾害地方。隱禍非淺。遂正典刑。事遂寢。此洞至今尙存。然自道士一入以後。迄未有再敢從事冒險者。

## 石人背

徐紹周云。伊通縣北五十里。有樂山鎮。鎮西十餘里。地名石人背。該地亂山雜沓。

山之半腰。有石人石羊數具。聞昔有人在嶺西種麥一頃。苗已長大。似有牲畜食踐者然。越日尤甚。惟不見有牧畜者。某夜伏伺。夜將半。見羣羊逾嶺來食麥。某鳴槍擊之。羊逾嶺逃。惟一中槍者臥地上。細審之。乃石羊也。不勝詫異。後羊不復來。而斃之石羊。今猶臥嶺西云。

### 猪石印

徐紹周云。樂山鎮正北夾皮山地方。路旁有小山。山頂平坦。露有青石數塊。石

極堅硬。上有猪蹄印數百。大小不一。深有一二寸者。縱橫錯雜。形象畢肖。如猪行泥上所印者然。

雖石工穿鑿。無其光潔。余經其處。必一審視之。該處鄉人云。此天猪下界所踐也。彼既妄言之。余亦姑妄聽之。

## ▽農安縣

### 龍灣城

任仁人云。龍灣城。即今之農安縣也。自東北九十里靠山屯沿松花江。土崗起伏

直達斯地。狀如龍形。故名。相傳謂古時欽天監觀星象。以斯地有帝王氣。遂派員重修寶塔以鎮之。塔築於縣城西門外。建於何年不可考。作八角形。兀然獨立。雖被風雨剝蝕。而玲瓏氣象。不減於昔。

## 羊灤城

何履靜云。羊灤城。在農安縣東北九十里。金完顏希尹氏。率諸部人馬。會師於羊灤城。卽在是處。及今人稱爲鴨爾汀云。

## 龍灣西塔

顏馨一云。龍灣卽今之農安。古稱黃龍府。係金人建都處。地勢隆起。西門外有塔一。上挿霄漢。高可數百尺。在四十里外遙望之如煙墩。相傳係唐時尉遲敬德監修。然已不可考。觀其突飢高聳。嵯峨雄壯。似非晚近來所能造。現則雀巢蛇穴。穿鑿盈峯。其根已浸剝如菌柄。尙未傾頽者。因原建之地盤鞏固。根基堅深而已。苟不從而修葺之。恐不免與西湖之雷峯塔同歸於盡矣。

趙惇懷云。農安縣城西門外。有古塔一座。形勢雄壯。視其磚表。多脫落處。故知其去今遠甚矣。張傑民云。農安。據伊通河畔。土質肥沃。昔爲金之黃龍府。西門外有古塔。高約三十丈。傳者謂唐時所建。因久經風雨摧殘。已多頽圯矣。

## 舒蘭縣

## 金完顏希尹墓

張修贊云。舒蘭縣治之巽方。三區小城子鎮東北八里。俗名高麗墓子。

有古陵蔚起。陵後石人石馬石羊等。羅列兩行。頗具勝概。陵前有一巨碑。巋然獨峙。修約二百英寸。廣當其四分之一。碑下有石屬蝕。碑爲風雨剝蝕。全體多破裂斷紋罅隙十餘處。加以苔痕鱗皴。字跡強半漫滅。可摸索而辨認者。十無四五焉。惟額題大金左丞相完顏希尹公神道碑。字尙清晰。按金史。希尹爲歡都子。本名谷神。金初時無文字。太祖命希尹撰本國字。希尹乃倣漢人楷字。製女真字。累官左丞相。儀同三司。爲相身先執咎。坐事賜死。後追封金源郡王。諡貞憲。

## ▽樺甸縣

### 高句麗城

張志高云。樺甸縣城東十二里之蘇密甸子。有一土城。俗呼高麗城。周圍約三里許。牆甚高峻。惟西北已頽圯耳。該城內外。現已悉種禾稼。而收穫特別豐富。以廿地土膏沃故也。其地昔爲城市。今成田野。滄海桑田。能不令人興感慨也耶。

### 壽山

張志高云。去樺甸西北七十里。有壽山焉。三峯並峙。勢甚雄壯。遙觀之。如三枚饅首。據鄉老云。前清乾隆帝曾經此地。適值誕日。衆藉此祝之。其後土人即命名爲壽山。其下有池。



作盆狀。直徑約六七尺。深可二尺許。水澄清。僅沒膝。四時不涸。謂伊時皇妃曾在該池浴。土人乃以娘娘盆呼之。該池至今歷百餘年。仍宛然如故云。

## ▽扶餘縣

### 伯都訥城

赫柁墅云。伯都訥城。爲扶餘縣最古之稱。

### 塔戶城

姜一字云。塔戶城。距扶餘縣十八里。位於松花江左岸。週圍八里。相傳爲金兀朮之舊都城。現在牆垣傾圮。一片荒涼。遺址突兀。徒留後人憑弔耳。

### 高句麗古城

周光南云。扶餘陶賴昭迤西。有隋朝高句麗所築之古城。相傳即唐薛仁貴從李勣征高麗所拔者。近則一片荒涼。屋宇俱圮。僅餘殘磚斷瓦。及城牆而已。惟在城內耕地者。每發現古磁器盛甲等物。

### 古城

邢輔弼云。距扶餘縣二百四十里。哈長路三岔河車站東五里。有古城一。牆雖傾墜。一城基猶存。方圓可三里。城基高四五丈。城中磚瓦滿地。農人耕其中。得古物甚夥。亦有得錢財者。

相傳此城爲蒙古所建。惜代遠無可考據耳。

## 點將台

周光南云。台在扶餘大青山。乃金太祖會諸路軍伐遼點將處。至今尙屹然獨立。視其地崗阜環立。有天然之險。登臨遠眺。多生古今盛衰之感也。

## 牛頭山

張富民云。宋岳元帥大戰於牛頭山。即在是處。該山與珠山連接。山下爲蘭陵河。河水紅色似血。相傳爲斬金人之血聚於此處。成爲此色。故至今遊覽該處者。不禁憑弔久之。

## 新城古廟

顏馨一云。吉林新城。今改扶餘。清稱伯都訥。置有副都統。蓋古城也。其東南江濱之關帝廟。相傳埋沒于沙中者不知若干年而後現。建修年月。已不可考。詢諸父老。謂新城初闢時。居民鮮少。廟之舊址。原爲山形之沙崗。高可數丈。大盈五畝。一夕。迅雷暴風。繼以烈雨。竟夜方休。翌晨。居民往視。則沙崗已移于東。其地突現古廟一座。塑關公周倉關平等像。並赤兔馬。其廟宇與常廟等。惟敝陋不堪。前有木製牌樓一座。彫鐫甚工。犬牙相錯。公母互結。未用一釘。如天衣之無縫。洵非今之匠人所能建造。兩旁有古木數株。嵯峨參天。確係多年故物。清乾隆年間曾重修一次。廟宇雖改。而牌樓未敢稍動。常聞蒙古飛沙蔽天。落則爲丘爲陵。游牧者苟

不預先避防。則壓斃於其中。此廟或亦曾遭此劫乎。然埋沒多年。仍有出頭之日。關帝之靈。誠足千秋。非如飛來峯之跡近荒唐。離合岫之決無可考者也。

## 得勝陀碑

凝香黃湘云。金太祖征遼。曾在現下双城扶餘兩縣分界之涑流河西岸誓師。

得勝後。至大定年即在該處立碑。記功頌德。代遠年湮。無人保護。此碑已埋沒於荒烟蔓草間。民國五年。忽然暴露。有人報告双城縣署。縣署即將此碑移於双城縣西街關帝廟院內。惟經風雨摧殘。字迹稍有磨滅。茲將碑上全文錄後。以供考古者之稽考。

大金大定廿五年七月廿八日在涑流河岸。即拉林河岸。立得勝陀碑。頌序及碑文如左。

### 大金得勝陀頌並序

奉政大夫充翰林修撰同知制誥兼太常博士驍騎尉賜緋魚袋臣趙可奉敕撰

儒林郎咸平府清平縣令武騎尉賜緋魚袋臣孫候奉敕書丹

承直郎應奉翰林文字同知制誥兼充國史院編修官雲騎尉賜緋魚袋臣黨懷英奉敕竊額

得勝陀。太祖武元皇帝誓師之地也。臣謹按實錄及睿德神功碑云。太祖率軍渡涑流河。命諸路軍畢

會。太祖先據高阜。國相撒改與衆仰望聖質如喬松之高。所乘赭白馬。亦如岡阜之大。太祖顯視撒改等人馬。高大亦悉異常。太祖曰。此殆吉祥。天地協應吾軍勝敵之驗也。諸君觀此。正當戮力同心。若大事克成。會於此。當酬而名之。後以是名其地云。時又以禳禱之法行於軍中。諸軍介而序立。戰士光浮萬里之程。勝敵刻日。其兆復見焉。大定甲辰歲。鸞輅東巡。駐蹕上都。思武元締結之難。盡孝孫先昭之道。始也命新神御以穆嚴穆之容。既又俾刊偵石以贊暉暉之業。而孝思不忘。念所以張閔休而揚偉蹟者。蓋有加而無已也。明年夏四月。詔以得勝陀事。訪於相府。謂宜如何。相府訂於禮官。禮官亦爲昔唐玄宗幸太原。嘗有起義堂頌。過上黨。有舊宮述聖頌。若仿此刻頌建字。以彰聖迹。於義爲允。相府以聞。制曰可。臣可方以文字待罪禁林。然而頌成功。美形容。臣之職也。敢再拜稽首而獻文曰。

遼季失道。腥聞。於天西春東顧。實生武元。皇矣上帝。受天之佑。恭行天罰。布昭聖武。有卷者阿。望之陂陀。爰整其旅。各稱爾戈。諸道之兵。亦集其下。大巡六師。告以福禍。明明之令。如霆如雷。桓桓之士。如熊如羆。大定太祖。首登高阜。龍睨自天。事駭觀覩。人仰聖質。凜如

喬松。其所乘馬。岡阜穹崇。帝視左右。人馬亦異。曰此美徵。勝敵之端。諸君勉之。往無不利。師勝而還。當名此地。神道設教。易經著辭。厭勝之法。自古有之。我軍如雲。戈甲相屬。神火燄燄。光浮萬燭。天有顯道。厥類維彰。國家將興。必有禎祥。周武戎衣。火流王屋。漢高奮劍。素靈夜哭。受命之符。孰云非貞。咄彼宗元。遂誣□□。得勝之祥。如日杲杲。至今遺老。疇弗樂道。聖金天子。元武神孫。化被朔南。德侔羲軒。眷言舊邦。六飛戾止。六飛戾止。江山良定。念我烈祖。開創之勤。風樛雨沐。川集大勳。聖容既新。聖功既寫。永□□□。以爲未也。惟此得勝。我祖所名。詔以其事。載諸頌聲。文王有聲。適駿有聲。潤色祖業惟時□□。帝王之符。千載合契。配姬與劉。詔于萬世。

## 得勝陀碑陰之女真文

愚叟云。按碑在涇流河西岸。扶餘縣界內石碑歲子地方。

碑陽中文。碑陰係女真文。前知事孔憲熙會作碑樓以護之。立石以識其旁。至今巍然猶存。前清道光初年。吉林將軍富著堂。主事薩英額撰吉林外記時。此碑尙完好。迨將軍長順作吉林通誌。字跡已殘缺不全矣。伏覩前編登得勝陀碑中文。而女真文尙付闕如。故從外通志錄出。以備考古家之參

考其文如下。

羊羊美羊

天禾並甲也尚至事

天不尚並委甲件吳反

天不委萃反也任芥米文吞无庄禾

太麗甲也委並秀更秀萃云

史來米无

早戈曼太訛兩筆史岸萃米

夾史委△米支并太季米字斗芳芝

益△△米床床成并父父營父圭弓里

衆尖支血風兵風戈用羊△史不

禾去羊控官更更史仕由太

尋太斤失伏字疋更方阜支尚否聲

## 珠山

張富民云。扶餘石城鎮北三十里。有珠山在焉。(即現在哈長路蔡家溝車站)該山高約十餘丈。長約四十里。山東北有蘭陵河環繞其下。西南面有街市。居民多爲船戶木商。據該處父老

云。該山內有寶珠三粒。前清年間。該山之頂。夜半時發光。至次晨日出時始沒。該處居人。至山頂搜覓。並無所得。該珠中間者光如日。左右次之。至俄人修造鐵路時。至其地。爲河水所阻。起工修造鐵橋。俄人見之。思開山者不知凡幾。徒以人工開之。故未達到目的。後鐵橋修成。該珠之光。亦不復現矣。

## ▽雙城縣

### 雙城

蔡輿周云。雙城縣。在吉林正北。南界溇流河。北至混同江。距省五百餘里。前清嘉

慶元年。富俊爲吉林將軍。開闢土地。設一百二十營子。分中前左右後。遷京中旗人。就耕於此。每丁授田三十晌。草房五間。牛具一副。即古者寓兵於農之遺意。因縣基西北五十里有古城二。故名爲雙城。先時僅設協領一員。至同治年間改廳。光緒末年改府。及民國又改爲縣。

李予宜云。雙城縣。原名雙城堡。設治未逾百年。清置協領司軍民事。迨光緒間始設州治。分掌民事。距縣城西北五十餘里有土堡二。相距里許。周圍各二三里。今祇存廢垣土堡。建於何時。無從

攷證。因附近並無居民。而又無人傳述。斯殆前代遺跡。雙城之名。殆因此焉。

## 古城

王元昉云。双城東北四十餘里。有古城一座。聞係金時所建。名曰元寶城。近城外居民。已成村落。村人每於城中耕種時。獲古物古錢。天氣陰霧之日。古塔現於空際。玲瓏可愛。亦奇觀也。

## 雙城縣之古城

黃凝霄云。余初到雙城。莫知其縣名之由。訪詢多人。其說不一。考之志略。始悉縣城東南六十里三合店之東。有古城二。南城周圍三里。北城周圍里許。俗呼爲雙城子。雙城縣名。由是而得。但縣城東南二十里有古城。名單城子。縣城西北八十餘里有古城。亦名單城子。城南卅五里有古城。俗名金錢屯。因土人掘地。得有金錢。遂以爲名。其西十里有古城。現名城子屯。縣城西南七十里有古城。俗名車家城子。其西北十餘里拉林河畔有古城。周約六里。俗名大半拉城子。又五里有古城。周約四里。俗名小半拉城子。其半拉之名。因該二城半場於河。土人即因半場而呼半拉矣。其西廿五里有大小古城各一。相距二里。大城周約七里。小城周約五里。南北相對。俗名對面城。又縣城東南七十里拉林鎮西南十二里有古城。俗名南土城子。拉林鎮正南



廿里有古城。俗名營城子。拉林鎮正北拾五里有古城。俗名北土城子。

雙城縣境之古城。計拾有四。考諸縣志。謂雙城子爲金達河寨及布達寨。金錢屯係金阿薩爾舖遺址。大小半拉城子。係金矩古貝勅遺墟。對面城。係金之爹晦城。當金太祖次其城時。小城親居。大城屯兵。拉林河西岸。有金之得勝陀。太祖於其地誓師。立碑紀事。俗名石碑歲子。屬扶餘縣界。其餘各城。均無所稽。或爲當日之台站耳。

**單城子** 蔡興周云。雙城西北七十餘里。有古城一座。周圍約四五里。城基尚在。攷該村名爲單城子。

**半拉城子** 蔡興周云。距雙城正西八十餘里。有古城一座。在溇水河東岸。城基周圍五六里。現已僅存一半。其西面一半。灘入河中。故名其村曰半拉城子。

**運糧河** 王元昉云。双城縣東北六十里許之双井子。爲遼河支流。名曰金兀朮運糧河。水色澄清。蜿蜒如帶。問之土人。爲金時運糧河。每當雲霧。村人遠望。糧船絡繹不絕。天晴則無耳。

**飲馬池** 黃凝霄云。雙城縣西八拾里對面城地方之小城西南。有一方池。周圍四里許。深

不可測。池中之水。天雨無增。旱亦不減。聞係金太祖次遼寧城（即今之對面城）時。用以飲馬。遂以名之。相傳至今矣。

### 涼水泉

蔡興周云。涼水泉村。在雙城縣西北。距城可六十里。該村舊有水泉四個。流水滔滔。晝夜不絕。冬則熱氣蒸騰。夏則寒涼。故該村名爲涼水泉。

### 榆樹縣

### 牛頭山

何世賢云。榆樹縣北九十里。藍凌河左岸。有山高數十丈。山土皆赤。山首如牛頭。倒入河中。因名之曰牛頭山。昔岳武穆曾敗金兀朮於此。至今兀朮營壘。遺跡尙在。

### 五常縣

### 石刀

王錫彤云。五常縣北四十五里牛頭山之南面。爲拉林河。由山下石礮中。突出石刀一柄。向河水作砍形。其刀類似關帝所使之大刀也。

## 倒鱗魚

王錫彤云。五常縣北五十里燒大戶山山頂。有水泡一個。週圍約一百廿餘丈。其水四時不涸。內有魚。其鱗均係倒生。故呼爲倒鱗魚。魚長三寸許。爲他處所無。惟不可食。亦一奇物也。

## ▽阿城縣

### 白城

李篤忱云。吉林阿城南五里許。有城曰白城。實金之一行宮也。當金盛時。國運之隆。武功之盛。軼漢邁唐。故所建行宮甚多。而白城其最著者也。不知者。皆以阿城爲金之行宮誤矣。是城北門之東。有演武軍場。方圓拾里。旁有古壘一座。係明時駐兵于此。以鎮邊陲者。

### 駙馬城

王元昉云。宋岳忠武朱仙鎮一役。戰勝金人。謂諸將曰。直抵黃龍府。與諸君痛飲耳。按黃龍府。即今之阿什河。迄今遊覽其地者。不禁弔古欷歔。距府十餘里。有駙馬城。相傳即楊四郎招駙馬處。雖屬無稽。而土人猶嘖嘖稱道。今該處已開爲菜圃。常聞掘獲零碎金寶。謂係公主所儲蓄。以備遺駙馬者。

## ▽烏珠縣

### 岱王嚮子之三層洞

李鶴人云。烏珠街東四拾里。有山名岱王嚮子。高度爲全境各峯冠。其極巔峭壁千仞。崖下有古洞。凡三層。第一層口徑丈餘。內頗明澈。行數伍。路突高。攀附齒巖。可入第二層。口徑六尺許。內較幽暗。復數伍。陟如前。可詣第三層。口徑三尺許。內頓陰晦。怪風怒號。雜有波濤瀑布聲。奇臭刺鼻。令人心膽俱寒。遊客至此。思過返焉。以是其中之奧竅無或探悉者。至此山之得名。詢諸龍廟住持。亦罔能道其詳。

### 迷魂陣之古壘

李鶴人云。烏珠乾方。去街十五里。樹木叢雜。廣袤無涯際。愁雲濃霧。彌漫其間。無時或解。採樵圍獵者入其中。輒迷不得出。是以土人無敢越雷池一步。呼之爲迷魂陣。(現已改名興隆溝)設治以來。佃戶日繁。所有樹木。斫伐殆盡。乃發現方圓里許之古壘一所。咸稱爲大豬圈。余於甲子春末。自奉徒烏。聞其事而奇之。逕往檢視。冀明底蘊。至則地已大闢。所云壘跡。依稀可辨。惟內部凸凹起伏。歷然綦布。縱橫廻旋。按象依方。耒耜過處。祇見土壤中半

鳳卵石。鬪鬪狼藉其上。頗增淒愴。凝視良久。感慨係之。惜無碑碣可考。未審其蹟遺自何代也。

## ▽延吉縣

### 古城

王元昉云。延吉縣西北四十餘里朝陽河西岸。有古城一座。聞係三百年前古物。城垣頽塌。已開爲田地。問之土人云。係朝鮮當日所建。

### 煙集崗

王丹陛云。延吉未開闢時。舊稱煙集崗。考其地。週圍羣崗起伏。每當晨夕。崗上烟集。因而得名。設治之初。殆就烟集之舊名而改其字也。

### 龍井村

梁維新云。龍井村。一名六道溝。在延吉縣西南卅餘里。初闢商埠時。祇華韓民戶十數家。間有零售油酒者二三家而已。街中有井一眼。即所謂龍井也。該井係韓人越境種稻時所鑿。相傳井成之日。陰雨連綿。井噴雲霧。有龍騰出。井因以得名。遂以井名村。然此係韓人名之。亦韓人之說也。國人則稱龍井村爲六道溝。蓋以圍繞馬鞍山前之海瀾河。白頭道溝至龍井。適第六道。故曰六道溝。今則統稱龍井矣。實則龍井尚在溝東一里之外。延屬多山。惟龍井村廣袤約廿里。

一平如掌。出產豐富。自闢商埠。中外商民。趨之若鶩。至民國拾二年。天圖路開車以來。又爲總站。商賈輻輳。市廛櫛比。商民無慮數千戶。已成延邊巨埠矣。今龍井則踞龍井村之龍井街龍井衝衢之西首。至非爲何年何人鑿成。因土著久已他徙。一時殊難考詢。

## 銅佛寺

梁維新云。去延吉五十里。布爾哈圖河北岸。有蘭若。廟貌莊嚴。一似真有神靈赫奕者。即銅佛寺也。攷銅佛寺事蹟。據廟祝冷道言。先是農人姜某。於光緒三年。一日。夜夢有人告以附近邊連城河中魚類繁衍。挈網而漁。可獲厚利。詰朝往。撒網拖之。覺有物甚重。非魚非宅。塊然銅佛五尊。爲菩薩像。高四五寸。重數兩。憶昨夢。恍然悟。此殆佛俾我拯溺歟。携歸頗奇之。漸漸播遠近。時吉林將軍常某。性佞佛。下僚逢迎。竟以此聞之將軍。將軍果索之去。於省擇隙地爲佛起廟堂。並塑高大泥像。宏壯巍峨。香煙頂禮。崇奉有加。詎佛殊落落。未朞年。廟燬於火。佛示夢將軍曰。吾燬廟佛。弗欲留此。應速送歸原處。勝媚吾多。乃送歸。此光緒六年春事。佛旣還。姜姓已去。有道人亦姜姓。募款修廟。先成佛殿三楹。如銅佛像塑泥像三尊。高可四尺。居正位。銅佛設座於香案上。繼成兩廂各三間。轉請佛於西廂。及自蒙邊請來銅佛三尊。高及尺。配

祀之。佛號難定。時無能名。遂以銅佛名焉。開光後。靈應如神。香火稱盛。迄今不衰。十年前。姜道圓寂。冷道繼之。已往事蹟。冷道談之猶歷歷也。現寺街人煙稠密。已成延吉名鎮之一。並爲天圖輕便鐵路幹綫之一站。

## 馬鞍山石洞

塞上散人云。延吉縣西南四十里許。有馬鞍山。巖然孤立。形若馬鞍。故名。山勢極爲險峻。石巖亦多崢嶸。爲縣界大山之最雄壯者。其陽面半山中有石洞一。惟無路可通。欲登者。須攀藤拊葛而上。始可達洞。其洞門。高約四尺。寬可容人。入內丈餘洞遽厥。四週石壁。光滑齊整。有如人鑿者。惟室頂石頗凸凹。有下垂者。視之若峯巒之倒立然。室中方可丈許。北端有石牀一。面極平坦。可坐臥。廣可宿三人。惟中頗陰寒。涼侵骨髓。冬季無人敢入。夏間雖有入者。類皆覽畢邁返。而無敢留宿。某歲夏。有某甲者。素號大膽。獨往遊。携壺酒豪飲至夜宿焉。甲自以爲獨宿一宵。明晝可以驕人矣。詎料一眠而醒。涼風拂面。知有異。睜目視之。則身已孤臥於山下。駭甚。躍而起。狂奔而還。後乃不敢言大膽。爲鄉老所道及。雖屬近於荒唐。但言之鑿々。恐亦不盡子虛也。

## ▽ 寧安縣

### 甯安

高恩溥云。甯安古名甯古塔。在呼爾哈河左岸。爲唐時渤海國上京龍泉府地。因滿洲始祖兄弟六人。居此得名（滿語六曰甯古塔）其西南六十里有東京城。臨畢爾騰湖。唐書所謂忽汗城。臨忽汗海。是也。

### 崆峒石道

王元昉云。甯古塔城西南八十里爲東京城。再往西行六十里。即南花頭湖。湖之附近地點。有大石道一段。計程廿里。其石平如砥。直如矢。惟石下空空。車行其上。聲錚錚然。道旁見有漏洞。窺虛空。其下水聲潺潺。游魚可數。墜長繩測之。深不見底。石道渾成一片。若懸架於水上者。而石不墜落。想其水上必有石骨爲之樁柱。重車行其上。覺有動搖之勢。恐石裂下陷。幸石而光滑。策馬疾行。頃刻可過。聞其水道。直通大江。石面距離水面。不過尋丈。又形如覆釜。不若峒巖洞天。而石道若浮橋。平鋪如華蓋。有廿里之長。天造地設。亦可奇矣。

### 銅柱銘

孫蔭喬云。清光緒十二年。吳大澂奉勘界之命。會同依克唐阿赴俄境巖杆河。與



俄員重訂界約。增立界牌記號。中俄界線。至此始定。大激乃建銅柱於界地。而刻銘其上曰。疆域有志國有維。此柱可立不可移。後聞庚子之役。爲俄人遷入伯利博物院陳列矣。國之恥。民之辱也。銘係吳親筆篆書。有拓木。高四公尺一寸五分。寬一公尺零三分。(見寧安縣志)

## 古印

孫錦書云。東京城南卅里葦子溝之東山上。民國拾五年五月間。經樵夫發現銅質古印一顆。爲二寸二分之正方形。厚五分。印柄高一寸五分。印文爲「上京路軍馬提控木字號之印」十二字。印之右側面。有貞祐三年拾二月七字。印之左側面。有木字號印四字。印之背面右方。有上京行部造五字。印之背面左方。有軍馬提控四字。此印現在東京城農會長楊春霖手保存。余曾目睹。鈐印數分。查東京城原爲唐時渤海五京之一。即上京龍泉府也。有此印發現。足以證明傳說之不謬。

## 敦化縣

### 敖東城

王仁庶云。敖東城。在吉林敦化縣城東。週圍約二里。城壕遺跡。尙可辨明。城之南爲牡丹江流域。牡丹江發源於牡丹崗。至依蘭而入松花江。該城相傳爲唐代遺跡。現在鄰縣居

民之赴教化者。尙咸稱爲赴敖東城也。

## 唐忽汗河

崔鳳五云。唐忽汗河。即今之牡丹江。金稱瑚爾喀。清作呼爾喀。源出敦化縣南。北流至依蘭而入松花江。唐置忽汗州於河上。即現有之鄂多理城。渤海國故都。亦在於此。

## ▽額 穆 縣

### 喇叭砬山

王錫彤云。吉林額穆縣西一百五十里許。有喇叭砬山。山爲喇叭形。因名。據鄉老相傳。斯山近頂處。有石洞三個。爲濟小唐成仙處。

編者按濟小唐成仙處在鐵嶺大台山小唐洞茲亦云然得毋傳聞有誤歟

## ▽汪 清 縣

### 薛仁貴飲水泉

王元昉云。汪清縣涼水泉子東十六里許。黑獮子地方。地臨圖們江岸。巨石矗立。石面光潔。石下有小坑一。大如盆。水深尺許。終年不涸。據土人云。係當日薛仁貴征

高麗時。渴飲於此。坑爲槍柄所杵。坑邊足跡宛然。指腫可辯。峭石之上。篆書二字。惜不識篆文。不知何字。凡至該處者。莫不欲一觀古蹟也。

## 江畔石

王元昉云。吉林汪清縣凉水泉子東。瀨圖們江岸有一巨石。聳然江畔。土人云。唐薛仁貴征高麗。血戰於此。石上血迹殷漬。至今不滅。清德宗末葉。邊防大臣吳綬卿巡視江邊。見此石歎歎撫摩。乃題血淚二字。鑄於石上。以誌感慨。迄今臨江憑眺者。悠然有弔古之思。

## 龍虎石

王元昉云。汪清縣屬凉水泉子南。臨圖們江對岸。有窟窿山。乃朝鮮穩城等處之孔道也。清吳中丞綬卿與俄畫界而回。在凉水泉子小憩。散步江濱。見巨石巋然。矗立水渚。高可尋丈。廣五六尺。面平如境。遂援筆大書龍虎二字於其上。筆力遒勁。命良工鑄之。迄今中外人士。渡江流連。玩賞不忍去。

## 和龍縣

## 名坦峴高麗城

梁維新云。和龍縣境。山嶺起伏。綿亘不絕。有圖們江直貫。爲天然

之國界。有山有水。可稱勝地。實則山多童禿。水且無魚。窮山惡水。國人墾牧於斯土者絕少。迄今猶不及韓人十之二三。然韓人來墾斯土者。自古已夥。和龍東北五六十里。有山曰名坦峴者。北麓有古城。短垣猶存。周圍可十里。城內有智井。據韓人言。係古代高麗城。與鍾城郡相望。曩本名區。商業殷盛。今則荒榛瓦礫。極目淒涼。豺狼晝見。野狐夜嗷。滄海桑田。空留憑弔。故宮禾黍。曷勝感悼。

## 鍾城

梁緒新云。順圖們江而下。距間島廿里。左岸爲韓屬鍾城。右岸有民戶十數家。一渡口也。因與鍾城一衣帶水。人遂以鍾城呼之。

## 烽火臺

梁維新云。和龍東北四十餘里。有山曰名坦郭峯。韓語名山意。爲黑山嶺最高峯。踞圖們江右岸。南望會寧。北指鍾城。實爲延邊較險要之地。山巔有孤樹聳然插入雲表。樹傍即烽火臺。周圍可八丈。已坍塌不堪。相傳爲高句驪之烽墩。與左岸距此十餘里下三峯之烽火臺相對峙。據韓人言。此俱爲千年前之陳迹。延邊一帶。圖江兩岸。關於戰爭之古蹟。不一而足。可見其地爲古代戰場也。

## 將台坪

梁維新云。將台坪。在和龍縣東北五十餘里。將台坪村前山崗上。相傳係古代高句驪大將督兵處。今則台基已模糊不可辨。

## 汗王山

梁維新云。汗王山在和龍縣東南八十里。距圖們江右岸稽查處十餘里。山無奇峯。亦非險要。與韓屬會寧遙相對峙。清太祖因遼陽之難。遠竄邊徼。嘯聚族類。訓練山中。聲勢既盛。起兵平定各部落。而稱滿洲汗。人遂呼以汗王。王於山既有練兵之雅。因以王名。以垂紀念。山爲長白支脈。黑山嶺脈。鄉老傳言。山中本有室與石槽等陳迹。近則徒留舊痕。已難考證。但尙留當年水泡兩處。從未乾涸。水且清澈。堪用以造飯飲馬。民十三年亢旱異常。遂枯涸矣。

王丹陛云。和龍縣東南約三十五里許有罕王山。因罕王會屯兵山中。因而得名。山勢高峻。綿亘數百里。與高麗會寧相對峙。山中清太祖罕王屯兵之石室石槽。至今尙在。並有水泡兩處。週圍均約有數丈。水雖不深。但永不乾涸。想昔時此處必爲國防要塞。故練兵於此。以固邊疆而威鎮韓人也。由此以觀。罕王當年之英勇。可想而知矣。

## 汗王山辨

梁維新云。汗王山。即老白山。又名憨王山。罕王山未之前聞。明萬曆十一

年。建州部長奴爾哈赤稱滿洲汗。萬曆四十四年稱帝。即清太祖。所謂老汗王也。王以微賤起兵老白山。而躋帝王。發祥之地。創業之祖。實爲滿清世世所懷念者。汗王山之得名。良有以也。王君丹陛所投之罕王山。殆即余所述汗王之誤。因贅數語以辨之。還望海內賢達加以教正也。

編者考吉林官書局出版之吉林全省圖和龍縣本設於和龍全境之東所謂東南八十里約三十五里者均無汗王山亦無老白山及愁王山之名僅縣南有汗王習射台王君以汗誤罕殆未之詳察耳

## 古攻

梁維新云。和龍名坦峴高麗城南。鄆都嶺脈。有一峯獨立。羣山環繞。形勢頗勝。山上土阜隆隆。即所謂古攻也。起於何年月日。所葬何人。俱不可考。一說謂其地時出大將。爭城奪地。塗炭生靈。人苦兵災。掘山以鐵柱鎮之。使將帥永不得出。免爲人禍。非古攻也。所聞如是。

併誌之以待考証。

## 馬牌

梁維新云。和龍東北六十里馬牌村左近。有一尺見方之石柱二十三根。列爲一行。高出地面五六尺。古色斑駁。千百年前物也。有言此爲高句驪用兵時。以防敵人射馬之石牌。是否不可考。然馬牌村之得名。或其一證歟。村北十二三里。及將台坪。均有類是之石柱十餘根。距四光

社二十里某村。先是亦有此類石柱多根。近已無存。據土著言。凡石柱均有鬼神附之。牧豎無知。偶有觸犯。動輒發狂。焚香禱之則愈。然此係神權時代之傳說。俱不足信。

## ▽ 依 蘭 縣

### 三姓

赫柈墅云。依蘭縣。爲古時三姓地。據先進傳說。該地當初闢時。住戶僅有三姓。故名。

### 鄂多里城

赫明林云。鄂多里城。位於松花江北岸爲牡丹江黑龍江匯流之口。地勢平原。

沃野千里。宋金之世。該地爲滿族部落之一。在明初時。有大金遺民三族聚而成爲部落。故名該地曰三姓。嗣後子孫繁衍。既無統系。又無法律。漸致一言不合。率族互相仇殺。部民苦之。欲舉部長。碍於三族。仇視過深。各不相下。是時突有神女所生一聖人。大清始祖。布庫里雍順。山長白山乘筏順流而下。既抵三姓江中。船已靠岸。居民詫爲天降神人。迎於岸上。奉爲部長大貝勒。布庫里娶甲姓女百里爲妻。遂與三族約。立法練兵。勸耕積糧。度山川之險要。擇東北高原。築城於鄂多里。城成。因命名爲鄂多城。大清一統江山之基業。由是肇造矣。

## 坐井觀天處

王元昉云。吉林三姓地方。即金之五穀城。清副都統衙門背後。有古井一眼。早涸。相傳即宋徽欽二帝坐井觀天處。想三姓雪窖冰天。寒威甚厲。如果二帝坐於此井。必凍僵矣。此亦不過姑妄言之。姑妄聽之而已。

## ▽ 密山縣

### 古城

塞上散人云。密山縣境內。古城甚多。或枕於山。或濱於水。率皆高麗遺蹟。其城垣大小不一。有周數里者。有十餘里者。牆多傾圮。所存者。僅高約數尺之土壕而已。縣東三十里許之夏家營有古城一。縣西三十里之趙家店亦有古城一。再西六十里。至柞木台子村北。復有古城一。即所謂古城子是也。今其中已成村鎮。地亦大半墾熟。惟頽倒之城垣。尙存在耳。再西六十里。則又有古城。自彼迤西。猶有數處。而其距離均爲六十里。聞爲高麗所設。用以防邊者。故經六十里。必有一城。至其年代。殊無可考。

### 高麗古城

襄山布衣云。密山縣屬半截河之西。有高麗古城在焉。面積週圍約四方里許。



城垣遺址。雖經風雨剝蝕。尙殘餘數尺。現被附近住戶開墾成田。每當耕種時。常拾得銅錢銅碗等物。相傳高麗某將軍會駐軍於此。

## 蜂蜜山

塞上散人云。密山縣治東南。有山曰蜂蜜山。孤峯聳立。高插入雲。絕壁千仞。

俯視驚心。爲附近第一高峯。縣境名山。當推首座。昔時有蜂蜜自石隙中流出。取之不竭。即或不取。而流自止。今則石隙猶存。而蜜則無矣。茲山之得名。實由於此。即本縣之名稱。亦係取義於茲。不過更其字面而已。至其流蜜之原因。殊無知者。或係巖石中有蜜蜂窠。蜜滿外流。亦未可定。姑略誌之。

## 青龍山

塞上散人云。青龍山。在密山縣西平陽鎮之南。山勢蜿蜒。儼似伏龍。其巔有巨

池。水常滿注。遇旱不涸。中有倒鱗魚。莫可捉得。相傳該山係一青龍。與本縣之大鍋盛山。遙相對峙。鍋盛山者。係一白虎云。

## 興凱湖

塞上散人云。興凱湖。在密山縣與俄東海濱省交界處。周圍可八百里。爲我國東

北與俄遠東間之大湖。湖之大部分屬俄。其爲我國所領轄者。僅西北之一隅耳。相傳中有龍宮。獨

角龍住於此。或謂係小白龍所住。惟事涉神話。殊難考核。每當嚴冬。湖水絕冰之會。時有冰面炸裂之事。當炸裂時。湖面之冰。儼同兩條銀龍。向兩傍紛落。堆積成山。聲若雷鳴。自彼開口之處。作極大之氣衝出。上接雲霄。俗謂係獨角龍用角所劃。謂因封湖後。湖中不通空氣。極爲燥熱。劃此所以取涼耳。當春夏天陰欲雨之時。湖中霧必大作。高與雲接。彌漫天日。甚或發現黑霧。直白天晴。霧始散去。否則兼旬累月不散。是以附近農民。多是以卜晴雨也。

## 興凱湖玩石

崔鳳五云。興凱湖。在密山縣東南。湖之中心。爲我國與俄分界處。旁有客字界碑。年久失修。惜已頽廢。湖爲橢圓形。中多魚鱉。沿湖有玩石。小者如丸。大者如卵。瑞彩繽紛。圓潤可愛。鄙於遜清末造。在蜂蜜山墾務籌辦處充差。同人繇密山調查歸來。袖回數枚。互索把玩。不忍釋手。供之案頭。尤爲雅觀。

## ▽ 綏 遠 縣

## 古鏡及磐石

馬漢儒云。吉林綏遠縣土人。掘地得一古鏡。銅質斑剝。背有蔡君二字。

遼陽某君。充差於此。曾親見之。在輪船中語余。按綏遠爲完顏達山脈盡頭處。前據松花江。卽古速末水。唐時爲渤海王國地。此鏡不知何代所鑄。何以至此。蓋亦考古者所宜研究也。又據一山東人言。在綏遠得一石。作箭頭式。長四五寸。其尖甚銳。其實甚硬。其面甚光。此或肅慎氏所貢之石。惜乎四千餘年之古物。隨手棄置。而不能登博物之館。以供考徵。是亦一憾事也。

東三省古蹟遺聞

# 黑龍江省

## ▽龍江縣

### 黑龍江沿革

郭德浩云。黑龍江(在瓊璫城東)古肅慎地。在北魏時。北扶餘勿吉室韋

諸部地。隋黑韃水獺羈地。唐黑水府。遼上京金蒲輿路。元開原路。明朶顏衛皆其地也。清太宗朝。

索倫達呼里兩部。以其地內屬。康熙廿二年始設將軍。築城守之。視爲巖疆重鎮。將軍初駐瓊璫。

康熙廿九年移於墨爾根。(即嫩江縣)三十年移駐齊齊哈爾。(即現在省垣龍江縣)其地種族。曰蒙古。

曰滿洲。曰索倫。曰達呼里。曰鄂倫春。曰巴爾虎。曰漢軍。(即民族)黑水襟帶黑龍江巨浸。背負

興安嶺大山。幅幘之廣。方萬餘里。重巒複水。雜遝環抱。老林蒼鬱。行數百里。不見天日。山川

毓秀。挺生英傑。如清之國初。海蘭察阿爾賽塔爾岱諸公。繪像凌烟者。四十有二人。中輿名臣。

都興阿。多隆阿。富明阿。善慶。穆圖善。光緒末葉。綽哈佈。壽山。長順。諸將軍。豐功偉烈。

彪炳人寰。名垂青史。流芳萬古。自碩儒方登嶧。方觀承。章汝楠。世臣。訥拙庵。龔光瓚。蔡制軍。毓榮。傅尙書彝（西清字研齋曾任江省軍器署主事），呂留良後裔。先後以罪遠戍龍江。土人慕其流風。執經受業。始能讀中國之典籍。稟性聰穎。不後於諸夏。迨至光宣之際。士駸駸向學。沿流溯源。有一日千里之勢焉。

## 齊齊哈爾

邱可名云。黑龍江省城。建於清康熙初年。原勘城址。在江西十八里之齊齊哈屯。奉旨核准。經某員監修。一夕忽遷於江東。某員未敢違。遂建於此。工竣呈報。基址錯誤。

奉旨正法。嗣憫其無罪受戮。爲其修祠塑像。程雪樓蒞江省。修官醫院。將像移入城隍廟。相傳如斯。未知確否。

黑龍江爲北魏時扶餘勿吉室韋。及唐時黑水靺鞨之地。室韋。即今之室韋縣。爲契丹之別種。居黑龍江北境。北史室韋。在勿吉北千里。南者爲契丹。北者爲室韋。北部在後魏時。始通中國。有南室韋。北室韋。鉢室韋。深末怛室韋大室韋之五部。後爲契丹所併。勿吉。即古之沃沮。魏書其國在高句麗北。舊肅慎國也。其人悍強。言語各殊。國有大水濶三里。名速末水。南有徒太山。北

史勿吉。一曰靺鞨。其部凡七種。勿吉。即今吉林地方。速末水。即松花江。徒太山。即長白山也。靺鞨。周曰肅慎。漢魏曰挹婁。後魏曰勿吉三韓。隋唐曰靺鞨。唐分黑水靺鞨。粟末水靺鞨二部前者於宋時建全國。後者於唐時建渤海國。按黑水靺鞨。即今黑龍江地。唐時其地爲黑水州。

## 黑龍江

陳沛如云。黑龍江省。爲古時北魏。北扶餘勿吉室韋諸部鎮地。至清康熙年間。在黑龍江築城鎮守。設將軍及副都統等官。後將軍移駐墨爾根。又移駐齊齊哈爾。光緒末裁將軍。改置巡撫。設府廳州縣。照內地行省治理之。以龍江府「齊齊哈爾」爲省治。至民國改龍江府爲縣。仍以其地爲省治。地處邊陲。逼近俄蒙。爲東北一咽喉重地也。

高恩溥云。龍江本名齊齊哈爾。又曰卜奎。在嫩江東岸。江右東境。有地名巴貝者。雍正間安置額魯特降人。伊克明安公置一小部於此。開札薩克。黑龍江將軍。有直隸管理之權。

## 兀朮長城

于純方云。昔金兀朮破宋以還。乘勝而驕。北敗於蒙古。乃在室韋（黑龍江省西北）之根河以北。及臚濱一帶。築金源邊堡以禦之。大定二十一年。又以舊堡寥寥。不足防禦。重籌邊備。由西布特哈（龍江縣北）經扎蘭屯濟沁河之間。繞呼倫貝爾南境。以抵山西之歸化城。共

設二百五十餘堡。名曰兀朮長城。斷壁殘垣。迄今尙在。但已淪爲荒墟矣。

韓光烈云。兀朮爲金太祖第四子。喜騎射。勤遠略。屢寇宋。足跡遍長江以北。北至黑龍江。與俄羅斯爲鄰。曾在滿洲里迤北一帶。築長城數百里。以防強俄。至今土埂猶存。城基尙在。即所謂兀朮長城也。然金之亡。亡於元。非亡於俄。則知人之所慮者。人事耳。慮之所不及者。有數焉。

## 五里墩

周興岐云。五里墩位于龍江城南。距城僅八里許。爲前清歷來屯兵營房。練軍場所。光緒廿六年。俄兵稱亂。犯我黑龍江。大軍雲集于此。擬以巨砲轟城。經程公雪樓以身蔽砲口。俄將感公忠義。得免斯難。即此地也。

## 龍沙西江

周興岐云。龍江省城西十里許。有巨流曰西江。即嫩江也。江流自北而南。

入松花江。爲赴扶餘大賚濱江呼蘭訥河嫩江等縣之孔道。光緒二十六年。俄兵藉口拳匪之亂。侵入黑龍江。駐兵于此。後和議成。俄皇命雲陽程公雪樓暫署黑龍江將軍。公以大清臣子。未肯受鄰邦亂命。俄將威挾太甚。公躍身入江。以期不辱君命。俄衆拯救。公得免于難。此二十年前事也。而西江自濤滾滾。逝者如斯。令人不禁生今昔之感云。



## 恩公祠

白芳洲云。龍江省城西南營房附近。有恩公祠。爲前清黑龍江將軍恩澤之專祠。

## 芍藥廳

白芳洲云。芍藥廳在將軍署西北。有精舍三楹。疊石爲假山。將軍觀明。栽野芍

藥數本。故曰芍藥廳。

## 紅豆山房

白芳洲云。房在舊土城東南。侍郎保泰嘗居之。後贈龔光鑽。龔去賣入官。

院中野草一叢。秋結紅豆。西清氏榜曰紅豆山房。

## 吉塔

白芳洲云。龍江舊土城東門外里許有古塔。居民震間平岡上。以甃砌成。高可丈餘。

據故老云。此係建城時。設以鎮城者。

## 穆果勇公專祠碑文

郭德浩云。黑龍江省垣。龍沙公園東偏路北。穆將軍專祠在

焉。有御賜碑。文曰。朕維巖疆作鎮。眷鞠躬盡瘁之臣。冊府書勳。重崇德報功之典。播隆恩於奕葉。

嘉成績於當年。艱鉅克成。旌揚宜至。爾福州將軍穆圖善。秉資桓武。賦性樸忠。從戎歷三十年。

轉戰閱八千里。馮異本起家主簿。張宗能制勝偏師。初從河朔之郊。繼入漢南之域。孫吳韜貫黃巾

聞名而自謙關隴威加。白帽相謂以無及。錫之勇號。功在先朝。洎平建節闔中誓師海表。烏僭犯順。

郊壘戒嚴。仗鉞以麾。戰士譏擊凶之義。洪船而渡。將軍有必死之心。時則犄角不枝。藩籬誤撤。狎敵之漸。議奪於養威。特險之謀。勇乖於重困。既墮犬羊之詐。遂驚鷓鴣之軍。惟爾前茅。獨櫻固險。據胡床而坐壘口。誓已忘身。布鐵藜而塞歸途。義無返顧。卒能好整以暇。易敗爲功。似此孤忠。足風有位矣。屬以三邊籌備萬里移旌。况瘁不辭規爲甫定。據鞍履鑠。時存報國之心。建築便宜。特著屯田之議。方冀銷兵虎落。屹若長城。何期延景蜚弧。摧茲大樹。既殊施於加奠。更榮錫以易名。象厥生平。謚曰果勇。於戲。名高海嶠。部民留墮淚之碑。氣作山河。國史定褒忠之筆。偉哉遠略。耀此真珉。

花翎副提舉銜補川知縣候選州判唐鴻緒敬謹書丹

光緒十七年四月

立

## 奪將軍碑

邱可名云。龍江省城南關大街路東。有石碑兩甯。現已砌入牆內。微露少許。爲奪將軍之記功碑。係清乾隆年間所建。按奪曾充西藏將軍。爲龍江北關人。

## 阿爾賽先塋墓道碑

郭德浩云。距黑龍江省垣。貢北三里許。有清戶部尚書。阿

爾賽先塋。臚字欽頹。僅一碑尙存。文曰。奉天承運。皇帝詔曰。宣威効力。事父資以事君。錫類推恩。教忠本於教孝。道存激勸。志慰顯揚。爾崔尙信。乃駐防福州將軍阿爾賽之父。偶儻負奇。老成垂範。鯉庭授傳家之訓。國有爪牙。虎臣策報主之勳。人敦詩禮。茲以特恩。贈爾爲光祿大夫。駐防福州將軍。錫之誥命。於戲。蒞官能敬。已弘昌後之基。有子亢宗。益勳在公之念。予何吝於爵賞。爾克世其弓裘。制曰。能仕教忠。式穀罔由於母訓。推恩逮下。疏榮必及乎慈幃。川答恩勤。特頒榮寵。爾福州將軍阿爾賽之母金氏。順柔淑德。婉孌宜家。盛年不御升鉛。相夫以儉。永夜時聞機杼。教子能勞。茲以特恩。贈爾爲一品夫人。於戲。先國後家。惟賢母獨知大義。作忠移孝。俾勞臣能紹前徽。生而有聞。歿且不朽。

雍正十一年十二月廿四日

按阿爾賽。漢軍人。本姓崔氏。名枝祿。其先隸孔藩部下。康熙年間。編入齊齊哈爾正黃旗。山水師營。六品官。積功至福州將軍。湖廣總督。戶部尙書。終於乾隆十年。

## 徐世昌題額

周興岐云。龍沙西倉公園。在省城西南。園林亭榭。景境幽閑。園之東北

隅。有八角亭。即龍沙萬里亭也。其東面懸長形式匾額一方。上書「龍沙萬里亭。」乃徐公世昌親題。筆意瀟灑。結構遒勁。此爲徐公在東三省總督任內。來黑閣邊時所書。留此紀念焉。

### 卜奎火鏈

鍾際午云。昔無火柴(又名自來火)時。有用火鏈以取火者。卜奎多達子。達子嗜旱烟。凡行走坐臥。必攜帶煙袋。並携有火鏈。火鏈爲純綳製成。取火時。用火絨少許。加火石上。以火鏈削之。火星迸裂。絨遂引着。達子因火鏈無論陰晴。取火最易。而攜帶尤便。故綴以鹿革囊。而釘以黃銅鉤。製造極精。遠近爭購。故向有卜奎火鏈之目。自洋火(火柴別名)盛行。用者日少。遂亦無人製作矣。

### 塔將軍墓

郭德浩云。將軍名塔爾岱。姓瓜爾佳氏。隸齊齊哈爾鑲藍旗。墓在黑龍江省城南。齊昂小火車站迤東。碑文漫漶。不可辨認。清高宗秋獵木蘭。塔爾岱朝行在。乃從圍焉。上會賜以詩曰。百戰歸來覆鏢身。凌煙姓氏竟誰論。是時合適林中趣。憐爾仍隨鞏後塵。赫奕虎符叨寵舊。輝煌竹簡紀功新。爲詢闕厓疆場事。幾度聞之厓念頻。

邱可名云。龍江省城西南三里許塔將軍墓前。有缺角殘碑一筭。下穿以鐵鎖。相傳原建碑兩座。於

某年兩碑無故自逸。行至省南某處。適遇探樵者見而訝之。急斫以鑿。削落碑頭一塊。旋即倒地。其一仍函行。至新城西江沿方停住。碑仍豎於該處。(即扶餘縣)嗣將斫倒之碑載回原處。貫以鎖。意恐再逸。相傳如此。未知確否。

## ▽大 賚 縣

### 遼泰州故城

何履靜云。遼泰州故城。在大賚縣南二十餘里。遼上京道泰州德昌軍。本契丹二十部族牧放之地。因黑鼠族累犯通化州。遂移東南六百里。建城居之。今之土人謂程塔呼城者。該州之遺址焉。

### 半拉城

純方云。大賚縣附近。有古城基。名曰半拉城。扼嫩江之險。控蒙古之衝。敗屋頽垣。依然存在。磚碑廢瓦。便概猶存。相傳城爲金兀時所築。嗣因城陷被焚。淪爲邱墟。民國十一年。大賚築城時。掘出鐵盔及屍骨數具。其頭顱。均有箭鏃。可見當年鏖戰之烈。城爲半環形。東西南三面。皆有牆垣。惟北面無之。而大賚縣適建其北。以補其缺。殆亦數歟。

## 塔呼城

醉鄉居士云。大賚縣南。距城廿五里有高崗。遙瞻其上。若墳墜者。即塔呼城是也。周圍約十餘里。直經長三里三。築土爲牆。高可一丈。寬約七尺。相距二丈。即有土臺一。似砲臺然。周有四門。東門以外。有點將臺。相傳謂金兀朮屯兵處。據土人云。昔有農人曾築室城內。夜宿于室。曉醒則不知如何竟身在城外。一時傳謂被神靈驅逐。遂不敢住。乃毀其室而徙其家。事之果否。未得詳悉。惟城內今則南阡北陌。已成爲膏腴農田矣。

## ▽ 訥 河 縣

### 訥謨爾河

鍾際午云。訥謨爾河。簡稱訥河。源出興安嶺。自東北曲折經龍鎮克山。洎訥河城迤西而入嫩江。夏日河水。廣可容舸。春秋水淺。寒裳可渡。兩岸沃壤。荒戶雲集。民國六年。辛天成知龍鎮縣事時。會擬疏鑿河身。用便航行。旋以需款浩繁。事遂寢。

鍾正云。訥河。清置直隸廳。因訥謨爾河流域得名。清初轄境極遼闊。東至二克山。南逾三站。民國紀元。克山放荒設治。此遂改爲頭等縣。實即昔之東市特哈也。

## ▽拜泉縣

### 拜泉

鍾正云。拜泉。舊稱大泡子。因城之西南。有大水泡子。故名。鄉愚以拜音同敗。泉水也。泉水失敗。故近年旱象迭呈。遂有改拜泉爲龍泉之私議。但此說近于迷信。堂堂縣名。豈宜無故紛更也。

## ▽青岡縣

### 小城子

詹清源云。青岡縣西南三十餘里。有屯曰小城子。詢以命名之義。據土著云。該屯北里許。有舊城基。縱橫皆一里有奇。四周城墻及城門。隱然隆起。均可辨識。農人耕地時。往往於瓦礫叢中。獲古銅錢。其式大小不一。皆係大觀政和崇寧等年號。查宋徽欽二宗北狩後。高宗興於中原。從徽欽而北之宗室大臣。每思通中原以圖恢復。金人懼其聚而協謀。遂將宋宗室分遷而居。以殺其勢。此地距五國城不逾千里。想係當日金人分遷宋宗室於此。築城而監守之。然無史乘可考。

是否未敢斷定。但以所得古錢觀之。或爲金人所築無疑矣。

## 恒升堡

詹清源云。青崗縣東北四十里。沿通肯河西岸。有村曰頭屯。自此而北。曰二屯。三屯四屯五屯六屯。各屯相距。遠近不宜。計綿亘四十里。統名曰恒升堡。俗呼六大屯。曾見屯中祠宇。記有咸豐二年建字樣。因知此屯由來。已近百年。今人皆呼屯戶爲土撥子。據耆老云。當屯戶移置之始。由官家給予牛具井磑。准令跑馬佔荒。以事畜牧。並設屯官以轄之。但禁應科舉。叙官階。故昔日屯丁。無由發迹。揆厥由來。殆仁廟時三藩之遺民。禁錮終身者。足徵當時法令森嚴。迨清季程公撫江時。奏請放荒立縣。土戶之荒。多被民戶承領。而各屯中民土雜居。薰陶漸染。一變其鄙儻固陋之習。辛亥以來。法尙平等。無復階級限制之文。而土戶中崛起者。頗不乏人。現六屯更名爲興化鎮。

## 石人崗

韓喜亭云。青岡縣北。距城百里。有白石數塊。形像不一。如人者二。如羊者二。如獅子形者亦二。惟均無頭部。只能識其形像而已。清季省當局放此官荒地。得之於荒草之中。現已三十年於茲矣。經屯人移置由青至拜之官道。往來行人。皆得一覩。故有石人崗之名焉。



# 石人

詹清源云。青崗縣城西南隅有石人。高七尺許。圍可八尺餘。以青石六方。疊累而成。其下以方石爲礎。其上每石如盂狀。口濶而底削。均方形。石之四周。皆鑿有隴式之溝。一仰一覆。計爲石盂者四。其上兩石盂微小。巔則置一圓形石頂。其側又有小石人一。累以徑尺方石三。巔亦置一圓石。近視之。如小浮圖。遙望之。儼若叟與童負劍辟咤而詔者。然青岡土名石人岡。蓋指此也。維石奚緣而設。肇於何年。無歎識可稽。訪之耆老。亦莫知其巔末。意者古墓之表志歟。土著以禱祝輒靈。遂創關帝祠於石之旁。今則改爲關岳廟。金碧輝煌。每逢香火會時。石人前亦香烟繚繞云。初青岡居民某氏子。牧馬於石人之側。見小石人頂上之石。圓淨可愛。遂負之歸。以爲漬菜壓器之用。該氏立即盡室不安。知爲石所祟。急送還而奠定之。一家復安如故。此楊君鍾嶽爲余言之。係光緒季年青岡未設治時事也。

## ▽ 嫩江縣

### 嫩江縣

鍾正云。嫩江縣。因接近嫩江得名。清墨爾根(根讀去聲)副都統駐此。故土人仍

呼爲墨爾根。後置府。民國改縣。屬龍江道。

### 古墨爾城根

趙惇儀云。古墨爾城根者。即今之嫩江縣城也。

### 烏丸國

邱可名云。考烏丸國。亦曰烏桓。係東胡別種。漢時被匈奴所滅。餘類保烏桓山。

遂以爲號。後漸繁殖。遂逼直隸山西邊外。屢侵漢塞。漢末爲曹操所破。勢遽衰。遺民窟居那河之北。自稱烏丸國。即今之黑龍江嫩江地方。按那河。即今之訥河。

### 嫩江

廣彩云。嫩江。一作沐江。蒙古稱諾尼沐漣。古名難水。源出興安嶺之伊勒呼里山南。

經龍江縣城西。流至吉林扶餘縣北三岔口（即新城子）與松花江會。江之流。可通瀛船。惟封凍較早。航行不便。

## ▽克山縣

### 克山

孫繩武云。克山爲黑龍江省新闢之一縣。原名察霍勒鎮。又名三站。原爲韃虎力游牧

之地。南街牧牛時所蓋之草房。迄今猶有遺跡可尋焉。

## 古城

孫繩武云。克山縣西三十里。有一古城。作長方形。濶里許。長里半。垣墻係土製。農人耕地。常發現古錢鍋鐵等物。詢之土人。亦不知建自何年。

## 二克山

孫繩武云。山在克山縣東六十里。兩山並峙。石質清脆。有孔如蜂窩。爲千年前火山之遺跡。山上廟宇甚多。俗傳狐仙常仙。最有靈驗。海倫縣知事辛公。曾飭人建廟焉。

## 石龍

洪孟航云。克山縣德都鎮北。有石龍焉。距鎮街二十餘里。據土人言。係石龍成精。被李老君用火煉死。余曾游歷該處。視之實屬非是。觀其形。蜿蜒雖如龍狀。以愚意忖之。乃上古時火山暴裂。流出石漿。凝聚而成。視其石。色黑如焦炭。若土人所云。誠荒謬也。

## ▽泰來縣

## 泰來縣

鍾萬有云。泰來縣舊名泰來溪。距黑龍江省城西南三百里。僻處邊陲。清末設治。

民國改縣。居民日繁。地當鴨綠江南岸。爲赴大來洮南各縣往來孔道。今者洮昂鐵路。建立車站於茲。交通便利。商業繁盛矣。

## 多耐站土城子

彭夔忱云。泰來縣東六十里之多耐站有古城一。周圍土壕三里許。東西兩門。遺跡猶存。城之西北隅。有土壕。現已坍倒無存。據鄉人傳云。城爲金兀朮時所建。台係點將台。並無寶貴古物。惟農人耕種。每得長形篆字古錢。及前清初年。置驛站於此。故命名曰多耐站土城子。光緒三十二年。創設武興廳。丈放街基。建築衙署。創辦官學未見興盛。宣統三年。改歸杜扎兩蒙旗屯墾局管轄。更名和鄉。嗣於民國三年春。經設治員張毓華呈請泰來設治。始將屯墾歸併。改武興廳爲縣佐云。

## 塔子城

邱可名云。泰來縣西北七里。有古城一座。城西半里許。有磚塔一。高約五丈餘。城內有土阜一處。前爲縣佐署。阜內時現古錢及五色石。土人每多琢爲玩器。陸離可愛。民國三年。縣佐蘇某。起土修工。得一銅印。方形缺一隅。查該處悉爲蒙人所居。據云斯城原爲金兀朮所建。現在黃綠殘瓦。仍隨處皆是也。

## 嫩江蛤螺城

段香坡云。泰來縣東南九十里許。嫩江下游。產蛤螺。多且大。因命名嫩江蛤螺城。據漁人傳云。前清光緒二十二年夏。有許姓者。山東萊州人。業漁于此。每至傍晚。見

水中放光。意爲有寶。閱數日。會同鄉人數十。用粗麻繩繫腰。手持猪鬃長杆。投入水中。行數伍。底大洞寬長十餘丈。可容百人。洞之內外。大小蛤螺麤集。至洞內果得明珠一顆。大如棋子。心猶以爲不足。復搜得小珠若干粒。將轉身外出。被無數大蛤螺包圍不令動。幾乎喪命。心怯。棄大珠。始得脫。出向衆宣言遇異。後人無敢試者。迄今漁人至此。咸焚香禱祝。否則不得漁。余曾于民二一六月間。同數友往觀。蛤螺固較他處爲多。惜未見洞。誠憾事也。

## ▽肇東縣

### 肇東

崔鳳五云。肇東。俗稱昌武城子。原歸肇州統轄。清末設肇東設治局。民國改縣。民國三年。余經其地。尙觸目榛蒿。近已開墾無餘處矣。兼之接近安達。交通甚便。將來興盛。益未可量。

## ▽景星縣

### 景星縣

鍾萬有云。景星縣。原名景姓堡。因開闢時。舊有村落中多景姓。清末改名景星

鎮。至民國設縣。古來遺跡。則非所知也。

## 濟沁河古洞

于純方云。景星鎮設治局西北百餘里。有濟沁河鎮。鎮之南端有山。山陰有古洞。橫列而三。其大者。洞口約三尺。餘則一二尺而已。其深莫測。其景幽異。洞旁有萬年青。叢生甚多。土人爲之建祠。呼之曰仙人洞。

## ▽索倫山縣

### 索岳爾吉山

周鳳林云。山在黑龍江省西南部屬之索倫。與外蒙車臣汗部毘連。相傳此山清聖祖康熙年親平準亂。曾屯兵於此山巔。故蒙人呼此山爲寶克杜敖麗。(即皇帝山之謂)山頂平坦如康衢。週圍可兩方里。有石堆大小十九處。屹然環立。惟中間高大尋丈。寬亦三丈。呼爲鄂博。蒙人習俗。每年五月六日賽馬于此山。并擲石於堆上。用示祭奠之意云。

### 遜河

崔鳳五云。遜河。舊稱遜別拉。索倫稱河曰別拉。故開關後。改遜別拉爲遜河。其流域在瓊瑋南二百里。河之北岸。設有遜河稽墾局。即疇昔棲林(索倫別稱)衙門之舊址也。

## 溫泉

周興岐云。泉在黑龍江索倫轄境之西南偏。索岳爾吉山脈之北。七十餘華里。山背地方。面積狹小。僅四五尺。水深四尺許。澄清如鏡。泉由石隙汨汨湧出。潺潺下瀉。分爲二流。春夏水度溫和。嚴冬泉處亦不結冰。泉之命名。蓋因此也。

## ▽布西縣

### 金元殘遺之邊堡

周鳳林云。布西設治局北可十餘里許。有斷續土城遺址兩行。中距半里。遙遙相對。相傳爲金時之邊堡。每距離數丈。即有形似砲台之圓堆一座。由該堡起。至嫩江西岸七家子後身。跨數道河流。延長至甘肅省。長可數千里。雖經歷年風雨浸蝕。尚殘餘土壤。

足資考證。

## ▽明水縣

### 明水

韓光烈云。明水。土名三里三。在拜泉東南六十里。原屬拜泉一小集鎮。近已設縣。

居民殷富。距安達車站最近。故交通甚便。

## ▽呼蘭縣

### 呼蘭

崔鳳五云。呼蘭。因呼蘭河得名。清設呼蘭府。民國改縣。爲江省東方咽喉。

### 五國城

趙惇慄云。宋徽欽二宗被羈處。曰五國城。爲金之故城。其遺址在今呼蘭縣南。

### 石人城子

張鏡如云。呼蘭縣東北九十里許。有村曰石人城子。該村居民。率皆業農。

村之中街。爲由呼綏海望各地入哈糧車之孔道。道之西邊。有石人一。長約三尺許。村因以名焉。至該石人之由來。則已無人能道之矣。

朱席珍云。距呼蘭縣城東北九十里。有石人鎮。俗呼石人城子。居民百餘戶。商店數家。呼蘭稅捐分卡在其地。所謂石人城者。城爲土築。廣可十餘畝。村人結廬而居。今則已僅存形跡而已。城內原有石人二。東西分立。並有石羊石猴。均埋沒無存。惟二石人時相作祟。村人患之。於是羣議將石人之顛。盡行斫下。移置縣城西崗公園中。其恠始絕。據野老相談。此城原爲金兀朮之故趾。一云



係古代遺塚。據形勢調查。當以後說爲確。姑誌之以待參考。

## 呼蘭河

韓光烈云。呼蘭河。自東北興安嶺南支發源。而西南委曲入松花江。繞呼蘭縣全境。經呼蘭縣南郭。爲呼蘭夏日赴哈爾濱必經之水路。民國三四年。官備小火輪。由哈埠。直駛望牽之黃堆子。惟近年水瘦。中流往往擱淺。上游久不通航。僅夏雨泛漲。飄船往來無阻耳。

## 松北鎮

張鏡如云。松北鎮。(即馬船口)昔爲遼金地。距黑龍江省城東南六百里。僻處邊陲。人烟稀少。民國改元以來。居戶日繁。然率皆以打魚駕船爲業。地當松花江北岸。爲吉江兩省進出口貨物會集之所。大江封凍而後。呼綏海拜各地糧車。運往哈埠。以此爲交通孔道。今者呼海鐵路起點於茲。將來商舖林立。市井繁盛。正方興未有艾也。

## 關帝廟

邱可名云。呼蘭關帝廟。考其碑。係建於清乾隆初年。始在良方。繼移異地。同治丙寅。有匪首馬傻子。率夥犯境。逾松花江。見前面有千軍萬馬。賊遂退。迨光緒辛亥。費萬金。率衆搗蘇城。直撲呼蘭。城守尉成公。逆擊於羅家窩堡。賊彈藥車無故自焚。遂潰散。因之御賜神功普佑匾額一方。懸於廟內。至光緒二十五年。經誥授振武將軍副都統額克全奏重修。

## 團山子古井

朱席珍云。去呼蘭縣西北二十里團山子村。村前石山。高可數里。廣十數里。山巔有古井一眼。深不見底。旁有石柱。拴一鐵練。繫入井中。有好事者戲將鐵練抽出井外。至堆積盈尺。井內隱隱有聲。既而如萬馬奔騰。水亦隨之湧出。大懼。將練急推入井。始寂然無聲。水亦尋落。據鄉耆言。此井內是大禹囚嫫水族。然當時九州之功。並未治及塞外。且不載之史乘。姑誌之以待考古家之研究焉。

## 綏化縣

### 綏化

韓光烈云。綏化俗稱北團林子。據鄉老云。城南廿餘里。舊有南團林子。中間又有腰團林子。此在迤北。故呼之爲北團林子。昔爲府治。民國改縣。近皆阡陌縱橫。闌闌櫛比。所有林木。因且且而伐之。已如牛山之濯濯。而北團林子之名。猶多襲而用之也。

### 古城及古碾

韓光烈云。綏化縣境。唐屬扶餘國。金改蒲輿路。明設福餘衛。當時居民。難以游牧爲生。但城鎮縣村。所在皆是。城之南北。古瓦古甃。不時發見。城東南西南。各

約十數里。均有古城基址。據鄉老云。開荒時。均土股隆起。宛然可辨。惟耕種年久。遺跡不可復尋。但古器爲犁頭衝出者。且比比焉。北河（通肯河）兩岸。古代碾磨。從地掘出者。屢見不尠。但徒有碾盤。而無碾砣。其形均係中凹外凸。爲舂米之用。與今日之碾形。迥不侔矣。

## 四方台

鍾正云。綏化城北。努敏。通肯。二河交會處。有一方形土崖。周半里許。高出地面。登台上。縱目遐觀。一望無際。台上面窟穴甚多。俯視之。深不可測。惟於較淺者探試之。率皆腐朽之糧。鄉老相談。此係古代用兵時糧台及瞭望之所。但年代不可考。故僅稱之曰四方台。

## 半截塔

黃承麟云。永安鎮。俗呼十間房。在綏化縣迤西六十里。鎮北約四里有半截塔屯。緣屯西南角。有古塔一座。傳係唐人所造。按唐將薛仁貴征東。曾駐兵扶餘王城。（在奉天昌圖界）唐人足跡。已遍歷扶餘全國。史稱黑龍江以西。松花江以北。濛江以東。皆扶餘國轄境。綏化在松花江北岸。此塔謂爲唐人建築者殆不誣也。但歷年既久。被風雨摧殘。七級浮屠。折而爲半。古甃盈尺。剝蝕不完。建築年代不可考。開荒闢草。遂以名村云。

## 古房身

湯永泉云。古房身在綏化双河鎮西十里許之野甸中。有謂係古城基。或云古廟宇。

數年前有李姓幼女(山東人)採菜挖出石鴨一隻。夜間。鴨腿放光。知爲金質。遂葬下。携市而沽矣。今其地古甗甚多。土石間雜。不便耕種。故一片沃土。曠等石田。惜年久湮滅。末山考其爲城爲廟耳。但因甗互俱在。故土人稱之曰古房身。

### ▽海倫縣

**海倫** 崔鳳五云。海倫俗名通肯。清初一片荒涼。光緒末年。設局招墾。按井(六華里方爲井)放荒。近已成綏蘭道屬極北富區。清置府。今改縣矣。

### ▽巴彥縣

**巴彥** 韓日中云。巴彥。昔稱巴彥蘇蘇。簡稱巴彥蘇。爲黑龍江東方開化最早之縣。在松花江北岸。距江三十五里。清爲巴彥州。隸呼蘭府。民國改爲一等縣。文風爲江省冠。

**龍王廟子古城** 韓伯炎云。龍王廟子。在巴彥西北。廟前有古城一座。尙隱約可辨。據

土人云。三十年前。有魏姓在古城基內。蓋房一所。及落成遷。晨醒。一家數口。均昇至城外。來朝又如此。不得已。拆屋他徙。乃相安無事。古城左近。古錢最多。錢之輪廓。大如盂口。均元明故物。廟左朱提（朱提二字音殊時爲四川山名產紋銀此蓋借用但俗讀豬蹄）河。左右岸。兒童剝菜。俯拾古錢。往往盈筐。某年夜靜。村人聞空中錚鏗有聲。一道金光。直撲東地。村媪以爲錢龍搬家。天明尋之。見地上細孔甚多。掘地極深。毫無所得。河稱朱提。蓋以此歟。

巴彥城北。古代遺器。不時發現。此地唐爲扶餘國界。金改蒲輿路。明稱福餘衛。巴彥江南（松花江）即阿城縣。阿城爲金之舊都。（白城）巴彥與阿城僅一江之隔。韓君文成。居此有年。述之最詳。其家中。存古銅大錢數枚。即係由古城東朱提河沿岸所掘得者。

## ▽慶城縣

### 慶城

韓光烈云。慶城縣未設治前。係大戶于清家所居。遂以于清名屯。嗣立縣。併于清二字轉音。改稱餘慶。民國成立。因與貴州黔中道餘慶縣同名。故改爲慶城。

## ▽蘭西縣

### 蘭西

韓光烈云。蘭西。土名雙廟子。因開闢時。舊有雙廟得名。初屬呼蘭。後設縣。縣境東至呼蘭河。與呼蘭縣分界。故稱之曰蘭西。

### 鋤刀城

石補天云。鋤刀城。在蘭西縣南七十里。縱橫各二里。礮台甕門。遺跡猶存。因土人掘得古鋤刀一口。故名。

### 女兒城

石補天云。蘭西縣東北六十五里。有女兒城在焉。古名鈕勒城。又名奴兒子城。今訛爲女兒城。周圍五里餘。以土爲垣。一門在東南隅。南向中有佛殿。建設時期不可考。惟土牆尙存。厚磚潤瓦。狼籍滿目。同治朝呼蘭人王小布耕於其地。掘得羅漢銅像十八尊。高各三尺餘。毀而鬻之。其後漢姓復得銅像七。高各二尺。中有觀音大士像一尊。後歸湖北曹君廷杰云。

### 郝城子

石補天云。郝城子有古城。在蘭西縣東七十里。今所謂郝城子屯。縱橫各三百六十丈。外有護城濠。建自何代不可考。每遇陰雨或黎明時。隣屯之民。常見其地有城郭屋宇之象。

清光緒二十四年。土人掘地。獲印一方。其紐爲二獅。背面鐫有真金二十四兩六字。土人不知寶貴。旋鬻之。

## 後山灣古城

石補天云。後山灣古城。在蘭西縣東南馬鞍山之陰後山灣子屯。東南各一里半。城基高丈餘。寬半之。四面甕門。餘蹟均存。外環深壕。自北面起。蜿蜒而西而南。折而東北。抱城一週。俗名護城河。城內殘磚餘瓦。質厚而堅。車馬往來。非經由四甕門不得達。土人掘得古瓷一二。封固甚密。至今猶保藏之。

## 總領古印

石補天云。宣統元年。呼蘭縣西北警察第二區鄉民。鋤地得銅印一方。寬三寸。厚八分。其篆文曰總領之印。背面刻總領印三字。朝代無可考。該印送存于黑龍江省藏書樓。

## 木蘭縣

### 木蘭

韓光烈云。木蘭。南臨松江。北接青山。(興安嶺)或云滿語哨鹿爲木蘭。此地多鹿。

獵人行圍。故名。或曰。青山林木蒼蔚。爲呼蘭河源。故稱木蘭。按前說近是。縣北有木蘭東興各

巨鎮。五行俱備。水陸交通。清屬呼蘭府。今隸綏蘭道。

▽龍鎮縣

龍鎮仙鶴

韓光烈云 龍鎮縣。即龍門鎮。在興安嶺山南麓。每年降霜太早。秋收恒感無望。惟此地盛產仙鶴。灰白各色。無不畢具。砂頂霜翎。古雅可愛。江省各縣公園。羅致以供玩賞者。爲數頗不尠。

▽湯原縣

鶴岡

韓光烈云。鶴岡。在湯源縣北。相傳昔爲鶴棲之所。今日黃鶴已杳。而土崗儼然。附近產煤最旺。有鶴崗煤局在焉。

△通河縣

通河

鍾正云。通河。在綏蘭道東南二百里許。前臨松花江。後背興安嶺。產木材最盛。清



置大通縣。屬吉林伊蘭府。後以在松花江北岸。改屬綏化府。民國重編縣。因與甘肅西寧道大通縣雷同。故改今名。屬綏蘭道。

## ▽通北縣

### 通北

崔鳳五云。通北設縣。在民國初年。考該縣初爲通肯(海倫舊稱)轄境。設治時遂以通北命名。但地近青山。(興安嶺土名)胡匪出沒無常。故近年來。編氓多數他徙。以致墾熟之地。半成荒廢之區。至縣城左近。山深林蔚。古木參天。古時此地大半皆索倫民族。從事游牧生涯。今幸榛莽初闢。又遭羣盜蹂躪。而其河流。婦女飲之。尤不相宜。惟備機器井。卻無妨害。

## ▽綏楞縣

### 綏楞

韓光烈云。綏楞。土名上集廠。對下集廠(即雙河鎮)而言也。爲綏化。海倫。慶城。鐵嶺各縣鄰縣。清屬綏化府。一小集鎮耳。民國初年。設縣佐。旋改縣矣。

## 蛤蜊城

韓伯豔云。蛤蜊城。在綏楞縣東北。迷迷河上游。據土人云。昔年數鄉者。近河工作。夜黑人靜。見河下萬點燈火。閃爍奪目。恍如城鎮。四門洞開。蝦兵蟹將。出入森然。數老人。昨舌縮頸。相顧驚奇。候天明。就面視之。兩岸蛤壳。堆移如山。乃知爲蛤蜊作怪。遠近相傳。遂以蛤蜊城呼之。尤異者。每當陰雨。人抵河畔。必迷途徑。故以迷迷名河焉。(按俗呼迷迷河正稱努敏河)

## 鐵驪縣

鐵驪 韓光烈云。鐵驪縣。舊名鐵山包。清末設治。近已改縣。按鐵山包之原稱。以環城皆山。而山又爲大青山(即興安嶺)脈。山中煤苗甚佳。山石之色。有如黑鐵。故名。

## 愛琿縣

## 愛琿

崔鳳五云。愛琿亦作愛琿。愛琿。艾琿。其城又稱黑龍江城。蓋因黑龍江省城。始設

於此。地在黑龍江右岸。係就薩哈連烏拉河屯改建。爲清聖祖康熙所築。咸豐八年。與俄訂璦琿條約。俄侵滿洲。此其肇端。光緒三十二年。中日協約。勘定城北。闢爲商埠。因不甚興隆。迄未實行。

### 古璦琿城

崔鳳五云。古愛愛城。在黑龍江左。精奇里江南岸。即現在璦琿縣城北六十里之黑河北岸。俄人搜我之海蘭泡是也。諺云「先有璦琿城。後有黑龍江」蓋指此耳。

邱可名云。古璦琿城。在黑龍江北岸。海蘭泡及精奇里江之濱。按海蘭泡。清咸豐間割讓於俄。易名爲布拉果維什臣斯克。精奇里江。發源於外興安嶺。南流入黑龍江。今屬俄國之阿穆爾省也。

### 棲林衙門

崔鳳五云。距璦琿南二百里。有棲林(索倫別稱)衙門(亦稱畢拉爾衙門)在焉。凡棲林人。散處於興安嶺之間者。皆在此衙門統治權下。民國五年。經朱子樵將軍。委專員金鼎三。設立遜河稽墾局。乃藉棲林衙門。重新翻蓋。厥後移至西偏。改作民房矣。

編者按索倫山設治以後所謂棲林衙門者當屬索倫轄境不在璦琿惟崔君既以璦琿揭櫫故編列於此

### 普樂鎮

崔鳳五云。普樂鎮。俗名普樂口子。亦作蒲拉口子。又作潑刺口子。在璦琿縣佐所駐之奇克特西南五十里。爲遜河稽墾局轄境。四面環山。如楚之方城。內有二百年前住戶六七家。

皆棲林(索倫)人。惜只知游牧。不事耕耨。負郭之田。資餬口已足。家畜馬牛。各百餘頭。入山棲息林中。恒終歲不出。(棲林之稱蓋以此歟)獵取禽獸。聊以果腹。冰天雪地。不以爲苦。其耐勞之風。令人驚歎。(泰西近有結隊野宿野食者以爲復古未免矯飾)不佞嘗云。與棲林人交。曷嘗與古人遊。故誌之。以俟夫觀人風者。

## 六十四屯

崔鳳五云。六十四屯。在黑龍左岸。蓋我國古時。屯兵之所也。昔爲環璦最富饒之區。俄帝制時。竟攫爲己有。是役也。我同胞被逐。死於黑水者。不計其數。至今思之。洵令人悽愴不已。

## 十里長江

崔鳳五云。環璦多山水。而十里長江最勝。源出古之斡難河。即今黑龍江之中流也。黑龍江。發源於蒙古車臣汗部肯特山。委蛇自西北來。經東南流。會松花。混同。直達烏蘇里江而入海。其間水勢颯爽。不可名狀。獨至環璦上下。其直如矢。故有十里長江之目。彼風饑者流。因此地於勝清時。先後出將軍十二。遂謂斯水之靈秀所鍾云。

## 魁星樓

崔鳳五云。環璦舊城。當拳匪肇釁。俄人一炬。悉成焦土。燼餘所存。僅城東南

隅魁星樓而已。今與十字街心八角樓。遙遙對峙。人登其上。遠矚高瞻。必悠焉而動滄桑之感。

## 八角樓

崔鳳五云。瓊瑣城內。十字街心。有八角樓。亦稱八卦樓。爲拳匪亂後建築物。

樓凡三層。每層有走臺回欄。高約十數丈。登臨遠眺。全城在抱。十里長江。一覽無遺。上有匾額甚多。惜余離樓日久。皆已忘記。

## 御賜善將軍祭文

郭德浩云。偉望聿昭。寄閭重干城之選。壯猷丕著。奮動增鐘鼎

之光。謳思不絕於行間。追念彌殷於事後。爾原任福州將軍。善慶。素嫻武略。熟習戎機。率勁旅以馳驅。志存勦定。慰深宮之兢業。治奏救平。熊羆旣張。鯨鯢盡剪。茲值禮成歸政。典尙酬庸。慈幃重念乎殊勳。溫綽特頒乎異數。懋嘉靈粹。用賚椒馨。於戲。險賊衝鋒。猶想見前矛敵愾。几筵衝奠。最難忘大樹聲威。惟靈鑒茲。尙其克歆。

按善慶。字厚齋。漢軍。張姓。原籍福建。其先人於康熙年間。由寧古塔。徙黑龍江。編入正紅旗。於咸同年間。從征直魯皖豫荆楚捻匪。身經數百戰。鱗傷徧體。由前鋒積功至杭州綏遠寧夏福州等省將軍。京旗都統。會辦海軍事宜。光緒十四年四月卒。諡勤敏。

## 善將軍墓

郭德浩云。距環輝縣城西南十餘里許。有善將軍墓在焉。清德宗御賜碑文曰。朕惟戰功日多。將士所以敵王愾。美行有諡。國家所以答臣忠。古者恒勒諸和鐘。今茲宜銘之直石。爾原任福州將軍善慶。性情果毅。韜略優長。當潢池弄兵之時。奮袍澤同仇之志。猛將起於卒伍。早收指臂之功。武夫用作干城。洊荷腹心之寄。蓋自橫戈疊決。迄於專閫。宣力積四十年。臨陣凡千餘次。解甲胄而創痕尙在。望旌旗而槍戟咸知。是以疊予褒嘉。深隆眷異。錫之勇號。寵以翎銜。東南則吳越賴其拊循。西北則關隴資其控制。出爲邦翰。張都護之牙麾。入贊戎機。領飲飛之羽衛。衝功論賞。贈官遠及其高曾。奏劄策勳。龔職更推於孫子。比者眷言兩服。慎簡邊材。以濱海之遐陬。宜中興之宿將。俾持虎節。往鎮閩疆。方期橫海威名。永作長城保障。忽遺章之上告。實軫惜之彌深。念彼盡勞。諡之勤敏。於戲。名垂宇宙。庶幾長播乎徽猷。氣作山河。或冀再生夫英傑。欽承異命。式樹豐碑。

## 富將軍墓

郭德浩云。富將軍墓。在環輝縣城西七八里許。有清穆宗御賜碑文曰。朕維干城宿望。武臣胥心腹之資。鐘鼎殊勳。統帥實爪牙之寄。故偉烈長留乎信史。斯隆恩宜沛於重泉。

丹旄銜哀。率隄紀實。爾原任吉林將軍富明阿。懷才果毅。秉志忠貞。從軍叙得級之勞。策士副屯田之任。始克突騎。繼典戎行。旋總師旌。出防豫省。扼江南之要隘。恢皖北之名城。草木知名。旌旗變色。響弧而調八陣。運用在心。環甲而冠三軍。創夷徧體。雖臣艱克念。暫許歸休。而時勢方殷。特加徵召。督禁垣之虎旅。防江介之鯨濤。攻克丹陽。救平白下。韓滉爲江淮保障。故甫遷荆渚。而旋改吳中。□□具文武才猷。故命攝漕司。而仍兼戎事。事實延於世功最日多。過征而特許眉輿。詢疾而頒頒手詔。乃吉林潛藏夫醜藪。俾上將重蒞夫戎旂。乘暇日而繕城隍。有備無患。耀軍容而修矛戟。不怒而威。賴茲安內攘外之功。成長治久安之業。迨上章而乞退。仍賜祿以酬庸。何期遺奏之忽來。頓覺老成之凋謝。大小三百戰敵愾同仇。前後五十年公忠體國。核其品誼。洵爲任事之臣。諡以威勤。不愧易名之典。於戲。柱留華表。螭文爭日月之輝。豢象祁連。馬鬣壯風雲之氣。永垂不朽。○○○○。按富公。字治安。漢軍袁氏。明兵部尚書。督師袁崇煥。六世孫也。原籍廣東。東莞縣。崇煥孫。爾漢。山寧古塔。徙黑龍江。(即瑗瑗縣)編入正白旗。遂爲黑龍江人。富明阿。少孤。事母孝。性沈勇。膽識絕人。通文學。於咸同年間。征捻匪。轉戰豫皖江蘇。江寧。

委克名城。身受十二創。積功至江寧將軍。署漕運總督。吉林將軍。在吉林任內。奏設督學使者院以試士。整飭吏治。自是士習丕變。政事修明。至今吉省文風蔚起。人材輩出。論者歸功於富公云。光緒八年卒諡威勤。

▽呼瑪縣

古站

韓廣彩云。古站在黑龍江上游。即今之呼瑪縣也。因係古時驛站得名。元太祖鐵木真遠征歐土。曾繞道於此。黑龍江下游之觀音山。爲元祖駐蹕處。此站蓋亦元祖征歐時所設耳。

△蘿北縣

蘿北

韓光烈云。蘿北。在興安嶺南麓。松花黑龍兩江夾箇中。清末曾設興東道。旋改縣。出木材。產木耳。北距太平溝金廠。僅百里之遙。亦富區也。

觀音山

崔鳳五云。蘿北西北。黑龍江西岸。興安嶺南麓。有觀音山焉。爲太平溝金廠入



口處。山上有觀音廟。故名。據傳者云。此廟舊址。爲元祖掃北時駐蹕處。嗣因築廟。上有碑碣。惜年久剝蝕。不可辨認。

## ▽呼倫縣

### 呼倫

邱可名云。呼倫。原以呼倫湖得名。清置廳。尋改府。民國改縣。成吉思汗初起時。

與諸部角逐於此。境內水草豐茂。可爲天然牧場。

呼倫湖。即呼倫池。又名達賴泊。在黑龍江臚濱縣之南。喀魯倫河所瀦也。

喀魯倫河。一作臚胸河。又名龍居河。發源於外蒙古車臣汗部。大特肯山之東南。流入黑龍江。瀦入呼倫池。又北出爲額爾古納河。入於黑龍江。

額爾古納河。源出外蒙車臣汗之肯特山。爲克魯倫河。(即喀魯倫)東流瀦于呼倫池。又東北流爲額爾古納河。至黑龍江漠河金廠之西。與黑龍江會合。南岸屬中國。北岸屬俄國。

臚胸河。即克魯倫河。五代遼時以此爲界。明永樂間。本雅失里。爲瓦剌所襲。徙居臚胸河。八

年親祉。止河旁。賜名飲馬河。

白蔭樵云。呼倫貝爾。今設縣治曰呼倫。即俗所謂海拉爾也。

張鎮如云。清時之呼倫貝爾副都統城。即今之呼倫縣城。城以呼倫湖得名。境內水草豐美。爲天然之牧場。成吉思汗初起時。常與諸部角逐於此。

高恩溥云。呼倫舊曰呼倫貝爾。以境內呼倫貝爾二池得名。又名海拉爾。因瀕於海拉爾支流伊敏河之西岸。境內水草豐美。誠爲天然牧場。成吉思汗初起時。常與諸部族角逐。此間所屬多額魯特及巴兒忽兩部人。清代名將海蘭察。(乾隆時人)即城之額魯特人。貝爾池北有壽寧寺。俗稱趕集廟。規模宏大。結構莊嚴。孤立沙漠中。風景殊佳。每歲八月。南自張家口。西自恰克圖。數千里內之蒙人。皆來禮佛。因而互市。列帳百里。貿易甚盛。

韓光烈云。呼倫貝爾。因有二池。一曰呼倫。一曰貝爾。故名。元太祖成吉思汗。嘗與諸部角逐於此。清設直隸廳。尋改府。今改呼倫臚濱二縣。呼倫以北。海拉爾境內。水草豐美。乃爲天然之牧場。故產馬極盛。每當春秋兩季。販馬者絡繹於途。

## 飲馬河

文一云。呼倫縣西南四百餘里。呼倫湖之南。有一河。即古之臚胸河。今之克魯倫河也。元裔本雅失里。殺明使郭驥。永樂八年。明成祖初次出塞親征。至臚胸河。飲馬于此。故更名曰飲馬河。成祖擊敗元裔。乃命劉才築城于飲馬河之旁。惜戩年久失修。今則雖廢址亦無可考矣。于純方云。呼倫縣西北七十里。有飲馬河。又名臚胸河。即今克魯倫河也。元太祖九世孫。名本雅什里者。殺明使郭驥。永樂六年。成祖以邱福爲征虜大將軍。率十萬雄師。戰於臚胸河畔。全軍盡覆。越明年。成祖出塞親征。至臚胸河。在該河飲馬。本雅什里聞嘶西遁。成祖渡河追擊。敗於斡難河岸。遂更臚胸河爲飲馬河云。

## 呼倫地穴

于純方云。呼倫縣西界。與車臣汗接壤處。有額爾得尼山。(譯言爲寶地山)山不甚高。下臨克魯倫大河。有輻輳獨尊之勢。元太祖曾起兵於此。故稱爲寶地之山。旁有地穴。深不可測。昔人以二十里長繩繫重鐵探之。終不得其底。穴口有旋風。日夜不息。或不及防。有被旋入穴者。(見臚之鑰出塞錄)

## 練兵場

于純方云。清嘉勇公海蘭察。以抄馬奴。奮志從戎。功名顯赫。相傳呼倫湖(在

呼倫縣西北) 東南岸。古城以東。爲其教練馬隊之處。

## 海公樓

于純方云。呼倫縣大街道西。有海公樓。相傳清嘉勇公海蘭察微時。爲呼倫公來號牧馬。奮志從戎。公來主人朱某器之。以健馬贈公。壯其行色。公既賞顯。受封爵。歸呼倫。感脫驂恩義。爲建重樓以謝之。公來號今已改爲公源慶。其樓巍然猶存。余戍防呼倫時。曾親見之。土人歸其事。呼之曰海公樓。

## △ 臚濱縣

### 臚濱縣城舊址

白蔭樵云。滿洲里站。位於中東路尾閘。其縣治曰臚濱。俗謂滿洲里。即臚濱縣城。不知其舊址實在滿站南廿里。緣前清末年。俄人設站於滿洲里商業逐漸繁盛。縣署因以移焉。

### 臚濱石

周興坡云。臚濱石。產于黑龍江所屬臚濱縣北山中。(即滿洲里) 以其質極細膩。故採作粧飾品。

## ▽室 韋 縣

### 鐵木哥幹赤斤古城

于純方云。根河北岸（在室韋縣西）有鐵木哥氏。幹赤斤之故

城。相傳元太祖四弟。幹赤斤。好土木。喜建宮室。封地最廣。呼倫湖以東。及嫩江東西。皆其封域。故各處古城。如根河五城。塔子城。達呼城。半拉城。元興鄒城等。亦最多。惟幹赤斤城。最爲壯麗。分爲內外二城。內城周四里。外城周八里。城各四門。角各有壘。北門靠土山。高約三百尺。東門傍枯井。深十數丈。西門裡有大土圍。中築方臺一座。內城中設工字壇。上置石鼓二枚。左右復有平台各一。琉璃瓦片。雜於草萊間。視之金碧交輝。燦爛滿目。殘磚寬大。殿址依稀。曩有三尺餘之鴟吻。委置其間。惜數年前。爲俄人移去矣。或謂札木合曾稱帝於根河之西。疑爲札木合所築。非也。朱履中有詩以記其事云。邊地城垣土擊環。根河獨有一磚關。輝煌金碧琉璃影。零落荊榛草莽間。

文一云。黑龍江室韋縣南百里之程。根河北岸。特勒布爾河南岸。有一廢城焉。名曰鐵木哥幹赤斤

故城。考是城爲元太祖第四弟鐵木哥斡赤斤所建。故名。城高二丈。寬八尺。分內外二城。內城周四里。外城周八里。城各四門。外城四角有砲臺遺跡。北門靠一土山。東門裡有枯井一。深數丈。西門裡有一土圍。中築方台。內城中央有一工字方台。高五尺餘。上有石鼓二。左右圓形平台各一。高二尺。台下東北隅。殿址尙依稀可辨。琉璃瓦片。雜叢草間。視之金碧滿目。惜哉此城居國土之邊。地荒人稀。聞見不及。今夏余道經是地。見廢址而疑之。詢問土人。考諸元史。乃得其詳。

## 郭爾羅斯沿革

何逸庵云。郭爾羅斯。在唐爲契丹地。遼置秦州昌德軍。屬上京道。金因之。大定間廢。承安二年。移州於長春縣。以故地爲金安縣隸之。元爲遼王納顏分地。明爲科爾沁所據。後分與其弟。是爲郭爾羅斯也。迨清天聰七年。其台吉古木布木巴等。隨土謝圖汗奧巴舉部降清後。編爲前後二旗。前旗即今之長農德嶺四縣地。後旗即今之肇州肇東二縣是也。

## 塔虎城

何逸庵云。郭爾羅斯前旗王府北二百餘里。據嫩江西岸。有土城一座。俗呼塔虎城。週圍約九里許。四外有深壕。農人耕地於其城內。會耕出古銅錢甚夥。俱有崇寧字樣。由是觀之。實遼金時代之秦州城遺跡也。

## 成吉思汗之陵

何逸庵云。成吉思汗之陵。在西蒙伊克昭盟達拉貝子旗。有祭丁五百戶。及祭農等官。掌四時祭祀之事。有一高大蒙古包。中置汗之遺骸在銀棺內。蒙人多來此瞻禮膜拜焉。

## 成吉思汗站

韓光彩云。站在昂昂溪西北百餘里。爲中東車必經之處。考成吉思汗。即元太祖曠木真。世爲蒙古部長。屬於遼金。及父也速該。展其雄略。平定諸部。即位於斡難河上。

號成吉思汗。征西遼。滅西夏。奄有歐亞二洲。後攻金。卒於道。此站即爲其攻金時駐蹕之所。故後人以成吉思汗名之。

## 興安嶺

崔鳳五云。興安嶺。有內外之分。外興安嶺在黑龍江左。爲金山東脈。屬俄領。內興安嶺。綿亘黑龍江右岸。乃陰山東脈也。

嶺東屬黑河道區。近嶺之麓。有呼瑪。瑯璁。蘿北。烏雲。等縣。暨奇乾河。漠河。黑河。奇克特。各金廠與鉅鎮。嶺西。在東南一帶。屬綏蘭道區。近嶺麓者。有龍鎮。通北。鐵驪。綏楞。慶城。巴彥。木蘭。通河。湯源。各縣。西北麓。屬龍江道區。近接克山。訥河。嫩江。寧安。等縣。嶺路有二。一龍奇官道。由龍鎮縣至奇克特。長凡二百餘里。係民國四年修成。一由嫩江直達瑯璁。爲舊已勘定之濱黑路綫。清季美人某。旅行經此會載日記。有云「登興安嶺。猶見太古遺風」見東方雜誌蓋紀實也。

鄙人於民國四年隨金公鼎三。驗收龍奇官道工程時。曾一度往還。嶺東居民。多滿洲索倫族。向以游牧爲業。穿山越嶺。隨遇而安。霍爾莫勒津。(俗呼紅毛鷄)畢拉爾。車陸。蒲拉口。等處。生活



程度。尤爲簡陋。

### 疊翠巖

何逸庵云。疊翠巖。在郭爾羅斯王府東北三十餘里之松花江西岸。巖崖高峻。土石層累。約十餘丈。巖底即松江之深流。往來帆船如織。在巖下與船內仰首上視。頗爲美觀。

### 野馬溪峰

何逸庵云。野馬溪峯。在郭爾羅斯前旗王府北卅餘里。雙峯聳峙。宛如角立。每年祭祀日。蒙人有賽馬角力之會。頗爲壯觀。

### 貝加爾湖

張鏡如云。貝加爾湖。昔爲北海地。西漢蘇武出使匈奴。不虧臣節。匈奴使牧羊於此以辱之。現地爲強俄所據矣。